

ASO TOFI, 19 IUNI 2014

Na nofoia le Nofoa e le Fofoga Fetalai i le itula e 9.00 i le taeao.

Tatalo.

FOFOGA FETALAI: I le agaga faaaloalo i lenei taeao fou, ou te ofo alofa ma ou faatalofa atu i tulaga aloaia i le paia maualuga o lo tatou Maota - malo le soifua manuia. E talitonu le faamoemoe o lea ua vaavaai atu ma outou silasila mai, ua tatou toe fesilafai i nuu potopoto ma ua tatou fesilafai i fesilafaiga a tupu ma tamalii o lo tatou atunuu i lenei taeao fou. E le faaitiitia ai lo tatou agaga faafetai i le Atua ona o lo o taumua ma taumuli i lo tatou Sa, o Ia lava o le foe mua i mea uma e pei ona i ai lenei taeao atofa ma le taeao na faalagi e faaauau ai a tatou galuega. E momoli atu ai le agaga faafetai i le paia ma le mamalu maualuga o lo tatou Maota, ua malo lava le onosai mai, ua faafetai foi le usufono. Sa tatou taumavae i le po anapo ma le agaga ma le faamoemoe o le a tatou alafai i faguga lelei i lenei taeao. O lea ua tatou vaai i ataata o Taulelei ma ua Taumaillelei le Igoaipu i lenei taeao, ia sula ailao le Atua i mea ua maua.

O le a tatou alo i a tatou galuega aua e talitonu le faamoemoe, o le aso lenei e tataua ona faataunuu ai le tele o le Tala o le Tupe. Ua faasolo ina uma tuleiga ma saunoaga, ae ua toe o lea Itu o le Maota i lau Afioga i le Taitai o le Itu Agai ae faapea foi sui usufono aloaia o lo o totoe, ia alo i outou faivamanaia i lenei aso ina ia vave ona faataunuu a tatou polokalame i galuega faale-Malo, ona tatou see atu foi lea i galuega a le Palemene e pei ona fuafuaina.

I lenei aso, tau ia ina ou piia ma ou faapai atu i le paia ma le mamalu o lo tatou Maota, o lo o i ina le uta a le faimea. O a tatou galuega o le ato e fevailiai, tatou te fefaasoai i tulaga i tuleiga ma saunoaga ina ia sagatonu lau o le fo aua lo tatou faamoemoe ma le tatou Fonotaga.

E faapena foi ona faapai atu i le tapuaiga a lo tatou atunuu, ua faamalo le galulue ua faamalo le onosai. Samoa, alo i outou faivamanaia i lenei aso ma outou tapuai mai a o le a alo le Palemene i ana galuega.

Le paia ma le mamalu i Faauluuluga o Matagaluega; good morning.

TULAFONO TAU FAAOFI O LE FAATATAUINA O TUPE FAAOPOPO (NU.2) 2013/2014 MA LE TULAFONO TAU FAAOFI O LE FAATATAUINA O TUPE 2014/2015 – felafolafoaiga faaauau i luga o le faitauga faalua

FOFOGA FETALAI: E tolopo Galuega a le Fono Aoao i le aso fono ananafi o lo o saunoa le sui usufono mo Aleipata Itupa i Lalo. Ou te tapa lau Afioga i le Tuiatua Faanofonofu, tulai mai e faai mai le saunoaga ona lafo ai loa lea o le avanoa i lea Itu o le Maota.

Afioga TAFUA MALUELUE TAFUA (Aleipata Itupa i Lalo): Faafetai i lau Afioga i le Fofoga Fetalai. E faatalofa atu i le paia o le Maota aemaise lau Afioga i le Fofoga Fetalai, Afioga i le Palemia ma le Kapeneta, le Sui Palemia, le mamalu i sui usufono, Minisita Lagolago faapea foi le Taitai o le Itu Agai ma sui usufono mamalu o lo o agaia le Malo. E faatalofa atu foi i Faauluuluga o Matagaluega ma i latou o lo o faatasi ai i le Maota Fono aemaise le Failautusi ma le mamalu i le Aufai Nusipepa faapea foi ma le au Faaliliupu, ae e le faagaloina ai le tapuaiga a Samoa.

Ua maea ona e sulu lapalapa o Malo, tatou te au faatasi ai e pei o lea; malo le maleifua mai malo le soifua laulelei i le paia ma le mamalu o le Maota nei. E faafetai foi i le tapuaiga a lou itumalo. O lea ou te faalogo atu ua e saunua mai e faauma atu le lauga, ae na o le 5 minute o lau lauga anapo ae osofaia au e le Palemia ma le Minisita mo Faatoaga ma Faigafaiva. E i ai lava le au matau ae i ai foi le au faitau, ae alofa lau Afioga i le Fofoga Fetalai tuu mai sina avanoa se i tau faamaea atu ai nai vaega laiti ia.

Susuga Hon Tuilaepa Fatialofa Lupesoliai Aiono Neioti Sailele Malielegaoi (Palemia): Lau Afioga i le Fofoga Fetalai.....

FOFOGA FETALAI: Ia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E le o sao le saunoaga a lau Minisita Lagolago, e le i osofaia lana saunoaga ae sa tulai atu e fesoasoani atili e faapupula mataupu ia sa ia laga. O lona uiga ua atili ai ona faamapue lana lauga. Ou te masalo a toe manatunatu lelei i ai, aveese le mea lea o le televave o le ita. A amata loa ona e toe foi mai i le lua o au Paeaiga, ona amata loa lea ona e malamalama i le mea lea ou te fai atu ai.

FOFOGA FETALAI: Ia, aua e te popole i le 5 minute e pei ona ou fai atu muamua. E tutusa lava le 5 minute ma le 50 minute, ae taatia mai pea aua na ona ou faapena atu ae na o se faamanatu, a o lo o i ina pea le uta a le faimea ina ia agai ai le saunoaga i mea tonu e tataua ona i ai, ae taatia mai Tafua.

Afioga TAFUA MALUELUE TAFUA: Faafetai lava i lau Afioga i le Fofoga Fetalai o lo o faasoasoina i latou e saunua i lea taimi ma lea taimi. A o le a faamaea atu se faamatalaga puupuu lea i le vaega o faatoaga.

O lo o manaomia lava se tatou incubator, o se mea e faamafanafana ai moa ma tuu ai fuamo, tulou. O le faamatalaga lea na aumai ae tuualalo atu i lau Afioga i le Minisita, o le tasi lona vaega o lo o moomia e le Matagaluega.

O le tatou fale chips foi lea sa fesiligia le Matagaluega i le aso na matou feiloai ai, ae saunua mai le aualii e le iloa e i latou le mea o i ai fale chips, a o lea ou te iloa le mea e i ai ma ua silafia uma lava e le atunuu.

O le Tulafono Tau Faaofi o le Faatatauina o Tupe Faaopopo (Nu.2) 2013/2014 ma le Tulafono Tau Faaofi o le Faatatauina o Tupe 2014/2015 masalo e leai, ua atoa le lua vaiaso o matou sailiilia. A silasila totoa i ai le mamalu o le Maota i le Tala o le Tupe, e \$790+miliona o lo o faaagaga mo le tatou paketi mo lenei tausaga. Ua fai sina pau laitiiti mai le paketi talu ai. O le tatou tamaoaga lea e i ai nei e tusa ma le \$1.6pilonia, ae a toese ai la a tatou tupe faaalu ia o lona. O lea lava e sosolo lelei lava i luga o faiga faavae a le

Matagaluega o Tupe. O lea o le a ou tautala atu e lagolago lau Minisita, Afioga i le Palemia. A silasila la i faiga faavae la e i ai, e tatau lava ona sosolo aitalafu po o tupe nono i luga o le 50%. A silasila la i ai masalo pe 67% la e i ai nei le solosolo malie o aitalafu. Ua sili laititi, a o le molimau autu foi lea e faagaga mo le sologa lelei o lo tatou tamaoiga. O le faasologa lea e i ai po o le aeae i luga masalo e i le va o le 2½% i le 3% e give and take le fuainumera lea. O le uiga o lea tala, e ui lava ina faapea o lo o faaletonu le tamaoiga o le lalolagi, ae sologa lelei lava lo tatou atunuu ma ou te tuualalo foi i lau Afioga i le Minisita fou aua ua avea oe ma sui e vaavaaia Faalapotopotoga Tumaoti po o SOEs, aua a faapea e aumai uma e pei ona aiaia i faiga faavae, o lena e maioio lelei lava e 50% e aumai i a latou dividends i totonu i tupe a le Malo. Aua o lau tilotilo mamao i ai o le isi 5 tausaga ua tatau ona ova atu i le \$2pilionia lo tatou tamaoiga aemaise pe a uma nei le fonu a le SIDS lea e loma nei, o le tasi lena vaega o le a tele nisi faamanuiaga e maua mai ai e le gata o tagata tafafao asiasi maimoa mai, ae maua ai foi ni a tatou donor partners e fesoasoani mai foi i le tatou atinae. O lona uiga o le isi 5 i le 10 tausaga ua tatau ona ova i le \$2pilionia le tatou tamaoiga ae faapea foi ma le sologa i luga o a tatou nonogatupe.

O lona uiga la o lea e lelei le tatou Malo i lenei vaitau ma e leai foi se atugaluga tele o i ai, ae faafetai ai pea i le Atua ma Lona alofa, e ui lava ina sa afatia i tausaga ua tuanai atu pe lua tausaga talu ai, a o lea lava e solosolo lelei ua amata foi ona toe take up tatou.

O le molimau autu lava o le vaega lea o faatoaga ma le lelei o taumafa a le atunuu. A fua i ai e pei ona silasila i ai i le tele o le talo, ulu ma le fai, manioka, o le ufi ma so o se mea, ua manuia lava lo tatou atunuu. E faafetai ai i le Atua i Lana pule faasoa ona o lo o tele mea lelei aua le atunuu.

O sina fautuaga mo le tatou fonotaga a le SIDS, a o le i fai atua le fautuaga e momoli atu le agaga faafetai i sui usufono o le Palemene sa latou laga lea fonotaga. E fia fai ai foi lou leo ma sui o le matou vaega i apitaga ma nofoaga, e momoli atu ai le agaga faafetai i le paia ma le mamalu o le atunuu ua ofo mai o latou maota ma laoa e tali ai a tatou malo. Ona pau lava se talosaga ma se tuualalo a o faafogafoga mai nisi, toe 200 ni nai a matou potu ia e moomia faamolemole. Afai e maua ona logo mai lea o le Pulega o Tagata Asiasi Maimoa Mai Fafu ina ia alu atu se asiasiga ma faamau lou maota ina ia faalava ai ni nai a matou potu ia o lo o saili. E momoli atu ai foi le agaga faafetai i le mamalu o le atunuu o lo o latou talisapaia le talosaga na avatu e le Palemia faapea foi le matou Komiti ina ia faamama ma faamanaia o tatou aai. O le tasi lea auala e talitonu le manatu o le a siitia ai lo tatou tamaoiga i se auala vave tele ona o le a tele ni a tatou paaga e maua mai ai, ae tatou taupule ola i lea aso i le alofa o le Alii.

Le vaega o lo o vaai auala, ou te matauina pea le auala lea i le beach road i Apia, o le tele ia o tagata e kolosi, e le kolosi i moli aua e le usitaia lava le vaega lea, ae na o se tuualalo ma le faaaloalo i lau Afioga i le Minisita e vaai lea vaega po o le LTA. E pei lava e onomea ma tatau ona fai ni a tatou over bridge, o ni auala foi ia e pei ni tamai auala laupapa ae fai e le donor partners. O lona uiga e tatau ona fai e le NPF i le sau lea mai le fale o le Development Bank e oso i le itu lea e i ai le fale o le NPF, e faapena foi ma le fale o Amau ma isi fale e pei o Ekalesia foi aua e kolosi mai tagata lotu mai le isi itu i le ituala lea i tai ma e aoga foi mo tagata faatau. O le fautuaga lea e avatu e aoga

mo le lumanai ina ne i lavea mai se isi. Aua e toatele ni tagata e tau lavevea i le va lava lea ona o le pisi tele o lea ogaualala.

O le auala foi lea, ou te iloa ua leva ona tatau ona review pe sui le tatou Tulafono lea e faapea e leai ni return aua o lea e le o iinei lou uso a sui usufono lea e i ou autafa, aua ana faapea ua sui le Tulafono lea meamanu faapea e le moliaina le uso lea i lea vaega ma aafia atu ai ma le Sui Palemia i lea vaega. E ui i lea e leai o le tuualalo lea e avatu.

O le Tulafono lea e i ai e faapea e sa ona return e amata mai i luma o le fale o Aggie Grey e tau mai i le Esetete Tausi lea ua i ai nei le Tanoa Tusitala, o le matua le fetai lava o lona Tulafono po o lona Regulation. Ua mafua ona fai lea tala ona ua leva ona fai a tatou traffic islands i totonu e vaevae ai le auala. O fea o le a return ai pe afai e faasa ona e return? Afai foi o lona, sa tatau ona fai ni round about i le moa o le taulaga ina ia faigofie ai ona liliu tagata, ae ou te talitonu lava au ua leva ona tatau ona aveese lea Tulafono. Afai e tuai, maka le auala faapea e no return. So o se atunuu lava po o fea e te alu i ai, o Farani po o Iapani, e tusi ai lava le faaupuga no return e tautau i luga o le manoa po o se maea i luga ae o moli ina ia iloa ai e tagata. A sau la le tagata tafao maimoa mai fafo e fou lona laisene e fealuai ai, e te i lava ua return i ou luma ae leai se mea o tusi ai i le auala. A o se tuualalo ma le faaloalo i lau Afioga i le Minisita mo Galuega, Felauaiga ma Atinae Eseeese.

O le isi tuualalo ma le faaloalo o le vaega lea o tatou auala. A timuga ae e sau i le va o leoleo ma le fale foi lea sa fai ma fale faamasino, o talivai uma lava o le fale lona e alu agai i le aualatele a le Malo, ia ona toa ai lava lea o le vaivai ona afaina ai lea o le vaega lea o le CIP ma tua atu o le.....ia faapena foi ma le nuu o Apia latou, aua e tafe atu le vai i i le fale e tele lava le mea o le rain water harvest e koleti e le fale lea, ia o latou talivai uma lava e faalu agai i le aualatele, sa fesiligia la le Matagaluega i le tulaga lea ia ma tatau foi ona faamalosi e le tatou PUMA, e talosaga ai i lau Afioga i le Minisita mo Punaoa Faalenatura ma le Siosiomaga, e manaia pe a toe review le tatou vaega lea o le faufale e faaopoopo i ai ia otometi lava le fai o tanevai o fale fou e le i faia e koleti ai le vai.

O lona lua ia e tatau ona fai se pelting o fale ia ma fai se drainage e alu faalelei i ai, aua o i ina foi e puipua ai le lolovai o le taulaga, o lea tatou te maitauina nei. Sa ou fesiligia foi le Matagaluega e a latou lea matafaioi, a o le tali e faapea mai, o le faalavelave o Apia e fai sina maualalo, o lona uiga afai e lifi le taulaga, ia e tatau ona lifi i luga le auala pe mita pe mita ma le afa. O ni faafitauli tele foi lea e tupu mai nei e tuu saoloto o tagata ia o latou fanua umia saoloto i Taufusi, Togafuafua, Lalovaea e faasolo uma lava i le taulaga atoa, a loto lava le aiga ia e tanu i le 2mita le maualuga e alu lava latou faasoloatoa, ae sa ou faapea e i ai se tulafono po o se benchmark_e aua le tuufau ai le vaega lea, aua o le mea la e tupu, ia o se aiga ua ou faalogo na lauga ai se tasi o sui usufono, o si aiga e limavaivai e le mafai ona totogi uta e tanu ai ma reclaim lo latou fanua, ia e goto lava i lalo le latou fanua ma o latou o le a goto uma ai i lalo le vai lea o le a sau. Ae o le talosaga ma le faaloalo mo le lumanai, o le isi sefulu tausaga, ua tatau ona silasila mamao le tatou Matagaluega ua tatau ona amata ona sii o tatou auala i le taulaga pe mita e sii ai, ia ae fai vaega foi lea aua e fuafua i le tau ma le tupe e alu ai pe afai e maua mai se fesoasoani mai fafo, tasi lea vaega taua o le SIDS pe a fai le tatou...e fesoatai ai po o ai se isi e maua mai ai se tatou fesoasoani mo le siiga i luga o tatou auala i le taulaga e puipua ai le mea lea e timu loa toa le

vai, o gauta o le bank po o tai pei o le mea lea na saunoa ai le sui usufono mai le Vaimauga ia ma Apia atoa lava i lalo i luma o le mea lea e i ai le fale o Hans Keil o lena vaega, ia o i i le maketi, o le taufusi atoa le mea i la aso ia sa tanu atoa lava, ae po o le a le tanu, e timu lava toa le vai, a o le taua lena o le vai o tatou alavai mo le sologa lelei o le taulaga.

Ona ou oo mai lea i le talosaga faaii lau Afioga i le Minisita faamolemole, o lea ua fai nai a matou aoga faataitai, o le aoga i Satitua ia ma le aoga i Saleaamua lea e tatala taeao i le 10:00, faafetai atu ai foi i le faafeagaiga i le alaafaga i Saleaamua ia Pati ma Matalena mo le atinae lelei. Na saunoa se tasi o sui usufono, pei o le talitonuga ia o le pa tatala lea mo le atunuu aemaise ia le amata i le aoga faataitai pei ona sa i ai ia aoga a faifeau ma taupoua i la aso, ia o lea ua amata lava ona fai a tatou grades e aotauina ai le fanau ina ua faatoa tolu, fa tausaga, e taua tele lea. E le gata i lea, e faafetai i le Matagaluga o Aoga, Taaloga ma Aganuu, lau Afioga i le Minisita e momoli atu lava le faafetai ma le faamalo i le tulaga lelei lea ua i ai le tatou Matagaluga, e le gata i le toe apoapo o le aganuu i siva, o lauga o tulaga faa-Samoa uma, ae faapena foi ma le apoapo o le tatou vaega laiti, e le gata i aoga faataitai ia ae faapea foi primary school ua tele lava suiga ua i ai, afai nei e maea le Broadband ia e leai se masalosalo o le a faamanuiaina uma nuu i tua e tofu ma le computer, ona pau lava le fautuaga, e tele faiaoga e fesiligia i le matou aoga e leai se isi e computer literate, o lona uiga o le tasi lea vaega e tataua ona silasila totoa i ai le Matagaluga e fai ma aumai a tatou faiaoga i tua pe taitoalua mai e aoao le IT o lea lava e tele a tatou vaega ia e i Apia e aoao ai mo le faaogaina o le computer, aua e leai se aoga e fai ai computer a aoga la e i tua, ae matua leai ma se isi e ilafia ma silafia le faaogaina o le computer.

O le talosaga mulimuli lau Afioga i le Minisita mo Galuga, Felauaiga ma Atinae Eeseese faamolemole, se o le aoga lea sa aumai le meaaloa i Niu Sila ina ua uma le Tsunami o Satitua, ua matua faaleagaina lava le latou auala, e le atoa se kilomita le alu i uta i le mea e i ai le faleaoga, e fai lava sina faaletonu e faapena foi ma le auala o le faleaoga i Saleaamua, o la e lelei le auala o Tiavea, e pei o se talosaga lea ma le faaaloalo.

Ona faagata mai ai lea ma se leo, e molimoli atu le agaga faafetai, e toe faafetaia ai pea le Matagaluga aemaise o Matagaluga Tumaoti, sa ou faalogo o lea o le a sii le tatou 9% o le dividend a le UTOS, e tasi lea Matagaluga Tumaoti a le Malo e fia avatu ai se agaga faafetai ma le faamalo, e faapea foi ma le SIFA e \$11miliona ea pe \$12miliona lea e maua mai a le Malo, e momoli atu ai le agaga faafetai i le fesoasoani mai i tupe maua a le Malo, aua o le taua foi o nei mea aua o lea ou te manatua e lua tausaga talu ai, o la outou target sa i ai o le UTOS e \$40miliona, ia a o le taimi ua ova ua latalata i le \$80miliona lea ua i ai. O se fuainumera e faafiafia loto, o se fuainumera foi e faafiafia ai lo tatou atunuu, o mea lava ua fai e tatou ia i totonu o le atunuu aua le sologa lelei ma le manuia mo le lumanai. E pei o lau tala sa fautua muamua atu ai, afai e tuufaatasi uma lava a tatou Matagaluga Tumaoti SOES lea e i ai e maioio ai i lalo o le tulafono e aumai le latou 50% o latou dividends i totonu o le Malo, o le matua ola lava ma le sologa lelei o le tatou economy. Ia o le tala lea e faaii atu ai, e momoli atu le faamaisega i le Afioga i le sui usufono mo Gagafomauga Nu. 1 ma lona aiga, le tina o le aiga aemaise alii faifeau ma le aiga atoa i le lagia o Safotu i sao e fa ma sa Umalau ma le ati Pouniu ma le Faasau, e momoli atu ai le

faamaisega. E faafetai foi i lau Afioga i le Fofoga Fetalai ma le Malo i le amanaia o lenei tama i lana tautua, o se mea fou lea ua tupu mai i le tatou Paeaiiga, ua toesea se tasi sa tatou galulue faatasi, ia o le toeaia foi e faagalogata aua o le toeaia e faitala oo, e tau ova foi e le mafaufau i le isi taimi, ae faapena lava uiga o le toeaia o lauga faatoeaia.

Faafetai i lau tapuaiga Samoa ia Tutuila ma Manua e faapea foi lo tatou atunuu, Lana Afioga Mamalu, O Le Ao o le Malo ma le Masiofo, faapea le Sui Ao le mamalu o lana Masiofo, le paia ma le mamalu o le vaega o le tafatolu o le Malo, le Afioga i le Palemia ma le Kapeneta, Faamasino Sili ma le vaega o le Faamasinoga, ia lau Afioga i le Fofoga Fetalai ma le mamalu o le Palemene nei, faafetai mo upu faamalo i Faafeagaiga o lou itumalo mai Tiavea se i oo i Satitua, ia malo tapuai faafetai le tatalo. Faafetai foi i le tapuaiga a lou itumalo, manuia lenei aso, manuia le tatou Fono.

FOFOGA FETALAI: Malo, faafetai saunoa i lau Afioga i le sui usufono mo Aleipata Itupa i Lalo, lau Afioga i le Tuiatua Faanofonofu, malo fetalai e tamua ai le tatou Fonotaga i lenei taeao, malo timai, malo foi saunoa e ala i le tatou Tala o le Tupe.

O lea o le a lafo i lea itu o le Maota i le sui usufono mai Salafai i Salega ia ma le fofoga o alii o Lealailepule. Ia tulai mai se tasi o sui usufono mo Salega, Afioga Afualo Wood Utu Salele, e avatu le faamuamua leaga e matua lou soifua i le sui usufono mo Faleata Sisifo, tulai mai le sui usufono mamalu se tasi o sui usufono mo Salega e saunoa.

Afioga AFUALO WOOD UTU SALELE (Salega): E faafetai atu i lau Afioga i le Fofoga Fetalai mo le avanoa faaauo, i lenei taeao fou ua mou atu le fano eleele o le la i lona tauafiafi o lea ua tuanai, ae ua tatou alafai i le taeao fou lea ua toe totogo ae malama, o lea e ao ina tatou saga sula ai pea le alofa ma le agalelei o le Atua. E masani ia ta aga i tu ma aga Samoa, fai mai a sasa le aveo pe momoli le fausa, ona vavae lea o foe o poula, ae fai mai ua alu atu le afi, ia o lenei ua talia e Salega ua oo mai le afi.

Lau Afioga i le Fofoga Fetalai ma le mamalu o le Fono Aoao e ao ina ou faatalofa atu, e faatalofa atu i lau Afioga o oe e faafoeina ia le tatou Fonotaga. E faatalofa atu foi i le Afioga i le Palemia, le Kapeneta ma le mamalu o le la itu, e faatalofa foi i le Afioga i le Taitai, le Sui Taitai ma lenei itu, ae tainane foi o lo o tapuaia o tatou faiva e le paia lasilasi o tamalii ma failauga o e ua lautogia e latou te faafoeina le tamaoiga o le atunuu. E le mafai foi ona faagaloina ia le tapuaiga lilo a Lana Afioga Mamalu, O Le Ao o le Malo ma le Masiofo, le Afioga i le Sui Ao ma le Masiofo, ae tainane le tapuaiga i le Faamasino Sili ma le paia o le aiga o le Faamasinoga. O lau tapuaiga Samoa e le mafai ona oo sau faamatalaga i ai, o le upu moni lava, o ou paia e mai lava i le vavau e oo i le faavavau, ua uma foi ona aisa ma fuafua ma faataoto e afua mai i le taisamasama o le Tuimanua se i oo atu i le tai ulaula o Nafanua na tauilo ai Malo, o ou paia na. E muliai sau faamatalaga i lou itumalo, aemaise paia o le aiga sa Levi o lo o talafaauto i itu e fia ma tafa e fia o le lalolagi aua le tauasuina o le Ipuvai o le Ola mo le manuia, e le gata i le tatou Fono nei, a o le atunuu atoa.

O lea lau Afioga i le Fofoga Fetalai ou te fia faafetaia pe oo atu foi sau tala i lou itumalo pele, aemaise lava ou paia e faigata le afio o Alo o Lilomaiava, susu mai Tuimaugapo ma le aiga, alaalatai sa Soa ma le falefa o sa Saumai. E

ao foi ona ou faapai atu i le afio o lau afioga i le Sao, lau afioga Toomata, afio le Toafa o alii, alaalatai Saleutogi Poe na lima matua i ai Faleupolu o tofiga, e ao foi ina ou faatalofa atu i le paia lasilasi i le afifio o le Toatolu o alii, ae alaalatai le mamalu o le Saleutogi Poe, e faapea foi lou nuu pele o Fogatuli, i le afio o Afualo ma ou Alo e toafa, alaalatai Faimanu o le fofoga o le Usoalii ma le mamalu o le Alataua. E ao foi ona ou faapai malu atu i le afio o Fualau ma le aiga alii, ma lau afioga Fepuleai, afio o Tilafono ma Faavaoga ma Tama, ae tainane le alaalatai o lau fetalaiga Tuisalega na aliitai ia te oe lou itu. E tatau foi ona ou faapai malu i le afio o le aiga Samoeleoi, susu le alaala maota ae tainane le alaalatai o sa Utuvai ma upu o le Alataua, e faapea foi isi ou nuu o Fogasavaii, le afio o le Gafa ma le Toafa o ou Alo, susu mai le Matua, afio mai le Maopu, alaalatai le Fuaiala o sa Nuu, aemaise o le alaalatai o le Taupoloalii. E muliai sau faatalofa i le paia o lou nuu o Sagone i le afio o Aiga Samoeleoi, afio o Alo o Lilomaivao, afio le Maopu, susu le Matua, alaalatai le Falesefulu o le ati Togia, ma le mamalu o le Alataua, ia o paia na o lo ta itumalo, ae i paia ua uma ma matupalapala ua uma ona to i le Aiga Sa Levi, lou itumalo pele, e le mafai ona oo i ai sau tala ona o lea ua uma ona vaelua le mamalu o le Atua ia te outou i fatafaitaulaga e fia, mai lava i Tapapa ma Mataiili seia oo lava i Vaimoliai ma Fetoloai, o la outou tatalo ua mafai ai e lou nei tagata ma le Afioga ia Tapuai ona molimoli se sao o le tatou itumalo i lona atinae aemaise o le tapenaina o le Tala Faatatau o le Tupe lea ua lauliuina nei e le Fono.

Lau Afioga i le Fofoga Fetalai, o le molimoli atu lea o le matupalapala e tusa ai foi o le tapuai mai a Salega. Ae i lenei taeao matagofie na liugalua i le alofa o le Atua, e agai sau faamatalaga i lou itumalo aemaise o galuega e tatau ona faatinoina. Lau Afioga i le Fofoga Fetalai, e le o po se lilo o lea ua laasia nei le tolu i le fa tausaga o le Paeaiga, ae ou te tatalo atu i lau Afioga i le Minisita mo Galuega, Felauaiga ma Atinae Eseeese i auala o lou itumalo. Sa nofonofa lava ma taputapuai, e le i i ai lava se Fonotaga e le i oo i ai se faamatalaga e tatalo atu ai, aua o le upu moni lava, ona o lea ua ou vaai atu o lea ua faagasolo mai o lea ua i ai nisi ua lautogia, ae tau ia ina ia faaauau ma oo atu i ai.

O le vai lea e i Sagone, atonu o lea sa afea e se tasi o sui usufono, o se uso foi faasino i lea itu, e moni lava o le vai e sualua, sa i ai se taimi ua tuanai sa logo atu ai, o la e foi ua silafia e le Tamaitai Pule, ua leva tele ona taumamafa lenei itu o le itumalo, ae semeamanu lava o lea e i ai isi vai lea e vili atu i luga, ua mafai ai ona fesootai, ona tau faaitiitia ai lea o le mai o le vai. Ae faamolemole ona o se gaoioiga e manaomia lona faatinoga vave, na ona sii lava i uta o le pamu ona toe vili ai lea, aua o le tulaga la e i ai nei le pamu e fai sina latalata i tai. Atonu foi ua le au le vili i tai i le faatanoa lea e i ai le suavai manino po o le suavai foi lea e le sualua, a o lea ua pamu mai le vai lea e sualua o lea o lo o taumamafa ai le vaega atoa lea o le itumalo. Faamolemole se i silasila ane i ai a ia faagasolo, aua na ona vili lava o le pamu.

Lau Afioga i le Minisita mo Leoleo ma Auaunaga Tau Tinei Mu, masalo ua se tai taliga ia te oe lau talosaga. Aua o le upu moni lava, o la e sauna lou itumalo i le pou lea sa.... A o lea ou te faalogologo atu o lea ua agai i lalo i Salailua le pou, ae sa ou saili atu po o le a le mafuaaga a ua logo mai fai mai e mumusu le aiga lea e i ai le fanua lea i Sagone e toso le pa. Ia o lau talosaga i lau Afioga, ona e le i toe oo mai se faamatalaga faapea ia te au ma Tapuai, e

mafa'i lava ona felogonai. O le mafuaaga ua ala ai ona ou finau atu e tatau ona tu le pou i luga i Salega, ona a faapea mai loa o Salailua, e uma loa Salailua o le togavao, Taga, a o le mamalu o le atunuu lea e faasolo atu i i i le itu lea i Salailua e agai atu i Salega. O lona uiga e le amiotonu le tu o le pou i lalo i Salai.

FOFOGA FETALAI: Ia malie lo oulua Fale Vaisigano se i avatu le saunoaga a le isi ou uso a sui usufono. Tulai mai le Sui Fofoga Fetalai.

Tofa Agafili Patisela Eteuati Tolovaa (Palauli Sisifo): Lau Afioga i le Fofoga Fetalai, e le o se mea e fia faasao o se mea e fia faamalamalama. Na ona faamanatu atu lava i lou uso, se o le tama foi lea o Fuaoletoelau na alu e aumoe i tua i Falealili ae alu atu lona uso o Laauli e seulupe, ae te i ane ua uma ane ua ese le mea ua maua. Aua e te popole o lau lava o le fiso lau o le tolo. Ma le faaaloalo.

FOFOGA FETALAI: Ia, tulai mai le sui usufono mamalu e faaauu le saunoaga.

Afioga AFUALO WOOD UTI SALELE: E moni lava lau Fetalaiga le sui usufono mo Palauli Sisifo o lau o le fiso lau o le tolo, ae a faapea e tupu se faalavelave i luga i o o atu leoleo ua oti le tagata, o le uiga lena o lau faamatalaga ona e fai si mamao i lalo aua o le pitonuu lea e fuafua e fai ai i lalo i Salailua, e uma loa tuaoi mai ma Taga, o le togavao, ae e aina uma mai e tau i luga, o le toatele o le mamalu o le atunuu lea e i luga i Gagaemalae atoa ma Salega, e valu nuu la e i ai. E pei o le agaga lea e ala ai ona toe talosaga atu, se i toe seu silasila lau Afioga, ou te le aoaia lau Afioga i le Minisita mo Leoleo, ou te talitonu o lena ua nofo fale ia Satuiamaa le tofa ma le faautautaga, e le gata i lea, o le loto mataala e fai ai le faaiuga ma le amiotonu i le mea e tatau ona tu ai le pou, o Salega e tatau ona tu ai le pou.

Lau Afioga i le Minisita mo Tina ma Tamaitai, Atinae o Nuu ma Afioga ma Agafesootai, ou te faafetai atu lava i le faalelegapepe lea faatoa uma, aua o le upu moni lava, o Salega le isi itumalo na matua faamanuiaina ma lautogia i lenei taleni a le atunuu lea e tau lalaga e lau Matagaluega. Ou te faamalo atu, ae o lau tuualalo i lau Afioga, se i silasila ifo po o lava faailoga ia, aua ina ua uma ma maea sa maua uma faailoga e lou nuu i Fogasavaii ma isi vaega o Salega, ae na toe oo mai lava olomatutua e toe faatau mai a latou ie iniini ia te au, ona ou fai atu lea, ia malilie o i le Minisita, e leai sau tupe. Sa ou fesili atu lea, pe fia se tau, ae na tau mai lava. Sa ou faapea lava au ia ai o la e manaia le tau, ae ou fesili atu po o le a le umi na lalaga ai, ae fai mai e tausaga atoa. E pei o le....

FOFOGA FETALAI: Malie le sui usufono mamalu se i tulai mai le Afioga i le Minisita o measina a le atunuu. Tulai mai lau Afioga i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioga ma Agafesootai): Faafetai i lau Afioga i le Fofoga Fetalai. O lea e faavailolo le paia o le Maota, ae na ona ou faamanino i le sui usufono mamalu e tusa o le faafesili, e leai, o lena e

sagatonu le tuusao mai o le fesili ona o le Matagaluega a Tina ma Tamaitai o lo o taulamua i lea foi vaega o polokalame tauatiea a le tatou atunuu, ma le faamoemoe o le Afioga i le Palemia, o ia foi o le Taitaifono o le matou Komiti, ia matua uunaia lea vaega o galuega fai a tina. Ae faafetai lava i le sui usufono. Na pau lava le itu na ona ou faamanino atu, o le meaalofo a le Malo e faailoa ai le amanaia e le Malo o le tautiga o tina o le atunuu e ala i le au matuauu ma le au seepapa, e faapea foi falelalaga, e \$1,000 e faameaalofa ae toe ave lava le ie a le tina latou. O lona afu ma lona maau i le tolu masina lea e lalaga ai le ie e tasi, aua o le sailiiliga lena a le Komiti ma le Matagaluega. E tolu lava masina pe tolu ma le afa masina e lalaga ai le ie lea faatulaga a le tatou Malo. Ma e taua tele le laga mai e le sui usufono mamalu, faafetai foi mo le faafetai ua laga mai, a o le mea tonu lava lena. E \$1,000 lava le meaalofo e ave i le ie tosi tasi, o le tosi lua e \$700 a o le tosi tolu e \$500 ae toe faafoi lava le ie a le tina e ana le galuega. O le faamoemoe la, e le gata i le faaaogaina i totonu o le afioaga ma faalavelave o aiga ma nuu, ae o le pule lava a le tina i lana faitalia, e mafai lava ona faatau. Afai ua faatau atu i lau Afioga, o i ina e tau mai ai, e silafia lelei e tina o le itumalo e lava tupe a le sui usufono mamalu mo lea faamoemoe. Ae leai ni taui foi ia faapea e uma loa ona lalaga ona avatu lea e le Malo tupe ae aumai le ie i le Malo mo le.... E leai se mea faapena. Se i vagana lava ua i ai le tofa i le fale lalaga ia e amanaia si toeaina o lo o Taitaifono vaeatu le Palemia ma au nei, ae le i tupu lava se na mea. Afai o faafogafoga mai le fale lalaga e fia, e le i tupu se mea faapena talu ona faavae mai lenei faamoemoe taua o le tatou Malo. Ma e faamanatu atu ai foi, o le amataga o Iulai, e le tataua ona toe faaaogaina ai se ie tuai, ie foi nei pei se lalolagi le tele pe a fua mai, a o le matua mataga lava, vaeatu lava le maau ma le milosia ma le measina a le atunuu, a o le a faataua loa a tatou ie ia. Mo le silafia e le sui usufono mamalu ma le faafogafoga a lenei Maota. Ma le faaaloalo lava.

FOFOGA FETALAI: Malo faafetai saunoa i lau Afioga i le Minisita mo Tina ma Tamaitai, Atinae o Nuu ma Afioaga ma Agafesootai, aemaise o measina a le atunuu.

Ia tulai mai le sui usufono mamalu e faaauau le saunoaga.

Afioga AFUALO WOOD UTI SALELE: Faafetai atu i lau Afioga i le Minisita mo le faamalalamalamaina o lea vaega. E moni lava au, ae pei o le agaga lea sa taumolimoli atu ai, ona o le tautiga foi ma le faafetai i lau Matagaluega, ona o measina nei e le faigofie, ua amata lava ona mou atu, a o lea lava tatou te taumafai, aua o le upu moni lava, sa i ai lou popolega, masalo o lena e i ina i lena itu, aua e alu ai alu ai le tau lea ua i ai nei, aua ua siitia le tau o le ie. O le ie lava lea ua uma nei, e \$3,000 lava lona tau, le ie numera tasi lea a lau Matagaluega lea sa... I lau la ia maitau i ai, o se fesoasoani tele i aiga aua o lea ua maua lenei tupe tele. A o le popolega lea e i ai, e iu ina tapena ai ma se tomai fou po o se poto faapitoa e masini e mafai ai ona lalaga le ie. Aua o le upu moni lava e mafai ona fai i le technology, e pei lava o le lalagaina o ie ia na aumai ia tatou i le taimi na amata mai ai le tau fuafuaina.

O le tuualalo la i lau Afioga, ina ia silasila totoa i ai i se auala foi lea e malupuipua ai measina nei a le tatou atunuu, aua e le umi lava ona lalaga e

masini ae le toe faigaluega olomatutua, ae aumai foi ma le ie, ua le tasi ae ua sili atu ua i lalo ifo ma le tasi le....

FOFOGA FETALAI: Malie le sui usufono mamalu se i tulai mai le Afioga i le Minisita mo Aoga, Taaloga ma Aganuu. Tulai mai lau Afioga e saunoa.

Afioga Hon Magele Mauiliu Magele (Minisita mo Aoga, Taaloga ma Aganuu): Faafetai i lau Afioga i le Fofoga Fetalai. E leai se manatu e faalavelave i le lauga matagofie, ae ua ou tulai atu ona ua taua measina nei o le puipuia. Mo le silafia o le tausaga na tea nei na ofi atu ai tatou i le Faalapotopotoga a le Lalolagi o le Puipuiga o Measina ia, ma ua uma ona resitala aloaia tatou. O le mea muamua lava la lea o lea e ave i le lisi e puipuia a tatou o le tatou ietoga. Ma le faaaloalo.

FOFOGA FETALAI: Ia, o lea la ua maua le tali o le atugaluga o lau Afioga i le sui usufono mo Salega. Tulai mai le sui usufono.

Afioga AFUALO WOOD UTI SALELE: Faafetai i lau Afioga i le Minisita mo Aoga, Taaloga ma Aganuu. O le agaga tonu lava lea o lea ua malupuipuia i lalo o le Tulafono. Faafetai ona o mea e tatau ona fai. O le isi la vaega, ona o lea e i ai Tulafono ia e tau agai mai, aua foi o lea e fua i le aga, o lona uiga a oo nei ina fua i le malosi lea e i ai, o le a le toe mafai ona toe faaaogaina aga a tina ma tamaitai ae o le a faaaoga lea ua i ai nei a le matrix system. Se i silasila pea i ai lau Afioga ona e le tatau ona avea le faaaogaina o le fua lea o le a avea ma vaega foi lea o le a mou atu ai le fua lea sa faaaoga mai lava e tatou mai anamua. E tatau pea ona malupuipuia ina ia mautinoa o le aga lava ae le o le inisi po o le senitimita e faaaoga. Atonu lava o la e i ai le fua faatatau o le aga e tasi.

FOFOGA FETALAI: Ia malie le sui usufono o saunoa se i tuu atu le avanoa i le Afioga i le Palemia. Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e leai lava se eseese o le mea lea e manao i ai le Komiti ia faalaugatasia, aua a fua le aga, o le lima o le isi olomatua e faapea le tele o lana aga, a o le isi e faapea le tele o le aga, a o le isi e faapea le tele o le aga, (*na faaaoga ona aao e faatusa ai le tele o le aga e tasi*). E tatau lava ona tasi le aga e faalaugatasia ai. O le isi mea o lo o tausisia e le Komiti, ia laugatasia i se mea e mafai ai ona faaosofia pea le naunau ina ia lalaga le mea aupito sili ona memea. O lea lava tatou te malamalama lelei i le natura o le tagata, e oso loa le augata palafu loa. O le mafuaaga foi lena o lea e tausisia ai lava e le Komiti le tulaga lea, ma e faafetaia Taitai o Ekalesia o lea foi ua latou maua mai le agaga o le Malo. O le faamaitemea lea a le Malo, ma e i ai lava le talitonuga o le Komiti, e oo lava i le faavavau amene, o alu pea le polokalame lenei, e leaga o measina ia o faatumutumuga o measina e faatino ai aganuu a Samoa i ona tulaga maua, ma o le ie la e memea ma lelei ona tapena, e atili ai foi ona amanaia e tagata mai fafo le aulelei ma foliga lelei o le measina a Samoa, ma ua tatau ai loa ona tau o le measina. E le o measina ia mataga sa tatou sau ai, pei ona amata ai le

polokalame lea o le lafoai o lalaga, ia o lea foi la ua taumafai ina ia aveese ma mea tetele ia a tuu i totonu o le taavale ua tumu vale ai ma le taavale i le soona lapopoa vale ae pei o ni papa laufala le lalaga ona o le manatu foi lele faatulafale, e lelei le mamalu ae le taua le mataga. O lona uiga, e mataga ae le tiga. Ae pei la o le agaga lena o lea e taumafai i ai le Komiti ia faasee ese tatou, o le mea la lena o lea e ala ai ona taugata ia le measina, o lea faatoa measina moni lava. Ae o le aoga o le polokalame lea e pei lava o le tulafono, o lena e te malamalama i ai i le tulafono e na o tagata e pei o lau Afioga e malamalama ai, o le Supply and Demand, o i ina e faatonutonu mai ai le tau. O lona uiga, afai e fai le \$3,000 nei \$3,000 le tausaga lea, \$3,000 le tausaga atu i tua, ua faapena foi ona tifa ifo i lalo le tau, ia ma talafeagai ai mo tatou nei e moomia mea faapea e teu lelei i lalo o le moega, e toe laga ae, ua toetiiti lava selu ai lou ulu i le manaia o le iila mai o le ie. O le tulaga la lena o se mea lelei tele le mea lea o lo o taumafai i ai ia le Komiti lea ma le Matagaluega o Tina ma Tamaitai, o lea lava sa amata mai le polokalame lena o tausaga atoa e lalaga ai, a o lea la ua sau i lalo, ua tolu masina, e le iloa pe oo atu i le tausaga lea, ua tasi le masina. E faapena le mea o le practice make perfect, o le fai pea fai pea, ona maua ai lea o le tomai e faafaigofie ai ona lalaga aveese ai ma le manatu, aua o le isi lena mea e tupu ai le augata pei e atu le mafaufau, a e tago loa e fai e faigofie lava. O lena foi mea o le fefe i masini, soia tatou te fefefevale i na mea, tatou alu pea lava i le mea o lea e i ai le tatou tu ma aga. O le tulaga lea ua agai i ai le Komiti, o le faatinoina o le ula, a o le ula lena ona o lea ua manaia le ula ae ua le paleni le fai o ula a loomatutua, o la e mafiafia, o lea la ua i ai ie i le taimi lena ua matua sui lelei le ula o lea la ua taoto mai ua sili atu foi ona aulelei la le ie lea nai lo ie anamua sa i ai. Lau Afioga i le Fofoga Fetalai, o le matua maoae lava o le polokalame lea e faatino e le Minisita ma lana Matagaluega, e toe lalaga ai le toe faaalologia o a tatou measina. O lea la ua apo i sauniga ia ua fai nei a ekalesia, o lea foi ua ou faalogo i le sauniga tele lea a le Metotisi, ua na o ie lava ia o le a faataga, ia ua ou faalogo foi o la ua talanoa ai foi le EFKS, o lea foi na fai nei ia le sauniga tele a le Katoliko, ia o ie ia o lea ua agai i ai. Ia ma o tulaga ia ou te manatu, e tatou te mitamita ai ia le Palemene o lea e faatino mea ia i le taimi o tatou Paeaiga, ma o tulaga e tatau ona tatou taufai lagolagoina uma ona o le taunuuga e lelei ma matagofie.

FOFOGA FETALAI: Malo, faafetai saunoa faamalamalama i lau Afioga i le Palemia e ala i le saunoaga a le sui usufono mamalu. Ia tulai mai le sui usufono.

Afioga AFUALO WOOD UTI SALELE: Faafetai i le Afioga i le Palemia, ia a e lailoa lava e tau faasilasila mai, ia a o le upu moni lava ia, o le masini ia aua na ona oo lava ina oo mai, ia e le toe vaai ia ni loomatutua e lalagaina, o le tala moni lava le tala lena, pei o le tulaga lena o lea e faufautua atu ai.

Lau Afioga i le Minisita mo Aoga, Taaloga ma Aganuu, i le tulai mai pea o lena vaiata aemaise lava i le atinaeina o le poto aoaoina ia ma le tomai faapitoa foi, e ese le taua o le sao o lau Matagaluega e le fesiligia lava lena ona o lea foi e faamuamua i lalo o le Tala Faatatau o le Tupe aemaise foi o faiga faavae a le Malo i lena itu. Ae o le tuualalo ina ia silasila ina ia mautinoa lelei, ua tapue lelei ia le vaega lea, ina ia faigofie ona tulai mai le

tamaoiga o se tamaoiga e faavae i luga o le poto salalau ma le poto aoaoina, o le uiga o lau faamatalaga, a knowledge based economy, a, ina ia faigofie aua o le tapenaga lea e i i i vaega ia, e falala i tua ae toe ifo uma mai i ai ia vaega uma o le tamaoiga, aua o le fatu lea, o le fatu lea, ae faafetai o lea ou te vaai atu o lea lava ua agai ia au fuafuaga ina ia mautinoa ua sagatonu lau o le fo e tusa ai o le faamoemoe.

Ona agai atu lea o sau faapitoa lava i lau Afioga, ona o le sao o nai o tatou uso fai mai i Ausetalia lea e ala mai i le APTC, ona o lea....masalo le iloa po o ua alu se fa tausaga i le lima lo latou maau lea e i gauta e vaavaalua ma le Iunivesite, ona sa tau sailiili lava po o fea o i ai ia le tele o alo ma fanau lea ua mafai ona faamanuia i lalo o le polokalame, ae o le a foi se tala mai po o mafai lava ona fai a latou atinae, po o fea la e faigaluega ai po o le mea nei ua uma ae gasolosolo atu i fafo? Ona e ese le taua o le tomai lea ina ia mautinoa ua nofo le tele o le tomai lea iinei e fesoasoani i le atinae o le tatou atunuu. Pei o le tulaga lea sa tau sailiili lava, ou te le o iloa i le taimi lena i lau Afioga po o lau Afioga e i ai le tali, ia po o le Minisita mo Pisinisi, Alamanuia ma Leipa le Sui Palemia, ae taua foi lea mo le silasila i ai, ae pei o le agaga lenei ina ia mautinoa lelei ona o le tele ia o atinae tetele ia a lo tatou Malo lea e faasolosolo mai, ina ia mautinoa e le gata o lea e lava ma tapue le tomai iinei i Samoa, ia a o maua mai foi ni fesoasoani i isi tomai mai atunuu i fafo, pei o le vaega lenei.

Ona oo mai lea o lau fautuaga mulimuli lava i le.....

FOFOGA FETALAI: Malie le sui usufono o lo o saunoa, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e le o le agaga lea e mafua ai ona faatu le polokalame lea, le polokalame lea a Ausetalia, e faapea, e na o le taofiofi o tagata i totonu o atunuu e aoaoina, e tatala lava le avanoa mo i latou o e ua maua le aoaoina i tomai eseese e mafai ona o atu i fafo ma faaoga ai foi lo latou tomai. O le mea tonu lava lea toetiiti lava taofi ai e Ausetalia le polokalame lea, ona ua faaali ia manatu o nisi o taitai o le Pasefika ina ua usuia le fonu a le Forum, ae faatu mai e Ausetalia, ona lilifa loa lea i ituaiga manatu lea. E aua ne i tulai mai se e na o le fai ma o, fai ma o, fai ma o i fafo, e galo ai le isi itu, e i ai lava tagata e o i fafo ae i ai lava tagata e nonofo i totonu. O le ala foi lenei na ala ai ona vave faatuina le aoga e na o le tolu lava aoga, e na o tatou, Fiti ma Papua Niu Kini. Na ala ai ona faatu le aoga lea i Samoa, ona e amata mai le mataupu a Ausetalia a o lea ua maea ia fale tetele ia a Iapani, na amatamea ai i ina ae mulimuli fau le fale o Ausetalia. A o le agaga lenei e toatele lava tagata o le atunuu e aoaoina ai ma nonofo i totonu, ae i ai foi nisi e toaitiiti e o i fafo, e le mafai ona taofia le mea lenei o le brain drain, aemaise o lea e i ai le tatou Quota lea sa laga i le aso ananafi, e tasi lea auala e vave ai ona faamanuiaina i latou e o atu i fafo i le Quota ona ua i ai le tomai lea, ae faaalia ma faamaonia i le tasi faamaonia o la e pipii atu ai, o le Australian Qualification, ona tele ai lea o le avanoa e maua ai galuega i Niu Sila po o Ausetalia foi e migrate i ai. E le o faapea la o i ai se popole o le Malo i le tulaga lenei, aua o le mea moni lea tatou te iloa, o le toatele lava e aoaoina, e nonofo lava iinei, a o latou ua faamanuiaina i fafo, o ma ave le tomai e ono atinae ai foi o latou aiga i fafo ia ma saga toe foi mai le tupe i

Samoa, le mafuaaga e ala ai ona faaopoopoina pea a tatou tupe maua mai remittances o tupe e toe lafo mai i aiga e atinae ai. O le taofi lea e aumai e le sui usufono, o le taofi e masani ona tatou tauavea ae aua ne i galo, e i ai lava foi ia le aoga mo latou e o atu i fafo. E tatou te le o taofia lene mea, ia i ai pea le avanoa e mafai ai ona o latou i fafo e i ai le tomai ma faaoga e toe tautua mai ai o latou aiga i totonu o Samoa.

FOFOGA FETALAI: Malo faafetai i lau Afioga i le Palemia faamalalama. Tulai mai le sui usufono mo Salega.

Afioga AFUALO WOOD UTI SALELE: Faafetai, ia o lene ua e toe saunoa mai a o le agaga lene, e le faapea o fai atu, e aua ne i o nisi, ia a mea o le ute lene o faigamea o le tatala o le avanoa, ae pei o le agaga lea e i ai ina ia mautinoa ua lava le tomai lea e nofo i inei e tautuaina ma auunaina ia galuega e faatino mo le atinae o le atunuu.

Lau Afioga i le Fofoga Fetalai, o le isi vaega taua lava e faasolo i ai lau...o le tulaga lea e taoto mai i le pulega o tagata faigaluega. Ia ou te masalo o lo o manino lelei i ai le Afioga i le Palemia o ia lea e faatautaia, aemaise lava ia le komisi. Ona o lo o taatia mai pea i le tulaga nei i le pule ma le malosiaga atoa lea e i ai i le Komisi e latou te filifiliaiina ai aemaise lava ia tulaga ia....

FOFOGA FETALAI: Malie le sui usufono, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, na ona ou faasilasila atu, o le Afioga ia Lautafi lea e na te vaaia le Matagaluega a le Komisi, ou te musu e ave fua le mea lelei o lo o faia e le isi Minsiita, o lea la ou te faapea atu, o Lautafi lea ua tauavea le vaega lene, ma o a viiga uma ave ia Lautafi.

FOFOGA FETALAI: Ia e le faitio foi leaga o lea e fou le tulai mai o le Afioga i le Minisita fou, ina ne i galo i le sui usufono mamalu a o lea ua faamalalama atu e le Afioga i le Palemia sa ia tauaveina, a o lea la ua tauaveina e le Afioga ia Lautafi. Tulai mai le sui usufono mamalu e faaauau mai le saunoaga.

Afioga AFUALO WOOD UTI SALELE: E fia faamalulu atu i lau Afioga i le Palemia, ia o lea sa ou manatu lava au i le tuanai, ia ae moni a au, o lea ua...sa ou faalogo foi nei i le taeao o le Afioga ia Lautafi, ia e sili ia ona tuu sao atu i lau Afioga, e moni lava ia na ona tau lava o lea e...ia o tala lava faatama e fou, ae leai e le o oe, o oe o le tama Savaii e matua faatuatuaina oe e le tofa foi ma le faautautaga. A o le tuualalo lava ia, se i toe silasila ifo lava i le malosiaga la e i ai i le Komisi, a, ia e le afaina lava ia le filifiliaiina ia o faauluuluga o Matagaluega aua o lea e i ai le Kapeneta o la lava e solo lelei, ae pei lava o le lagona lea o lea e i ai, ina ia....po o talafeagai pea ia lea malosi pe ono toe silasila i ai lau Afioga ona fai lea o se fautuaga i le Kapeneta ina ia mautinoa ua tali foi manaoga o e foi o lo o aafia i lalo i le faaiuga, ae le o mafai ona o le tulafono. Lau Afioga i le Fofoga Fetalai, pau ia o nai vaega o lea sa fia agai i ai ona o lea lava ua manino lelei.

Ona oo mai lea o sau faamatalaga e muliai ai lau lauga i le Tala Faatatau o le Tupe. O le upu moni lava ia, e momoli atu lau faafetai i lau Afioga i le Minisita o Tupe lau Afioga i le Palemia, ona e le faigofie foi le tapenaina o lenei Tala Faatatau o le Tupe. E moni lava o lea ua tulai mai ua le tutusa fuainumera o le tausaga na tea nei ma lenei tausaga ona ua maea galuega faatino o faalavelave faalenatura, a o lea lava e molimauina o lo o agaigai pea i luma galuega fai o le atinae o le atunuu.

I le aotelega lava ia ona o le matou Komiti lea sa nafa ma le lauliuina o le Tala Faatatau o le Tupe, e le toe oo sau faamatalaga i ai ona o lea ua taoto i le Lipoti o se taimi i le lumanai ona saunua manino lea i ai o le Taitaifono. Ae na o nai vaega lava ia ou te fia faapupula atu ma ia avea foi o se tuualalo i le Afioga i le Minisita o Tupe po o le Palemia foi, ona o lau vaai i ai i le \$722,962,208milion, o se... atonu o lea ua pau le fuainumera pe a fua i galuega faatino lea ua maea i le fesoasoani. Ae o lau ia tilotilo i ai, ua lava ma totoe le faasoa lea. O le uiga o lau faamatalaga, ou te fia faaaogaina le faataoto na faamanatu mai e Iesu ia i tatou i taleni e lima, ona faasolo ai lea i le lua ma le tasi. Ina ua avatu taleni ia e lima, o lo o afifi ai i totonu pei o se vaega o se grant po o se isi foi faamatalaina, o le loan, o lea ua avatu e galueaiina ina ia mautinoa ua toe tulai mai lenei tino tele po o lenei vaega i lona tulaga e i ai. Ia o le tala masani lava ia mai le taleni, na toe faalimaina le na ave i ai le lima faapea ma le lua, a o le na i ai le tasi, e le i faamanuiaina ona e ese foi lana ia galueaiina o le tovine ina ia mautinoa ua tulai mai. I le vaavaai la i ai i le Tala Faatatau o le Tupe i le \$722milion lea, o le tovine lea ua aumai ia i tatou uma lava, e le gata la i lona Itu ae faapea foi ma i matou uma, aemaise le mamalu o tamalii ma failauga o lo o ua lautogia o latou nei e faasoasoina ma galueaiina le tamaoiga lea ina ia mautinoa, i lenei Paeiga seia oo atu i le isi Tala Faatatau o le Tupe, ua tataua ona toe tulai mai pe tino mai. Pe le tino mai foi a ia i ai se fuainumera e mafai ona tatou mafaufau i ai e fua lea agai galuega faatino ma le auunaga e talafeagai ma le \$722milion. O lona uiga o le tatou galuega e fai faatasi. E tele le feau lea e aumai i i e le tatou Faaola ia i tatou i le galueaiina o le taleni, ina ia mautinoa ua faaoga tataua le tamaoiga lea ina ia fuafua ma le potu, fuafua ma le totoa, ae le gata i lea ia fuafua ma faaoga ma le alofa le tamaoiga lea. Faafetai lava i le Minisita o Tupe aua e le faigofie le fuafuaina lea, a o tatou nei o lo o galueaiina le tovine lenei, e ao ona tatou vaavaai, e afua mai la i le vaai o meatotino a le tatou atunuu, aua o fale, o taavale, o mea uma nei e faatino ai le galuega, e le o ni mea a tatou, o meatotino a le atunuu. A o tatou nei ua tofia o tatou e vaai ma ia mautinoa lelei ua tino mai le \$722milion lea mo le isi Tala Faatatau o le Tupe ina ia mautinoa lelei o le agaga lona e tataua ona i ai, ona mautinoa lava lea e agai pea i luma a tatou fuafuaga fai. Aua o le upu moni lava, o lenei lava tatou te vevesi aemaise lava aitalafu. O le matou mau ia e tuutuu atu, a o la outou mau, e faifaipea. A o le matou faufautua atu, e leai se mea o i ai i le fai ae fai fuafua. E manaia lava le faasalalau lea ou te vaai ai i le TV, ua aoga foi le faasea i ai a le tele o Komiti ia i latou ia e gaosia le ava malos, e inu fuafua, drink responsibly. Manaia tele le fuafuaina o lona e silafia lelei lava e e gaosia le ava malos, e te oti ai ma e mai ai. A o la e ua toe fai mai, a e fia ola umi ona e inu fuafua lea. E faapena foi la le fautuaga lea e avatu i aitalafu, ae le faapea o le soona fai, e leai e le o i ina Tuivalea. Ou te talitonu lava e le o i ina, o lona e ia te outou le faautautaga....

FOFOGA FETALAI: Malie le sui usufono mamalu se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le fautuaga lea e aumai i le sui usufono e taua tele, a o le mea moni lava lena o lea e fai. O le lalolagi lea tatou te i ai, se o le lalolagi o le tele o le mau faaosoosoga. A o le mea moni lava lea e agai i ai le sui usufono, o le mea tonu lava lena o lea e fai. Mo le silafia e le sui usufono, e faatolu ona tagofia le suesuega lenei, e faatolu. O le suesuega muamua e fai i le va o le Ofisa Sili o Pulega o le Matagaluega o Tupe ma Ofisa Sili o Pulega ma Pule Sili o Matagaluega ma Faalapotopotoga e avatu i ai le fesoasoani. E matua omai uma lava i totonu. E fai lava si umi o vaiaso ina ua uma le mea e tau o le Budget call o auauai mai i le Matagaluega o Tupe. E omai Matagaluega ma talosaga tetele, ae fua lava e le Matagaluega o Tupe i le faautautaga tatau i le fuainumera o tupe o le a maua. Ona uma lea, fai se loan e le Matagaluega o le Tupe, le anoano o le mau talosaga, ona toe aumai foi lea i le Kapeneta, ona toe faagasolosolo mai foi lea o Matagaluega ma Faalapotopotoga e toe auauai mai i luma o le Kapeneta e justify a latou Tala o le Tupe. O nisi lava taimi ua i ai mea ua tipi, ua toe tipi atili, o nisi taimi ua toe faaopoopo e le Kapeneta, ae faaiu mai i le Palemene. O lona uiga e faatolu ona fai le sailiiliga ina ia sau sau lava le Tala o le Tupe ona taunuu tonu loa lea i le mea e tatau ona i ai. O le ala foi lena o lea e omai ai isi mai Matagaluega ma le manatu e toe maua se faaopoopoga. E leai lava ma se faaopoopoga. Na o le pau lava le mea a le Komiti ia e fai o le ooti, aua e le o silafia e le Komiti pe i ai nisi tupe e toe maua na o le pau lava le mea o le vaavaai o le Komiti i le mea e le tatau ma le mea e le talafeagai. A silasila atu le Komiti e le talafeagai fautua mai loa e ooti, aveese. E tusa la e faatolu ona screen le mea lea o le Budget faatoa aumai lea i luma o le tatou Palemene nei ona fai ai lea o le faaiuga faaiu.

Lau Afioga i le Fofoga Fetalai, o le tulaga lena o lea tatou te talanoaina ai le Tala o le Tupe, o le tala o mea e fuafua mo le agai atu i le lumanai. Ia, o le fesoasoani atu lena, ae o le fautuaga lea e aumai, e saolele lava le fautuaga. O le mea foi lena lea e mafua ai ona feiloai le Kapeneta, e tai lua masina ma feiloai e avatu le fautuaga ma le tuualalo, e malamalama lelei ai Minisita Lagolago i le vaega lenei i le mataupu e tatau ona toe tilotilo i ai i atinae o lo o faatino ma mea e tatau ona fai ina ia faatino lava i tulaga aupito silisili. Lau Afioga i le Fofoga Fetalai, o le toe faaopoopo atu lena.

FOFOGA FETALAI: Malo faafetai. Ia, tulai mai se tasi o sui usufono mo Salega, Afioga Afualo Wood Uti Salele e faaiu maia le saunoaga.

Afioga AFUALO WOOD UTI SALELE: Faafetai atu i lau Afioga i le Palemia po o le Minisita foi o Tupe. O le agaga tonu lava lena, e le i fausia ni manatu faapea o le a faaoloataua. E leai o le lagona lava ia e faufau ina ia mautinoa e tasi le fautasi tatou te alo faatasi ai ona maua lea o manuia o le atunuu.

Ia, ona faaiu atu lea o sau upu, aua o le tovine lenei ua tuuina mai tatou te galueaiina ina ia toe fua mai, e i ai lava lona tau. Afai foi e le faamaoni i tatou o le a galueaiina, e i ai lava le tau. E faapena foi le meaalofa lea na aumai e le Alii ia i tatou, lea ua galo ia i tatou. Aua foi o le ola lena lea na

aumai, e le gata o le meaalofa a o le loan na aumai i le Alii e tatou te galueaiina ma tatou ola ai ma tausisia ana poloaiga, ae i ai lona tau, tatou te tutulai uma tai tasi i luma o le Alii e tolaulau pe na tatou galueaiina le tovine lea pe leai e tusa ai ma Lona finagalo.

Lau Afioga i le Fofoga Fetalai, o le a faaiu ai i se manatu o Salega. Ia talosia ia i le alofa o le Atua ina ia manuia le tatou Fonotaga. Ia faamanuia foi i le Palemia ma le Kapeneta, aemaise o le paia lasilasi o tamalii ma failauga ua tofia foi latou te galueaiina le tovine, e faapea foi lenei Itu i le Afioga i le Taitai ma le mamalu o le matou Vaega, ae faamanuia le Atua ia Samoa ma lana tapuaiga. Faafetai.

FOFOGA FETALAI: Malo faafetai saunoa i lau Afioga i se tasi o sui usufono mamalu mo Salega, Afioga Afualo Wood Uti Salele. Ia, e talitonu o le fofoga taumomoli lava lea aua o lea e ee mai le Afioga i le Sao ia Tapuai Toese, o lo o olo pea le fua ma mau iumaea a o malele lau Afioga i le alii Sao aua le molimoliga o le finagalo o le itumalo. Faafetai timai, ua lagona le faamoemoe e ala i timaiga ma tuleiga ma saunoaga ua opea i le Maota i lenei taeao.

Le sui usufono mo Faleata Sisifo, tulai maia e saunoa.

Tofa LEALAILEPULE RIMONI AIAFI (Palauli Sisifo): Faafetai lava mo le avanoa. E muamua ona ou faatulou i le Maota o Samoa i lau Afioga i le Fofoga Fetalai, lau Afioga i le Palemia, lau Afioga i le Sui Palemia ma le paia o le Kapeneta, aemaise o Minisita Lagolago. E faatulou foi i lea Itu i lau Afioga i le Taitai o le Itu Agai ma sui usufono mamalu o lenei Itu. Ia, e fia oo foi se faamatalaga i le Sui Taitai o lenei Itu ona o lona faataotolia i le maota gasegase, ina ia toe vave faafoi e le Atua lona malosi. Ou te talitonu e vave ona malosi le toaina o la e ua maua le tausimai.

E faatalofa atu foi i le paia ma le mamalu o Ofisa Sili o Pulega ma Pule Sili o Matagaluega ma Faalapotopotoga a le Malo, o i latou o lo o vae ma lima i ai le atunuu, aemaise o le faafofoga tapuai mai a Samoa mai ona ao seia oo i ona iu....

FOFOGA FETALAI: Malie le sui usufono mamalu leaga o lea ua e taua le faatafagasegase sa faapea e oo i ai se upu mulimuli.

Ia tulai maia lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, na pau lava le mea ou te fia tulai atu ai, ona e pei e foliga mai i le saunoaga a le sui usufono, e leai ni tausimai a le falemai. So o se gasegase lava e i ai, o la e i ai tausimai. O le ala lena o lea ou te tulai atu ai, so o se gasegase lava e i le falemai, o la e i ai tausimai a le tatou Malo, ona o le agaga lea e momoli atu i tua, e pei o le falemai o se falemai foi lele na ona tutunoa ae leai ni tausimai. O le faamalalamalama lena ina ia faasao lea mea sese e aumai.

FOFOGA FETALAI: Saunoa mai Saleaula.

Tofa Levaopolo Talatonu (Gagaemauga Nu.2): Lau Afioga i le Fofoga Fetalai, masalo matou te mau eseese ma le Afioga i le Palemia. O lau faalogo o le tausima o le mai.

Tofa LEALAILEPULE RIMONI AIAFI: Faafetai. O le tausimai lava ia a le falemai o la e tologi e le Malo, a o le tausimai a le matou Sui Taitai o le tausimai faapitoa, o la e tologi lava e ia i ana tupe.

Lau Afioga i le Palemia, e tasi le tou mai lena e i ai e manaomia le tausimai, o le sui usufono mo Siumu. Ona ou faafetai ai lea i le Atua....

FOFOGA FETALAI: O le mea la lea na ou musu ai, o lea o le a agai le mea i le au mamai ae o lea e fai le tatou Fono.

Tulai mai le sui usufono mo Siumu.

Tofa Hon Tuuu Anasii Leota (Siumu): Lau Afioga i le Fofoga Fetalai, o le mea e fia faasao, ou te le o mai. Aua le popole e foai mai lava e le Alii le tausimai pe a ou mai. Ma lou faaaloalo.

FOFOGA FETALAI: Tuuu e fia ni au tausimai o i ai?

Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Ona faafetai lea i le Atua i Lona agalelei ia Samoa ma lana tausiga, amuia i tatou o lo o ala mai i le fiafia ma tatou omai e faasoa nei mau tupe. E tele atunuu o le lalolagi ma tagata o lo o mafatia ma puapuagatia i taua ma fevaevaeaiga, a o Samoa o lo o manuia ona o le faamalumalu mai o le Atua i mea uma tatou te faia.

Faafetai i lau Afioga i le Palemia ma le mamalu o le Kapeneta i le tele o galuega lelei o lo o faagasolo ona o le tele o nei mea ua tatou miti i ai. O le miti a Farao, na ona miti ae leai se isi e faamatalaina ana miti, a o le miti e miti ai tatou, e miti ona faamoemoe lea ma faalagolago i le agaga o le Atua e musuia Taitai i le mea e agai i ai le miti.

Lau Afioga i le Taitai o lenei Itu, o oe o Iosefa e faamatalaina le miti, ae le o le miti o oe toe miti ma oe ona le iloa lea pe faapefea ona fai le tatou Malo. Ia, lou itumalo, malo le tapuai, o le itumalo o Faleata mai sasae seia paia sisifo, ma o le taulaga lona lua o Samoa, lea ua ave atoa i ai le malosi i lenei vaiata, e avatu le faamalo, faafetai. Sa matou asiasi ma le Komiti o Tupe i Faleata i le vaiaso na tea nei, ua saunoa mai nai sui usufono, "Amuia oe Leala e fai e le Malo lau campagn." E leai, o fuafuaga ua leva ona faataatia mai. O le itumalo o lo o i ai le manuia ma le filemu, faafetai.

A o nai mea laiti ia lau Afioga i le Fofoga Fetalai e fia molimoli atu, o le auala foi lea e i Laloanea lea matou te galulue ai ma le Tofa Aveau, ona pau lava lea o le auala galue e toatele tagata o lenei itumalo e galulue ai. E le gata i lea o le auala lea i Toamua lau Afioga i le Minisita, faafetai. Na sau lava lenei auala i le tatou lisi mai le amataga o le Paeaiga, faafetai e le i aveeseina aua atonu e oo i ai lau faatatau i se taimi lata mai.

O lea foi ua faatalanoaina le uafu, e momoli atu le faamalo i nei atinae tetele e aoga ma talafeagai mo lea vaega o le atunuu.

O le Ofisa o Leoleo i Faleata lau Afioga i le Fofoga Fetalai, faafetai o lea ua taua e le Matagaluega o lea ua lavea i le Tala o le Tupe lenei le toe faateleina o lenei Ofisa ona e moomia tele.

O le fonotaga lea e fai mai i inei, e momoli atu le faamalo. E ova i le 190 atunuu, o lona uiga o le taimi muamua leni i le tatou augatupulaga ua fai mai ai leni fonotaga, ae tatou te le iloa foi po o fea nisi augatupulaga e toe fai mai ai i inei se fonotaga faapea. E ave i ai le lagolago ina ia manuia le usuia o leni fono aua o le taligamalo a Samoa atoa. O le mea e aupito sili ona taua i le vaai o le agai i luma i le mafai lea ona faaaogaina pea o nei fale e o tatou tagata e faatino ai fonotaga faapenei. O le vaega taua lea tatou te tepa taulai i ai ina ia faatauaina leni fonotaga. Ona ou oo mai lea lau Afioga i le Fofoga Fetalai i le Tulafono Tau Faaofi o le Faatatauina o Tupe Faaopoopo (Nu.2) 2013/2014 ma le Tulafono Tau Faaofi o le Faatatauina o Tupe 2014/2015.

Muamua, e ave le faafetai i le Minisita o Tupe sa i ai muamua i tausaga ua tuanai atu. Ou te talitonu ua faigofie foi leni Tala o le Tupe ona o le lelei o le faagasolo mai o Tala o Tupe i tausaga ua tuanai. E avatu le faamalo i lea tamalii le Afioga i le sui usufono ona e tele sona sao i le atinae o Samoa.

O le Tala o le Tupe ua tatou masani ai, e faigata tele ona faamalie o tatou manao ma e faigata foi ona siitia tupe maua mai lea tausaga i lea tausaga. A o le tuualalo a tatou nei le Palemene i le faasoia ina ia lelei ona fuafua ma faatatau. Ia tatou fesoasoani i auala e faaono faasaoina ai ni tupe ma ni auala tatou te talitonu e faaono faaopoopo ai ni a tatou tupe.

Lau Afioga i le Fofoga Fetalai, sa ou fesili i le Afioga i le Sa’o ia Tapuai aua o le ma lauga faatasi, ona o lea ua saunoa Afualo i nisi o vaega. Na ave i ai lau note, “Lau Afioga Tapuai, o le a sou finagalo, e faaopoopo aitalafu pe toese?” Ua ou faanoanoa ina ua aumai le pepa a le toeaina e faatolu ona circle le faaopoopo. E faaopoopo, faaopoopo, faaopoopo, ua faafetai Tapuai o lea ua faaleo lou finagalo. A o lau fautuaga aua o lea ua avatu le fautuaga a Afualo, o le fautuaga lena tatou te mafaufau i ai.

Ona ou oo mai lea lau Afioga i le Fofoga Fetalai i le Matagaluega o Faatoaga ma Faigafaiva. Tatou te fiu e fealofai, ae tatou te iu lava i le Matagaluega o Faatoaga. O i ina o le fatu aua e maua ai galuega, o le fofoga taumafa ma maua ai oloa e ave i fafo. Faafetai i lau Afioga i le Minisita i le faailoga faapitoa ua e maua ma lau Matagaluega. Faafetai i le sao o lau Afioga i le Minisita ma le paia o le Matagaluega. Ua faamalieina ia vaega i MDG’s ia na aumai.

Sa matou malaga ma le Afioga i le Sui Fofoga Fetalai, sa lauga i o i Aferika i le mataupu leni i Millennium Development Goals. Sa ia faamamafaina ma ia taua, se o le mea leni o le food security e le o se faafitauli ia Samoa, ae faafetai i lea vaega. Ona pau le luitau lea ua feagai ma oe, o nisi o oloa ia tatou te tilotilo i ai e ave i fafo pe faapefea ona fai aemaise o ni au fuafuaga e fai i le talo lea ua tele. O se galuega e fai faatasi ma le SROS pe e le faaono mafai ona faaoga e fai ai meataumafa a pepe po o nisi mea lelei. O le mea lea e fia fesili ai i lau Afioga i le Minisita o le chilli sauce foi lea e fai i inei ia tatou, e le faamalieina le maketi ona o le moomia tele. A o le tala lea ua maua mai i le aiga lea o lo o faia le sosi, o lea ua aumai i fafo le polo lea e faaoga e fai ai ona o le tala mai e le mafai ona toto faafaatoaga le polo i inei. Ou te le talitonu i lea tala aua a tagai i ai lau Afioga i le Minisita i le totoina o le polo lea ua faafaiilele nei ma toto e le vaega lea, ua matua tele le polo lea ua i ai. O se mea e le talafeagai i lou talitonuga le tatou o aumai polo mai Fiti, a o lea e maua i inei le polo e fai ai le sosi lea, a o le sosi lea e aupito sili ona lelei i le taumafa i le lalolagi atoa. O le tasi leni export ou te talitonu e le tau sueina se maketi.

O lea ua tele le sao o nisi o tamalii i le aniani lea ua i ai nei. O mea ia e tatau ona o e lagolago aua o le mea tonu lea na fai mai ai le mea lea o le SACEP, o le aumai o tupe ina ia atiae tatou e substitute ai e sui ai mea ia mai fafo ma oloa mai fafo ina ia mafai ona faatino iinei ma maua e tatou.

Sa taua ananafi lau Afioga i le Fofoga Fetalai mea nei o i'a. O le saunoaga lata mai nei lava a le Failautusi o le UN lea o Mr Moon i le fono lea e lumanai mai ia tatou na ia faamamafa ai i atunuu laiti, ia ave le faamuamua i ogasami i oloa o lo o i ai, o i ina e maua ai galuega, tupe maua ma meataumafa. O le mea la lea sa naunau i ai le Komiti ina ia mafai ona taumafai e ausia le tatou quarter lea e aumai i tausaga taitasi e 4,800, le quarter lea e aumai e mafai ona pueina i totonu o tatou ogasami. O le aofai o tupe e mafai ona maua mai i nei tone e ova ma le USD\$20milion. O le a la se faiga se i tagai i ai le Matagaluega ina ia mafai ona tatou maua. Pe na o le afa po o luga atu aua na o le 1,200 tone lea e maua i le tausaga. E matua maualalo tele. Pe e le faia ni faiga paaga ma nisi e aumai e fagota iinei i Samoa i ni vaa tetele e fesoasoani i ai ina ia maua mai lenei alatupe.

Ona ou oo mai lea lau Afioga i le Fofoga Fetalai i le Minisita mo Fesootaiga ma Faamatalaga Tekonolosi. Lau Afioga Tuisugaletaua Sofara Aveau, ou te talitonu ua faatiga taliga i lau Afioga le tau o le mea lea o le internet. O lea ua e saunoa manino i auala, lau Afioga i le Fofoga Fetalai se i tagai vave ane i lea tulaga aua e pei o le tali lava lea o lo o tuuina mai, ae se i alofagia o lena ua e saunoa ma faamaonia le tupe lea e taugata tele, ae e tuu atu i ina se i e tagai ane i ai faamolemole ina ia vave maua se tali o lea vaega.

O le isi vaega taua i lau Matagaluega lea o le Regulator, o tupe ia e maua mai i le BlueSky ma le Digicel. A tagai lau Afioga i le Minisita i le lima tausaga ua tuanai, o lea e tumau lava tupe ia e maua mai i a latou polofiti e 2%. O le mea matautia e oo mai i le kuata mulimuli lea na aumai ai le tupe latalata mai nei, ua tutusa lelei lava tupe ia e aumai e le BlueSky ma le Digicel. A silasila i ai toeitiiti faaluaaina customers a le Digicel pe a faatusa i le BlueSky. E tatau ona tagai lau Afioga ma tilotilo lelei po o talafeagai aua tasi ia tupe misi a tatou aemaise overseas calls. O lena e silafia e lau Afioga i le Minisita ma le Malo, e tasi ia tupe tele a le Samoa Post i aso ia, o calls ia mai fafo. O i ina e talitonu o lea e taaalo ai le vaega lea, se i tagai lelei i ai aua e tele lava se tupe e maua mai i ina e fesoasoani ai i le tatou paketi ma Matagaluega ma tagai lelei i ai ona o lea e pei e alu i lalo tupe maua, a o le mea e tatau ona alu i luga. O lea e fetuutuunai e le vaega lea a latou polofiti, ae tele ai le lusi o le Malo. Se i silasila ane i ai lau Afioga i le Minisita i le vaega.

Ona ou oo mai lea i le PSC, e pei ona o lea sa taua e le sui usufono ua tuanai atu. Lau Afioga i le Fofoga Fetalai, ua maua i le faatalanoaina o le Tala o le Tupe le siitaga fou a le aufaigaluega a le Komisi o Galuega a le Malo. Ae e muamua ona avatu lau faafetai i lau Afioga i le Minisita ma e faamalulu atu - ae faamalo mo lou valaauina ua talafeagai lou tofiga i ou agavaa, aemaise o lou naunau ia Samoa. O lena ua avatu lau tusi i lau Afioga i le Minisita ae kopi i le Afioga i le Palemia. Ua faafetai o lea foi ua tali mai lau Afioga. E pei e foliga mai e lelei ona avatu se faamalamalamaga lelei i lau Afioga e le Matagaluega. O lea ua faamaonia i le Tala o le Tupe i le vaega lea o Principal level ma a latou senior staff. O lena ua avatu le fautuaga a le Komiti o Tupe Maua ma Tupe Totogi lau Afioga i le Palemia. E tatau ona taofi ona e le talafeagai. E le tusa ma faiga faavae ma le finagalo o le Malo ina ia laugatasia

tagata uma. E le faatusatusaina foi galuega a ai, ma ai, ma ai. E tutusa le sao o tagata ma le finagalo o le Malo i mea nei.

Lau Afioga i le Minisita, se i tagai ane i ai i le vaega lea aemaise le tofiaina o tulaga nei o ACEOs, se i toe tagai ane i ai lau Afioga i le Minisita i le Tulafono. Ua matou talitonu ua faaoga sese le paoa lea ua avatu. O lena e afio mai i ina le Minisita e aupito sili ona lelei o le Kapeneta, le tama matua ia Tuiloma sa Taitaifono i le Komisi. O tua atu o lena e afio mai ai le Tuiatua o le sa avea ma sui o le Komisi sa i ai lata mai nei e malamalama i procedures ma mea nei. E tatau ona tagatagai i ai ae sui le Tulafono, ave se aiatatau ia i latou nei e fesiligia ai pe aisea ua aveese ai. O le human right o le mea e tatau ona fai lau Afioga i le Minisita. Ia manuia lou tulai mai i le tofi. O mea ia e laulau atu e faigofie lava ona e faia.

Lau Afioga i le Minisita mo Aoga, Taaloga ma Aganuu ua faamalo. O le mea lea e.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.....

FOFOGA FETALAI: Malie le sui usufono o lo o saunoa se i vavae foe.

Susuga Hon Tuilaepa Fatialofa Lupesoliai Aiono Neioti Sailele Malielegaoui: E peiseai o mea ia e te taua, o mea lava ua leva ona mafaufau ma fuafua i ai. O lea foi ua uma ona tapena o se taimi ona toe vaavaai lea i ai o le Kapeneta, ae ua uma ona tapena Teuteuga o le Tulafono i mea tonu lava ia e te aumaia. Ua ou le iloa pe na musumusu atu se isi ia te oe, a o lea la ua ou vave tulai atu e tau atu ina ne i te i foi ua aumai le mataupu ae toe faapea mai, “Ana leai au e le faia.”

O le ala lena ua ou vave tulai atu ai e tau atu, ua leva lava ona taoto le ata o le Tulafono ma Teuteuga ina ia puipui ai i auala tonu lava ia ua e aumaia.

Tofa LEALAI PULE RIMONI AIAFI: Faafetai lava i lau Afioga i le Palemia.

FOFOGA FETALAI: Mo le fia faasaoina o lou taimi leaga o lea sa e taua le tama matua ia Tuiloma.

Tofa Hon Tuiloma Lameko (Minisita mo Tupe Maua): Lau Afioga i le Fofoga Fetalai, ua ou tulai atu lava ma le faaloalo i se mea e fia faasao.

Ona pau lava le mea e tasi lea e fia faasao, ou te le i Taitaifono ae sa ou i ai i le Komisi. O au o se tasi o le Komisi sa i totonu o le Public Service Commission. Ou te le i Taitaifono ae sa avea au ma se tasi o Komisi.

Tofa LEALAI PULE RIMONI AIAFI: Ia manatua foi le taimi lea sa ta galulue ai, a ou alu atu nei e pei lava oe o le Taitaifono. O lea la ou te sese ai lava aua na ou faapea e te taitaia fono ae le taitaia e le isi vaega. O lea ou te taumafai e faamapue oe le tama matua.

Lau Afioga i le Minisita mo Aoga, Taaloga ma Aganuu, o le mea lea e faanoanoa ai lou loto o le tulaga lea ua i ai le lakapi i Samoa. O aso ia a o tatou aoga, e te lakapi lava mai le grade 1 e tau i luga i le Form 6. Sa lelei le faiga o taaloga i totonu o aoga. O lea la ua fua mai nei i luga i taaloga ia a au

FOFOGA FETALAI: Ou te faasilasila atu ua toe amataina nei Tualumaga a le Fono Aoaofaitulafono.

E talitonu ua tatou taunuu mai i le maea ai o le tatou faiga malologa o le taeao, ma e i ai le manatu maualuga ia ua faafoisia le malosi i le tino e ala i le tatou taumafagati, e momoli atu ai pea le faafetai ma le faamalo i le paia ma le mamalu maualuga o le tatou Maota ona o le faaauauina o le tatou galuega.

E i ai le talitonuga o le aso e tataua pea ona faamaea lelei ai le tatou Tala o le Tupe pei ona faapolokalameina ona tatou see ese atu ai lea i nisi foi o polokalame ma fuafuaga ua uma ona faataatia mo galuega a lo tatou Maota.

E faia le tatou malologa o saunoa lau Afioga i le sui usufono mo Faleata Sisifo, ia tulai mai le sui usufono mamalu e faaauau le saunoaga.

Tofa LEALAILEPULE RIMONI AIAFI: Faafetai i lau Afioga i le Fofoga Fetalai, aemaise foi o le paia o le aufaigaluega i le tausiga.

Lau Afioga e pau lava nei o le aso e tausami lelei ai nai sui usufono, e uma tupe ona ave i itumalo ae leai se tupe e ai ai, ae faafetai manaia le taumafataga i aso uma ifo le fono ua ta alu fiafia ua ta maona lelei, faafetai.

E fai le tatou malologa o saunoa le Afioga i le Palemia i lakapi ma fusuaga, o le lakapi lea na fai i le Paka i le Aso Toonai lau Afioga, leaga e toalua ulupopoo na taaalo, o le ulupoo la lenei sa malo ai le au, a o le isi ulupoo lea e i tua i i, pei o le tagata lena o lea sa faaletonu ai le au lea e saunoa i ai le Afioga i le Palemia, ioe. O mea foi o fusuaga.....

FOFOGA FETALAI: Se i tulai mai le sui usufono mo Aleipata Itupa i Luga, leaga o lea ua tatou oo i mea tau ulupopoo.

Tofa Fagaaivalu Kenrick Samu (Aleipata Itupa i Luga): Lau Afioga i le Fofoga Fetalai o le mea e fia faasao.

FOFOGA FETALAI: Ia sa e sikoa?

Tofa Fagaaivalu Kenrick Samu: Lau Afioga o le tagata aupito sili lava lea na faaletonu ai le au i le Aso Toonai o Lealailepule, ioe, o le mea tonu lava lea e tau o le....e sao ai le tala a isi toeaina i le Aso Toonai, oi se e lelei lau ulupoo e lelei, a o le ulupoo le la o le ulupoo malovale, vaeatu le....

FOFOGA FETALAI: Oi ia ai o se faatagata na avatu e teuteu ai le malae pe a faapea.....

Tofa LEALAILEPULE RIMONI AIAFI: Ona oo lea o lau tala i fusuaga. E tasi lea, faafetai i le alo o Samoa lea o Alex Leapai, se faatoa o ta ai lava lea i se tupe a se tama fusu, faafetai faamanuia le Atua i le alo o Samoa, manaia lana taumafaiga, e moni lava i le tulaga na i ai le fusuaga, ia faafetai ua fusu i le fusi o le lalolagi, ioe, o le mea la lena o lea e fai atu ai, tasi lea atinae i aoga. Ina ua uma le fusuaga foi lea sa ou fusu ai, e foi mai i le fale ua fetagisi ou matua, ou fai atu, o le a le mea ua tupu? Fai mai le toeaina, son, ua ou toe salamo, ana ou iloa e le tele ina e alu i le aoga ae ave oe e faafusu, faapenei ua e siamupini i le lalolagi, ioe, o le isi la au paga e sosoo ai, o le ulupoo lea.

Lau Afioga i le Fofoga Fetalai, ona ou oo mai lea i se tasi o mataupu taua lea na laga e nisi o sui usufono i le faatupulaia lea o...ia tatou faaigoa ia o tagata Asia i le tatou atunuu, e tautala lava au i lou itumalo, ia ua tele ina tapunipuni faleoloa o nai tagata, o lena e te silafia lau Afioga, ua tu ai se faleoloa tele. A o le mea la e matautia, e o faatasi lava le wholesale ma le retail i le faleoloa e tasi, e tasi lea vaega o lea sa lagaina pea e le Afioga i le Sui Palemia ma lau Matagaluega ua saunoa mai, o le a fai i ai se fuafuaga i le tulafono lea, a e alu e te wholesale, wholesale, ae tuu le retail i nai isi tagata e ola ai latou, a o le tulaga lena o lea e i ai, e le afaina i lou taofi le omai o tagata i totonu o le atunuu o lea e moomia le tele o tagata e omai e atiae i totonu o Samoa.

FOFOGA FETALAI: Ia se i tuu atu i le Minisita e ia le Matagaluega, tulai mai lau Afioga i le Sui Palemia.

Tofa Hon Fonotoe Nuafesili Pierre Lauofo (Sui Palemia, Minisita mo Pisinisi, Alamanuia ma Leipa): Lau Afioga i le Fofoga Fetalai, e mo le silafia e le sui usufono mamalu, ona o lea ua taua le tulafono lea, ou te talitonu o le tasi foi lea tulafono taua, masalo ua e silasila i le nusipepa o la ua faasalalau ia le faatalanoaga e uiga i le Tulafono la lea e taua ai ia mo Wholesale ma Retail, o la ua faasolo ia faatalanoaga i le vaiaso nei ma le vaiaso lea i Savaii i luga o le Tulafono o la ua uma ona tapena, ae mo se ata faatitai foi lea, ia ona oo mai lea i se aso o lenei foi tausaga i totonu o le Maota.

FOFOGA FETALAI: Malo, faafetai i lau Afioga i le Palemia. Tulai mai le sui usufono.

Tofa LEALAILEPULE RIMONI AIAFI: Faafetai i lau Afioga i le Sui Palemia. E tasi lea tagata malosia o le au a le Golden Oldies o le CEO a le Sui Palemia, e manatua la, ou te le tetee i le aumai o tagata e atiae le tatou atunuu, pau lava le mea i lou talitonuga e tataua ona omai ma aumai, aumai ni tupe fou, aumai ni atinae fou, ia aua le omai e toe tauva ma o tatou tagata, ae aoga. O le Tulafono foi lea ua faaataata mai i le tagata mai fafo, Citizenship Act, pei ua tuai ona aumai i lou talitonuga, o lea ua sao mai i totonu isi tagata la ia, aua sa tataua ona ave ni special conditions i tagata ia lea e omai i inei e faaalu a latou tupe i inei, tai pei o mea ia ia limit a latou aiatatau aemaise lava i mea ia o le faatauga o fanua ia ma tulaga faapena, o mea na. O tagata ia e moomia e tatou, o tagata ia tusa lava pe le sau ae lafo mai na o le tupe e invest i inei, a o le mea ua tupu, ia o lea la ua...o tagata ia ua i inei, ia o le tulaga faigata lena, ona ta alofa ai lea ia tatou i le agai i le lumanai, ae taatia atu i ina, e leai lava se isi tatou e le o ola i Samoa ma tagai ma silafia le tulaga ua tupu.

Lau Afioga i le Palemia, o lea ua sii i luga le tamaoaiga o Samoa ma lona tulaga i le faataatiaga o atunuu tetele o le lalolagi, o le tulaga lelei lea o lea e iloa ai le atunuu o lea e alualu i luga, i luma lona atinae ma ana taumafaiga mo tatou uma. O le a se fuafuaga a lau Afioga ma le Malo i le mea lea o le retirement age, ia aua o lea e tumau i le 55, pe le i ono talanoaina lea vaega, o lea ua siitia i luga le soifua uumi o tagata ona o le lelei o le soifua maloloina, lelei atinae, o lea ua tulaga mai ua 70 tausaga i tama tane, ae 72 i tamaitai, o se tulaga lelei lea, ua umi ona soifua tagata, ia pei o se taimi lenei e tataua ona

tagai i ai aua o la foi ua fai e isi atunuu, o lo o iloa ai foi o lo o alualu ai foi i luma le tamaoaiga ma le tulaga atiae o le tatou atunuu i le tulaga lea e i ai nei, se i tagatagai ae i ai, e moni e taugata.....

FOFOGA FETALAI: Malie le sui usufono, se i tuu atu le avanoa i le faaulavea a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, se i aumaia sou finagalo, o le a le taimi e tatau ona e manatu e te litaea ai?

FOFOGA FETALAI: Tulai mai le sui usufono.

Tofa LEALAILEPULE RIMONI AIAFI: Faafetai lava i lau Afioga, ia afai o lena e te malosi, o lena e te saunoa mai fai mai o lou fatu pei o le fatu o le tarako, ia o le a la le taimi e tatou te.....e le tatau ona tatou litaea vave? Ae o lou talitonuga i le aufaigaluega lava ia a le Malo, manaia le tuu i luga i le 60 tausaga, e tilotilo agai i ai.

FOFOGA FETALAI: Ia se i toe tuu atu le avanoa.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e i ai le mafuaaga, o la e manaia le saunoaga a le sui usufono, e i ai le isi Tulafono Tau Faaofi lea e tapena mai tonu lava i le vaega lea, ae pau lava lau fesili atu, o e malamalama a talanoa loa i le mea lena ua aafia foi ma le penisione?

FOFOGA FETALAI: Ia tulai mai le sui usufono mamalu.

Tofa LEALAILEPULE RIMONI AIAFI: Lau Afioga i le Palemia a o le fautuaga e tuuina atu, aua o lea e tatou te vaai i ai i le ola uumi o o tatou tagata la ua i ai ma le manuia ua i ai tatou, e lelei foi lena e latalata atu ai i luga i le taimi foi lea e saina ai lou litaea i le 65.

Ona ou oo mai ai lea i le NPF, faafetai lava i le Ofisa Sili o Pulega ma le Faalapotopotoga o le NPF.....

FOFOGA FETALAI: Malie le sui usufono, tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o mataupu nei tau litaea, e le o se mataupu e te manatu loa e litaea, litaea, e tele lava mau vaega eseese e tatau ona e vaavaai i ai, o lea sa ou taua ia le tulaga o penisione. E ala ona ou taua le mea lea, leaga ua fai soo lava e outou le mea lea, e fautua, fautua i se mea ae aumai le Tulafono Tau Faaofi i i, ua ou faalogo atu, ua ese le mea ua outou sau ai, ua matua outou tetee lava. O le tulaga faigata lena o le mea o le talia o a outou fautuaga, a o lea foi sa tatou talanoa i le Tulafono Tau Faaofi foi lea, tauanau, tauanau, tauanau le Tulafono Tau Faaofi e aumai, aumaia, aumaia, i le Teuteuga o le Tulafono o Faiga Palota. O lea ua amata ona lesitala tagata ae le i aumaia lava se Tulafono, ae aumai foi le Tulafono, ae

toe tutu ae foi fai mai ua televave foi toe tuu atu i tua. O uiga na lau Afioga i le mea o le tu i luma tu i tua tu i luma tu i tua, ua amata ai ona ou le mautonu, e oo lava foi o lea e saunoa mai isi i le tulaga o lo outou saunoaga e ese le taua, ia ae tu mai foi le Taitai ia fai mai e leaga na mea. O le ala lena lau Afioga, ae le mafai ona fai sa outou faiga foi lele, tou te talanoa muamua ina ia aumai so outou manatu e aumai e tasi moemoe, i lo le felautoai, ona aliali mai ai lea o se vaega, e le o lelei ona tapena.

FOFOGA FETALAI: Ia o le a avatu le avanoa, lau Afioga i le Taitai o le Itu Agai.

Afioga Hon Palusalue Faapo II (Taitai o le Itu Agai): Lau Afioga i le Fofoga Fetalai o se mea e fia faasao. A faafogafoga lelei mai lava lau Afioga i le Palemia, o le manatu lava lea e avatu, fuafua lelei aitalafu, matou te le o fai atu e taofi aitalafu, fuafua lelei, o lea foi na e saunoa i ai aneleila e talifuitau i le saunoaga a le sui usufono mo Salega, fuafua lelei, o le matou autasiga lena. A o le tulaga i le penisione a nai tagata matutua, o lea lava matou te pesepese atu, e \$125 i le masina, pinati, pinati, pinati mea na. A ia e silasila lelei, o lea e maua atu nei le 65 tausaga le matua o lea ua maua.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ia vaai la i ai i le mea la lea na ou fai atu ai, o le mea lea le Taitai o le Itu Agai, seiloga lava sa e lauga muamua i se mea faatoa e tu mai lea e faalauaitete se mea, point of clarification, o mea lava na sa sau ai lava le Maota lenei, seiloga lava e te lauga muamua ona e faatoa tu lea i luga e faamalamalama se mea, ae ua e tu soo lava e faamalamalama, faamalamalama, faamalamalama, a o lea e te le i lauga. Na o lou faalavelave i lauga a isi o lau Vaega, a o lea lava e te le i lauga.

Afioga Hon Palusalue Faapo II: Lau Afioga, o lo o manino lava i le Tulafono Tumau, a i ai se mea e fia faasao.

FOFOGA FETALAI: O le Tulafono Tumau, e leai, e te le faasaoa le faauilavea.

Afioga Hon Palusalue Faapo II: E le o se faauilavea le mea lea, o le tuuaiga mai ia matou.

FOFOGA FETALAI: O le faauilavea i le lauga a Lealailepule la e fai. E le mafai ona e tulai e fai sau saunoaga agai i le faauilavea i se lauga. O le Tulafono Tumau lena. A o lea lava e avatu o le ava tele atu Palusalue. Ae fai foi ma e ava mai o lea e ava atu. Lealailepule tulai mai.

Tofa LEALAILEPULE RIMONI AIAFI: Ia faafetai o le a ou mei ese ma lea vaega. Ona ou oo mai lea i le NPF. Lau Afioga i le Tamaitai Pule ma le mamalu o le aufaigaluega, ou te lauga pea lauga pea i lenei mataupu i tausaga taitasi. Pe tiga ai o outou fofoga, ae faafogoga mai pea. O le interest rate lea e i ai, tului a nai tagata foi nei i a latou personal loans, se i alofa tuutuu ifo i lalo ona umi lava lea ona outou feola ma outou manuia. O le mea lea e sau nei i le siitaga lea e sau nei, e le toe oo i ai sou leo, a o le mea lea o

le tului lea, o lena e sau i le Tulafono e tataua ona 4% e ave i le dividend foi lele as a minimum. Ia ana tuu foi i ai ma le 4% i interest rates a nai tagata, aemaise lava personal loans se i atiae nai aiga ma ave le tupe i tua e faataamilo le mea ona lelei lea. O lea e pisa solo i se car park ua leai ni mea e paka ai taavale. O le mea lea ua tupu, ua fai faletetele ona faaavanoa lea o car park e paka ai le afaigaluega ae o atu tatou nei e o i feau ua leai ni mea e paka ai. Manaia le fanua foi lea o outou i le va ma le SLAC, faatu ai se tatou car park i ina e amata i se fogafale tolu pe fa e o atu tagata e paka ai ma fai a latou feau ma savavali solo i le taulaga, sefe taavale e maua ai foi sina tou tupe. O nai mea e fesoasoani ai, o fautuaga i lau Afioga.

Ona ou oo mai lea i le Soifua Maloloina, oi leai, faamulimuli aua leaga e uma ai lou taimi. Ona ou oo mai lea i le LTA, e avatu le faamalo ma le faafetai i lau Afioga i le Minisita ma le afaigaluega. Se e anoanoai manaoga o sui usufono e avatu ae utiuti lau faasoa ae malo galulue, tele galuega lelei o lo o faatino. O le mea lea na fautuaina muamua lau Afioga, o amioga a avetaavale i luga o auala, i awareness programme, aemaise lava i laina ia agai atu i i, ua tele taavale lavevea. O mea nei o pasi e le tutu i bus stop, o le mea lea o taavale lemu, aua o lea o le a toe faatele le auala. E manaia lau Afioga ae toe... a leai se isi e faia, toe aami mai se tasi o sui usufono mo Falealili, Tofa Tusa Misi Tupuola. O ia lea na faia le suiga o le itu auala, e ese le atamai o le tagata i ana faaupuga malie, e tiga ona ta ita, ae ata lava i ai. E tataua ona fai ni aoaoga, e o i traffic lights ma mea uma, e tataua ona fai ma faamalalalama i o tatou tagata lau Afioga. O le mea foi lea e maitauina, o le...

FOFOGA FETALAI: Malie le sui usufono ona o lea sa e taua le suafa o le sui usufono. Tulai mai se tasi o sui usufono mo Falealili, Tofa Tusa Misi Tupuola.

Tofa Tusa Misi Tupuola (Falealili): Lau Afioga i le Fofoga Fetalai, ou te tulai atu ma le faaaloalo e fia faamalalalama se mataupu lea e saunoa i ai le sui usufono mamalu. E sao le sui usufono i le tulaga o lo o i ai nei avetaavale, ae le faapea o la e fai le galuega a le Ofisa ia o le fai o a latou polokalame, ae pei e tausolomua lava i le toatele o le Maota lenei le mea lava lenei o le talanoa i le telefoni ma o i luga o le aualatele, aua e fiu lava nai tama, e vaai mai loa le vasega o leoleo aemaise foi o ATOs a le LTA, o le mea lena o lea e tupu ma le faaaloalo. Ae sao lau Afioga.

Tofa LEALAILEPULE RIMONI AIAFI: Lau Afioga i le Minisita, o le mea lea e maitauina, pei e i ai se feteenaiga i le va o alii leoleo, traffic ma le vaega a le LTA lea e vaai tatou taavale. O le talitonuga, o le malosiaga o le Tulafono o lo o i aao o alii ma tamaitai leoleo, ae ao ona galulue faatasi i le faamalosiga o le Tulafono aua e ulagia ai ma taumamaina ai foi nai tagata Ofisa pe a....

FOFOGA FETALAI: Malie le sui usufono se i tuu atu le avanoa i le Minisita mo Felauaiga. Tulai mai lau Afioga i le Minisita.

Afioga Hon Manualesagalala Enokati Posala (Minisita mo Galuega, Felauaiga ma Atinae Eseeese): Lau Afioga i le Fofoga Fetalai e leai, o le

faasaoga o lea mea e le o i ai se feteenaiga, o lea e afio atu le Afioga i le Minisita mo Leoleo. O la e ua faatalatalanoa nisi o vaega e toe teuteu ai le vaega o le faatinoga o galuega ia. Atonu afai o le a oo i se isi taunuuga, e mafai ona oo i le Kapeneta e fai ai sana faaiuga pei o le vaega lea. Ae leai se feteenaiga o i ai i le tulaga lea. Ma le faaaloalo.

Tofa LEALAILEPULE RIMONI AIAFI: Faafetai lava i lau Afioga. Ona ou oo mai lea i le Matagaluega o le Soifua Maloloina lau Afioga. Lau Afioga i le Minisita ma le Matagaluega, faafetai mo le falemai fou ma tulaga uma o i ai. O lea foi ua uma ona avatu finagalo o nisi o sui usufono o lenei Itu i le Health Promotion Bill. Na pau lava le vaivaiga lau Afioga e tatau ona toe tagai i ai, o lenei Tulafono ua maua ai ina ua faatalatalanoa le Tala o le Tupe, na fesiligia le Matagaluega o le National Health pe na faatalanoa, e le i faatalanoaina. Na fesiligia le asosi o fomai pe na faatalatalanoa, o le tali lava lea e tasi. I lou talitonuga i le mea o le health sector, e tatau ona faatalatalanoa uma i tagata o lo o aafia i le health, le soifua maloloina, ona tuu mai ai lea o se Tulafono ua atoatoa ma lelei. A o lena ua toe tuu atu i lau Afioga ma le Susuga i le Pule o i ai nei, se i toe tagai lelei i lea vaega. O le mea lea ua tulai mai lau Afioga, ua toe faatupulaia le mai lea o le lepela ma le TB. O lea ua alu foi i luga le numera i isi atunuu o le Pasefika, ia a o totonu o le tatou atunuu. Se i tagai lau Afioga i ai, leaga o au e taua tele ia te au le vaega lea lau Afioga, leaga o le mea lea sa ma feoi ai ma lou tina a o ou laititi e faainu vai a lepela ma TB. O la e silafia e le Minisita o le Soifua Maloloina ma le Minisita mo Faatoaga ma Faigafaiva, matou te taamilo solo i nuu i Savaii ma nuu i tua ma si ulugalii papalagi mai Siamani o Carol ea po o ai le igoa o le fafine i le la taavale, ma te feoi ai e faainu, fale o lepela, fale o le TB, e faainu vai, ioe. E oo mai la i le taimi lena, toetiiti lava mama ese uma le mai ma i inei i Samoa. A o le mea la e faateia ai i lipoti nei lata mai, ua toe faatupulaia nei mai. Lau Afioga i le Minisita, o lena ua taatia atu i lau Afioga e te toe tagai i ai.

O le faaletonu lea e i ai nei i le Matagaluega o le Soifua Maloloina ma le agai i luma pe a maea le fale fou, o le pili o le moli, o le pili o le moli. I lau tilotilo i ai i le Tala o le Tupe, a maea, o se mea o le \$3miliona i le tausaga e alu i le pili o le moli ona o le fausaga o i ai nei. A o le Lipoti ua tuuina mai, leaga o la e charge atu latou i le commercial rate e le Faalapotopotoga o le Malosi Tau Eletise. Ia, lau Afioga i le Minisita, se i tagai ifo i lea vaega mo le agai i luma, aua o le pili e totonu uma lava e tatou.

Ona ou oo mai lea lau Afioga i le Minisita mo Tina ma Tamaitai, Atinae o Nuu ma Afioga ma Agafesootai, o le Minisita aupito sili ona lalelei o le Kapeneta. Lau Afioga i le Minisita, o le mea lea e fia avatu ai sou manatu, o le sootaga lea o le mea lea e tulai mai i feteenaiga ia a le Samoa Victim Support. E tele le auunaga a lea foi vaega ma lo latou sao. Ae i ai lou talitonuga, sa tatau ona galulue vavalalata ma lau Afioga ma lau Matagaluega. O le pogai o lea vaega, leaga foi e leai se nuu o Samoa e leai se sui o tina, o pulenuu, faifeau, taitai o nuu. O le vaega uma lea o lea e i lalo o le puleaga a lau Afioga i le Minisita ma le Matagaluega. Ou te talitonu o tagata nei e tatau ona muamua ona fesootai i ai se faafitauli i totonu o se afioaga, i so latou foi sao ma so latou leo ae le i oo i tulaga ua i ai, lea ua tulai mai ai nisi taimi i feteenaiga o i ai. Ae a mafai ona galulue faatasi le vaega lea ma tina ma tamaitai aua o latou nei o lea e faafoeina le tele o Tulafono i tina

ma tamaitai, ia ua faigofie foi ona fofoga lea faafitauli i le tele ma le ogaoga o mea o lo o tulai mai.

Lau Afioga i le Fofoga Fetalai.....

FOFOGA FETALAI: Malie le sui usufono se i tuu atu le avanoa i le Afioga i le Minisita mo Tina ma Tamaitai, Atinae o Nuu ma Afioga ma Agafesootai, tulai mai.

Tofa Hon Tolofuaivalelei Falemoe Leiataua (Minisita o Tina ma Tamaitai, Atinae o Nuu ma Afioga ma Agafesootai): Lau Afioga i le Fofoga Fetalai, faafetai i lau Afioga i le Fofoga Fetalai mo le avanoa. Ou te tulai atu foi ma le faaaloalo, e leai se manatu e faalavefau i le saunoaga matagofie a le sui usufono mamalu, o lona ia lava finagalo. Na pau lava le mea ia sagatonu foi lau o le fo i mataupu faapenei o lo o maitau foi le atunuu. O lea foi ma te tafatafafuga ma le Afioga i le Minisita o le faatama o lea foi Faalapotopotoga. I le taimi leni ia te au ma lou iloa i ai i le Faalapotopotoga ma le faatonuga foi ua fai i ai e tusa ma le galulue soosootauau, e afua mai lava i le SUNGO faasolo mai ai i le Samoa Victim Support, o le faamoemoe lava e tasi tusa ona i ai le finagalo o le Malo ina ia galulue faatasi. Ou te le iloa po o fea e agai mai ai se finagalo o le sui usufono lea, ae o lo o i ai lava le sootaga e fesootai ai le Matagaluega ma le Faalapotopotoga leni e i ai le Samoa Victim Support, ina ia tumau pea i le agaga o le galulue soosootauau ina ia ogatasi le faamoemoe o le Malo ma tulaga foi o lo o lautogia ai nei vaega o Faalapotopotoga Tumaoti e i ai foi le Toomaga mo e Puapuagatia. O le mea la lea na ona ou faapea atu, e le o i ai se Lipoti ua oo mai ia te au, a mea o i ai se feteenaiga. O lo o i ai foi le Tulafono o lo o fou mai e saga faatumauina ai pea lea galulue faatasi e ala i se taitaiga foi a le Matagaluega mo Tina ma Tamaitai, Afioga ma Alaalafaga i lona atinae faapea foi agafesootai. Ma lou faaaloalo lau Afioga i le Fofoga Fetalai.

FOFOGA FETALAI: Malo. Ia tulai mai le sui usufono. Faaiu mai le saunoaga.

Tofa LEALAILEPULE RIMONI AIAFI: Faafetai i lau Afioga. Ou te talitonu e le oo i lea vaega... Ae lau Afioga, ua lava lea lauga. E avatu le faamalo ma le faafetai a leni itumalo i lau Afioga i le taitaiga o le tatou Fonotaga. E malu le Maota o Samoa ia te oe. Malo le fai o le faiva, malo le onosai. Faafetai foi i le Afioga i le Palemia ma le Kapeneta ma le mamalu o le Malo i galuega faatino. E pei lava ona tatou talatalanoa, tatou faamoemoe i le Atua. A uma ona tatou miti ona tatou faatuatua lea i le Atua ona faatusa lea o tatou pei o le laau e ola i tafatafa ane o vaitafe, e fua mai ona fua i ona lava tau, e le toulu foi ona lau, e manuia foi mea uma na te faia. E le pei o le laau lea e saunoa i ai se tasi o sui usufono mo le Palota Taitoatasi, Afioga Maualaivao Pat Ah Him, e ola ae tipi. Ia leni Itu, lau Afioga i le Taitai o le Itu Agai ma leni Vaega maopoopo, faamalolosi e fai le tatou faiva e faufautua i le Malo i mea e lelei ai. Ia foai le mau e tele i lau Afioga ma leni Itu.

I Ofisa Sili o Pulega o Matagaluega a le Malo, ia, o outou e tua i ai le Malo i galuega fai. Ia faamanuia le Atua i lo outou tulai mai i o outou tofi. O le faamalulu atu foi pe a i ai ni lafoga a le Palemene ma le sui usufono ua afaina

ai se finagalo o se sui usufono, ae le o le agaga lea. Ia tatou galulue faatasi e tapue le Malo o Samoa. Ia faamanuia tele le Atua i lo outou valaauina aemaise si ou uso o Vaaelua ua avea ma tama matua o la outou mafutaga, ia, faamanuia atu ia te oe. Ia manuia tele le faafofogaaga a Samoa. Soifua.

FOFOGA FETALAI: Malo faafetai saunoa i lau Afioga i le sui usufono mo Faleata Sisifo po o lau Afioga foi i le Fofoga o Alii o lea Itu o le Maota. Ua tatou le faatasi i le tatou Fonotaga i lenei aso ma se tasi foi o toe Ulutaia o lea Itu o le Maota. Talofa ua tatou le faatasi i le tatou Fonotaga lenei, ae le mafai pea ona faagalo Afia i si ona vao, o le toe Ulutaia foi ma o ia o le Afioga i le Sui Taitai o lea Itu o le Maota, le Afioga ia Aeau Peniamina. E momoli atu moomooga alofa i le apulupulusia o le fala ma le toia o tofaga, ia alofa le Atua ia taulu taulu taulu ia tatou toe feiloai i ataata o taulelei i lenei aso. E ui i lea, e le o tuua ia tama lena Itu o le Maota, o lea lava e agiga i matagi malie ma tatou tepa i matagofie i tuleiga ma saunoaga a lena Itu o le Maota aemaise le tapuaiga a le Afioga i le Taitai o le Itu Agai.

Ia, lau Afioga i le Taitai o le Itu Agai, tulai maia o lea ua tatou faasolo i le taamilosaga mulimuli ona tuu atu ai lea o le avanoa i le Taitaifono o le Komiti o Tupe ona tali ai lea o le tatou Malo i le aso.

Tulai mai lau Afioga i le Taitai o le Itu Agai.

Afioga Hon PALUSALUE FAAPO II: Ou te tulai atu lava ma le agaga faaaloalo i le avanoa ua tuuina mai e lau Afioga i le Fofoga Fetalai e fai ai foi se manatu aua lenei Tala o le Tupe taua. O lea foi ua maea ona tuulaupua paia o le Maota nei, aua le afio o lau Afioga i le Fofoga Fetalai, le afio o lau Afioga i le Palemia, aemaise foi le Sui Palemia, le mamalu o le Kapeneta, Minisita Lagologo aemaise foi o lenei Itu i le Kapeneta Agai ma Minisita faaolioli, ioe. Ia, tainane foi Ofisa Sili o Pulega ma Pule Sili o Matagaluega ma Faalapotopotoga. O lo o faafofoga foi Samoa mai mauga tetele seia oo i mauga iti. Pe oo i ai sau faamatalaga e leai, e tumau lava paia ma mamalu foi e le avea ona o le naunautaga ma le manumanu i le taimi aemaise lava le aufaigaluega paia a le Atua o lo o nonomanu aua se manuia o Samoa. E manatua foi le Ekalesia Soofaatasi i le Afioga i le Taitaifono ma le mamalu o le Laulau a Fono, i Faauluuluga o Ekalesia e fia i la outou mafutaga, faamalo faafetai. O la outou pitolaau taua aua le soifua faaleagaga o le atunuu, aemaise foi le Tutoatasi talu ai. Faamalo le fai o le faiva.

Ona pau lava lea o le tuualalo i lau Afioga i le Taitaifono ma le mamalu o Ekalesia Soofaatasi, se i toe silasila lava i le lotu lea i le taeao i le Tutoatasi, e ui lava ina le talia e le Afioga i le Palemia, ae ou te talitonu o le tuualalo o le mea taua lena. E matagofie uma tapenapenaga o le Tutoatasi i Afioga i Taitaifono ma Komiti ma outou uma sa galulue i le ao ma le po aua le faafoeina o le faamanatuina o le Tutoatasi o lo tatou atunuu, a o lena lava e i ai le misi, e i ai le atoatoa. E ui lava o lo outou talitonuga ua maea le lotu i le afiafi o le Aso Sa, ae....

FOFOGA FETALAI: Ia, malie lau Afioga i le Taitai o le Itu Agai se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e lelei ona taatia pea tulaga o

mea nei o sauniga faalelotu i le Fono a Ekalesia, o le latou lea matafaioi. O lea foi e fai lava le lotu i Mulinuu e faaiu ai. Ma e manatua foi o taimi uma lava o taimi o le Atua. O lea ua uma foi ona tali le Taitaifono o le Fono a Ekalesia i le mataupu lena, o lea sa e fesili i ai. Ua uma foi ona tau mai ia te oe. O le mea lea o le laa o tatou i mataupu paia, lafo pea lava ia i latou e paia, o latou na e nafa ma mataupu faapea, ae tatou alo pea tatou i mataupu faa-Kaisara. O lea e te saili ai i mea paia. E faigofie lava... se pei o le ao le mea lena, ae tuu pea, o lea ua uma ona ou tau atu ananafi, e manino lava Afioga a le Alii, “Ave mea a Kaisara ia Kaisara, ae ave mea a le Atua i le Atua.”

Ia, tulai maia lau Afioga i le Taitai o le Itu Agai.

Afioga Hon PALUSALUE FAAPO II: E leai e le o se saili ai, leaga e ola mai lava le Samoa e ave a le faamua i le Atua. A o lea o le a ou see ese.

FOFOGA FETALAI: Faafetai. Se i tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga, so o se mea lava a le Malo e tomua lava le Atua. O le mea foi lea e ala ai ona fai lotu i le po lea faapitoa lava mo le Tutoatasi. E lelei ona taatia pea i le aufailotu le latou mataupu.

FOFOGA FETALAI: Ou te manatu ua manino lea mataupu Palusalua. Ia lau Afioga saunoa ma see ese se i faaalu le tatou Fono.

Afioga Hon PALUSALUE FAAPO II: Ua manino lelei lau Afioga i le Fofoga Fetalai. Na ona ou fesootai lava i lou itumalo e faatalofa i ai, leaga o outou tou te tuualalo mai aemaise le aufaigaluega paia a le Atua lea e ala ai ona ou sau e avatu, ioe. Faamalo le tapuai. E faamalulu foi i sa outou faafofoga mai, leaga o oe o le Aiga Malosi, ioe, e leai lava se isi e toe vaeluaina le itumalo lena, leaga o le aiga. O le mea lea Sa Tunumafono faapea faleupolu ma Tapaau na Tausi e le Alataua ma le Faasuaga, tapuai mai. O le ma galulue ai ma le Afioga i le Minisita po o lou uso a sui usufono, leai o lea lava e tatalo, faamalo i le Afioga i le Minisita i le lava o le toovae ma faasoasoalelei mo le atunuu, aemaise foi lena Itu, faasoaso i ai aua o oe ua e masani, o le tama o le Aiga Malosi e faapena, e le manatu faapito. Ae a? E alofa faasoasoalelei. A i ai ni toega, o taua lena. Ou te le tau fai atu i ni mea e fai, o lena e te silafia lau Afioga, o lau Afioga foi o le Tiakono Toeaina, e te silasila ane i ai.

Na pau lava lea lau Afioga i le Fofoga Fetalai, lau Afioga i le Minisita mo Punaoa Faanatura ma le Siosiomaga, e talosaga atu pea o lea foi ua alu lea tausaga ma lena tausaga ia o le taligalu lava lea, a le uma, e leai se aoga o le isi vaega o le taligalu. Aua foi e toe mimilo ane lava le sami toe alu i totonu. O le mea lea e tatalo atu ai pea i lau Afioga mo le taligalu i Sataoa.

Lau Afioga i le Fofoga Fetalai, ua lagia Tiafau nei i se tasi o toe Ulutaia o le Maota le Tofa ia Tuiloa, o le toa manumanu o le Maota lena, leaga e tuusao tala, e otegia le Kapeneta vaeatu o outou paia ma o outou sa ma faiga, e oo lava i le Palemia. E faapena tatou, e tuusao faamatalaga, e le faaaloalo. E faapena Tuiloa, e misia i totonu o le Maota lena. Na pau lava, ia faamaise le agaga o le Atua ia faamafanafana i le faletua ma le nofo a alo ma aiga na lua aemaise le itumalo e avea ai au ma sui o le Tautua ma lena Itu Agai e avatu

ai faamafanafanaga. O lea ua e saunoa i le Sui Taitai o lenei Itu i le Afioga ia Aeau, ia talosia ia alofagia e le Atua ia toe faafoi le malosi. Ou te talitonu o la e ua malosi si toeaina, o la e ua malosi. Aua le faapopoleina fua le tatou Maota, o la e lava e taotooto lelei. O le matou fautuaga lea na ave i ai, aua e te popole, tuu mai pea lana uo le Palemia o lea o le a matou faafoefoeina, ae faafetai i le Atua ua toe faafoisia le malosi ia te ia.

Lau Afioga i le Fofoga Fetalai, e le umi foi sau lauga. O lea ua sausaunoa le Kapeneta Agai, sausaunoa i tulaga uma o le Tala o le Tupe. E faatomua la au upu, leaga o au e ala ae loa i le taeao faitau lau Tusi Paia. O le manatu autu la o le aufaitau Tusi Paia i le taeao lenei, “O tiga faale-Atua.” E maua mai i le Tusi Lona Lua a Paulo i le Ekalesia i Korinito, ioe. Ona ou aumaia ai lea o le fuaiupu lea, Mataupu 7, a o le tusi faitau lena o le aso lenei. Na ou aumaia la le Fuaiupu 3 lea e faapea, “E le faapea ou te aoai atu ia te outou, aua ua uma ona fai atu, o lo o i o matou loto outou loto, tatou te oti faatasi ma ola faatasi.” Silasila la i le manaia o upu o lenei taeao? E le malaese i ina malaese iinei, ioe, e le malaese. Ona toe sosoo mai lea o le Fuaiupu 10, “Aua o le tiga e tusa i le Atua e tupu ai le salamo e oo i le faolataga, ae o le tiga faalelalolagi, e tupu ai le oti.” Ia, ou te le o faafefea atu le paia o lenei Maota, a o le matau i le Atua lea e taumafai atu ai au upu tomua i le lotu, matau i le Atua lea tatou te sapi ai ma solosolo lelei le atunuu. Aisea? O le matau i le Atua. Aua le matau i le po anapo ae le matau i le taeao fou. Aua seiloga e tupu mai le faalavelave ona matau lea. Matau i le taeao fou ua aumai e le Atua. Ia, o le autu lena o lau lauga lau Afioga i le Fofoga Fetalai.

FOFOGA FETALAI: Ia, se i vavae foe o le mau ae se i avatu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea ua ou vaai atu ua lima minute talu ona uma le lauga a le alii faifeau, o lea ua ou tulai atu ai, *E toe faaopoopo se isi itula atoa.*

E le i faaluaina le lafo.

FOFOGA FETALAI: Ia, se i tulai mai lau Afioga i le Tiakono Toeaina pe i ai se isi mea o misi o le faitauga o le Tusi lea.

Tofa Hon Tolofuaivalelei Falemoe Leiataua: Lau Afioga i le Fofoga Fetalai, leai na ona ou tulai atu lava ma le agaga faaaloalo aua o le Aoao Fesoasoani le Taitai o le Itu Agai o lo o agai mai i le Malo. Ae ua ou faalogologo ma le totoa i lana mau lea e aumai i le Tusi Faitau, o tiga faalelalolagi e oti ai. O le mea tonu lava lena o lea e tupu i le Taitai o le Itu Agai, ua leva ona oti i tiga faalelalolagi, aua ua nofo lava ia ma fasioti ia. Vaeatu lava, o lau tala ona o lea ou te talanoa i le mataupu silisili, ou te le o talanoa i ni mataupu faa-Palemene, ae ona o lea ua oo i ai le Taitai o le Itu Agai, o le mea la lena o lea ua tupu. E le o manatu le Taitai o le Itu Agai, o le tele o ana lafoga e faapea, o lo o faamasino le atunuu, o lo o faamasino le atunuu, matau i le Atua ma faamuamua le Atua. Ae o lena ua uma foi ona ou tau atua lena mea sa tataua ona tuutuu loloto i ai le tofa a le Taitai o le Itu Agai...

Afioga Hon PALUSALUE FAAPO II: Ia o lea ua ou maua lau Afioga i le Fofoga Fetalai.

Tofa Hon Tolofuaivalelei Falemoe Leiataua: Na te le i manatua na mea i le taimi na manuia ai.

FOFOGA FETALAI: O lea o le a uma ona avatu, se i faamanino lau mau. Tulai mai lau Afioga i le Minisita.

Tofa Hon Tolofuaivalelei Falemoe Leiataua: Se i tau faamatalatala le mataupu silisili lea ou te fai atu ai. O le tulaga la lena na tupu, e le i toe manatua e le Taitai o le Itu Agai tiga faale-Atua ina ua ia maua manuia o le lalolagi, lea la na oo loa ina tiga ai, lea e oo mai lava i le aso o tiga ai faalelalolagi. O le oti la lena faale-tagata o le lalolagi, ae le mafai ona maua le faamanuiaga lea e moomoo i ai e tusa ma se faamanuiaga a le Atua. Ia na ona ou talanoa atu faapena ae o le a faalatele i se taimi o i luma.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga o le mea e fia faasao i le Afioga i le Minisita. O lea ou te fia faasao, ou te fia fesili atu po o a manuia ia na e ... ua tau masalosalo lava lou loto, o lea na e faapea mai ua maua loa manuia ona galo lea o le Atua. O a tonu lava manuia lea e te saunoa i ai?

Afioga Hon PALUSALUE FAAPO II: Lau Afioga i le Fofoga Fetalai, ou te le faafinau i lea mea.

FOFOGA FETALAI: O a manuia ia e taua e Tolofua?

Afioga Hon PALUSALUE FAAPO II: Ou te le taua atu foi na mea o manuia.

FOFOGA FETALAI: Ia alo ia ia manuia lau saunoaga ae faatea ia fuilauvi.

Afioga Hon PALUSALUE FAAPO II: O lea e saunoa atu le Kapeneta Agai, ou te le toe oo i ai, ae tuualalo atu i lau Afioga. Na pau lava le mea lea o le a ou tali atu i lau saunoaga e uiga i le Paketi lenei. O lea ua ou vaai atu ua faasolo ina manifinifi, aua i le Afioga i le Minisita i le tatou Paeaiga talu ai, pei sa tuputupu i luga, sa faapena foi ona tupu le tatou Tala o le Tupe. Lau Afioga, o lana....

FOFOGA FETALAI: Malie le sui usufono o lo o saunoa se i tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, faatoa uma nei lava ona lauga faafaifeau mai le susuga i le Taitai o le Itu Agai, a o lea foi ua toe tiapoloa

lana lauga. O lea ua agai i mea vaaia. O a mea e vaaia? O mea na i la le tino, ae te le o vaai i la le agaga. O le mea taua lena. Ua leva ona ou faalogologo pe o le a e faapea mai, o le matau i le Atua o le amataga lea o le potu. Ae misi atoa i lau saunoaga. Ua iloa foi e i ai lava e faalele e i ai foi e maitau. A o le taua ia o nisi Afioga na a le Alii, “O le matau i le Atua o le amataga lea o le potu.”

Afioga Hon PALUSALUE FAAPO II: Ia o le potu la lea o le a ou taumafai atu ai, o le potu tonu lava lea, aua o le Tala o le Tupe talu ai, e faavae lava i luga faapea o le tamaoaiga maaleale, le mautonu ona o mea e tutupu. A o le Tala o le Tupe lenei, fai mai e a le manatu autu” Toe tapue le tamaoaiga. O lea ua toe fotuai mai le tamaoaiga.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le aso 19 lenei, o le 20 ai lenei o aso talu ona taoto le tatou Tala o le Tupe i lumamea ma faitau uma ai outou, a o lea e aliali mai, e le o maua atoa e le Taitai o le Itu Agai faamatalaga uma lava i le tulaga o le tupu o le tamaoaiga. O le mea lena e te tilotilo i ai. E le o le mafiafia o laupepa, ae tilotilo i mea ia e i totonu o laupepa po o a mea na e afifi atu ai. O lena e te tilotilo i ai i le tupu o le tamaoaiga. O le taeao nei ua ou faalogo ai i le tala o lo o aumai, o le tulaga o le tupu o le tamaoaiga o le Malo o Amerika, ua toe tuutuu ifo i lalo mai le 2.8% sa i ai, ia ma ua toe tuu ifo ai i lalo ona o le anoano o faaletonu o lea e faafeagai ma le Malo o Amerika. Ou faalogo atu, ua tutusa lelei lava ma le siitaga o le GDP a Samoa o lea foi e i ai, Amerika o le Malo tele ma le Malo o Samoa. O le mea la lea ua ou te i ai i le saunoaga a le sui usufono, o lona uiga, e luasefulu aso e te le i faitaua lava le pepa lenei manifinifi lea na e avea ae i luga, a o totonu o le pepa manifinifi lenei, o lena o lo o i ai uma lava mea uma o faamatalaga ina ia oa ai le malamalama a oe lena ia ma lau vaega. O le toe faaopoopo atu lena, vaai i le faamatalaga o le tupu o le tamaoaiga o le mea taua lena, e le o i ai lalo le tupu, o la e agai i luga.

FOFOGA FETALAI: Ia tulai mai le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, o lea e matamata tetele lava i i le manatu, o se lauga lava, o le mea taua o le manatu autu, o le manatu autu, aua foi e faavae uma i ai manatu ia e saunoa i ai le Afioga i le Palemia, o lea ou te fai atu, o le manatu autu, toe tapue le tamaoaiga. O lea la o isi la manatu ia e sau i tua, o lea ua toe fotuai mai le tamaoaiga, o le ala lea o lou oo i ai.

FOFOGA FETALAI: Malie le sui usufono, se i tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea la o le a ou fesili atu i le Taitai o le Itu Agai, ua e malamalama i le uiga o le upu lena, toe tapue? O lona uiga, e faaopoopo ma saga faaopoopo, ma saga faaopoopo pea. E le

faapea o le tapue o le tapue ona nofonofono ai lea i le mea e tasi. A e tilotilo i ai i le itulau e 10, lena o lo o avatu ai fuainumera ma le tupu o le tamaoaiga, i le tamaoaiga lea tatou te faagasolo nei e 1.8%, tamaoaiga lea o lo o taoto i le 2014 i le 2015, e 2.4% ia le tulaga o le tamaoaiga, o se matua tele o le tupu lena e tupu ai, ona tuu ifo laia i le tuputupu o le tatou GDP, o le matua maoae o le tupu lena o lo o tulai mai ai i le faitau piliona, piliona. O lena o lo o avatu uma lava i fuainumera nei ia \$1.6piliona, o le a le uiga o lena mea? O tupe na o lea o le a taavili i totonu o le tatou tamaoaiga i le tausaga faaletupe o lo o lumanai ai nei. E le o ni tupe laiti na mea, o le matua tupe tetele e faagaoioi ai ma tupu ai pea ia galuega mo a tatou fanau. O e malamalama i le mea lea ou te fai atu ai? O le a faapena ona e pulatoa mai o lea e tau avatu....tilotilo i mea ia?

Afioga Hon PALUSALUE FAAPO II: O le faalavelave lau Afioga i le Fofoga Fetalai, e le i oo i mea na, o lea e amata atu i le itulau 1, ioe, ou te le i oo i le mea lena o lea o le a alu atu, se aua e te popole lau Afioga i le Palemia. O le a tapue faapea, e faapefea ona lipoti ia o quarterly reports mai i le tatou.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga, vaai na o le 12 itulau, ae na amata lava ona e lauga mai e sese atoa lau lauga? Ae na o le 12 itulau, ae o lea ua luasefulu ia aso o tuu atu ia te oe e te faitau ai ma e malamalama ai?

Afioga Hon PALUSALUE FAAPO II: E ese le Lipoti lena ese le Lipoti lea ou te fai atua, o lea e tau mai ai le pau o turisi, pau tupe faamomoli.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Vaai, o le Lipoti lea, o lea e avatu uma ai lava faamatalaga o mea o fuainumera ae ese ai le Lipoti mafiafia lea, o le tatou Tala o le Tupe, lea, o le tatou Tala o le Tupe, lea. Afai la e le mafai ona e faitaua atoa ma e malamalama i le 12 itulau ma le mea mafiafia lea e 300 toeiititi 400 ia, oka, oka, o le matua tele o le faaletonu o lau taitaiga o lau vaega, ma se i e faafogafoga i saunoaga a lau vaega lea na tuuina mai, vaai e ese mamao lava le mea lea na sausaunoa mai ai lau vaega, e ese ma le mea lea e te sau ai. O le fautuaga.....

FOFOGA FETALAI: Palu.....

Afioga Hon PALUSALUE FAAPO II: Lau Afioga i le Fofoga Fetalai, o le faalavelave o lau Afioga, e te musu e faalau atu mea ia, e te musu e faalau atu mea ia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le fautuaga a lau vaega, e le o lava tupe e nono mai e faatino ai. A o lea e te tu mai oe o lea e te auselasela, ae tatau ona e fesili i lau vaega, e aumai ni fautuaga lelei ia te oe?

FOFOGA FETALAI: Ia, se malie lava le Taitai o le Itu Agai, o le mea e tupu ai le numi o le finauga, o lou pao lava ma oso, se faatonutonu mai.....

Afioga Hon PALUSALUE FAAPO II: E te faa'au'au i o, aua e te faa'au'au i le Afioga i le Palemia. O le a le uiga o lau faamatalaga, e pao ma oso? O lea e pao ma oso le Palemia.

FOFOGA FETALAI: Aua e te tusia mai lou lima. Faatali mai o lea ou te tuu atua le avanoa. O le a faapefea ona manino pe a...Palu, aua e te fai ma tusi mai lou lima ia te au, don't do again, tulai mai, ia vaai o lea ou te tuu atua lava le avanoa? Ia tulai laia, fai lea o au figures.

Afioga Hon PALUSALUE FAAPO II: Ia e faamalulu atu i lau Afioga, se i tau fautua i le Afioga i le Palemia, se i tau tuu mai se avanoa.

FOFOGA FETALAI: Fautua i ai oe.

Afioga Hon PALUSALUE FAAPO II: Ua uma ona ou faitaua.

FOFOGA FETALAI: O lena e i ai lou fofoga e te fautua i ai.

Afioga Hon PALUSALUE FAAPO II: Ua uma ona ou faitaua mea ia e i totonu o le Tala o le Tupe, a o lea ua oo lana suesuega i Lipoti ia faale-kuata. O le ala lea o lou taumafai atu, e tau i le Afioga i le Palemia, e ese lava mea ia e i i, ese Lipoti ia e aumai, pau le tamaoaiga, pau turisi, pau tupe faamomoli, leai ni oloa e avea i fafo.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, a lea e te uu maia le Lipoti lea ou te fai atu ai, lea e te uu maia le Lipoti o lea foi ou te uu atua, ae ese le mea lena e te talanoa mai ai e le o i totonu o le Lipoti lea.

Lau Afioga i le Fofoga Fetalai, o le faalavelave lea, o le faitau le malamalama ai, e na o le 12 itulau, ae na ala ona avatu mataupu nei ma avatu Lipoti nei, ina ia malamalama ai ia aua ne i i ai ni mea faanununu. I lalo o le 11, o lo o tau atu ai le tatou GDP, ioe, e piliona 569miliona i le 2013/2014, ona oo mai laia i le 2014/2015 e piliona 5658miliona le faitau aofai po o le faaopoopo faatasi o tupe maua a le atunuu atoa lava lenei, o lea e tupu le tamaoaiga, o mea e fua ai, e fua ai le maualuga ma o le mea tonu lena o lea ua i ai le tamaoaiga, ma o le mea tonu lea, lea na ala ai nei ona see ese Samoa mai le tulaga maualalo o le tamaoaiga ma faatulaga loa i luga. O lea la ou te talanoa atu i mea o lea ua fai ai faaiuga a le Malo Afaatasi, o le mea lea e tele ai le faaletonu.

Vaai lau Afioga i le Fofoga Fetalai, Palu, o oe sa e galue i le siosiomaga o le malae vaalele e aofia ai ma Leala, aofia ai ma Levaopolo, o outou uma ia sa galulue i le siosiomaga o le malae vaalele. O le faagaioiga o le malae vaalele a Samoa lea e pito tautaua i le lalolagi Samoa, e maoae le tautaua, aisea? Aua foi na o Samoa lava e tutupu ai mea maoae i le malae vaalele. O vaalele ia e feoi nei, na o le alu alu leaga le vaalele, ave tau auuui mai i fafo mea o atafa, ma mea o albatross ua vilia i totonu o peapea o vaalele. Ae a le tatou malae vaalele? Pau lava lea o le malae vaalele ua alu i talaaga o le lalolagi, ua soa e le vaalele le asini, ua soa, o le ala la lea, o lea la e faapea ai uiga o outou ia e toatolu, o lea tou te manatu o asini mea ia, a o lea e faataoto atu mea o

fuafuaga, faufuaga au i luma o le tatou Malo, ma o lea e i ai faamaoniga, ua sua e le Malo Aafaatasi le faatulagaga o Samoa. A o le mea lea e taua foi le tulaga o mea faapenei, lea ua ou talanoa atu ai, o le ala lena e tou te faapena ai outou le toatolu lea, leaga o le siosiomaga o mea o asini.

Ia manuia le Fono lau Afioga i le Fofoga Fetalai.

FOFOGA FETALAI: Ia se i tulai mai, leaga o lea ua.....

Tofa Lealailepule Rimoni Aiafi: Lau Afioga i le Fofoga Fetalai, o lea ua ou fautuaina le Afioga i le Taitai o le Itu Agai, aua le toe tusi ia te oe, tusi ia Jesus na e i tua, vaavaai i le vaai mai a Jesus, e vaai sao mai ia tatou, ua alofa. O le asini foi lea e tau e le Afioga i le Palemia, o le asini tonu lava lea na tietie ai Jesus lea faatoa pe i i i le malae vaalele lenei.

FOFOGA FETALAI: Ia le sui usufono mo Gagaemauga Nu. 2, tulai mai.

Tofa Levaopolo Talatonu: Lau Afioga i le Fofoga Fetalai, na o se mea e fia faasao i le saunoaga, e ma te o atu ma Lealailepule ua lavevea asini na o Palu na i ai.

FOFOGA FETALAI: Ia.

Tofa Hon Tolofuaivalelei Falemoe Leiataua: Lau Afioga i le Fofoga Fetalai, sa ou faapea e le amanaia e...a o lea faatoa iloa nei, o asini le toatolu la lea na tutu faatasi mai ma le Taitai o le Itu Agai, ma le faaaloalo.

FOFOGA FETALAI: Ia tulai maia lau Afioga, e faatea lea fuilauvi, faa-Kerisiano lou finagalo.

Afioga Hon PALUSALUE FAAPO II: O le a ou see ese ia, e taumafai atu lava ae faalavelave lava le Afioga i le Palemia.

O lea o le a ou sosolo lava i lana saunoaga e faavae ai le Tala o le Tupe, o le saunoaga fai mai, ua pau le Tala o le Tupe ona ua uma ona faaleleia mea na faaleagaina e le afa. Ia faamasino mai oe Samoa, faamasino mai po o ua uma auala laupapa, faamasino mai po o ua uma tupe ma mea ia na aumai e fesoasoani o le afa? lea e tufa e lou tama ia Mamea, faamasino mai Samoa, po o ua uma auala, po o ua uma taligalu ma talivai, po o uma nei mea?

FOFOGA FETALAI: O lea o le a tali atu le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o au nei e Taitaifono i le Komiti foi lea sa o e lipoti mai mea na faaleagaina. Ina ua uma le afa na matua pogisa Upolu, e le i...na mumu lava moli o Savaii, na ou alu ou taamilo i Savaii, taamilo i Upolu, e toetiiti lava leai se mea na faaleaga i Savaii, a o Upolu i le tulaga lava lea o le alu atu iinei i i i Siumu agai atu i Safata, o le matua maoae o mea na faaleaga, toetiiti lava le mafai ona o taavale, a o le tele o pou, ua lafotu i lalo, ia ona faasolosolo atu lava lea e oo foi i pou sa i o i Aleipata, na lalo uma lava, o le ala lena na pogisa faasoloatoa ai ia Upolu. O mea ia tetele, o mea tetele ia na matua mafatia ai tatou. Sa

televave mai ai le talanoa mai a le Business Community ina ne i te i ua faaletonu ia meaai tuu aisa, ina ia vave se faiga e fai ai.

Lau Afioga i le Fofoga Fetalai, o mea faapenei, e tutupu ai le femalamalamaai, ua tuu le au ae maa i aau, o mea tetele na faaletonu. E a le taimi nei pe a toe malaga atu i Siumu ma Safata? E toeitiiti lava atoa po o le valu i le sefulu masina o fai auala na, o le matua lelei o le tulaga lena ua i ai auala na. A o le mea e tatou te faafetaia ai, o seleni na aumai e faalelei ai mea nei, na faameaalofa mai i Faalapotopotoga i fafo ma Malo agalelei. Ua ala ona ou tau atua mea ia...e i ai foi ia seleni na aumai e fesoasoani ai i o tatou tagata lea sa faaauaala atu i le Housing ma le Faletupe o le Atinae o le tamaoaiga i fale na faaleagaina, o le faiga lea, e maua tonu latou na matua leaga fale, ona tuu atu ai lea i ni nonogatupe e tuumama, e tuumamaina e matua maualalo lava ia tului o le tausaga muamua e leai se tului e totogia. E le o na ma le laina mea ia na tutupu, na tupu muamua, o le matua tele o mea o lipoti sese taufaasese na aumai, so o se mea lava e maua fua, o le matua tele o mea sese e faasau ai i totonu i i, ae pau lava le auala moni lava e maua ai ia fesoasoani moni, o le fai i ai faiga faapenei, e auala mai i faletupe ma le Faletupe o le Atinae o le Tamaoaiga, e faapena foi ma le tatou Housing Corporation, le Faalapotopotoga lea na faatu faapitoa ina ua tuanai le afa o Ofa, na faatu ai lea o le Faalapotopotoga lenei e mafai ai ona nono ni tupe i ni tuutuuga mama i tua, ona e le mafai ona faalagolago pea le Malo i nai o tatou tagata e o i faletupe ia Commercial Banks, o lea lava la e alu ai pea le Faalapotopotoga lenei e tau mai lava i le taimi lenei, o se auala aupito sili lea ona amiotonu i le tuuina atu o fesoasoani ia i latou o lo o moomia tonu le fesoasoani. Lau Afioga i le Fofoga Fetalai, o le tulaga lena.

Sa i ai le polokalame sa fai e le Faigamalo na i ai i le 1977. O le polokalame lena e i ai le vaega tele lava e avatu fua. Na i ai si tamai vaega lava e avatu o le nonogatupe laitiiti lava e tusa e 5%, a o le vaega tele e avatu fua. Na alu, alu, alu le polokalame lena na toe taofi. Aisea? O le tele o nuu ua avatu uaea i se auala maua fua ma fetalaisa e fai ai faatoaga fai, ae alu atu le asiasiga ua faapala fetalaisa i totonu o faatoaga. E oo i uaea e sue atu e leai ni pa uaea o faia ae ua toe faatau e isi i isi tagata o isi nuu. O mea na sa tutupu, ua le faatasi, faalua ae ua tupu soo. O le ala lea na taofi ai le polokalame lena na amatalia i le tausaga e 1977. Sa aumai ai foi fesoasoani laiti lava a Malo Afaatasi, o i ina na toe taofi ai foi na mea. Na amata mai i le taimi lena na iloa ai, o mea nei maua fua e tele lava ina faaoga sese.

Lau Afioga i le Fofoga Fetalai, o le ala lena o lea e mafua ai ona tausisia pea e Faalapotopotoga nei o lo o aumai a latou fesoasoani leaga ua le faatasi, le faalua pe faatolu ma ona tupu. Ua le na o se atunuu e tasi, ae toeitiiti lava tutupu i atunuu uma o le lalolagi le tulaga lea. O le ala lena o lea e faataoto ai polokalame nei a mea nei o faletupe ina ia tausisia. A faapea la e le mafaia e tagata ona mulimulitaia, o lona uiga e tau mai ai i ina le tulaga sao lava o lea e i ai le atunuu.

Lau Afioga i le Fofoga Fetalai, ua ou fiafia lava ua ou faalogo atu i le faasilasilaga a le Minisita ua ova ma le \$100,000 le tupe ua alu i tua, a o la lava e galulue latou ina ia uunaia pea tagata e omai. E le o taofia ai lava la tagata fia atiae moni lea e omai, a o le mea lea ou te tulai atu ai. O lea ou te iloa e tiga lava ona iloa e Palu aua na matou i ai i totonu o le Kapeneta, o la foi na te silafia le mea e tatau ona fai ma le mea e le tatau ona faia. O lea sa e lauga nei ma e siisii upu o le Tusi Paia ma o lea la o le a ou tau atu le isi upu

po o le Afioga a le Alii, “O le na te iloa le mea e tatau ona fai ae le faia, o le matua agasala aiai lene i luma o le Alii.” O lene la ua ou tau atu ia te oe ia fai ma ou taiala. Aua e te toe tautala i ni mea e te iloa e sese, ae ia e saunoa mai na o mea sao ma talafeagai.

E ala ona tupu le mea lene ona ua faamuamua ia te oe le mea lea o lou fia iloa. Ta te fia iloa uma lava; ona tuu ai lea o le mea amiotonu ae e taumafai e saili ou ai i se mea vaivai.

Afioga Hon PALUSALUE FAAPO II: Lau Afioga i le Fofoga Fetalai, ou te le tali i ia tuuaiga soona fai. O lea lava e taumafai atu le matou pitolaau. Lau Afioga i le Palemia, e leai se mea e faapea o ou taumafai e faaleaga le Tala o le Tupe. Ona pau lava le mea lea ou te faia, ou te mulimulitai i lau saunoaga o le Tala o le Tupe lea e faapea ua maea ona faaleleia mea uma.

O lea e popole lou mafaufau ona o lea e le i maea le faleaoga, e le i maea le maketi, e le i maea isi fesoasoani ia e aumai, a o lea e le o sau i le Tala o le Tupe. Ou te popole po o i ai ni tupe e fai ai nei mau mea? O le ala lea o le lagalaga atu lau Afioga i le Fofoga Fetalai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, na ona ou faamanatu atu ia te oe Palu. O le tagata na te silafia le mea e tatau ona fai ae le faia, o le agasala.

A lea e te oso atu lava i luma o le maketi, o lene e te tilotilo atu o lea ua atu le maketi? O lene e te oso atu ai lava i taimi uma. Ou te faapea atu, e le i leaga le maketi i le afa. Se i vaai i le sese tele o mea ia e te aumaia lea e te taumafai e tau seseina ai mea ia? O lene ua e tau mai le maketi, ae e le i leaga se maketi i se afa.

Lau Afioga i le Fofoga Fetalai o le toe tali atu lene. Palu, o lea ou te toe faamanatu atu ia te oe, o le tagata na te silafia le mea e tatau ona fai ae le faia, o le agasala.

Afioga Hon PALUSALUE FAAPO II: Lau Afioga i le Fofoga Fetalai, afai e le i leaga le maketi i le afa, o le a la le mea ua tuai ai le tatou maketi?

FOFOGA FETALAI: Palu, agai i le tatou mataupu o lea ua malamalama.

Afioga Hon PALUSALUE FAAPO II: Ia, o le a ou see ese. Aua ou te tau fai atu lava i lea mea e le i uma, ae tulai mai le Afioga i le Palemia fai mai o au ou te iloa le mea sao e tatau ona fai. Ia vaai, e tau punipuni lava nei mea. O lea la ua ou see ese mai le saunoaga a le Afioga i le Minisita vaeatu le Afioga i le Palemia. E leai ni lafoga, e leai ni siitaga o lafoga. A o le a le mea lea tatou te tilotilo i ai? Ua sii le tau o auaunaga. Po o fea lava le mea e agai i ai, o le lafoga lava le mea lene, a o le mea matautia, ua matua aafia lava le tagata e vaivai le tamaoaiga.

FOFOGA FETALAI: O lea ua maua.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O lea e manino lava le faaupuga. E ese lava le mea e igoa o le lafoga ese totogi fuapau o auaunaga. E eseese mamao lava mea ia e lua. O lene foi o le a e tau faasese a o lea faatoa uma nei lava ona ou fautua atu. O

lou naunau ta e te sese atili ai. E le o ni lafoga mea ia. O lena e manino lava le faa-Samoaina o mea o tax. A faa-Samoa o lafoga, a o fees o totogi fuapau. E eseese lava mea na e lua.

Afioga Hon PALUSALUE FAAPO II: Lau Afioga i le Fofoga Fetalai, ou te manatua lava le upu foi lea i le lauga matagofie a le Taitaifono i le aso o le Tutoatasi, “Moa, moa lulu, niu, niu pulu.” O le tax, tax siitia le auaunaga. Silasila la i ai, o le aitu lava le moomu lau Afioga i le Fofoga Fetalai. Leaga e i ai tagata e omai ia te au ma lenei Vaega Faaupufai e sulu mai i ni tupe e totogi ai pili ona ua tea ma le falemai ae leai se tupe. O le upu moni lava lea o la e faafofoga le Atua. E lua vaiaso i le falemai ae aumai le pili toetiiti oo i le \$300. Ua siitia mea uma i le falemai. Se i silasila, o ai e aafia? E aafia le lima vaivai lau Afioga i le Palemia. Ua fai mai e le toe o i le falemai ua malilie lava e mamai i le fale. Se i silasila i ai i aafiaga o le atunuu.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.....

FOFOGA FETALAI: Le Taitai o le Itu Agai o lea ua maua lou finagalo ae se i tali atu le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O mea nei o totogi a le falemai e maualalo atu i lo totogi a fomai i tua, e le gata i lena a o i ai le tatou falemai foi e pei o lea e i luma ane o Avele, o le matua taugata o lena falemai, ae tumu lava ma o i ai tagata.

O le taimi lea sa tupu ai le teva, sa tele lava tagata sa o i ai. O le uiga lea o lo tatou soifua, o lea lava tatou te manatu ma faatupu le mea lea ua matua taugata tele, ae a fua i le o o tagata i fomai ia i tua, lau Afioga i le Fofoga Fetalai, e faapena le soifuaga.

O le mea lea e mananao i ai tagata ia aua ne i totogia se mea. O le tulaga sao lava lena i le mea e igoa o le taugofie, ia aua ne i totogia se mea. A o le tagata e tautala i le amiotonu, e tatau ona totogi mea ia. E leai se mea o toe maua fua i le lalolagi lenei aua o lea lava e i ai le tau o mea uma. Afai foi e fai e le Malo i se tulaga maua se vaega, a o la e i ai le tau i le Malo.

Lau Afioga i le Fofoga Fetalai, o lena foi e tele lava le mau tusi lena e sau i totonu o le Tusi Paia lena e te faitau soo ai, aemaise lava le Tusi a Paulo ia Roma, o lena foi e sau ai Afioga a le Alii, “ia totogi lafoga ma ia totogi totogi fuapau.” Alu e sue le tusi lena o le a ou le tau atua, ae a toe ae mai nanei ae ou fesili atu ae le tau maia, ona ou tau atua loa lea.

FOFOGA FETALAI: O lea ua malamalama foi lea mataupu Palu. O lena e matagofie le faasologa o lau lauga.

Afioga Hon PALUSALUE FAAPO II: Ona pau lava lea o le mea i le Afioga i le Palemia, talofa e i le atunuu pe a leai se tupe. Ae a pe a i ai se fuafuaga foi lea ma le falemai e tea pea le mai ae togitogi po o se mea faapena, aemaise le taugata o fualaau ma tulaga faapena; a ma’i le nifo e ese le totogi o le fomai fainifo, alu atu e fai le faata, e ese le totogi o le faata, alu atu e tui le toto e suesue e ese le totogi o lea auaunaga. Silasila la i ai, ae a sau

la le tagata mai tua o le faifaatoaga e faatau ana meamata i le maketi leai se mea e taulia, o le a faapefea ona fai? O le mea lena o lea ou te fai atu ai.

FOFOGA FETALAI: O lea ua maua lou finagalo, se i tali atu le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le mea tonu lava lea o lea ou te matauina i le Taitai o le Itu Agai. Ia manatua foi o le mea silisili lea ona faaaoga e le tiapolo e faaososo ai le tagata ia foliga o se faiga alofa lea ua e sau ai, a o uiga tonu lava na e fai e le tiapolo. Ia faafoliga o se faiga alofa, a o le mea moni lava o ituaiga faiga tonu lava ia e matua mafatia ai le atunuu lenei, o le manao e fai fua uma lava mea uma.

O le mea lena o lea sa e taulamua ai lava i le mea lea, “A matou o atu i ina e leai ni tiute e toe faia, e leai ni lafoga e toe aoina.” A o le a faapefea ona fai mea ia? E faapefea ona totogi mea ia? E le maua fua ni fualaau e aumai i fafo, e le i faia fua fale la. O fale foi la lau Afioga i le Fofoga Fetalai, o la e fai i nonogatupe e mama tului ae toe totogi, e le o fai fuaina.

Lau Afioga i le Fofoga Fetalai, o le soifuaga lea tatou te i ai, tatou te agai i luma e faalelei mea mo lo tatou atunuu. E tai pei foi o le vaa le la e alu i Savaii, e faalelei mea uma aua a toe leaga mai ae mafai ona toe faalelei e tatou.

Lau Afioga i le Fofoga Fetalai, o le tulaga sao lava o lo outou Itu, o lou tulai mai ma fai mea ia na aumai e lau Vaega. O lena e manaia ae vaavaai i ai ma toe tilotilo i se tulaga e toe fetuutuunai ai. E pei la o lauga sao na, a o lou tulai ane lava ma fai mai e leaga, leaga, leaga. E le mafai ona e fai ia lelei ni mea ae fai fua. Lau Afioga i le Fofoga Fetalai, e te le maua ai le lalolagi lenei se Malo e faapena.

Afioga Hon PALUSALUE FAAPO II: Lau Afioga i le Fofoga Fetalai o le mea e fia faasao.

FOFOGA FETALAI: Ia faasao.

Afioga Hon PALUSALUE FAAPO II: E leai lava sau tala e faapea e o atu loa aveese lafoga. O lea matou te iloa lelei, a faapefea ona faagaioi le Malo? E leai ma se tala faapena a le Itu lenei. Ona pau lava le mea lea o fautuaga ma tuualalo ia fai fuafua, ae e le o le fai fua. Ioe, o le mea lena o lea e taumafai atu ai. Ia fai fuafua e fua i le tagata la e fia ola, ae e le o le fai fua e pei ona e saunoa i ai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea la faatoa sao lau lauga. O lea la faatoa sao, a o totogi fuapau uma lava ia ua i ai, o mea na fai fuafua.

Afioga Hon PALUSALUE FAAPO II: O le a ou see ese foi ma ia mea.

FOFOGA FETALAI: See ese, faasolo mai o lena e matagofie lava le sau o le ta lauga.

Afioga Hon PALUSALUE FAAPO II: O lea ou te tilotilo lava i le saunoaga matagofie a le Afioga i le Palemia lea e mulimulitai atu ai aua e tatau ona fai sau tali i lana saunoaga. O le saunoaga a le Palemia, o le saunoaga a le Minisita o Tupe e tatau ona tali i ai le Taitai o le Itu Agai i lana saunoaga lea o le budget.

Lau Afioga i le Fofoga Fetalai, o lea ua sausaunoa i atugaluga o le Vaega Faaupufai lenei. O tagata ia Asia ma e i ai lava Asia lelei, a o konekarate ua vaai atu i ai ma le alofa i konekarate a nai tagata Samoa po o konekarate fau fale. Ua na o le falolo le mea lea ua fai leaga e omai ia matou. Na ou fai atu i ai, "O le a outou omai ia matou ae le afio i le Palemia." O lea la ua tauva nei, a silasila i le tau e ala ai ona malo konekarate nei mai fafo, e matua maualalo lava. E mafua aisea? Se i silasila i le tau o a latou oloa nei e aumai i totonu pe e le o faaaogaina faiga foi ia e faamama tiute ma mea faapena ina ia silasila totoa i ai. Talofa i nai o tatou tagata, ua fao mea uma.

FOFOGA FETALAI: O lea ua maua. Tulai mai le tali a le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea e fia faasao. O tuuaiga na sa aumai ia te au, ona ave lea i Matagaluega e fai i ai latou suesuega ona aumai foi lea o le latou suesuega table i le Kapeneta, e leai lava ma se tuuaiga e sao, e matua leai lava ma se tuuaiga e sao. Ae i ai le mafuaaga e taugofie ai, a outou vaai nei i ai i le tele o fale, aemaise Ekalesia. E i ai le isi Ekalesia i Falealili sa fai e le kamupani Saina le latou falesa. Sa ou fesili lava i le faifeau ma le Komiti po o le a se latou vaai ae fai mai, e matautia le galue. E le faapea o tatou tagata, e galue ai lava galue ai lava. E oo foi i meatausami, o le faigofie ia ona tausii. Ae ua fua atu nei i le mea na semeamanu e oo i ai latou, tusa o le 1/3 o le tau lea na fai ai le tau na semeamanu e fai ai. Afai la o le experience lea o lea e maua e lea Ekalesia, matou te faafetai, o lea e sau mai tua, o le mea foi la lea o lea e tupu i konekarate nei. Ae ou te taofi foi, o se mea e taua tele mo le tatou foi aufai konekarate, ia taumafai e faataitai ia i latou ina ia taumafai foi e fai lelei e pei lava o ia foi tagata. Aua o lea lava e o i le tauvaga e tasi. E faapena le kamupani lea a le Fletcher, na malo malo malo le Fletcher, oo lava ina faiaina le Fletcher i o tatou tagata. Ia, taai fala o le Fletcher. O lea foi la ua alu alu lava, o lea foi ua tele konekarate ua pau ai konekarate Saina ia a ua malo ai tatou konekarate fai fale. O lona uiga o le mea lea, e i ai le feau lea e aumai i le mea o le faatauva. Ma o lea tatou te iloa le lelei o le faatauva, a le lesona tele lava lea na tatou maua i le tauvaga na fai e le Digicel ma le Bluesky. E le tau faailoa ua iloa uma e le tatou atunuu le manaia tele o le mea lea o le tauva. O se luitau lena mo tatou foi konekarate ina ia taumafai e faaleleia atili a latou galuega ia aua ne i toe manumalo kamupani mai fafo.

FOFOGA FETALAI: Ia, tulai mai lau Afioga i le Taitai o le Itu Agai.

Afioga Hon PALUSALUE FAAPO II: Faafetai i le faamalalamalama manino a le Afioga i le Palemia. Na pau lava le popolega, o le faiga o fale. O ai e iloa pe see ifo nei i le faiga o auala ma auala laupapa ma mea faapena? O le mea lena o lea e popole ai. Ae a silasila pei ona saunoa le sui usufono mo

Faleata Sisifo, oka oka le mau tagata i Vaitele. O au ia ua ou te i i le o atu faatalofa atu ia au. Ua ou faapea, sole....

FOFOGA FETALAI: Ia, malie le Taitai o le Itu Agai se i tulai mai le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o atunuu uma lava o le lalolagi, e faapena. A fia televave le atiae ona faasalalau lea e omai pisinisi, tagata e i ai latou tupe e omai e invest i totonu o le atunuu. Na pau lava lena o le auala e televave ai le atinae ma tele ai galuega e maua mo a tatou fanau. Se i avatu lau faataitaiga, e i ai le tusi masoa a le isi faipisinisi, tatou, na aumai ia te au, o le mea o le gaosiga o toilet papers, pepa faleese se i tulou. Ua ou manatu e faaaoga le example lena e faigofie. O le faamatalaga a le faipisinisi lea, se taofi pepa nei mai fafo o le a afaina ai lau pisinisi. Ona ou alu loa lea aumai samples eseese. Ona ou sau loa lea tatala ma faitau pepa ia lea e fai nei a le tagata lea ma pepa ia mai fafo, e i ai mea tipitipi e 150 le tele ae vaiti lava. A o pepa nei mai fafo, e 350 tipitipi, ae i ai la ma isi pepa e sau ai ma le namu pauta toe taugofie. Ia ona ou aamia lea ou fai i ai, ua e vaai i ai i le faaletonu lea ua i ai? O lona uiga, o le toatele o le tatou atunuu lea e mafatia i au pepa, e le gata o le malo, a o le mageso toe taugata. O le mea la lea, e le mafai ona na o oe o le a avatu i ai le faatagaga, na o au pepa toilets lava e fai i Samoa nei, ae lelei le aumai o pepa ia mai fafo, e fia moomia foi e tagata le tago atu e faaaoga le pepa ae sau le namu pauta, manogi toe vaivai e le malo, toe le mageso.

Lau Afioga i le Fofoga Fetalai, o le uiga tonu lena o le mea lea e tau fai atu nei, e le faapea o le a tatou nonofo ma faaaoga o tatou tagata i taimi uma, aua e le mafai ona tatou iloa po o le mea aupito silisili lea mo tatou tagata. Tatou te mananao e eseese tagata e omai e fai le galuega lea ia tatou iloa ai, pe le o ituaiga ia e manuia ai o tatou tagata. E i ai foi la le isi Saina lea ou te vaai i ai i le itumalo o Lealailepule, e tumutumu lava lena fale i aso uma, a o le ita ia i ai o tagata, ona ou alu atu lea ou alu i totonu, sole, ou alu atu, o le manaia o oloa toe taugofie. Ana faapea la e leai se fale lena, o lau vaai i ai i tagata nei e tumutumu ai, e le o ni tagata e tele ni a latou tupe, a o lea e o i ai ona o i e maua ai le laveai mo i latou. O le lesona lena mo tatou tagata, afai tou te mananao ina ia maua tupe nei ma pisinisi ia, vaai le faagaioioiga e tagata nei mai fafo, ona tatou taumafai foi lea o tatou e faataitai i ai lau Afioga i le Fofoga Fetalai. O le tulaga lena, e fai o lou naunau i o tatou tagata e i ai pisinisi, toalaiti, ae tatau foi ona fai ma e alofa i o tatou tagata lautele lea e o atu e faatau mai mea ia ma o atu e faaaoga o tatou tagata e faaaoga le latou taleni, a o le i ai o le mea o le faatauva, o i ina e atili improve ai ma atili faalelei ai le tautua a o tatou lava tagata mo tatou tagata.

Lau Afioga i le Fofoga Fetalai, ailoga o se mea leaga lea mea? O se mea lelei. A o lea ua ou faanoanoa tele i lou faalogo atu i le Taitai o le Taitai o le Itu Agai, e leaga tele le mea lea e fai e le Malo. Ana faapea e leaga, ua tele lava ni savali tetee e sau agai i le Malo, ae na pau lava le tagata lea e leotele le tetee, o lau Afioga Palusalua. E tatau la ona e manatua, o uiga ia faatemokarasi, e alu le Malo i le mea e fulisia i ai le toatele o tagata.

FOFOGA FETALAI: Malo. Tulai mai le Taitai o le Itu Agai.

Afioga Hon PALUSALUE FAAPO II: Lau Afioga o le mea e fia faasao. Na pau lava lau tala lea na fai, o konekarate, e puipui mai i le leai o ni galuega a nai konekarate nei. Na pau lava lea o lau tala. Ou te le o fai atu a mea o faleoloa ma tulaga faapena. O galuega a nai tagata ia e popole i ai.

FOFOGA FETALAI: Ia, o lea ua maua lou finagalo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o se mea e fia faasao. O le matua sese o lenei mea e leai ni galuega a tatou o fai i konekarate. O fonotaga ia pe tolu na uma atu nei a le Komiti o Tauofoga, na o tatou konekarate lava ia na maua faaiuga fai na avatu i le Kapeneta, aisea? Ona o le tulaga maualalo ma le competitive, tauva o latou peti. Ou te le iloa po o ai lea e pepeloa oe, a o le tulaga sao lena o lea foi ma faasalalau mai i le nusipepa ina ia transparent ma ia accountable. Ou te fautua atu i lau Afioga, vaai le internet ma le pepa lea a le Observer lena e faasalalau mai ai i vaiaso uma vaiaso uma iuga a le tatou Malo ona e malamalama ai lea i mea ia ou te fai atu ai, ma e le lauga pogisa mai ai i na mea po o ai lena e pepeloa oe.

Afioga Hon PALUSALUE FAAPO II: Amuia lava le tuuaifua aua latou te iloa atu le Malo o le Atua. O lea ua tuuaifua au faapea ou te le o malamalama. E malamalama lau Afioga i le Palemia, a o le alofa i nai o tatou tagata lea e taumafai atu ai. Ia silasila la lau Afioga i le Fofoga Fetalai....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai o le mea e fia faasao. A faapefea ona e fai mai o lea e tuuaifua oe o lea faatoa uma nei lava ona e lauga mai ma aumai mea ia ou te tali sao atu i ai? Se la e faamasino mai le tatou atunuu. A faapefea ona e pepelo mai o lea ou te tali sao atu lava i mea ia e te fai mai ai, ae uma atu le tali ae e fai mai e te le o fai mai ai? O le a ea le uiga o ia mea?

Afioga Hon PALUSALUE FAAPO II: O lena foi e te pepelo mai oe ia. E leai lava ma ni au tala o lavea ai na mea.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ou te le o pepelo atu. O le mafuaaga ou te le o pepelo atu ai, o lea ou te fai atu ia te oe, alu e faitau faasalalauga ia e aumai ona e vaai lea i ai. O lau faamatalaga, e leai lava nai a tatou locals o maua ni konekarate. O le mea lena na e aumaia nei. O le mea lena ou te fai atu ai, aua le oolea gofie oe. Se i vaai i ai o lea foi na e talitonuina gofie le faaseega o oe e le faipule sinia o le Vaega lenei, le Tofa Tuuu. Lea na ona fai atu lava o Tuuu e oso, fai atu Tuuu e oso. A o le tagata lea o Tuuu, o le matou fai gapia aupito maoae lea e entertain ina matou.

Afioga Hon PALUSALUE FAAPO II: Sole, matua leaga alii.

Tofa Hon Tuuu Anasii Leota: Lau Afioga i le Fofoga Fetalai, se ou te le iloa lea upu o le gapia. Faamolemole le Palemia se i toe sui mai se isi upu manaia leaga e le manuia lea upu. Faafetai.

FOFOGA FETALAI: O le gapia o le tagata ua leai se ama, e saoloto ma faafiafia.

Afioga Hon PALUSALUE FAAPO II: Lau Afioga i le Fofoga Fetalai, o le a tau faaiu atu se matou tala, o lea ua lata i le tatou taimi manava, ua fia faagasolo foi le galuega a le Kapeneta. Na pau lava le mea ou te faafetai i le Afioga i le Palemia i le faauilavea ma faauilavea. Silasila mai i lau lauga, toeitiiti o le faila atoa lenei e le i oo i ai, ioe. Ae ui i lea, pau lava le fautuaga lau Afioga, o lea ua sausaunoa le Minisita Agai, e le faapea matou te fautua atu ona o se aoai, pei o le upu lea e sau nei i le Tusi Paia, leai. O matou loto na e ia te outou, ioe. A tatou oti, tatou oti faatasi, a tatou ola, ola faatasi. O le mea la lea e ala ai ona ou fai atu. . . .

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le mea e fia faasao lau Afioga, a outou fia feoti lava outou, feoti ai pea outou, a o matou ia, matou te fia feola, o le ala foi lena matou te faia ai polokalame ina ia ola ai pea le atunuu lenei. Ae a outou fia feoti lava outou, feoti ai pea outou.

Afioga Hon PALUSALUE FAAPO II: O le faalavelave lea o lou vave oso mai lau Afioga i le Palemia. Tago e faitau le uiga loloto o upu ia, i le mataupu silisili o uiga o upu, ae aua e te faitau i luga o uiga ia ou te fai atu ai a. O le uiga loloto, o le uiga o le mataupu silisili ma tulaga faapena. Ae ui i lea, lau Afioga i le Fofoga Fetalai, ou te faafetai tele atu ma ou faamalulu atu i lau Afioga i le Palemia, Sui Palemia ma le Kapeneta. O le a foi sa outou faafogafoga mai ma lena Itu, e taumafai atu lava ona o le agaiina o a outou Afioga. O le tatou galuega e fai faatasi. O lea ua sausaunoa Afioga i Minisita Agai, na ona tuu atu lava i o outou tafatafa, a faaoga lelei. O le mea sili o lena ua amata ona faaoga mai pei o isi mea ia ua fuafua i ai le Malo e fai. Ae a leai, ia e pule lava outou, e pule lava Sitafine i le la o lona vaa.

Lau Afioga i le Fofoga Fetalai, o le a foi se gagana ua sala i lau taitaiga o le tatou Fono, e faamalulu atu, o lea lava e fai le matou tiute i le agaiina o le tatou Malo. E faapea foi i le faafogafoga mai a Samoa, e faamalulu atu ona o se faamatalaga ua sala. Ia manuia tele lau Afioga i le Fofoga Fetalai faapea foi lau Afioga i le Palemia ma lena Itu i Afioga i Minisita ma Minisita Lagolago, ia alo ifo e fai lo outou faiva, tatou galulue faatasi, talia ia le Tala o le Tupe. Aua le faia se auiliiliga, o le mea lava e tasi, ae faafetai tele lava mo lou avanoa. Ia manuia le Fono.

FOFOGA FETALAI: Malo. Ia e faamalo atu saunoa, malo fetalai i lau Afioga i le Taitai o le Itu Agai, ia e manatu foi ua tini tauao ai i i tuleiga ma saunoaga o le paia ma le mamalu o sui usufono sa saunoa. Ia e le tau faafuluina le vagana fetalai leaga o oe lea e te tu i le matagiolo i lea itu o le Maota, ua faafogafoga foi le Maota, ua faafogafoga Samoa i lau saunoaga matagofie, na tamua lava i le Atua, ua e siisii mau ma e saunoa foi i le tatou talanoa i le Atua ma Lona alofa, ioe, e leai lava se isi mea e i ai le maluapapa o lo tatou atunuu, ua liutino tagata le Upu, o le Atua e faavae i ai le tatou Malo. O a foi tiuga o le vaatele ma saunoaga o lenei aso, ia Palu, e malu le Maota i le va nonofo ma le vatapuia, i lo oulua faafeagai ai ma le Afioga i le

Palemia, o lau paaga lena. Pei lava ona ou mau iumaea ma ou faufautua atu foi, soia ia e te faalavelave i lauga a Minisita Lagolago ma latou o le pito i tua o le tautuaina o le Malo, o lau paaga, o le Taitai o le Malo. Ia ae faigata o lea foi ua tatou talanoa ma ia faamalamalama le mataupu, o le itu taua lena. O a foi tulaga o le taumafai atu o le Fofoga Fetalai e tau faamalamalama, e leai, o lea lava ou te saofai i le ogatotonu o le fale e faafoefoe a outou tuleiga ma saunoaga, e le faigofie, e leai se isi e mafai o na toe auau pe toe tofi le atunuu ua uma ona iloa ona aiga ma tulaga mamalu e pei ona i ai.

Ona o lea ua tatou taunuu i le tatou taimi malolo, o le a avatu le avanoa i le Afioga i le Taitaifono pe a tatou taliu mai i le taimi masani, ia ona lafo loa lea i le tatou Kapeneta ua leva ona fia tali le Malo, ia ona faaauau ai lea o le tatou Tala o le Tupe.

Ua sauni e le tatou Matagaluega le tatou taumafataga foi o le aoauli e pei ona masani ai. E tatalo atu ma le faaaloalo i le paia ma le mamalu o le tatou Maota faapea foi faauluuluga o Matagaluega, e manatu o lea e lava ma totoa le sauniuniga a Fepuleai, o le mea foi lena ia outou alofagia pea le Paketi a le Matagaluega o le Ofisa o le Fono, aua a oo mai lava, o lea ua uma lelei lauga e leai se isi o outou e lauga i lenei pakeki, ia ae le afaina, e le uma ai Tala o le Tupe o lenei Paeaiga.

Ou te faasilasila atu o le a faataatia ese Taulumaga a le Fono Aoao Faitulafono mo lana malologa masani o le aso.

Na faataatia ese Taulumaga a le Fono Aoao i le itula e 1:00 i le aoauli.

Na toe faaauau Taulumaga i le itula e 3:00 i le aoauli.

**TULAFONO TAU FAAOFI O LE FAATATAUINA O TUPE
FAAOPOPO (NU. 2) 2013/3014 MA LE TULAFONO TAU FAAOFI O
LE FAATATAUINA O TUPE 2014/2015 – felafolafoaiga faaauau i luga
o le faitauga faalua**

Na toe faaauau felafolafoaiga.

FOFOGA FETALAI: Ou te faasilasila atu ua toe amata nei Taulumaga a le Fono Aoao Faitulafono.

E i ai le talitonuga o lea ua tatou taunuu tonu i le taimi amata o lenei vaega o le afiafi, e faamalo atu ma momoli atu le faafetai ona o le onosai mai o le paia ma le mamalu maualuga o le tatou Palemene, e ala i le faaauauina o le tatou Fonotaga i lenei vaega o le aso.

E faia le tatou malologa ua atoa pulu fagota o fetalaiiga, saunoaga ma malelega aemaise o le momoli maia o le tofa ma le faautautaga i le paia ma le mamalu maualuga o sui usufono o le tatou Palemene aua lenei Tala o le Tupe.

Ae o le a avatu le avanoa lenei i le Afioga i le Taitaifono, ia e saunoa ai i tulaga o le latou Lipoti, ma e taumafai foi e talitali atu ona o nisi o finagalo na faaalua i taimi o saunoaga o sui usufono mamalu e ala i le tatou Tala o le Tupe na tuuina atu i luma Maota. Ou te valaau atu i lau Afioga i le Taitaifono

o Tupe Maua ma Tupe Totogi e tulai maia o lea o le a tamua i lau Afioga le tali atu a le Malo, ia ona faasolo lea i Afioga i Minisita ma le Afioga i le Palemia.

Tulai mai lau Afioga i le Taitaifono o le Komiti o Tupe Maua ma Tupe Totogi.

Susuga Hon PAPALIITELE NIKO LEE HANG (Taitaifono Komiti o Tupe Maua ma Tupe Totogi): Faafetai atu i lau Afioga i le Fofoga Fetalai mo le avanoa e fai ai foi se sao o lenei sui usufono i le Tala Faatatau Autu o le Tupe 2014/2015, e talitonu foi ua maua se faasiliga malosi i lau Afioga i le Fofoga Fetalai aemaise o le Afioga i le Palemia ma le paia o le Kapeneta, tainane foi ia sui usufono mamalu uma o le Palemene, aemaise faiga malologa e faaauau ai le tatou galuega.

Ae muamua lava ona ou toe sii le viiga ma faafoi le faafetai i lo tatou Matai sili, ona o Lona alofa faifaipea ma Lona agalelei o lo o mafai ona tatou toe fesilafai i lenei itula o le aso e faaauau le tatou galuega i le manuia. E faatulou atu foi i le pau o le Maota o sasao nei, le afio o lau Afioga i le Fofoga Fetalai, afio lau Afioga i le Palemia, lau Afioga i le Sui Palemia ma le mamalu o le Kapeneta, afio lau Afioga i le Taitai o le Itu Agai ma lena vaega toaitiiti o le Palemene, aemaise foi afifio i Afioga i Minisita Lagolago, afifio ia faauluuluga o Matagaluega ma Faalapotopotoga a le Malo, ia afio foi afioga i le Failautusi ae tainane le loaloa o le aufaigaluega o le Maota Fono.

Ou te fia faatalofa atu foi i le tapuaiga a Samoa mai ona Ao seia paia ona Iu, afio Lana Afioga Mamalu, O Le Ao o le Malo ma lau Masiofo, afio lau Afioga i le Sui o le Fono a Sui Tofia ma lau Masiofo, afio lau Afioga i le Faamasino Sili ma le mamalu o le Ofisa o Faamasinoga. E faatalofa atu foi ma faafeiloai atu i susuga i Faafeagaiga Taulagi i fata faitaulaga e fia o lo o faanonomanu i nuu ma afioaga, aua se manuia o Samoa mo a taeao.

E faatalofa faapitoa atu foi isi ou itumalo o le Au Palota Taitoatasi, faamalo le soifua faamalo le tapuai, o outou sa ma faigata i ona tulaga faalupelupeina o le paia lava ia faale-Talalelei o paia faale-Malo, o paia faale-Atunuu o le a nuunuu atu. Tulou, tulouna lava.

Lau Afioga i le Fofoga Fetalai, e fia faamauina le agaga faafetai i le Afioga i le Minisita o Tupe o le Afioga foi i le Palemia faapea le Ofisa Sili ma le Pulega ma le loaloa o le aufaigaluega o le Matagaluega o Tupe i le tapenaina o le Tala Faatatau Autu o le Tupe 2014/2015. Ou te talitonu e le i faigofie la outou galuega faifaipea, o lea e momoli atu ai le faamalo ma le faafetai. Tau ina ia agalelei ma alofa pea le Atua e faamanuia mai pea i o outou faiva o lo o feagai ma outou aua se manuia o le tamaoaiga o Samoa.

E momoli foi le faafetai i sui usufono mamalu uma sa sausaunoa aemaise e sa talia ma le fiafia le Lipoti, aemaise foi le taliaina o le tulaga o le Tala Faatatau Autu o le Tupe i lona tulaga aoatetele, e momoli atu le faafetai.

Lau Afioga i le Fofoga Fetalai ae le i tuuina atu se sao a lenei usugafono i le Tala Faatatau o le Tupe 2014/2015, e muamua ona ou fia piiama atu i le saunoaga a lou uso a sui usufono ia Maualaivao, e tusa ai ma sona lagona i le Tulafono Tau Faaofi o Teuteuga o le Tulafono o Faiga Palota 2014, o lo o aafia ai nofoa o le Palota Taitoatasi. Lau Afioga i le Fofoga Fetalai o se lagona foi lea e tasi i lou nei sui usufono, e pei lava o se laau fulifuli mamafa lenei Teuteuga, e saolele lava le saunoaga a le Afioga i le sui usufono, ona o nisi itumalo o lo o aafia i lenei Teuteuga, na o le vaeluaina o nuu ma afioaga,

a o lo o tumau lava le igoa faale-Itumalo, ae paga lea, o le ma itumalo o le Palota Taitoatasi, e fai ai le tala a le alii papalagi foi lea e faia le TV add a le Vailima Beer, ua uma, finito, capot, ia ae o le tulaga lea e i ai, o le upu moni lava lau Afioga i le Fofoga Fetalai, ua pulapula le gata ae fasia. E pasia loa le Tulafono Toe Teuteu ona mate loa lea o si mea, ae e toe valuvalusia lava aa o le fau i se finagalo o lau Afioga i le Palemia i le toe iloiloina o lenei Tulafono Tau Faaofi o Teuteuga o le Tulafono o Faiga Palota 2014.

Ona oo mai lea i le Tala Faatatau Autu o le Tupe 2014/2015, lau Afioga i le Fofoga Fetalai ma le paia o le Palemene, ia e tele lava ni sui usufono mamalu sa sausaunoa aemaise ni sui o le matou Komiti sa sausaunoa i nei tulaga e aafia ai nisi o matou fautuaga o lo o tuuina mai i le Lipoti o le matou Komiti, ae pau lava le tulaga lea e toe avatu ai se faamatalaga faaopoopo ona ou te manatu ua uma ona faamalamalama foi e le Afioga i le Palemia po o le Minisita foi o Tupe i mea lava nei o tatou aitalafu, o lo o faapena ona popole ai pea le Taitai o le Itu Agai. A silasila lau Afioga i le Fofoga Fetalai ma le paia o le Palemene, o le Tala o le Tupe o lo o maitauina ai, e le o lava ni a tatou tupe maua e ono faatupe uma ai ia le tulaga uma lava o lo o moomia, aemaise lava la tulaga ia o atinae, ma i lou talitonuga, se i vagana ua lava ni tatou oloa e auina atu i fafo, o le isi faalavelave lea e tulai mai o le leai o ni a tatou oa faalenatura, e leai se isi mea e tatou te faamoemoe i ai na o le lafoga lava, na o le tax, ia ae paga lea, a le taumafai la e nono mai ni tupe e faatino ai ni atinae, ia ou te talitonu e le mafai ona toe agai i luma le tatou atunuu aua a leai ni atinae leai ni galuega, ia e foi i tua le atunuu e leai se mea e leai se manuia, aemaise lava le tamaoaiga. Ma ou te talitonu, o faiga ia e fai e le Malo i nonogatupe, o lo o fai fuafua lava. Silasila lau Afioga ma le mamalu o le Palemene, o lea e i ai taiala ia e faataatia mai i le Tala o le Tupe, o lo o i ai foi la fuafuaga i a tatou aitalafu, o lenei e fua i le 50% o le GDP, o fua ia lau Afioga e le faapea e tamau ai se faagasologa o ni aitalafu, na o se target foi le e fuafua i ai le...a ova foi, e leai se mea o i ai. Ona o lea e manino mai foi i faiga faavae, a alu alu tele foi agai i luga, ia taumafai lava le Malo e toe tuu mai le pasene lea ina ia meet lava le target lea o le 50%, a o le tulaga foi lea i nonogatupe ia faaopoopo e tataua ona fai, aua a leai, ia e le agai i luma lo tatou atunuu e developments ia ma tulaga uma faapena, o le fautuaga lea na aumai e fai fuafua, o lea ou te talitonu o lea e fai fuafua. Ae pau lava le manatu a le Malo e ave pea le faamuamua i atinae e faatupu ai avanoa faigaluega aua le mamalu o le atunuu aua le faatupulaia o le tatou tamaoaiga.

FOFOGA FETALAI: Malie lau Afioga i le Taitaifono, se i tuu atu le avanoa i le mea faamalamalama a le Taitai o le Itu Agai.

Afioga Hon Palusalua Faapo II: E faamalulu atu i le saunoaga matagofie a le sui usufono mamalu aemaise o le Taitaifono, o lea e manino lava lana folasaga, o le target ia 50%, 50% o le aitalafu o le GDP. Ae o le a le mea lea ua oo ai nei? Ua ova ma le 70%. O fai fuafua la lea lau Afioga i le Taitaifono? O lea ua savali atu i le 80% o le GDP e aitalafu? O le mea lea e faafesili ai.

FOFOGA FETALAI: Ia o le a tuu atu le avanoa i le Afioga i le Taitaifono.

Susuga Hon PAPALIITELE NIKO LEE HANG: Faafetai i le faauilavea a lou uso a sui usufono le Afioga i le Taitai o le Itu Agai o le sui foi o le Komiti o le Tupe, leai e pei ona ou taua o le 50% pei o se guideline, e saolele lau saunoaga ua ova ma le 50% pei ua 68% i le taimi nei, a o le tulaga lea e tau faaali atu lau Afioga i le Fofoga Fetalai, e le mafai ona taofia e tatou mea nei o aitalafu, nonogatupe e mama tului, ona o le avanoa lenei lea tatou te maua e faaoga ina ia atinae Samoa, a le faaogaina la pe a tulai mai ni atinae e tatau ona fai, ia o le a nofonofoai la tatou ma leai se agai i luma i le tulaga lea. A silasila lau Afioga i isi atunuu laiti ia i fafo i Aferika o le Pasefika, ua ova i le 100% ia external debts compare i le GDP, o la e struggle, ma leaga e le o i ai se fuafuaga faapea pei o tatou e tau tata ai le soona fai o fuafuaga ia pei ona ou taua, o lea e fai fuafua fuafuaga nei, i lou talitonuga, ona o lea e i ai ia guidelines ia e fua i ai e aua ne i soona alu tele i luga, ou te iloa e faaeteete foi le Malo ina ia aua ne i oo atu i le 100% le tulaga lea, ae ona o atinae ia e moomia i le taimi nei, e moomia ai pea le nono mai o tupe e faauma, e faauma loa, ia ou te talitonu e le toe i ai ni nonogatupe, o lea ua ata mai ia miti, o lea ua fua mai miti, pei o le tulaga lena lau Afioga i le Fofoga Fetalai. E pei ona ou taua atu lau Afioga, a leai ia lafoga ia e leai ni...o lea e faamoemoe tatou i mea nei o Taxes, ona e leai ni a tatou oa faalenatura ua le lava a tatou oloa auina atu i fafo, ia ua faaitiitia foi le tulaga o tatou tagata asiiasi maimoa mai fafo, a o lea lava e taumafai le Malo i se tulaga e toe atinae ai ia vaega ia, ia ma toe alualu agai i luga se tulaga o tatou tupe maua, pei foi ona fautuaina e nisi sui usufono mamalu o le matou Komiti, o le itu na agai i ai le saililiga a le matou Komiti ina ia sue ni auala e faasaoina ai a tatou tupe ia ma nisi auala e maua mai ai nisi tupe faaopoopo, pei o saunoaga a isi sui usufono mamalu, ia toe faamalasia a tatou Faalapotopotoga Tumaoti aua mea ia o dividends.

Lau Afioga i le Fofoga Fetalai, e pei ona faailoa atu i le matou Lipoti, ua talia atoatoa e le matou Komiti le Tala o le Tupe, se i vagana ai la le tulaga lea sa laga mai e se sui usufono mamalu i le tofogi la ia o le Komisi o le Aufaigaluega, sa maitauina ma le totoaga e le Komiti le tulaga o le leai se...e le fair i nisi foi Matagaluega a le Malo ona ua matou maitauina, e i ai ia mafuaaga na tuuina mai, a o le matou talitonuga, e tatau pea ona faatali se i maua se tupe po o le a le tulaga e tatau ona faatali, ia amata faatasi, o le mea la ua tupu mai, o le amata ona faitio mai isi Matagaluega i tulaga ia ua fai nei e le Komisi o Galuega, ua sii i luga tofogi o latou principal officers ma latou senior officers, a o isi uma Matagaluega a le Malo, o la e tumau. O le mea la lea e talosaga atu ai i le Malo se i silasila ane i le tulaga lea. A o le fautuaga lea na tuuina atu e le matou Komiti, ia taofi lea tulaga.

O le agaga foi lena o lenei sui usufono mo le talia atoatoa foi o le Tala o le Tupe. Ua maitauina e le Komiti le tele o Matagaluega ua ova i le afe pasene tupe faaalu nai lo tupe sa faaagaaga mo mea nei o meataumafa, dining and lunching ma le faaogaina o telefoni ma le internet. O items foi nei po o expenses nei na lagalaga ai le finagalo o le Suetusi i lana Lipoti talu ai, o le overspend o items a Matagaluega uma. Atonu e tasi pe lua ni Matagaluega o lo o sao mai ai, a o le tele o Matagaluega, e le laitiiti pasene ia e papa ai le faaogaina o items ia, e tai afe, tai lua afe pasene. O le mea lea e tatalo atu ai i le Malo e silasila ane i tulaga ia, ia faaoga tupe ia e pasia atu i le Palemene i fua faatatau ona o lea e le o lava le faasoa a le Matagaluega o Tupe e faasoa ai tupe a le tatou Malo.

Ona ou oo mai lea lau Afioga i le tatou Ministry fou lea o le Public Enterprises. E fia faamauina le agaga faafetai i lau Afioga i le Palemia ona o le faatulai mai o lenei Matagaluega fou. Ou te talitonu o le a avea lenei Matagaluega e mataitu ai ma silasila totoa ai le Malo i galuega faatino a tatou Faalapotopotoga Tumaoti, SOEs, ina ia tusa ai ma Tulafono po o Acts na fausia ma amata mai ai nei Faalapotopotoga Tumaoti taitasi. O le faamoemoe lava o le Malo mo nei Faalapotopotoga ina ia galulue faapisinisi aua ni tupe mama e fesoasoani i tupe maua a le Malo mo le Tala Faatatau o le Tupe mai lea tausaga i lea tausaga. A silasila lau Afioga i le Fofoga Fetalai ma le paia o le Palemene i le Tala Faatatau o le Tupe 2014/2015, o lo o i ai se vaegatupe e \$700,000 e maua mai dividends e aofia ai la Faalapotopotoga ia o le Samoa Post e \$297,764.50. O le Samoa Land e \$162,970, o le Polynesian Airlines e \$239,265.50. E na o le tolu lava Faalapotopotoga ia e fuafua le Malo e maua mai ai ni tupe i le Tala Faaletupe lea o le a pasia nei pe a pasia.

I le fitu tausaga talu ai lau Afioga i le Fofoga Fetalai, na aoina mai i le Faalapotopotoga a le Agro Store, Development Bank, Polynesian Airlines, Samoa Housing, Samoa Land, SPA, Samoa Post se aofaiga e \$4,282,460 mai Faalapotopotoga nei e fitu. A o fea le isi vaega? Na o le tolu lea ua declare o lea e fuafua e maua mai ai ni dividends aua le Tala o le Tupe a le Malo. A o le fesili; po o le a le mea ua tupu i isi vaega ia sa aumaia tupe ia?

O le mea lea ou te faafetaia ai le Afioga i le Palemia ma le tulaga lea i le Ministry lea ua faatulai mai nei, ona ou te talitonu, o le faatulai mai o le Matagaluega lea, o le a mafai ai ona toe silasila totoa le Malo i le faapogai ua le mafai ai ona toe silasila totoa le Malo i le faapogai ua le mafai ai ona faaauau e nisi o Faalapotopotoga Tumaoti ona maua ni tupe mama aua se latou sao i le faamoemoe o le Malo.

Sa afea foi i lauga a nisi o sui usufono mamalu le taua o le tuuina mai o Annual Reports mai Matagaluega ma Faalapotopotoga a le Malo i le Palemene, i le taimi faatulagaina ina ia tuuina mai ni a latou Annual Reports. Ou te fia tauina atu pea Matagaluega ma Faalapotopotoga nei se i faafofoga mai pea Afioga i Minisita se i tapena mai ai, o le vaega lea o Faalapotopotoga Tumaoti. O le Samoa Shipping, Samoa Land, Land Transport ma le Public Trust. O Matagaluega a le Malo, PSC, Foreign Affairs, MNRE ma le MWTI. Lau Afioga i le Fofoga Fetalai ma le mamalu o le Palemene, e taua tele le tuuina mai o nei Lipoti i le Palemene i taimi faatulagaina, e mafai ai ona outou silafia ma matou iloa ma malamalama i le tulaga o faatinoina ai galuega, aemaise lava tatou Faalapotopotoga. O Lipoti foi nei ou te talitonu e mafai ona fesoasoani i le Malo mo le toe filifiliina o Ofisa Sili o Pulega ma Pule Sili aua e fua i le performance, po o tau mai i le Lipoti lenei po o maua ni tupe mama po o lea le tulaga o faatino ai galuega. A le maua la e tatou Lipoti nei lau Afioga i le Fofoga Fetalai, e le mafai ona tatou malamalama i le tulaga lea. A o tatalo i le Malo e auala atu i lau Afioga i le Fofoga Fetalai, ia se i tautuana Lipoti nei ona o le taua lea ou te faamatalatalaina atu. Ou te manatu foi, o le isi lea vaega taua e faamalieina ai le tatou manulauti o le good governance, o le accountability ma le transparency.

O se manatu vaivai e fia tuuina atu i le Malo e auala atu i lau Afioga i le Fofoga Fetalai, se i toe silasila ane i le tapenaina o tatou Annual Reports pe ua le tataua ona standardize uma Lipoti ina ia taugofie mo Matagaluega ma Faalapotopotoga a le Malo. O le upu moni lau Afioga i le Fofoga Fetalai, o nisi Annual Reports pei o ni photo albums i le tele o ata felanulanuai ma pepa

taugata, glossy paper o lo o faaaogaina ina ia tau faasaoina mai ai nisi vaegatupe. O mea taua lava ou te talitonu e tatau ona i totonu o Lipoti ina ia faafaigofie ai ma taugofie a tatou Lipoti, ia i ai le Audit Report, Annual Accounts ma se Lipoti mai le Pulega i a latou galuega sa feagai ai ma le tausaga faaletupe lea e tuuina mai i totonu o Lipoti. A o nisi uma tulaga o ata ma mea faapena, ou te talitonu lau Afioga i le Palemia ma le Kapeneta, se i silasila ane i ai ona ua fai lava si taugata tele o isi Lipoti. A fua i isi Lipoti i le faiga, o le matua simple lava toe taugofie.

Ona ou oo mai ai lea lau Afioga i le Fofoga Fetalai i faiga masani a le Malo mo le faamaloloina lea le tumau pe suspend o nisi o Ofisa Sili o Pulega ma Pule Sili o Matagaluega ma Faalapotopotoga a le Malo o lo o tuuaia i ni faiga faasolitulafono i ni faiga faasolitulafono i le faafoeina ma le faatinoina o latou tiute. Lau Afioga i le Fofoga Fetalai, i le tulai mai o le aafiaga o le Komesina o Leoleo ma lana Komesina Lagolago i le tuuaiga i le le faamaoni i le faatinoina o la tiute ma faamalolo le tumau ai laua seia oo ina maea suesuega a le Malo, pe faamaonia ia tuuaiga pe leai. A faamaonia, ua faamalolo, ae a leai, ua faaauau le auunaga.

Ou te manatu foi la lau Afioga, e tatau lava ona laugatasia faasalaga mo i latou ia e tulai mai ai tulaga ia, o lea ou te tautala atu ma lou amiotonu i le tulaga lea o le Pule o le Faalapotopotoga o le SLC. E i ai lava lou lagona ua tatau ona fai i ai se fuafuaga a le Malo. I lou amiotonu, ua tatau ona fai i ai se tulaga faapea. O lea ua suspend nai isi Ofisa Sili o Pulega le tumau ona o le tulaga lea ua tuuaia i ni tulaga piopio pe le amiotonu, ae se i fai se suesuega a faamaonia ona faapena lea ona faamuta. A leai, ia toe reinstate. O lea ou te tautala atu lau Afioga i le Fofoga Fetalai i se tulaga e fair uma i tagata faigaluega a le Malo, aemaise Ofisa Sili o Pulega ma Pule Sili lea e faafofoga mai. I lou la manatu, o le tuualalo lau Afioga i le Palemia, se i silasila ane i le tulaga lea, ona ua tele foi le mamalu o le atunuu ua fesiligia tatou, o Taitai o le Malo, Taitai o le atunuu. O ai e fai faapea a o ai e fai faapea? Ia na ona taatia atu faapea lau Afioga.

Ona oo mai lea i faamanuiaga lau Afioga i le Fofoga Fetalai i tulaga ia. Aua o lea e maitau atu, a faamalolo le tumau se Ofisa Sili o Pulega, po o se Pule Sili, e alu lava le totogi, ave ma le taavale ae se i toe silasila le Malo i le tulaga lea, ona sa faatea talu ai nei lava se Minisita Lagolago, aveese le taavale, tipi le totogi ua alu i le totogi masani o sui usufono. O le manatu lea e tuuina atu i lau Afioga i le Palemia ma le paia o le Kapeneta, e tatau foi la ona fai faapea tulaga ia. Afa le totogi, taofi le taavale ae se i saili po o fea le mea moni. A faapea e le faamaonia tuuaiga, reinstate. A o le mea lea ou te le iloa pe sao, faasao mai au pe a sese. A uma le suesuega lea a o la e totogi lava ma faaoga le taavale ae uma ifo e faamaonia, a faapefea le tele o le gau lea e alu i le tupe lea e totogi ai ae leai se galuega o toe faia, faaoga le taavale e le iloa po o le a le faaaogaina la e faaoga ai? Aua a alu ma le talitonuga e sese lana mea la e fai, ia o la e alu soona fai lava le taavale lenei, leiloa pe foi mai le taavale ua malepe. Ia na o se manatu po o se tuualalo e taatia atu i lau Afioga o lena e i ina le faimea ma le tulaga e faatino ai lea tulaga.

Lau Afioga, ua maea se folasaga, a o le itumalo foi lenei e le tagisa. O lea ua uma ona saunoa atu lou uso a sui usufono i manaoga, na o nai auala lava, aua o le tolu lenei o Paeaiga o ou tulai mai i le tofi faipule o le itumalo, na amata mai lava o talosaga le auala lea i Aleisa o le Levadine Rd. E le umi le auala, ae o le auala ua tele ina nonofo ai foi tagata, ae o le leaga ia o le auala. Toe

tasi lava le ma tausaga i le Palemene, o le tulaga foi i le lumanai e le mautinoa, ae lau Afioga i le Minisita, se i toe silasila ane lava i le talosaga vaivai a le sui usufono o lenei itumalo. E manaia pe a uma atu maua ma le Palemene a ua i ai se ma sao i le ma itumalo. Ma le auala lea e i Vaitoloa lau Afioga, lea foi sa talosaga atu i lea Tala o le Tupe ae le i faia lava se galuega i ai. Ou te iloa e le o lava se tatou tupe, ae na ona taatia atu i ina aua le tausaga faaletupe lea pe a aulia pe a tusa ai ma lou finagalo. E popole lava aua o lea ua ma lauga i auala le Palemene, e le faamanuia i maua ma le tofi faipule, ae ou te talitonu le itumalo e leai se manuia e tuuina atu i lau Afioga. Se i silasila ane i le tulaga lea ma le faaaloalo lava.

Lau Afioga, ua maea se lauga a lenei sui usufono, ae tau ina ia agalelei pea le Atua i lau Afioga, ia faafualeva lou soifua laulelei aua le feagai ai ma le taitaiga o le Maota Fono faapena foi i le Palemia ma le paia o le Kapeneta. Lau Afioga i le Taitai o le Itu Agai ma lena Itu o le malu, aemaise foi Afioga i sui usufono mamalu o lo o matou galulue atu i lenei Itu, ia faamanuia le Atua. I Ofisa Sili o Pulega ma Pule Sili o Matagaluega ma Faalapotopotoga, ia manuia la outou galuega, ia faamanuia le Atua ia te outou. Faafetai lau Afioga i le Fofoga Fetalai mo le avanoa. Ia manuia le tatou Fono.

FOFOGA FETALAI: Ia, e momoli atu le faafetai i lau Afioga i le Taitaifono, ma e talitonu o le saunoaga mulimuli foi lenei i le tatou Tala o le Tupe. Lau Afioga i le Palemia ma lau Kapeneta, ou te manatu ua oo tonu i le vaeluatai e tulai atu ai le tatou Malo aua le tali atu ona faasolo ai lea o le polokalame aua le pasiaina o le tatou Tala o le Tupe.

Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ou te tulai atu ma le agaga faaaloalo e molimoli atu le faafetai. O lea ua ou maitau ua toeitiiti lava atoa uma le tatou Palemene ua sausaunoa i le Tulafono Tau Faaofi o le Faatatauina o Tupe 2014/2015, e i ai le lagona ua matua saausi lava le fefaaliga o taofi. O le Tulafono Tau Faaofi o le Faatatauina o Tupe 2014/2015, lea o le a faafoe ai le Malo ma le atinae o lenei atunuu i le isi 12 masina o lo o lumanai ai. E le mafai ona tau mamaina le faataua e le gata i le sao taua o le atinae o Samoa a o le atinae foi o o tatou itumalo. O lea ua maitau ma le totoa le tulaga aoatetele o le faaaliga o finagalo faapea foi ma le naunautai o a outou Afioga i le atinae o o tatou itumalo taitoatasi.

O mea matagofie nei e fia faafogafoga mai foi le itumalo i fautuaga a o latou sui usufono. O le naunautai foi lena ia te au ma le Kapeneta ia maua ni tupe se tele e mafai ai ona faatinoina uma i se taimi puupuu mea uma o lo o tatou manaonao i ai. Aua o le taunuuga o nei mea uma o le faatupulaia lea o le tamaoaiga o Samoa. O le uiga o lea upu, o le faatupulaia o le tamaoaiga o tagata uma lava o lenei atunuu. Afai e faatupulaia tupe maua, o le a se isi mea i tua atu o lena, pau o le mea o le fiafia ma le filemu e taunuu i ai mea nei o aiga ua maua seleni e faaaooga ai fanau. O le a foi le taimi e mai mai ai le atalii po o le afafine a o lo o i ai seleni e tua i ai.

O le tulaga lena o atunuu uma e oo lava ia Amerika e fai foi ma o e fai a latou nonogatupe. E oo foi i fua ua faataoto mai, o fua na e faataoto e mea nei o Faalapotopotoga o le lalolagi. O le a le igoa o fua ia? O taiala, e le o ni tulafono e ta mau i ai le atunuu a o taiala e limataitaiina ai. Aisea le mea e

faalupe ai o taiala? E i ai taimi e tatau ona o ai le atunuu latou e matua aumai ni nonogatupe aemaise o nonogatupe māmā le tului ona faatupulaia ai lea o le tamaoaiga. A faatupulaia le tamaoaiga ona tifa to ifo ai lea i lalo o le pasene lea e talanoa ai tagata. E tifa to ifo i lalo pe afai e faatupulaia le tamaoaiga, ae a taofiofi o le a le mea e tupu? Na o le agai lava i luga o le aitalafu ae leai se tamaoaiga e tupu. O le mea lena lea e tau faamatala atu ia te outou. A tupu le tamaoaiga o le i ai o seleni, a o le i ai o seleni – afai e le lava tupe tatou te maua ona tatou o lea e vaai Faletupe e mafai ona maua mai ai tupe e māmā le tului, aua a leai se atinae e leai foi se tupu o se tamaoaiga, leai ni galuega e maua.

Ua ala ona ou taua lea mea leaga ua pei o se tulafono a Mose ma le ua perofeta lea e faataatia. O le mea lea na faasao mai e le Taitaifono o Tupe Maua ma Tupe Totogi i le Taitai o le Itu Agai, e le o ni tulafono a Metai ma Peresia a fai mai loa e 50 ua 50% o taiala. O le a le uiga o lena mea o le taiala? E faatutu mai faapea e fai ma fuafua i ai aiaiga a le Malo.

O se taimi ona ou toe faamalamalamaina atu ai lea o le mea lea e tele ai le fenumiai ma le pogisa. O le a lafo atu la matou galuega e amata mai i le Minisita aupito talavou toe aulelei, le Minisita o Leoleo ma Falepuipui ona faasolo mai ai lea ia te au ona ou faaiu atu ai lea. Afai lava ua outou tagofia mea uma o lona uiga ua leai foi se mea ou te toe faia, ina ia tatou agai atu ai i le Tulafono Tau Faaofi o le Faatatauina o Tupe 2014/2015 ma faagasolo ai.

Ae toe avatu lava lau faafetai, faafetai tele lava ona o le matua oa o felafolafoaiga ua fai nei, a o se taimi mulimuli ona ou toe alu atu ai lea se i toe talatala le pogisa lea e aumai pea i le taiala. E le o se tulafono a Peresia ma Metai. O fea o i ai Peresia ma Metai? Ua leai se Peresia ma Metai, aisea? Aua foi o le uta a le poto e fetalai. O ai e ona ia upu? O upu a le atunuu lenei, o le uta a le poto o le fetalai, fetuutuunai.

Lau Afioga i le Fofoga Fetalai, o si au tifaga puupuu lena e tau ina faaemo ai ata ia o le a faaali atu a o le faagasolo loa la matou galuega.

Soifua ma ia manuia.

FOFOGA FETALAI: Malo faafetai saunoa i lau Afioga i le Palemia, o lea foi ua faafofoga ma le manino le paia ma le mamalu o le Maota e ala i tuleiga ma saunoaga malamalama.

O le a faagasolo le Tali a le Malo, tulai mai lau Afioga i le Minisita mo Faatoaga ma le Faleoloa o Faatoaga. A o le i tulai mai le Minisita, na ona faamanatu atu le talosaga a lenei itumalo leaga e le o faaleoina atu. O lo o faatali pea lo tatou nuu i le pou lea na e saunoa i ai mo Sasina. O lo matou nuu e aafia tele i le afi ae mamao Leoleo i le Gagaemauga. Na ona faamanatu atu ou te talitonu o lau Afioga e te savali i upu uma lava e te saunoa i ai.

Tulai maia lau Afioga i le Chef in Command lau Afioga i le sao Fetalai Sala.

Afioga Hon SALA FATA LISATI PINATI (Minisita mo Leoleo ma Falepuipui): Faafetai atu i lau Afioga, o le mea lava lea e manaia ai le tatou Fono, a lelei lava le Taitai Au e lelei lava foi mea uma.

Lau Afioga i le Fofoga Fetalai ma le paia o le Maota, ou te muai faatulou atu i paia ma sa o le atunuu o le a ou le oo i ai. A o le a fagatonu loa le malamama ma vili tonu le ifi a maina e pei ona i ai le tele o saunoaga ma fetalaiga e pei ona fia malamalama i ai sui usufono.

Lau Afioga i le Fofoga Fetalai ma le mamalu o le Kapeneta ma sui usufono o le Maota, sa ou fia talanoa i le mataupu lea e uiga i le Komesina o Leoleo ae peitai ane o lea ua saunoa le taitai ia Papalii, ou te talitonu o lena ua i totonu i ina le tala autu e pei ona i ai le fuafuaga ua faataatia.

I nisi o pou e pei ona saunoa i ai nisi o sui usufono e leai se mea e le faia, o le mea moni a outou maitau i lou tulai mai ua toeitiiti uma ona fai pou. O Savaii ua maea ona fai pou ma ua faatetele ae pe toe lua lava ni pou i Savaii. Lau Afioga i le Fofoga Fetalai, a tuu i fea? O mea uma nei ua tataua ona faatino, o lea a faamaui i lalo e tataua ona i ai le Fuimu ma Leoleo i ina, ae a. E le o le galuega lea a tatou e fai o le puipui aua o le tiute o le Malu o le Malo ina ia leoleo ma saogalemu ona tagata. O le agaga lena ma le auga o mea uma ina ia tautua ma le faamaoni le Leoleo, fai ma le alofa ma ia tutusa tagata uma i lalo o le vaavaaiga a le Matagaluega o Leoleo. Po o le faavalevlea o le tagata po o le a lava le tulaga e i ai a ia tutusa i le vaaiga a Leoleo, pau o lea a faaletonu se sui usufono o le Palemene ae avatu i uta, ia ona alofa atu lea.

Ua taua pou i Olomanu e pei ona i ai auala galue, ua uma ona faatalatalanoa i le Minisita mo Galuega, Felauaiga ma Atinae Eseeese, anusa foi o Manua lea, Manua lea, Manua lea, faafetai. O lea ua tali mai lou uso a Minisita, Sala e tuu i fea? O lea e aafia uma ai sui usufono e toatolu i le auala lea e alu i Olomanu, o nei auala uma ua maea ona faatinoina. O le tautua matavela lea a le Malo... ou te manatua ai le tala a se tasi o toeaina i Tutuila. E i ai le matou malaga na alu, ia ua alu alu le lauga ae faapea mai le isi toeaina, “o au ua ta masani lava e faamimiti au upu ae faapepeti au faiga”. O le agaga lena o le Malo e pei ona i ai le matou Paeiga, ia faamimiti a matou upu a ia faapuputa a matou galuega fai ina ia faasafua atu le manuia i le atunuu atoa. Ua tagisa le sui usufono mo Siumu i le auala, o le a le mea na e le fai i ai. Tuuu o le a fai le auala o oe.

E faapea foi i le paipa a se tasi o sui usufono mo Aana Alofi Nu. 1, o le Malo mo tagata, o le Malo na fai mo tatou, e le i faia se mea e tuu. A lea e molimau le Minisita mo Fesootaiga ma Faamatalaga Tekonolosi, molimau foi le Minisita mo Tupe Maua e action mea uma e bad le Itu lena, malo lava le lavapapale. A toa lava upu e toa foi galuega e fai, ae i ai le mea e mulimuli mai ai. Ia i ai le faamaoni, o le a le mea e faamaoni ai? E ala ona tutupu faaletonu ona o taitai, e le o tatou a o tagata nei e tofia e avea ma Ofisa Sili o Pulega ma tagata i lalo atu o Ofisa Sili o Pulega. A faaletonu ua tataua ona malolo. O le mea moni lava o le tautoga a le tagata, “ou te faia ma le faamaoni ou tiute”. Aua ne i faataga faia, o Samoa e mamala. E alu alu a le isi fai mai, o le faiga lena ua pei ua memumemu foi lele laugutu. Ia vaai i le tele o tupe a le Malo ua ai e le tagata le la. O le mea lea ua tupu ai, ua tele tupe ua alu vale talu ai le soona fai o le olaga, a o lea e lelei lava lo ta ola mativa...

O le toese i Tafaigata ua taua faapea o lo o nofoia e le Malu o le Malo ma o latou aiga. O le talitonuga ma le mau o lo o i ai, o i latou nei ua nofo sala e moomia le agaga o le tufa atu e pei o lo o i totonu o aiga. Aua foi afai e faasala o le a avatu loa ma pa puipuia ma tuu e aunoa ma nisi e talanoa i ai pe faia se osiga aiga ma faalenuu, o lona uiga e lua lava mea e oo i ai e pei ona ou fai atu, a le faitauina lima ua memumemu, aua foi e moomia e o tatou tagata lea fesootaiga. E i ai le isi talitonuga lea ou te nofo ma au, o le a avatu le tagata e nofo sala ma tuu ai na o ia lava ona le maua lea o le agaga o lo o moomia e tagata o le ola toe fuataina, ia maua le mafutaga faifai pea e aoao ma fai i ai mea uma. Ou te faafetai atu i le EFKS i Malua i so latou sao tele sa

latou donate ai le tele o mea faigaluega e pei o computers ma fai le fale mo le nofoaga o tupulaga i Olomanu.

O le taimi nei o la e fai ia galuega a tama, a uma galuega e malolo mai ona fai latou aoga, o tamaiti o lea ua aoao i le computer, ae na mafua aisea ona maua le malamalama? Faafetai i le tofa alofa ma le tofa na ae i Malua i faifeau na latou faia le galuega, o lea toefuataiina ai olaga o nei tagata, ia o tatou e le talanoa i alo ma fanau, e tofu lava le tagata ma lona sese, o au foi ou te sese, aua a oo lava i le taimi ou te ita ai foi au i lau fanau, ia o upu lava nei, o upu lava e pau mai ai upu, ia e le mafai lava, ae o le a le mea e tatou te fia mama ai? o le lalolagi lenei e fai mo tatou, o le lalolagi lea e fai mo tatou e leaga, e ala foi ona maliu fasia lo tatou Faaola, ia o tatou, o tatou uma lava e i ai lo tatou sao lea na ala ai ona maliu fasia lo tatou Faaola.

O le mea moni lava ia.....

FOFOGA FETALAI: O lea se i faasao e le numera lua le numera tasi. Tulai mai le sui usufono mo Gagaemauga Nu. 2.

Tofa Levaopolo Talatonu: Lau Afioga i le Fofoga Fetalai o le mea e fia faasao. E faamalulu atu i le Afioga i le Minisita e le o matou, o latou na maliu ai le Faaola, e le o matou.

Afioga Hon SALA FATA LISATI PINATI: Faafetai le sui usufono mo Gagaemauga Nu. 2. Sa ou faapea au e te le faalavelave i lou uso, ia ae le afaina, e a oe nei a o au taeao, o mea lava a tama ia e faapea lava ona fai.

O le tulaga lea pei ona avatu ai se agaga faafetai e faaleo ai e lou nei tagata le agaga lava o le faafetai i le EFKS le lotu lea LMS, se i tulou, ou te faafetai atu i le agaga na fai ai le foai, ua ola alo ma fanau i lenei galuega lelei ua faatino. O lo o faia foi galuega a Ekalesia eseese i uta i Tafaigata, o aso uma, o le Tusi Paia lea e i uta ou te le iloa pe i ai se faifeau, ia a alu atu nei ia le Minisita mo Tina ma Tamaitai, Atinae o Nuu ma Afioga ma Agafesootai, e avatu Mose ma mea ia e fai i uta, ae faapea mai ia si toeaina i uta, e matua pepelo tele lava mea ia e fai i tai. Ia o se tala lena.

O le tulaga pei ona i ai ia le LTA ma Leoleo, o lena ua saunua atu lou uso a Minisita, ia o uiga lava ia o tagata, e i ai le agaga foi lea o tatou o Samoa e musu le isi tagata e faatonu atu ia, ae e ia te oe loa le malosiaga po o le paoa, ia ona e faapea lea, ua na o oe lava, atonu o le mea foi lea e tele ia tagata e aumai a latou faitioga, a faapea e te alu atu i le EPC e totogi lau pili, ia ae pe e te alu atu foi e faafesili i le vai ni mea e fai, e uma ifo le aso, ua ta fetamoeai solo fai mai e te alu i i e te alu i i, ae o la e i ai le tagata la e i ai e tatau ona fesoasoani mai, o le lagona lena o lea e tupu nei, e seiloga e faatonu atu foi lele le mea e fai, ona fai lea, a o le agaga moni, ia galulue faatasi, leoleo e puipui le tulafono a o le LTA latou te aoina aitalafu ma sala, atonu o le isi lea vaega e ala ai ona tau faafuafua laititi le matou Matagaluega o le tele o tupe lea e alu i i, ae pei e leai se tupe e sau ia matou. Ia na o se tala foi lea e avatu ae o lena e i ina ia outou le uta a le faimea.

O le tulaga e pei ona i ai ia mea o finger prints, o se manatu taua tele, aua ou te masalo ana faapea e molia le tagata pue le ata ma fai ia finger prints, atonu o le a faapea ona faafaigofie ona fai ai suesuega, a i ai foi ni mea leiloa e mafai lava ona sue tonu lava i i ia prints o la e maua mai ona identify lea. O

lo o i ai foi ia alo ma fanau o le tatou atunuu ua aotauina i le finger printing, ua matuai lava ma lelei ma atoatoa lo latou tomai lea ua i ai.

Ou te manatu lau Afioga i le Fofoga Fetalai, a o le i uma sau faamatalaga, ou te fia oo i lou itumalo, ou te faatalofa atu i le tapuaiga a lou itumalo i le Lealatele i Savaii, afai o outou faafofoga mai o lea ua i ai le ata a le Malo o faataoto mai, a le o le faaiuga o le tausaga nei ia po o le amataga o le tausaga fou ia o le a galueaiina ai le tatou auala laupapa le Maliolio. Ia mo Patamea, o lena ua uma ona avatu lo outou matupalapala e le Minisita mo Aoga, Taaloga ma Aganuu, e tusa ai ma le malae taalo sa talosagaina, ia ua talia ma le faafetai. Ia mo le tatou nuu i Leauvaa, malo faafetai, o le a ou le oo i o outou paia, pau lava lea ou te fia faafetaia la outou lagolago, aua o le mea moni, o ai lou nei tagata, o le a se aoga o au nei, ana le seanoa lo outou tusi aao ma lo outou alofa tulai, ia ou te le oo mai i le Maota o Samoa, faafetai le faaeaea, faafetai mo le tapuaiga, ia manuia Samoa o lo o faafogafoga mai. Soifua.

FOFOGA FETALAI: Malo faafetai, faafetai saunoa i lau Afioga i le saofetalai i lau Afioga i le Minisita mo Leoleo ma Falepuipui, ia e manatu foi o le fofoga taumomoli lea aua le afio o lau Afioga aemaise o le paia ma le mamalu mauuluga o le tatou Matagaluega, ua manino foi ma malamalama lau tali mai e ala i finagalo na faaalii e sui usufono mamalu, ia o le mea sili ma le taua lea, malo faafetai, faafetai saunoa.

Ia ua tatou oo mai i le Afioga i le Minisita mo Galuega, Felauaiga ma Atinae Eeseese a le tatou Malo, tulai mai lau Afioga i le Minisita ua oo i le taimi e te saunoa ai aua le tatou Matagaluega.

Afioga Hon MANUALESAGALALA ENOKATI POSALA: Lau Afioga i le Fofoga Fetalai, e manatu o le paia o le Maota nei, o le tauiga o upu popo ma upu oo ma upu taoto lea ua faufau i luga faafogatia liligo ma atu-tiasa. Afio le Afioga i le Taitai o le Malo, le Afioga i le Palemia, afifio Minisita o le Kapeneta, afifio Minisita Lagolago, le paia i lena talaga i le afio o lau Afioga i le Taitai o le Itu Agai aemaise o le mamalu i sui usufono mamalu o le Palemene. O paia o faaululuga ua mafai ona tatou faatasi e vae ma lima i ai le Malo aua galuega faatino, aemaise foi o le tatou Ofisa o le Fono. E le faagaloina foi Afia isi ona vao i le tapuaiga o Tafatolu o Faigamalo, aemaise foi le paia mauuluga i Aiga ma Tama, ma le Usoga a Tumua ma Pule, Ituau ma Alataua, Aiga i le Tai ma le Vaa o Fonoti, o paia mai le galu na siisii i le atululuga o le Tuimanua, ia seia paia le galu na pisi i Siupapa e tulata i Falemoa na tauilo ai manu o malo. Aemaise foi o le tapuaiga a le Aufaitatalo vaaula faaufigata o le Talalelei o lo o nonomanu aua Samoa ma lona lumanai. A oo ina sue fuefue le tai, e amiami fana, e le toe tu ai se too puupuu, na o le too o le loloto, e faapena Samoa pe a fagota lona upega, tai oo'oo, aua o le ia ma lona malamala, a o le tai foi ma lona tautai. O Samoa o lo o lavea i atumotu laiti, small island developing states, e i ai le fono o lo o loloma nei, o lona laufanua e 2,820 kilomita faatafafa, o lona faitau aofai e i lalo ifo i le 200,000, o lo o ogatotonu i se ogasami sili ona tele i le lalolagi lenei o le Vasa Pasefika, o lona uiga, e le gata ina tu mamao ese ae maaleale le tulaga faalenatura. O lea ua tapenaina ai le Matagaluega o Galuega, Felauaiga ma Atinae Eeseese ia ni taiala o le transport sector plan, ia mo vaega o felauaiga, o se faavae lenei e taulai uma i ai fuafuaga a le Malo mo mataupu uma tau felauaiga aemaise o le faatulagaga o atinae tetele, e ao ina ave i ai le

faamuamua i le faatinoga. O lenei foi taiala o lo o aafia ai felauaiga i luga o le sami, ea ma le laueleele. O sini autu ma auga o lenei taiala, o auala uma ia e tali atu ai i tulaga maaleale o le siosiomaga faalenatura, ina ia faaitiitia le ono faaleagaina o nei atinae eseese ma aafia ai feoaiga o le mamalu o tagata lautele, o le felauaiga o oloa ma fefaatauaiga, aemaise o le faaleleia atili o tulaga tau le saogalemu o auunaga, e le gata i lea, ae ao foi o ana ia faiga faatauva i le faatinoga o auunaga e le vaega tumaoti faapisinisi, o le saunia o auala e tausia lelei ai ma toe faalelei ni aseta e faaleagaina.

O nisi nei o sini po o matatia e ao ina ausia mo felauaiga, faamalosia le faaaogaina o le alafua mo le fausia o auala ma alavai, ina ia mautinoa le saogalemu o tagata uma e aofia ai ma tagata savavali ma ia fausia foi auala ina ia gafataulimaina fesuiaiga o le tau, siitia le tulaga lelei, tausia lelei le tulaga o i ai uafu ma taulaga o vaa, malae vaalele ma isi auunaga mo felauaiga. Ia saga faaleleia foi tulaga tau le saogalemu ma le puipuiga malu o uafu ma taulaga o vaa faapea malae vaalele. Ia mautinoa le faatino o pulega lelei ma ia galulue felagolagomai vaega uma, ina ia tausia alafua faava o malo. Ua maea foi ona tofia e le Kapeneta latou te faatautaia le puleaina o le faatino ma mataitu fuafuaga uma, aua lava le manuia lautele o tatou tagata, aemaise ai lava i le vaega o felauaiga.

Ona ou amata mai lea i le pulega o felauaiga i le laueleele, ia o polokalame taua o le faatinoga e aofia ai faamalosia le uunaia o alafua mai konekarate fai auala, moavao, ma teu auala o lo o galulue ai e tausia lelei auala, fuafua ma faatino se faiga fou e faamauiina ai taavale, faatauina mai ni mea pueata e mataitu ai avetaavale ave saosaoa ma faamalosia ai le saogalemu. O lo o i ai se iloiloga o le aoga o le faia o ni mita e mataituina ai le taimi e tutu ai taavale i tafa o auala, aemaise lava le maga auala i le beach road i Apia. O lona uiga, o lo o faagasolo lelei le polokalame lea ma tuuina atu i le Kapeneta ina ia mafai ona mita taavale ia e paka i autafa o le auala e tuutiitia ai le tuufau o le tutu o taavale, aua o lenei vaitau ua siisii i luga le tele o taavale e ofi mai i lo tatou atunuu.

Ua amata foi ona faatino le mita o taavale laupasese, faamalosia le faapolokalameina o malaga a pasi ma le faaaogaina o nofoaga e tutu ai pasi.

I le vaega o Felauaiga i luga o le Sami, le Pulega o Uafu ma Taulaga aemaise foi le Faalapotopotoga o Vaa, o lo o faatalanoaina nei le fausia o le uafu fou i Vaiusu. O lea tulaga o le a siitia ai le taulaga o vaafaila i totonu o lea nofoaga. Ia i ai foi se nofoaga faapitoa e taula i ai meli tetele. O le vaega lea o lo o agai i ai saililiga mo felauaiga i luga o le sami. Ou te fiafia foi e faailoa atu le tulaga o le siitia o le uafu i Satitoa o lo o i ai le tatou nofoaga tosovaa. Ou te iloa o lena e maitauina ua faaauuina pea ona faaaogaina lea uafu tosovaa mo vaa a le Faalapotopotoga o Vaa. E le gata i lea o le vaiaso na tea nei sa asiasia mai ai se malaga mai Ausetalia, o i latou nei o lea e nafa ma vaa foi nei patrol boat lea e i ai le Nafanua. O lo o i ai le fuafuaga i vaa ia e masani ona latou faia le tulaga o le faaleleia o lea ua pasia le tatou nofoaga tosovaa i Satitoa mo lea faamoemoe, ae o lo o faatalanoaina le vaega o tau ma nisi o fuafuaga ina ia faaleleia atili. O lo o i ai foi le faamoemoe ina ia siitia pea le faaleleia o uafu i Salelologa ma Mulifanua aua le femalagaai o le tatou atunuu.

I le vaega o femalagaiga i le ea ma le malae vaalele, ia, o lo o i ai le fuafuaga o le fesoasoani a le faletupe o le lalolagi e toe faaleleia ai lona runway ma le tulaga o lo o paka ai vaalele. O lea sa fuafua se i uma le tatou

taligamalo ona amata lea o lea fuafuaga. E i ai foi le fesoasoani a le Malo Iapani mo le toe faaleleia o le fale faatali pasese. A o lona aotelega, o lea ua faatalatalanoa ma le Malo Saina i se fesoasoani i se tulaga lelei e faatino ai ma faaleleia ai le tatou malae vaalele faava o Malo. E i ai foi le iloiloga o le faia o se malae vaalele i Satitoo, atonu tasi ia itu taua pei lava ona i ai i le taimi ua fano ona o fesoootaiga faava o Malo ma Amerika Samoa mo le agai i luma. O le toe fausia o se fale fou mo pasese e aofia ai ma ni auala se tolu e ulufale ma ulufafo ai vaalele i Faleolo. O itu ia o lo o i ai fuafuaga pei ona i ai le taiala pei ona matou taumafai i ai.

O le tulaga i le tatou eletise, o le eletise i lona tulaga o le malosi faafouina, renewable energy, o lea ua maea ona komisi le 546kilouati o le malosiaga mai le la pei ona i ai le tatalaina o le poloketi i Salelologa, o lo o lavea ai ma Tuanaimato, lavea ai ma Tanugamanono ma Vaitele. Ua uma ona tatalaina, o le fesoasoani mai le Malo o Iapani sa tauala mai i le Pacific Islands Forum Secretariat lea fuafuaga. O le fesoasoani a le Malo Niu Sila, ua maea ona faatinoina i luga o le Gym 3, lea ua fuafua e i ai le food court mo le fonotaga o lumanai. E 250kilouati, ma ua fesootei foi i totonu o le tatou grid. O le isi vaega o le latou fesoasoani o le 2.2mekauati o lo o faatinoina i totonu o le malae mo tuuga solofanua vaeatu le paia o le Maota nei, le 2.2mekauati, o le fesoasoani lea a Niu Sila. O lo o i ai le faamoemoe a mafai ona ausia, e mafai ona tatalaina fuafua agai i le Fono o lo o loma nei. E i ai foi le faamoemoe i le polokalame lava lea a Niu Sila e fai ai se 400kilouati i Asau ina ia fesoasoani i le tatou motu i Savaii, tuufaatasi ma le fesoasoani ua i ai nei mai le Malo o Iapani, o lona ua i ai i Salelologa, ua fausia foi le 250kilouati o le fesoasoani lava lena i Niu Sila i Salelologa mo le motu i Salafai. E tele nisi kamupani ua faatulaga ma sainia, o lo o taumafai sailiiliga ma faamautu feagaiga, e i ai le kamupani lea a le Green Power, o lo o ua amata nei foi le latou galuega o le 4 megawatts i Tuanaimato, o lea ua sologa lelei pe a silasila i ai i le race course lea, o lo o i ai fuafuaga ia mo a tatou polokalame ia. Ua uma foi ona sainia le feagaiga ma le Solar for Samoa e 4megawatts ua fuafua foi i Tuanaimato. O lo o faagasolo foi le faatinoina....

FOFOGA FETALAI: Malie lau Afioga i le Minisita se i tuu atu le avanoa i le faauilavea a le Afioga i le sui usufono mamalu. Tulai mai le sui usufono mo Faleata Sasae.

Tofa Aveau Tuala Lepale Niko Palamo: Faafetai i le Afioga i le Minisita mo le faamalamalamaina o nei vaega taua. Ae sa ou taua i lau lauga lea i le EPC i le tau a le EPC. O lea la ua tolaulau mai e le Afioga i le Minisita taiala ma faiga faavae o le a oo atu i ai. O lau fesili la faamolemole; pe a maea la ona faatino vaega uma nei pei ona saunoa i ai le Afioga i le Minisita o le a alu ai la i lalo le tau o le eletise? Ma lou faaloalo lava.

FOFOGA FETALAI: Tulai mai lau Afioga i le Minisita mo Galuega, Felauaiga ma Atinae Eseeese.

Afioga Hon MANUALESAGALALA ENOKATI POSALA: Lau Afioga i le Fofoga Fetalai, o lo o faagasolo le atiaaina o nisi o polokalame mo le tulaga i atinae o tatou afi vai. I le taimi nei, o lo o amata pea fuafuaga mo le toe faaleleia o le Loto Samasoni ma le Fale o le Fee, o fale afi ia sa faaletonu

i le taimi o le afa o Eveni, ona o mea faapenei o lo o mafai ona fesoasoani mai ai a tatou donor partner. O lona uiga o lea lava e fua i a latou polokalame, ae le gata i lea o lo o i ai foi insure o nei afi, o lo o fuafua ona e tele le galuega e tataua ona toe faaleleia ina ia mafai ona atoatoa ma tele ai le fesoasoani i le tatou eletise. E i ai foi nisi vaega o potential sites e mafai ona fai ai a tatou afi vai, ma o lo o faapena ona faagasolo pea i ai polokalame a le Malosiaga Tau Eletise. O le faaiuga o Me 2014, e tusa e 235,770 iunite o le eletise ua mafai ona gaosia mai le malosiaga o le la, pe tusa lea ma le 56,136 lita o le suauu kiso, po o le tau e \$168,408 ua mafai ona faasaina. A fua la i si vaega lea ua mafai ona faaaogaina ai le malosiaga mai le la, o lona uiga ua tele le tupe e faasaina. A fua la i polokalame lea ua faataatia ma le agai ina ua atoatoa le faatinoga, o lea e i ai le faamoemoe o le 2017 i le 2018 ua selau pasene le malosi faafouina, fua i ai i polokalame lea ua amata ona faagaoioi ma ua faia feagaiga. O lona uiga o se tulaga maoae tele lea ua ausia e le tatou Malosiaga Tau

Eletise ma tulaga talafeagai o lo o i ai le vaiata lenei ma...

FOFOGA FETALAI: Malie lau Afioga i le Minisita se i tuu atu le avanoa i le faauilavea a le sui usufono mamalu.

Tofa Lealailepule Rimoni Aiafi: Lau Afioga i le Fofoga Fetalai, faafetai lava i le Afioga i le Minisita ua matagofie le faalogologo foi i le matagofie o fuafuaga tuutumamao a lana sector. Malo lava. A o le mea lea leaga o lea sa taua i le tatou Tala o le Tupe le fuafuaga a le Malo, o se fuafuaga lelei, e oo atu i le 2017 ua tele ina faaoga le renewable energy lea e sui ai le suauu.

Na pau lava le fesili lau Afioga, manatua foi tatou afi ia e i ai nei o afi fou, e tele le tupe lea pe \$100miliona lea e alu i le aumaiga. Po o le mea e toe faatau ese afi, pe faapefea le totogiina o tatou aitalafu ia, aua o se fuafuaga lelei. A o le mea lea e avatu ai le fesili i lau Afioga, i le tulaga lea o tatou afi ia, aemaise o le nonogatupe tele lea e feagai ma tatou i le taimi nei. Ma le faaaloalo lava.

FOFOGA FETALAI: Tulai mai lau Afioga i le Minisita, e pule lava oe pe te tali mai pe na aafia i le lauga a le sui usufono.

Afioga Hon MANUALESAGALALA ENOKATI POSALA: O vaaiga mamao ia o lea e vaavaai i ai le tatou Faalapotopotoga ma le Malo. Afai e tilotilo e i ai se suiga i le tele o le suiga lea o le a tulai mai, ia o mea uma lava e oo i le tau, o mea uma lava e tataua. O lea na sii nei le tau e tasi le tausaga ona o le tau talia o tatou tulaga i malosiaga nei faafouina, se i tulai mai i se tulaga e vaavaai i ai ua le pepe a ua tulaga mai ua malosi, ma fesoasoani tele i tulaga ia. O afi ia ua i ai i Fiaga e sili atu, more efficiency nai lo afi tuai sa i ai, e tele foi le suauu faasaina. O lea e i ai le fuafuaga mo Savaii e tataua foi ona fai se fale afi mo Vaiaata. A o mea la ia o lea ua vaavaai i ai, afai o le tulaga lea e le i mautinoa po o le a le tulaga e i ai. O lea e i ai tatou afi tuai lea sa i Tanugamanono, o la e foi ua ave e tataua lava ona i ai ni afi faaleoleo, aua e moni foi o le la, ae o le tulaga e i ai o le ao, ae a oo i le po ua moomia le tulaga lea i tatou afi vai po o tatou afi ia suauu e tataua ai ona maua le eletise mo le atunuu. A o tulaga uma na, o le tau ou te le fai atua se folafolaga, e leaga lenei mea o le folafolaga, leaga o le vision lenei a le Faalapotopotoga o

Malosiaga Tau Eletise, ina ia gafatia e o tatou tagata, e reliable ma affordable e o tatou tagata le tau o le eletise. E pei o le laasaga lena e i ai, a o lea ua vavala ata o taulelei, atonu o le taunuuga lea o lea e i ai, e tatou te naunau uma ina ia mafai ona tele se fesoasoani ma taugofie le eletise e maua i Samoa nei.

O le tulaga i le suavai, o galuega faifaipea, o galuega o lo o faatino mo le faaleleia o le suavai. O le polokalame lea mo le non-revenue water, o vaega ia e vaavaai uma i tulaga o la e liki le paipa e fai i ai sailiiliga ma suesuega, o lona uiga e tatau ona sui, sui i mea fou ina ia lelei, ae fai lelei suesuega ina ia mautinoa o le vaega lea e tatau ona faaleleia. O lo o i ai foi paipa tuai e tatau ona faafouina ina ia faaauau pea le galuega ma maua le suavai lelei. O lo o siaki foi mita ma tulaga uma e tatau, aua e ogatasi le tulaga lea ma le suavai mama, o le suavai ia gafatia ma lelei mo le faaaogaina e le atunuu, ma tatou maua foi se tau e talafeagai ma gafatia e tagata uma.

O galuega faatino la na a le Pulega o le Suavai o lo o faaauau pea. Ua uma ona sainia ma le Malo o Iapani le latou fesoasoani e tuuina mai e faaleleia ai le vaega i Vailima, o le a toe faaleleia faatanoa i Vailima ma fai lona treatment plant ma faaleleia ai le agai mai le falemai ma isi vaega. E le gata i i, o Vaivaseuta, tasi lea nofoaga o lea o le a lavea i le polokalame lea, o Oketopa, ae leaga o le polokalame lava lena a le Malo o Iapani o Oketopa ua amata ai ona faatino le tatou galuega lea. Ia faapea foi ma Tapatapao, o la e ua uma ona tatala le vai mama ae o lo o faaaoga pea paipa tuai. O lo o i ai le faamoemoe e tatau ona sui le ala ona o fanua o aiga lea e aafia i totonu o le taatiaga tuai lea sa i ai, a o lea o le a faataatia mai i le auala ma se taotoga lelei e mafai ona maua uma ai e tagata le suavai

O lo o i ai foi le faamoemoe i nisi o galuega i le vai o Faleasiu uta ma Fasitouta, o le masina fou ua amata la tatou galuega. O le tulaga lava ina ia ogatasi le futia ma le umele, a uma ona vili a ua i ai ma paipa e tatau ona fesootai ma maua ai le suavai.

O le mataupu sa laga mai e se tasi o sui usufono mo Salega, Afioga Afualo Wood Uti Salele, o lo o vaavaai i ai le Pulega o le Suavai i lea vaega ina ia faaleleia le suavai o Salega.

O galuega o lo o faatinoina i felauaiga i luga o auala tetele, sa fuafua o le a faasalalau konekarate latou te faatinoina lea auala mai Vailoa seia paia Vaitele, la tatou four lane foi lea. Ua uma ona tusi ata ae ou te iloa o lo o tau fetuunai se i uma a tatou taligamalo ona amata faatino loa lea.

O le auala laupapa i Leone, ua faamaopoopo ata ma ua i ai le kamupani ma o la foi ua tusi ata. O nei galuega o le tasi o vaega o galuega o lo o fesoasoani mai i le Faletupe o le Lalolagi, e ese le vaai mai a le Faletupe o le lalolagi i lo tatou atunuu ma fesoasoani o lo o tuuina mai. A oo ina tutupu faalavelave e aafia ai auala laupapa ma auala tetele, e tuuina i le Faletupe pe mafai ona fesoasoani mai, afai e fesoasoani mai ona taatia lea ia latou polokalame faaauau. A maua seleni a le Malo ma faatino ai le faaleleia atili o a tatou auala taamilo. E le gata ai i ina a o le fuafuaga i auala galuega, o nai seleni nei o lo o mafai ona faatino ai. E le mafai ona fesoasoani mai le Faletupe o le Lalolagi i ni auala galue, o tupe lava a le Malo o lo o faatino ai le polokalame o auala galue. O lo o mafai ona fesoasoani mai le Faletupe o le Lalolagi ma Ausetalia ina ia faatinoina a tatou galuega. O le ala lena e umi ai ona taatia ona o lo o faagasolo pea a latou polokalame. O le vave ona faatino, sa masani ona umi ae peitai o lea ua tasi le tausaga ma faatino ona o le silasila mai i le

agai lelei o a latou seleni o lo o tuuina mai i le tatou atunuu ma ua siitia ai foi le tulaga o aseta ma auala tetele.

Ua maea foi ona tofia le Kamupani latou te vaai le auala lea e alu agai le malae vaalele o le fesoasoani lea mai le Faletupe o le Lalolagi, o lo o ua amata le design ma fuafuaga mo lea auala. E i ai foi ma le tatou auala i Malioilo ua uma ona launch le fesoasoani a le Faletupe o le Lalolagi mo nei polokalame. O le tulaga lena o a tatou galuega ae ou te manatu o lo o tele lava le naunau ina ia faatino auala galue a o le faasoa o lo o taumafai lava ina ia tofutofusia i tatou ma galuega faatino.

Ou te manatu o le faasoa lea i upu o le Tusi Paia lea ou te faaaogaina ma le ola taumafai o lo o i ai lo tatou Malo. “O lē lulu ma loimata e selesele foi ma le fiafia”. O le saili lea o le Taitai ma le Malo, e saili mai fesoasoani i auala eseese mo tapenaga o le tatou taligamalo o lo o loma nei. E faigata ma utiuti ae lulu lava ma loimata a tuanai afa ma timuga ma le louloua ona tatou vaai lea i le manino mai o le taua aua a tatou atinae ma fuafuaga uma.

O le tulaga lea sa talosaga mai ai le sui usufono mo Anoamaa Sasae i le tulaga o le eletise, ua logoina mai au o la ua o tama e faaauau le polokalame na tuai ai ona faatino. O isi fuafuaga uma e pei ona i ai le tatou auala i Satitua lea e temporary nei, o lo o ua i lalo o le Faletupe o le Lalolagi ma ua talia ma le fiafia, o le ala foi lena ua tuai ai a latou polokalame ma fuafuaga ona e tele tapenaga e tatau ona faia i ai.

O nai manatu na e tusa ai ma le Tulafono Tau Faaofi o le Faatatauina o Tupe 2014/2015 aemaise o talosaga sa tuuina mai. Ae ou te le i nofo i lalo ou te fia oo foi i lou itumalo ma le latou tapuaiga. Le paia o Satunumafono, le Falefa o le Ulugatanifa, aemaise o Faasuaga ma Tapaau na Tausi, Nofo a Igoa Matua, Taulauniu ma Aitutagata ma le Nofo-a-Tula ia Safata aemaise o le Alataua, faafetai tele. E le faagaloina foi le matou Pulega i Safata lau Susuga i le Toeaina aemaise o le matou Matagaluega ma le Toeaina Faatonu. Faafetai i la outou tatalo, ou te manatu o le mea lea e manuia ai faiva a lo outou sui usufono aemaise o le faatinoina o galuega a le Malo. Ia tatou tatalo i le Atua e faia vavega, ou te iloa o le mea lena o lo o tulai mai i le atunuu, o vavega nei e faia e le Atua ma fesoasoani mai ai, o lo o tatou vaavaai pea i ai i le manuia. Ia tumau pea lona filemu.

Ia manuia lenei aso, faafetai.

FOFOGA FETEALAI: Malo faafetai le saunoa i lau Afioga i le Minisita mo Galuega, Felauaiga ma Atinae Eeseese, e sao le saunoaga a lau Afioga e le faigofie le galuega. E momoli atu le agaga faafetai tele i lau Afioga aemaise o le paia o le Matagaluega i le Ofisa Sili o Pulega ma le Pulega Lagolago, malo le tautua. Ou te talitonu e lafo atu lava le mamafa ona o i ina le punavai e sulu atu i ai le atunuu aua atinae, ia mau pea le toovae ma ia lava le onosai i lau Afioga i le Minisita. Ou te talitonu e le i soona tofiaina lau Afioga e le Palemia i lea tulaga ona e i ai le manatu o le a e fai ia mafai. O moomooga alofa i lau Afioga ma ia maua lou soifua aua le feagai ai ma galuega a le Malo.

Ua tatou taunuu mai i le Minisita mo Punaoa Faalenatura ma le Siosiomaga.

Tofa Hon FAAMOETAULOA LEALAI AULOTO ULAITINO FAALE TUMAALII (Minisita mo Punaoa Faalenatura ma le Siosiomaga): Lau Afioga i le Fofoga Fetalai, ae ou te le'i asaina le tai ma ou utufia le vai na iite

i ai le Tuiatua i Mulinuū ma Sepolata'emo, ou te muamua ona taia le tafa'itoa ma ou faatulou atu i le Fono usu a Samoa. Tulouna le Afio o lau Afioga i le Fofoga Fetalai, tulouna foi lau Afioga i le Palemia ma Minisita o le Kapeneta, ae ā Minisita Lagolago.

E le gata i lea tulouna le afio o lau Afioga i le Taitai o le Itu Agai, faapea foi le mamalu o sui usufono o le Fono usu a Samoa.

Ou te fia asiasi au foi i le mamalu o Samoa o lo o faafofoga tapuai mai, e amata mai i mauga tetele seia oo mai lava i laufanua a lalo. O Lana Afioga Mamalu O Le Ao o le Malo seia oo lava i sē ua aupito laitiiti. O le paia lava lea i le Afio o Tama ma o latou Aiga, Aiga ma Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ae ā foi le mamalu o le Motu i Sasae i le paia ia Sua ma le Vaifanua, Fofu ma Itulagi, Saole ma le Launiu na Saelua. Ae ā le paia o le Laau-na-amotasi, Tootoo o le Faleula faapea le mamalu ia te oe le Manuatele.

Ou te fia asiasi atu foi i lou itumalo, e avea ai lenei taimi ou te faatalofa atu ai i le paia o lou itumalo o lo o taputapu mai ma tatalo mai aua se manuia o lo outou sui usufono a o galue ai i totonu o Mulinuu nei. O le paia lava lea o le afio o le Aiga Sa Peseta, afio foi le Maopu, alaatai le Nofo a Usoalii, ae ā le mamalu o le Faleiva ma Upu ia te oe le Muā'autasi o Puleono i Salafai.

E le gata foi i lea o lo'u nuu o Satoalepai, ou te faatalofa atu i le paia ma le mamalu o le Afio o Maiava, Susu Mataia, Alaatai le Aitutagata ma le mamalu o upu ia te oe Satoalepai. O le Aufaigaluega a le Atua o lo o nofo taputapu mai ma po le fala ma tatalo aua lava se manuia o Samoa mo nei ma a taeao.

E avea foi lenei taimi e momoli atu ai le faamaisega ma se faamafanafanaga i le itumalo o Gagaifomauga Nu. 1 o lo o soo tuaoi lava ma Gagaemauga Nu. 3, e faamaise atu ai i le faletua ma le nofo-a-alo, o Aiga na lua ma le mamalu o le itumalo ona o le usugafono a le Afioga i le Faipule o Tuiloa Anetelea. Ia faamaise le Atua i le faletua ma le nofo a alo ma aiga na lua faapea foi le mamalu o le itumalo, Sao e Fa faapea Aiga Saumalau, lau Tofa Lavea aemaise o le mamalu i Leatipouniu ma le Faasau. Ae ā lo tatou nuu o Manase, e momoli atu foi le faamaisega i lau Afioga Taito ma ou alo aemaise o le paia o Aiga Saumalau faapea le Fetalai Tauasa ma le Lauti-na-laulelei i le Faleupolu.

Lau Afioga i le Fofoga Fetalai, e toatele sui usufono na laga ni mataupu e faatatau i lenei vaega o Matagaluega ma Faalapotopotoga o lo o i lalo o lau vaavaaiga . O le tele foi o nei mataupu e aga lava e tasi, o lea o le a ou tali atu ai foi, o ai lava na fesili i lea mataupu ma lea mataupu o le a tali ai lava i lalo o nei vaega.

E tele ni fesili ma talosaga mai i taligalu ma talivai po o fea o i ai taligalu, po o fea o i ai talivai; ae po o le ā foi se galuega ua fai. Pe faaleleia foi aua polokalame o lo o faataatitia e le Matagaluega e faatinoina ai lea auaunaga. E momoli atu lau faafetai i sui usufono uma na sausaunoa i lea mataupu ona o le lavapapale ma le lava onosai. O le tali, o lo o faagasolo pea lava le fausia o talivai ma taligalu i lalo o le Evans recovery works po o le polokalame o le faaleleia o mea na faaleagaina e le afa o Eveni.

Mo se faataitaiga o le talivai lea i Laulii o lo o galulue ai nei. Ua uma nei foi ona tapena le lisi o taligalu ma talivai e fausia i lalo o le polokalame e faatupeina mai i polokalame a tatou paaga faava o Malo i fafo e i ai le Adaptation Fund lea e lisi ai i lalo o le 25 itumalo. A o lalo o le PPCR po o le

Private Program of Climate Resilience. O lea e faatupeina i lalo i ina le 16 o itumalo ua amata nei ona sauniuni atu i ai le Matagaluega e faatino ai atinae.

O lona uiga la o lo o faagasolo le tulaga o le faagaoioiga o feagaiga i le tuutuuga lea ma le va ma paaga o lo o faatinoina. E i ai lava auala ma tuutuuga ma aiaiga e tatau ona faamalieina a o le i tuuina mai vaegatupe nei. Atonu o le ala foi lea ua tuai ai ona faatino nei atinae e pei ona fuafuaina, ae fai lava ma e oo lava i ai. Ou te le tolaulauina atu la itumalo ma nuu o i ai i le lisi lea, a o lau vaai i ai o lea e i ai uma lava i latou ia na saunoa nei ona o talosaga na aumai. A faapea loa e le lelei le talosaga, o lona uiga o le a toe aveese le igoa o lea itumalo.

Ona ou oo mai ai lea i le tulaga lea e faapea ua umi tele e le'i faatinoina poloketi nei. E faailoa atu o faiga lava o lo o i ai ma tuutuuga ma paaga o lo o faatupeina nei atinae. E amata mai lava i le taimi na faatoa foafoaina ai le poloketi, o le tele ia o procurement procedures e tatau ona faamalieina a o le i tuuina mai ia vaegatupe. O le auala lena e mafua ai ona umi, e le faapea o le faatamala o le Matagaluega, e leai. Ona o le tulaga lava ina ia faamalieina manaoga o ē o lo o aumai ai le tupe po o le World Bank po o le LDC po o ai funds eseese. E amata mai lava i le sailiiliga o le concept po o mafauaiga i le faiga o le poloketi. E tele masina e fai ai, ona oo mai loa lea i le vaega e tapena le le poloketi atoa ma ave. A pasia e le donor ona toe aumai foi lea ma e i ai lava isi auala uma e tatau ona uia ona faatoa mafai loa lea ona aumai vaegatupe e faatino ai ia galuega. O le faamatalaga lena, leaga ua faapea mai nisi o lo o tuai ona faatino poloketi ma e tatau ona faavave. E le o le Matagaluega la e mafua ai ona tuai, ae ona o faiga faavae lava a paaga o lo o maua mai ai tupe e fesoasoani i a tatou atinae.

Ona ou oo mai ai lea i le tulaga i Komiti Faatonu po o Boards ma Komiti Faufautua. O lalo o le Sector oi lalo o lau vaaiga o lo o i ai SOEs e lua po o Faalapotopotoga tumaoti. O le Faalapotopotoga lea o Suesuega Faasaienisi ma le Faalapotopotoga o le Esetete Tausi. O lo o i ai Komiti Faatonu e fesoasoani i Pulega o ia SOEs i le faagaoioiga o auaunaga. O lea la na fesiligia le tele o tupe o lo o faaalua ai i Boards nei ae laitiiti le return. Ia te au e matua vaivai tele lava ia mafauaiga. O tagata nei po o tamalii ma faletua o lo o faigaluega i totonu o Boards nei e taitoa 7. E toa 7 members o le Board a le STEC, 7 members o le Board a le SROS. O nei Board members e le mafai ona faatupeina le tau o le latou auaunaga aoga ma le taua i nei itutino o le Malo. E le i soona filifilia foi, na filifili i luga o le i ai o le poto faapitoa ma le experience e faatatau i matafaioi a le Matagaluega po o le manulauti a le Matagaluega po o le Faalapotopotoga Tumaoti a le Malo.

O lea o le a ou laulau atu members o le Board a le SROS o lo o Taitaifono ai Fonoti Perelini o le Inisinia. O le Sui Taitaifono o Polofesa Satupaitea Viali ma o lo o i ai foi Dr Taema Imo mai le NUS. O lo o i ai foi Manuleleua Dr Sonny Lameta mai le USP faatasi ai ma nisi o tamalii ma ni faletua se toatolu mai le private sector. Ona o latou experience i pisinisi lea e mafua ai ona i ai i totonu. O le tele ia o le latou sao i totonu o Boards nei. O lona uiga la e le mafai ona faatupeina pe a fai se tau o le auaunaga a nei tamalii i totonu o Faalapotopotoga nei e lua. Ia te au ou te molimau atu o lo o lelei, o lo o i ai ma e tele le aoga o le latou sao i totonu o le Pulega po'o auaunaga i totonu o ia Boards po o Faalapotopotoga tumaoti foi.

O le tulaga i Komiti Faufautua lea e faapea ua toatele nauā, ou te iloa e tatau ona faaluaaina le fuainumera o Komiti ia e i ai nei, aua o Komiti Faufautua o

le Siosiomaga mo Savaii ma Upolu. E le lava le aufaigaluega a le MNRE e ̄ ai i tua e asiasi le faatamaia o le taina faasolitulafono o le vaomatua ma le eliina faasolitulafono o le oneone. E le gata foi i lea o le tanu faasolitulafono o alavai. O mea nei e lipoti mai e sui nei o fonu faufautua i fonotaga e tailua vaiaso ma fai i Savaii faapea foi ma Upolu. A aumai a latou lipoti ia te au ou te vaavaai i ai ma fesootai ma le Matagaluega ina ia asiasia ia tulaga ma faaaoaga i ai le Tulafono.

FOFOGA FETALAI: E faamalo atu i lau Afioga i le Minisita. E talitonu ua matua see i maaomalie le tuleiga ma le saunoaga, ae ua manatu foi ona ua tatou taunuu tonu i lo tatou taimi malolo. O le a toe tuu atu le avanoa pe a tatou toe taliu mai ona toe faaauau ai lea o le tali aloaia a le Matagaluega.

Ou te faasilasila atu o le a faataatia ese Taulumaga a le Fono Aoao Faitulafono mo lana malologa masani o le afiafi.

Na faataatia ese Taulumaga a le Fono Aoao mo lana malologa masani i le itula e 7.00 i le po ma toe amatalia i le itula e 7.30 i le po.

FOFOGA FETALAI: Ou te faasilasila atu ua toe amataina nei Taulumaga a le Fono Aoao Faitulafono. E i ai le agaga maualuga le paia o lo tatou Maota i lenei itula o le afiafi, faafetai ua maua le faamalosi tino ma ua toe faafoisia le malosi aua le faaauauina o felafolafoaiga i le Tala o le Tupe. O lea foi ua matua see i maaomalie tuleiga ma saunoaga a le Kapeneta. O le agaga atoa lena, ia aua ne i toe toalia le sa i lenei afiafi ae ia papa-aveloa taulumaga o tali a le Malo ma faatino ai le atoaga o le Tala o le Tupe.

Ou te tapa lau Afioga i le Palemia mo le lafo.

LAFO MO LE SUIA O ITULA FONU

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, e faamalo atu ona o lea ua sao i alo le faasiliga malosi a le paia maualuga i sui usufono mamalu o le Fono Aoao Faitulafono, ua faamalo faafetai.

Ou te tulai atu ma le agaga faaaloalo e faatu le lafo, *Ina ia toe faaopoopo itula o le tatou Fonotaga seia maea le Tala o le Tupe i le po a nanei.*

Faaluaina e le Afioga i le Sui Palemia.

Na faamaonia le lafo.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2013/2014 ma le Tulafono Tau Faaofi o le Faatatauina o Tupe 2014/2015.

FOFOGA FETALAI: Ou te talitonu ua fetau fola e pei o lea upu ma o le agaga atoa foi lena i le matau atu a le Nofoa. E le aoga foi le fai ma motusia soo a tatou felafolafoaiga. E lelei lo tatou onosai i lenei taimi mo lenei po e

tasi, ina ia oo atu taeao ua mama le avega ona ou te talitonu o taeao foi o le aso e tua i le aso puupuu, atoa ai foi ma nisi o a tatou fuafuaga ua uma ona faataatia ona o le peau faamavae ma toe sauniga o lo tatou tama ia Tuiloa. E i ai le agaga, ia onosai mai le paia o lo tatou Maota. O le a faasolo le tatou galuega, o le a lava le taimi o le afiafi o le a tatou faamaea ai ma pasia aloaia le Tala o le Tupe, ona tatou malolo ai foi lea. O le a lafo atu ia i le Kapeneta o lea ua i la outou pitolaau le tatou galuega. O outou lava o le a tuai ai ona tuuina atu le iloiloga auiliili ma le pasiaina o le Tala o le Tupe ina ia manino ma malamalama i le tatou polokalame ua uma ona pasia e ala i le lafo a le Afioga i le Palemia.

E faia le tatou malologa o lo o saunoa le Afioga i le Minisita mo Punaoa Faalenatura ma le Siosiomaga. Tulai mai lau Afioga i le Minisita e faaauau le saunoaga.

Tofa Hon FAAMOETAULOA LEALAI AULOTO ULAITINO FAALE TUMAALII: Faafetai i lau Afioga i le Fofoga Fetalai.

E fia momoli atu foi se faafetai i lau Afioga i le Fofoga Fetalai faapea le mamalu o le Ofisa o le Fono ona ua maua se faasiliga malosi o sui usufono o le Fono a Samoa e ala i le taumafataga e pei ona tuanai atu.

O le vaega lona fa o se tasi lea o mataupu na laga mai e le toatele o sui usufono, o le faaleleia lea o nofoaga e faaono ave ma nofoaga mataaga.

Afioga Toeolesulusulu Cedric Pose Salesa Schuster: Lau Afioga i le Fofoga Fetalai.....

FOFOGA FETALAI: Malie lau Afioga i le Minisita, se i tuu atu le avanoa i le faauilavea a le sui usufono mamalu mo Aana Alofi Nu.3.

Afioga Toeolesulusulu Cedric Pose Salesa Schuster: Faafetai lava i lau Afioga i le Fofoga Fetalai mo le avanoa.

Sa le i faalavelave lava ona sa saausi ma faafofoga i le saunoaga a le Afioga i le Minisita e tusa ai o nisi o tuualalo i le faatauaina o vaega o Boards aemaise foi o Komiti Faafoe e pei ona saunoa i ai lana afioga. E faamalie atu i lau Afioga i le Fofoga Fetalai, e le o i ai se naunautaiga e fesiligia faailoga o i latou o lo o i totonu o Boards. O le naunautaiga sa tuuina atu o le faatinoina ma le lagona o le taua o Boards, ona o i latou ia e pei ona e faalia e i ai tomai faapitoa e mafai ona fesoasoani ai e faaleleia auaunaga a Pulega, peitai ane e pei ona taua le SROS, masalo ua silia nei ma le 10 tausaga o i ai le tatou SROS, e tele foi suesuega ua latou faaalia ua mafai ona faatinoina, peitai ane lau Afioga, atonu lava e le i mafai lava ona iloa mai ni galuega e mafai ona commercialize e maua ai se polofiti, e aoga i a tatou suesuega o lo o faatinoina e le SROS, ou te talitonu foi, o le tele o nei vaega e umi ona faatino, a o le faanaunautaiga lea ina ia mafai ona faaleleia ia auaunaga a ia pulega, o se tasi pei foi ona e faalia le STEC, ia o le vaega foi lea le biodiesel lea sa galulue faatasi ai le SROS ma le STEC, ia atonu pei e tau maua atu e le o faaogaina lea seleni po o lea poloketi foi sa galulue faatasi ai ia pulega, e le gata foi i lea, e maitauina e le pulega a le STEC, e tele lava seleni e le o mafai ona maua mai e le tatou kamupani, a o le tele o costs ia e alu ai a tagata faigaluega ma galuega atinae, e le o mafai ona tino mai se lumanai o nei faalapotopotoga. Pei o se tuualalo lea na ala ai ona faaoo atu

ina ia mafai ona toe silasila i ai a tatou Boards, e le gata o ia vaega e lua a o nisi foi o tatou SOES, ina ia toe timata le upega e toe vaavaai po o i ai nisi auala e mafai ona faaleleia ai a latou auunaga e fesoasoani ai foi i pulega o lo o faapea ona latou feagai ai. Pei foi ona e saunoa foi i vaega ia o Komiti Faafoe, ia o se tuualalo foi na auina atu, ou te talitonu e pei ona e saunoa o Komiti Faafoe ia o lea e faufautua o lea e gasolo i tua e aumai ia lisi o tagata o lo o faapea ona asu seseina ia oneone o vaega faapea. Ou te talitonu o se tasi lea vaega taua atonu e aoga ona galulue faaoga ni komiti faafoe, o lo o i ai a tatou pulenuu.....

FOFOGA FETALAI: Ia malie le sui usufono o lo o saunoa, se i tulai atu le tali a le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai., ou te fesoasoani atu i le mataupu lea. Masalo ana maua mai e le sui usufono ia lauga sa fai e le tatou Taitaifono o le Tupe, sa ou manatu e na e puea mai ai i ina le tulaga mamao o fuafuaga ia ua faataoto nei i le itu o le vavae ese o vaega ia ma faatu ai faapitoa le Matagaluega o le a avea ma matafaioi faapitoa le tulituliloa faapitoa lava o Faalapotopotoga ia a le Malo ina ia ausia ia matatia ia lea e agai tonu mai ai lava le sui usufono. Sa ou manatu la ua maua mai e le sui usufono, o lea e tau ai i ina i fuafuaga mamao na a le Malo mea ia e te laga mai, a o le itu ia sa e taua faapitoa lava i le SROS, e i ai le agaga o le fua tualuga lava le manulauti o le SROS, na mafua ai ona faatu i le amataga, o latou ia e amatamea i le mea o le faaogaina o le tomai o tatou saienisi e latou te sailiili ai mea fou, oloa fou, ina ia see ese ia Samoa mai le tulaga o le Primary Producer Country, ae amata ona vaavaai tatou e galueaiina mo mea o oloa gaosi, mo se faataitaiga ina faigofie, pei la o le gaosiga foi lea o le sosi, o le sosi lea sa lauga ai nisi o outou. E le faapea la o le ave o le tamato i fafo, ae process le tamato tuu i ai ma le polo, gaosi ai loa le sosi la lea sa agai i ai nisi o lauga. O le faamoemoe atoa lena, lea la sa gaosia ai isi oloa ia, ae o le faamoemoe, ia i ai ni a tatou kamupani e mafai ona faamatuu atu i ai ona o lava lea o latou e gaosi, e le tatau ona toe ae fai suesuega a le SROS ma toe nofo lava ia ma toe produce e le tatau ona faia, o i ina e malepe atoa ai le faiga faavae a le Malo o le aua ne i toe tago i ni manufacturing ni pisinisi. O lea la ua uma nei ona faataoto le iuga a le Kapeneta e pasi ai se tasi o kamupani ua uma ona tender mai, o le a latou gaosia ia le isi mea lea na amatamea atu ai o le faiga o le suauu o le suauu foi lea mai le avoka. O le tulaga la lena o lea ua uma ona fai i ai le iuga ae faatino e le kamupani lea mai tua, ma e o le amataga lena o mea ia e fai nei, o lona uiga e i ai foi le taimi e alu alu alu ona maua foi lea o se kamupani a tatou lava ia e tuu atu i ai e faamatuu atu i ai, i luga lava o tauofoga, e faamatuu atu i ai le falaoamata, ia ma isi mea faapena, e tatau ona faifai totoa le galuega a le SROS. Ua ou manatu e tatau ona faamanino atoa le tulaga lea, ina ia manino ai, o le Fale Suesue lea o le SROS o le latou galuega e tele le lumanai o Samoa e maua mai ai i i le galuega a le Fale Suesue lena mo le agai atu i le lumanai, ae le faia ma latou toe o e gaosi e fai ma faamatuu atu i tua.

FOFOGA FETALAI: Ia.

Afioga Hon Palusalue Faapo II: Lau Afioga i le Fofoga Fetalai, leaga o lea ua see ese le Minisita, sa i ai se mataupu lava lea ua oo i ai le saunoaga a le Afioga i le Minisita.

FOFOGA FETALAI: Malie lau Afioga i le Minisita se i faasaoina lou taimi, ae tulai mai le Taitai o le Itu Agai.

Afioga Hon Palusalue Faapo II: O le isi mea sa ou laga, o le taumafai foi lea o le Malo ina ia tuutuu i lalo ia tupe o lo o faaalu a, o lea ua saunoa i le taua o Komiti Faufautua, lau Afioga i le Fofoga Fetalai na ona ou faamanatu atu faapena i le Afioga i le Minisita ma lena itu, o le tele o le tupe o lea e alu i la outou polokalame lea ma tulaga faapolokiki ia i Komiti Faufautua, o le matua tele lava o le tupe, masalo pe ova ma le \$7miliona pe a faaopoopo faatasi uma, tupe a le atunuu.....

FOFOGA FETALAI: Ia o lea ua maua lou finagalo le Taitai o le Itu Agai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai o se mea e fia faasao. O le atunuu lenei o le atunuu o Samoa o le isi lea mea e faalagolago i ai le Malo e faalagolago i fautuaga lelei a toeiina o latou o lo o faia nuu, e iloa foi e i ai le upu, o le umi o lou soifua i le lalolagi lenei, o le tele foi lena o lou iloa, ma o le mafuaaga lena o lea e manuia ai le atunuu lenei, o ana faiga faa-Matai, vaai i ai i le Komiti lea o le Faa-Faleula, a? i le tele o le latou galuega lea e fai nei, Komiti o le Ietoga, tele o le galuega lea e fai nei, Komiti Faufautua lea e te ita i ai. O le mea lea, Palu, tuu ia lou ita i toeiina o le atunuu, o le ala lena e feita ai ai ia toeiina o le atunuu, o lea e tapa e le HRPP e omai e aumai le latou fautuaga, o e lava e faalogologo i fautuaga a e matutua, a, e manuia, e le pei o Reopoamo na faalagolago i fautuaga a taulelea, a, o e manatua le mea lena? O lea e faalagolago le Malo lenei i fautuaga a e matutua o le atunuu, tuu ia lou ita. O le mea sili, e fia foi le tupe lea na e fai mai ai?

Afioga Hon Palusalue Faapo II: Lau Afioga i le Fofoga Fetalai o se mea e fia faasao, ou te le o ita i toeiina, vaeatu le faafogafoga, ou te ita ona o tupe a le Malo a o lea e faaoga e le HRPP, ave ifo ni tupe a le HRPP e totogi ai tagata.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Afai e \$3miliona, a lea faatoa e fai mai nei e sili ona.....O le mea la lea, o lona uiga e te manao na o le omai o toeiina ae aua le pasese? E matua mataga tele lenei mea.

Tofa Lealailepule Rimoni Aiafi: Lau Afioga i le Fofoga Fetalai, o le sao o le talosaga a lenei itu, e i ai foi a matou toeiina, ia avatu nai a matou toeiina e avatu e.....faatasi ai i o, ioe, ae e popoto atu a matou toeiina i a outou toeiina, se faamolemole, avatu a matou toeiina faamolemole.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O lea foi e i ai isi a outou toeiina i i, a o le ma foi e fua lava i le mamafa, e fua lava i le mamafa, afai e na o le toa 12 outou ae toa 37 lea e i

i, ia o le a soona aumai lava a outou toeiina e le fua foi i le mamafa ae tatau foi ona mama.

FOFOGA FETALAI: Ia e manatu ua malamalama lea mataupu.

Afioga Hon Palusalue Faapo II: Leai, lau Afioga i le Fofoga Fetalai o matou toeiina e le alu ai ni tupe a le Malo i a latou fautuaga, e i ai foi a matou Komiti Faufautua ae le alu ai se tupe a le Malo.

FOFOGA FETALAI: Ia o lea ua maua le Taitai o le Itu Agai, e manatu foi ua le faa-tasi le faalua a tatou Tala o le Tupe, ia o tuuina mai pea le finagalo lea a lena itu o le Maota, o lea ua faafofoga ma le manino le tatou Malo, o lea ua tau la outou fautuaga ae lafo laia i le Malo, e fai foi o le na ia a o le manatu foi o le Malo ia pei ona taumafai e faamatalatala atu le uiga. Tulai mai le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, se i ou fesili lava i le Afioga i se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi, Leaupepe, e te manao e faataape au toeiina ia e i i lea e faufautuaina le Malo?

FOFOGA FETALAI: Ia.

Afioga Hon Leaupepe Toleafoa Apulu Faafisi (Aana Alofi Nu. 1): Lau Afioga i le Fofoga Fetalai ona o lea ua fesili sao mai lava le Afioga i le Taitai o le Malo i lou foi tamai toeiina, ae o la e sao le saunoaga a le Afioga i le Palemia, aua o toeiina ia a le aualii ia i le itu lea, tulou le faafofoga mai a le atunuu, e uma ona toe against lea ia latou, a o toeiina ia e i ai i i, e aumai lelei lava ma a latou fautuaga e lagolago mai ai i le Malo. Pei o le eseese na o toeiina, ma lou faaaloalo faafetai.

FOFOGA FETALAI: Ia e manatu ua manino ma malamalama ia le atugaluga a le Afioga i le Taitai o le Itu Agai. Tulai mai lau Afioga i le Minisita mo Punaoa Faalenatura ma le Siosiomaga e faaauau le saunoaga.

Tofa Hon FAAMOETAU LOA LEALAI AULOTO ULAITINO FAALE TUMAALII: Faafetai atu i le faauilavea foi a sui usufono, ou te le toe ta agai i tua le tulaga o le faamalamalama na faatu ai le SROS e le Malo, aua ou te iloa e tele lava se faamatalaga e avatu ai, aua o au sa ou i ai ma ou faatuina i le taimi na ou sau ai. A o lea o le a ou tali atu lava i fesili ia na aumai a le sui usufono lea na fesili mai faapea, o faailoga e iloa ai i ina le taua o le service, invaluable service na e i ai i ina, aua e appropriate ia qualifications na ma le experience i le faatinoina o le galuega, o le tali lena. O le upu faapea e sefulu tausaga na faatu ai le SROS, na o le valu, na amata mai i le afa po o le ogatotonu o le 2006, ma e na amata mai lava i le amataga o tau faatu, su'e se nofoaga e faatu ai, e oo i le recruiting (tofia o le aufaigaluega) o le staff, ma le faatauina mai o equipments, ma le fuafuaga po o le a le ituiga scientific research organization e tatau mo Samoa, ia e alu ai lava le isi lua tausaga o taumafai, ia na fai foi lea e faa-Internationally Accredited e Niu

Sila ma Ausetalia, aua e le amanaia ia suesuega pe afai e le accredited i ai, e amanaia e atunuu na ia lana auaunaga. O le uiga la e na o le fa tausaga o lea na i ai, a o lea ua laulau atu e le Afioga i le Palemia ia le tulaga o oloa o lea ua uma ona saina le feagaiga o le purchase agreement e faatau ai e le isi kamupani ia le avocado oil, o lea foi e faatau le falaoamata o le ulu i le Vailima Brewery e fai ai le beer, ia ma o le Biodiesel foi lea ua faaoga, e tele ia galuega ia e fai, a o la e fai lava, remember o le faamanatu atu, o le SROS o le Scientific Research Organization, e na ona fau le technology ma le process ia ma tuu atu i tua i vaega o le Private Sector. O le tulaga foi i le STEC o le STEC e self funded lava ia ana operations, o lena e i ai lo outou mamalu na asiasi i ai o ana tupe lava na maua i o, o la e faatino ai ana galuega, e le o avea i ai e le Malo se vaegatupe e faatino ai ia ana galuega. O lo o tele lava la ia ana galuega ma atinae pei ona outou asiasi atu foi lo outou paia ma lo outou mamalu ma molimauina, ma e ou te molimau atu foi au nei o le Minisita o le STEC, a fua mai ana poloketi o lo o ua uma ona faatinoina po o o lo o faatinoina foi, ou te iloina o le a tele lava se aoga i le tamaoiga o Samoa i le lumanai.

Ona ou oo mai ai lea i le tulaga lea o Komiti Faufautua. Ia tailo i ai, a o Komiti Faufautua a a'u, e fai lelei lava TORs o le list o duties latou te faia, ma ou te asiasi foi la i ai i Savaii ma i. O le tele ia o le galuega latou te faia. O lea foi e i ai le Komiti i i, sa tatau i lau Afioga i le Taitai o le Itu Agai ona e fesili ifo i le sui usufono mo Gagaemauga Nu.2, o le isi ana Komiti lea e Taitaifono i lau Komiti i o, fesili ifo i ai i le aoga, aua o lena e lafi mai i ina, a o lea e i ai i totonu i i.

Tofa Levaopolo Talatonu: Lau Afioga i le Fofoga Fetalai, o le mea tonu lava lena na ou le pisa ai.

FOFOGA FETALAI: E le o maua e le Taitai aga a le vaega, o le ala lea, fai ma tau i le toeaina mea ma le maitaita ma le faalii soo ona faasagasaga mai lea ia te au, a o le leai o ni ana Komiti i Komiti Faufautua.

Malie lau Afioga i le Minisita, ou te manatu ua malamalama le Komiti Faufautua ae na ona fautua atu, o lea ua manino ma malamalama lau folasaga, e taua le galuega a tupu ma ee o le atunuu o lo o fai i totonu o Matagaluega, ae le gata foi i lau Matagaluega, a o le loaloa o isi Matagaluega a le tatou Malo. Ae alofa atu ne i toe asa le ogasami toe tulai atu foi le Taitai o le Itu Agai faaumiumi ai le tatou Fono. Ia, o le agaga lea e lafo atu i lau Afioga i le Minisita mo Punaoa Faanatura ma le Siosiomaga.

Afioga Hon Palusalua Faapo II: Lau Afioga, pau lava lea o le mea ona ua taua lou igoa lau Afioga, ou te fautuaina le sui usufono mo Gagaemauga Nu.2, aua ne i totogia lana Komiti i tupe a le Malo, totogi lava e ia, ioe, aua le faaalua tupe a le Malo e totogai ai Komiti nei.

FOFOGA FETALAI: O le a le tutusa ma faiga faavae. E ui foi ina e saunoa, e tasi lava le atunuu, e le faapea o le a Komiti a Levaopolo ona le totogia lea. Ia, aua ia see ia lou sa i luma i le mea o i ai le tafola lau Afioga i le Minisita.

Tofa Hon FAAMOETAU LOA LEALAI AULOTO ULAITINO FAALE TUMAALII: Lau Afioga i le Fofoga Fetalai, ona ou oo atu ai lea i le mataupu lea i le tulaga o nofoaga e ao ona faaleleia.

FOFOGA FETALAI: E i ai se isi mea le sui usufono mo Aana Alofi Nu.3? O le a se mataupu e le o malamalama?

Afioga Toeolesulusulu Cedric Pose Salesa Schuster: Lau Afioga i le Fofoga Fetalai, Komiti Faafoe, ona o lea ua fao e isi tagata le manatu o au lea na avatu ae o lea e le i uma ona faailoa atu le vaega lea o Komiti Faafoe. O se tuualalo lea na taumafai e avatu lau Afioga, o le faaaogaina lea instead o le fai o le Komiti Faafoe, ona o le taimi nei o lo o i ai pulenuu ma le sui o tina o lo o tele ina latou vaavaaia ma lipoti mai i totonu o le fonotaga lea o lo o faatinoina e le Matagaluega o Tina ma Tamaitai galuega faapea. Ona ua maitauina foi nisi o Komiti ua tauau ina eseese Komiti, ua le faalogo i vaega o pulenuu i afioaga ma alaafaga. O lea e fautuaina ai ina ia mafai ona galulue faatasi, po o le tuu foi o le galuega lea e faatinoina e pulenuu ma sui o tamaitai ona tasi ai lea o le auala e faagaoioi ai galuega a le Malo e pei ona taumafai e faatino.

FOFOGA FETALAI: Malo, o lea ua maua le fautuaga a le sui usufono, a o lea ua manino ma malamalama lau Afioga i le Minisita.

Tofa Hon FAAMOETAU LOA LEALAI AULOTO ULAITINO FAALE TUMAALII: Ia, faafetai atu i le faauilavea. E pei lava o lene ua uma ona ou tali atu i ai i le tulaga lea.

Ona ou see mai lea i nofoaga e ao ona faaleleia e ono avea ma nofoaga o mataaga, e pei la o le paka i le pupū i Pu'e, faapea foi le faaleleia o le track lea i luga i le tuuagamau o Robert Louis Stevenson. Ua maea ona fai le auala e agai i tai, o le access road lea i le pupu i Pue sa faatupeina e le Malo o Iapani, ma ua uma foi ona fai malologa foi nei along i le access road lea i le agai i tai e malolo ai tagata maimoa mai ma asiasi ai i lea nofoaga. E le gata foi i lene ae o lo o faaauau pea le galuega a le Matagaluega i le Folesi lea e toto laau Samoa māo'i i le fanua lea i le agai i tai. E lelei foi e avea ai ma nofoaga e tafafao ai tagata ma malolo ai i aso malolo.

I le tulaga i le faaleleia o le auala lea i le alu i luga i le tuugamau o Tusitala, e moni o lea ua uma ona tatala ma sa ou poloaia ai foi le vaega lea a le Environment Conservation o i latou ia e nafa ma le vaega lea ina ia galulue e faaleleia le auala lea ae tuu maia le talosaga lea se i ou toe asia lava le vaega lea po o le a le tulaga ua oo i ai aua o lea ua faalua ai ona laga mai e sui usufono mamalu.

Ona ou oo mai ai lea i le aoina o le lapisi se i tulou lava le paia ma le mamalu o le Fonousu a Samoa i le motu tele i Salafai. Ma e momoli atu lau faafetai i le sui usufono na ia laga mai le mataupu lea i le fonotaga talu ai, ma na uma loa ona logo mai ou aamia loa le Matagaluega faatasi ai ma le konekarate lea e nafa ma latou i le aoina o le lapisi lea i le va o Asau ma Faasaleleaga, ma sa faatonuina loa ma lapataia. O le lipoti na oo mai ia te au i le taeao nei, ai lava na o le taimi lene na lelei ai ona toe foi foi lea i le mea tuai. O le tulaga la lea ua i ai, taatia maia se i ou talanoa i le vaega lea e asia

le tulaga lea i le tulaga ua i ai. Afai e le faamaoni loa le konekarate lea, ua tatau loa ona terminate ae sue se isi konekarate e faaauuina le auunaga lea.

Ona ou oo mai ai lea i le tulaga o le aualea lea i le togatogo i Moataa, o lea ua i ai lava fuafuaga a le Matagaluega o lo o lisi ai i totonu o afioaga ia na ou faalauina atu i le tulaga lea o le faaleleia o coastal resources ma communities e lavea ai tonu i totonu le vaega lea. Ma o le a fautuaina foi le tulaga foi lele o le Matagaluega e vaai lelei i ai ma fai le fuafuaga i le tulaga lea pei ona ou lisiina atu e 25 districts i le isi fund ae 16 districts i le isi fund. E uma loa ona review a latou CIM plans i le tulaga o urgency o le manaomia, ona fai loa lea e fuafua i le tulaga o le manao o le itumalo.

Ona faaiu atu ai lea o se faamatalaga i le tulaga lea o le ono faaaogaina o le sisi Aferika i se taumafa. Sa ou le faalavelave lava i le tulaga na laga ai le mataupu lea, ae ia te au, e le tatau ona o le tulaga e eseese ituaiga food poisons e maua mai i mea nei o sources faapenei, biological sources. E eseese le tulaga aua o le isi e tupu mai le food poison i luga o le tele o le siama, a o le isi food poison e tupu mai i le tautuufua o le siama, se i tulou, o le toxins i luga o le meaai; po o le a la le vevela tele o le mea e kuka ai le meaai, e le mafai ona talepeina le toxins lea i totonu o le meaai, ma e ono afaina ai le soifua maloloina. O lea la ia te au ia, e le tatau ona faaaogaina lea ituaiga meaola e fai ai se taumafa aua le fofoga taumafa o le atunuu, ne'i te'i ua taumafai i ai se tamaitiiti po o se isi, ae tupu ai se faaletonu.

Ona faaiu atu ai lea o lau folasaga, e momoli atu le faamalo i lau Afioga i le Fofoga Fetalai faapea foi le mamalu o le Fonousu a Samoa, ae le gata foi i lea o le faamalo i le Ofisa o le Fono faapea foi Ofisa Sili o Pulega ma Pule Sili o Matagaluega ma Faalapotopotoga Tumaoti a le Malo ma sui foi o lo o auai mai, o lo o avea lava latou ma lima ma vae e tautuaina le Malo i le tulaga o ana auunaga faatino. Ma lou faaaloalo lava. Manuia le Fono.

FOFOGA FETALAI: Malo faafetai saunoa i lau Afioga i le Minisita mo Punaoa Faanatura ma le Siosiomaga. E le mafaitaulia foi le tele o le sao taua o lau Afioga aemaise e le o se Matagaluega laitiiti o lo o feagai ma lau Afioga ma Ofisa Sili o Pulega faapea Pule Sili o Matagaluega ma Faalapotopotoga, aemaise foi le loaloa o le tatou atunuu o lo o galulue. Faamalo atu ma momoli atu le agaga faafetai, o lea lava ua folasia i malae lou finagalo ma tali maioio ma tali manino ma tali atoatoa. O manatu foi ma finagalo ma lagona sa laga e sui usufono mamalu. Faafetai lava i lau Afioga i le Minisita, malo mo le saunoaga i lenei itula afiafi.

Ia, ua tatou taunuu mai i le Minisita mo Aoga, Taaloga ma Aganuu, tulai mai lau Afioga i le Sao, ua avanoa le Maota mo le saunoaga a lau Afioga ma le Matagaluega.

Afioga Hon MAGELE MAULIU MAGELE (Minisita mo Aoga, Taaloga ma Aganuu): Lau Afioga i le Fofoga Fetalai, ua noatia lauulu o le tamaloa Salafai ona o le taimi, o lea o le a faataalolo paia o le Maota, faataalolo paia masani o Samoa ae se i ou pai ane i lou itumalo. E le galo Afia i si ona vao, e le sili foi le tai i le tapuai. E le galo le tapuaiga mamala a si ou itumalo o Faasaleleaga Nu.1 i ona tupu ma ona ee, faleupolu, faletua ma tausii, saao ma tamaitai faapea le malosii o nuu. Faafetai i le tapuaiga a faafeagaiga taulagi i fatafaitaulaga e fia i totonu o le itumalo ma outou faletua. I le afifio o Tia ma Luamanuvae, susu Sua ma Tinousi, susu le

malelega a le Malietoa, alaalatai le falefia ma le Falesalafai ma lau Tofa i le Tuua ma upu ia te oe le Lologa na Pule ma le Faitoaga e te laveimanino laveiaava. Susu le Aiga Sa Sua o le Maopu o Nafanua, susu Suaalii o le fofoga o le Aiga Sa Sua, afio Tusagi ma le Aiga Sa Tusagi, afio le Taumaopu, afio le Taofia alaalatai Suafoa ma Leana, Leitualasa ma Saveama ma le mamalu ia Silafaiga.

Afio le Aiga Salevalasi, Matautia ma Magele, afio Tagaileono ma le Aiga Sa Tagaileono, afio Fonoti, afio Lelevaga, afio lau Afioga Tofilau o le Tootoalii na iva i ai Aiga o le Malietoa, alaalatai lau Fetalaiga Leauanae, alaalatai Tinifu o le Tagataoleaava, alaalatai foi Sasulu ma le nofo a ituaiga. Susu le Tagaloa ma Alo o le Tagaloa, Taito, Leota ma Toomata, alaalatai Aitu Tagata, alaalatai oulua fofoga fetalai Moemai ma Lealiiiee, alaalatai lau Fetalaiga Oloapu ma le Aiga Sa Oloapu, alalatai Safune ma Taulauniu.

Susu le tamaitai o Gatoloai o le Tupu Tausi, susu le Falefa o Alo o Aitulagi, susu le Aiga o Sa Gatoloai, afio o Taito o le Sao Usoalii, afio Tanuvasa, alaalatai Safuamua, alalatai le Aiga o Sa Malu, alalaatai le nofo a Ituaiga, alaalatai le Aiga Sa Vaaelua, o le mamalu lava lea o le Faletolu.

Faamalo faafetai i le tapuaiga ma tatalo i faafeagaiga uma o le ta itumalo, e manatu o lo o taufai puea le ofeloa ma le matila i lo outou soifua ma lo matou ola, aemaise o maua ua faasinolima i ai le itumalo, le Afioga po o le Susuga i le Tamatai ia Gatoloai ma lou nei tagata.

Ou te fia faafetai i lou nuu o Iva i lo outou sao taua i le valaau atu o le tatou Malo mo faafiafiaga o le 52 tausaga o le Tutoatasi o Samoa. Sa le mafai ona ou auai ona o tuatuaaga i fonotaga i atunuu i fafo, ae sa maua le tala aemaise o le faafiafiaina o le Taitaifono o le Komiti aemaise foi le Afioga i le Palemia i le matagofie tele o la outou siva. Faamalo i le tatou nuu aemaise lava le susuga i le faafeagaiga ia Tonu Mauafu ma le faletua ia Malelega, lea sa taimua i le tapenaina o le faamoemoe. Ana ou iloa o le a faaletonu le pese a Falefa, semeamanu ou te talosaga e avatu foi ma le pese e fai e tatou. Ia, aua ne i outou te i i te i ua maua atu se tou valaaulia aua le fonotele faava o Malo o le a fai nei ia Setema.

FOFOGA FETALAI: Malie lau Afioga i le Minisita o lea e tau tulai mai le sui usufono mo Anoamaa Sasae.

Se i tulai mai le sui usufono.

Tofa Alo Fulifuli Taveuveu (Anoamaa Sasae): Faafetai lava mo le avanoa lau Afioga i le Fofoga Fetalai, ona pau lava le mea lea ua lavea mai ona ua taua ma faapea mai ua faaletonu le pese. Sa faaletonu lava i le finagalo o le tama, a o le mea moni lava e pei ona faaali atu i le Aso Sa ma avatu ai le faafetai, e leai o le agaga lava lea o le Afioga i le Palemia, a o le atunuu lava sa tumu i le agaga fiafia ma le faaaloalo ma sa valaau mai i le matagofie o le pese. O le mea lea e leai lava ma se faaletonu o le pese a Falefa, ma lou faaaloalo lava.

Afioga Hon MAGELE MAULIU MAGELE: Lau Afioga i le Fofoga Fetalai, o le matagofie ia o lauga na afea lenei Matagaluega, o le tele lava foi o lauga o le faamanatu mai o mea masani lava e pei o faiaoga, tamaitai aoga ma faleaoga. E i ai lava le lauga lea na tulaga ese ai lava ia te au, na ou alu ananafi ma ou moe ma le fiafia ua ou faalogo i se lauga tutua ma anoa. O le

lauga lea i lau faalogo na faufau mai i le silafia e le sui usufono i taaviliga o mea tau aoaoga i le lalolagi aemaise lava o Aoga Amata. O lea na ia aumaia ai le sootaga o le taua o le aoaoina o le tamaitiiti mai le lua tausaga i le 5 ma le 5 agai i le 17. O le mea o lo o tupu i le lalolagi e faale o taua tele Aoga Amata aemaise lava o atunuu o le Pasefika, talu ai ona o le le lava o faamaumauga po o le a tonu le penefiti. Ua fai mai nisi ua na o le ave i ai o tamaiti e tula'i i ai, a o lea ua faatupu suesuega ma sa saunoa ai le sui usufono i le taua o lea sootaga. O le taua o le saunoaga a le sui usufono lea mo Sagaga le Falefa ou te faafetai atu ai. O le taimi nei e le o i ai Aoga Amata i le formal education a tatou o lo o i tua, o lo o ua galulue nei le tatou Matagaluega e aumai i totonu ina ia – a tau loa Formal Education i Samoa, e iloa ai e sau lava i le Aoga Amata e oo i luga o le Year 13. Ona faapea foi lea ona avatu i ai isi fesoasoani a le Malo ina ia aumai ai i luga le tulaga aloaia ma amanaia ina ia faaopoopo i le fesoasoani o lo o ave i ai. E aofia ai ma le ave o faiaoga i lalo o le Malo, atoa ma le vaavaaia e le Malo mea uma ina ia mautinoa o lo o alu faatasi ma isi aoga ona o le taua o lea vaega.

E i ai foi le isi vaega taua o le lauga lea o mea tau Community Schools e aoao ai Matata. E ese foi le taua o lea polokalame aua e le o se mea fou, ua leva ona fai a ua mou atu ae pei ua sau Aoga faa-Polytech ae mou atu nai aoga ne i i tua. A o lea ua toe lalaga mai i atunuu o le lalolagi, faafetai o lo o ua toe taumafai i tatou e faaolaola lenei vaega ona e augatata tele ē e ana tupe i aoga nei ona e taugata tele ae taumafai lava le Matagaluega i se auala taugofie ma anoa e faatino ai lea nei aoga aua a tatou fanau ua toulu ese mai aoga, e i ai foi le faamoemoe o le a le toe toatele nisi i le vaega lea i le lumanai ona ua totogi lava pili o aoga e gata mai i le Year 13.

E i ai le manatu e faapea ua mamau tele aiaiga o school fees o grant scheme lea e ave ona ua leai se mea e fesoasoani ai i le totogiina o loans. Ae taatia mai se i ou talanoa ia i latou o lo o faafoeina lea vaega pe mafai ona i ai se faatagataga.

O le tulaga o fanau le aoga i nuu, faafetai i lenei foi lauga na afea lea itu ona e taua tele. Ae avea foi lenei avanoa a o faafogafoga mai alii ma faipule i tua i nuu taitasi, se i alolofa ane, o le galuega lenei o le aoaoina o fanau o le tatou galuega fai faatasi. Ua i ai nuu ua fai faasalaga o aiga pe a le avea fanau i aoga a o le talosaga i nisi o ala'alafaga o lo o faatalale pea ina ia lagolago mai i le tatou Malo mo lea atinae.

O le tauofoina o meaaoga e alu lava i tulaga masani ona o faiga faavae lava o le Malo o lo o i ai lava le Komiti e tau ofo meaaoga, a taunuu mai ona omai lea o a outou Pule Aoga ma le Komiti e avatu a outou meaaoga. O le faiga aupito sili lea ona transparent ma lelei.

Ona ou oo mai lea i faiaoga, ia lava le onosai ua toetiiti ea le pologa o i tatou ona o le le lava o faiaoga. O lo o ua faataavale polokalame a le Matagaluega mo lea vaega ma le talitonuga e amata atu i le tausaga fou ona tauva uma tamaiti e fia faiaoga, ae le toe vaai maualalo se isi i le faiaoga. O le mataupu o le faa-Saienisi o le tasi lea mataupu e utiuti i aoga, ae ua i ai le faiga a le Matagaluega e ave tamaiti i isi Kolisi e mafai ona aoaoina ai le Science. O se faiga e le tumau ona e i ai le tatou faiaoga e amata po o le Aso Toonai o le vaiaso fou e launch ai le Bachelor of Science e 60 faiaoga o lo o i ai nei o le a latou faia lea faailoga ma faatautaia i le Aoga a le Vasa Pasefika i Saute, e lua tauasaga ma maua le Bachelor of Science.

Lau Afioga i le Fofoga Fetalai, ona ou oo mai ai lea i computers.....

FOFOGA FETALAI: Malie lau Afioga i le Minisita se i tuu atu le avanoa i le faauilavea o lo o tulai mai ai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, ou te fia fesili i le vaega lea o faiaoga, ona o le manulauti a le Matagaluega o Aoga, Taaloga ma Aganuu, e 100 faiaoga e iu mai i le tausaga ua pasi atoatoa mo aoga mauululuga. Ae a oo mai i tua i le faasologa o faiaoga e iu mai i le NUS ma faailoga Degrees na o le toavalu po o le toasefulu i le tausaga. Ou te fia fesili i le Minisita faafetai o lea e faaoga le USP, po o i ai se fesootaiga a le NUS o lo o aoga ai faiaoga ma le Ofisa o Aoga ma lou faaaloalo lava.

Afioga Hon MAGELE MAULIU MAGELE: Lau Afioga i le Fofoga Fetalai, ua fai soo lava le amio a le sui usufono lea e le i lauga ae fesili lava. O le mea lea e ui ina taua ae ou te le tali i ai aua a tali ua atili ai lava ona fai.

O a tatou computers, o le mea lea e tupu o se mea lelei le faaosofia o nai nuu ma alaafaga e o e sue mai computers, ona aumai lea ae le i sauni a latou aoga e faaoga computers, ona faatoa omai lea o le Matagaluega e saili atu ni faiaoga. O le mea lea e talosaga atu ai i nei aoga se i tau faatelegese le aumai o computers pe afai e leai se faiaoga. Ia muamua ona faafesootai le Matagaluega o Aoga ina ia fai i ai se galuega ma aumai ni faiaoga. Ia taatia maia le request mo le silasila i ai o le Matagaluega.

Lau Afioga i le Fofoga Fetalai, e faafetai atu i le Ofisa Sili o Pulega o le Matagaluega o Aoga, Taaloga ma Aganuu, Afioga Matafeo ma le aufaigaluega. E faafetai atu i le SQA i le Susuga Fepuleai ma le aufaigaluega, Ofisa Sili o Pulega a le NUS, Afioga Lau Asofou Soo ma le aufaigaluega. E faafetai atu i le Failautusi o le Fono ma le aufaigaluega, o paaga a le MESC. Ia manuia leni Fono, soifua.

FOFOGA FETALAI: Malo faafetai malele i lau Afioga i le Sao po o le Minisita mo Aoga, Taaloga ma Aganuu. Ou te talitonu e le faaitiitia le sapaapaia ma talia aloaia i le faafofogaaga a le Maota le tuleiga ma le saunoaga, aua e le o se Matagaluega laitiiti o lo o feagai ai ma lau Afioga, a o se Matagaluega foi o lo o ave i ai le faamuamua a le Malo e ala i le manulauti o aoaoga. O se atunuu aoaoina lelei o se atunuu manuia foi lena. Alo i outou faiva lau Afioga i le Minisita aemaise o tupu ma ee, tamalii ma failauga o le Matagaluega o Aoga mai lava i le Iunivesite seia paia Aoga Amata.

Ua tatou taunuu mai i le Matagaluega o le Soifua Maloloina.

Afioga Hon TUITAMA TALALELEI TUITAMA (Minisita mo le Soifua Maloloina): Faafetai i lau Afioga i le Fofoga Fetalai. Ou t e talitonu ua maea ona paepae ulufanua paia, sa ma faiga o leni Maota i le tele o saunoaga ua mavae. E faapea foi paia mauuluga i le tapuaiga a le atunuu mai lava i tupu ma ee ma ponao seia oo lava i le lautele o Samoa o lo o faafogafoga mai. Ona i ai lea o le agaga ia te au o le a le toe uia lea ogasami pe toe faloina foi le afa loloa e tusa ai ma tulaga masani, a o le a sagai tonu loa lau o le fo ma agai tonu e tali atu i mataupu sa laga e sui usufono ia latou lauga faalauaitete e tusa o le Tulafono Tau Faaofi o le Faatatauina o Tupe Faaopoopo (Nu.2) 2013/2014 ma le Tulafono Tau Faaofi o le Faatatauina o Tupe 2014/2015.

Lau Afioga i le Fofoga Fetalai, a o le i oo atu sau faamatalaga i mataupu na laga, talu ai ona o le puupuu o lau tali, ou te fia faaaogaina ai nai minute ou te faapai atu ai i lou itumalo ma lana tapuaiga, le paia maualuga i Susuga i Faafeagaiga o lo o tapuaia, tatalo ma faanonomanu mo le manuia o lo matou nuu ma le itumalo ma ua faafaletulua ma faapaulia i afioaga o Aana Alofi Nu.1, aemaise o lou Tama faale-Agaga le Susuga i le Toeaina Faatonu ia Eti Tamati faapea fata faitaulga e fia o lo o tautuaina lenei itumalo i le talaiina o le finagalo o lo tatou Atua.

Le paia o Aiga Sa Tuala, Aiga o Mavaega, Aiga Taulagi faapea foi le paia ia Tama Aitu ma le Maugafa ma le mamalu ia te oe le Faletolu ma Fuaifale. E faapena foi i le la itu o le itumalo i le paia ia Leaupepe ma Aiono, Toleafoa, Sua ma le mamalu i le Falefitu ae tainane foi le Fetalai i le Matua o Tauauvea. Ee ia ma papaaao le paia maualuga o le tatou itumalo, ae avea ai lenei avanoa e momoli atu ai le agaga faafetai tele i la outou tapuaiga ma la outou tatalo e mafanafana ai pea o ma sui usufono ma le uso ia Leaupepe o lo o ma tauaveina o outou finagalo i totonu o le Maota.

Atonu ua maua i le faafofoga mai a le itumalo aemaise o le faafofoga mai a lo tatou nuu o Faleasiu-uta, ua saunoa le Afioga i le Minisita o Galuega, Felauaiga ma Atinae Eeseese, o le masina fou o lo o faamoemoe mo le viliina o le tatou vai. E ui lava ina tele tausaga o tatou faatalitali mo le tatou talosaga, ae i ai lava taimi o le Atua. O lea ua oo mai le faamanuiaga ma ua logo i tono matagi lelei e tusa o le saunoaga a le Minisita i lenei taeao. Faafetai ua oo mai lava le faasoa i lo tatou nuu.

E faapea foi le faafofoga mai o le tatou nuu ua loa foi taimi o taumafai ma ii lenei Paeaiga i le tulaga o le tatou malae taalo. Ua maua le avanoa ma le faamoemoe o le masina fou o le a faataunuuna ai le suaina o le tatou malae taalo ma maua ai se nofoaga e ao ai le taleni o lo o i totonu o le tatou itumalo. Ua tele tausaga o leai se avanoa e faatino ai ona o le leai o se avanoa e talafeagai mo lea faamoemoe i taaloga.

Lau Afioga i le Fofoga Fetalai, e toaono sui usufono sa lauga ma afea lenei Matagaluega. E momoli atu le faafetai tele i manatu na faaalua atoa ai foi ma saunoaga matagofie e timai ma fagufagu i le faatinoina o le auaunaga a le Matagaluega. Ua maea ona ou tali atu i sui usufono e toafa, toe toalua la sui usufono ou te le i tali atu i ai ona ua ou fia faalogologo i le matagofie o a la folasaga. Ua ou musu e faalavelave a o agiagi ae se i afu pea a la taumafaiga ona o le matagofie o manatu e le gata o le soifua maloloina a o isi foi mataupu taua ma le aoga mo le Malo.

O se tasi o sui usufono sa talosagaina se Health Centre mo le isi nuu o lo latou itumalo e fai sina mamao ese atu ma le latou falemai. Mo le silafia na ou lauga ai ma avatu le faamalamalamaga o lea tulaga ina ua talanoaina le Tulafono Tau Faaofi o le Faatatauina o Tupe Faaopoopo (Nu. 2) 2013/2014, ae ui o lea e lelei lava le toe avatu pea. O lo o i ai faiga faavae ua uma ona faataoto e fua agai i ai le manaomia o le fausia o health centres po o falemai i lea vaega ma lea vaega o Samoa. E le o faia i le mamao ma le tausavali mai i le falemai ae fua agai i e o lo o agai i ai le auaunaga faatasi foi ma e faatinoina le auaunaga po o talafeagai ma lea taimi ma lea taimi. E pei ona silafia o lo o i ai foi nisi o afioaga ma alaafaga o lo o motu mamao ese mai le lautele o isi itumalo pei o Uafato i Fagalua, Falealupo i Salafai o nofoaga faapena e mamao ese e le o fuafuaina i ai se tulaga faapea ona o nisi o

mafuaaga talafeagai. O le mea lea e i ai le talitonuga ua lelei auala i le vaega tonu lea na aumai ai lea talosaga ou te talitonu ua faigofie lava feoaiga.

O le falemai i le itumalo o Aana ua faalua ona ou asiasi ai i le tausaga, o le amataina mai o lenei falemai o le anoanoai o vaega ua maea faaleleia. O le falemai foi lea na punitia lava mata o maasiasi ae totoa lava le aisiga mo ni moega ona ua tele ina faaleagaina. Ua i ai le faamoemoega ua maua mai moega e sui uma ai moega o le falemai ona ua tele ina faaletonu a o le tele o vaega o lenei falemai ua maea ona toe faaleleia mea sa faaletonu. E matautia le maoae o le tulaga ua i ai lenei falemai, e i ai le talitonuga ina ia faaoga atoa mo le itumalo e faigofie ai feoaiga mo le autovaa mai ai e faaoga le tatou falemai.

O le tulaga e pei ona laga mai e se tasi o sui usufono i le mataupu lea o le health promotion. Sa ou lauga ai muamua ma sa toe faamalamalama foi i le aso ananafi a o lea lava e foliga mai e le o malamalama lelei lava. E i ai foi le manatu ia te au, o le a le aveave ai pea atonu e i ai se taimi oo mai i ai le malamalama i e le o malamalama. O le mea e feteenai ai le taofi ona e le gata ina aumai e peiseai e faitioina le health promotion ae toe aumai ai foi ma le isi manatu ua faatupulaia gasegase ma ua taugata pili o le falemai. E feteenai taofi a o le agaga tonu lea na fuafua ai le health promotion, ina ia taofia ai i latou mai le omai i le falemai, ae manatua foi e leai lava se tupe e alu pe afai e te le alu i le falemai. Afai e malolosi uma tagata e leai foi se tupe e alu, ae ala ona tele tupe alu ona ua faatamala i le tausiga o le soifua maloloina ma agai ai ina mai ma alu i le falemai ma complained ai loa i le pili o le falemai.

Mo le silafia foi ua ave taitasi le mataupu a ua le avea i lona aotelega. Na ou faamalamalamaina muamua e tusa o le 2/3 gasegase o lo o agai i le falemai o lo o vaai fua. O le outpatient lava latou i mai tau savali, o tamaiti pepe e oo i le 15 tausaga e leai se tupe e totogia ae vaai fua. O i latou o le au penisione e 65 tausaga e oo atu i le 100+ e leai foi se tupe e totogi. O tina maitaga ma i latou o lo o ola i le falemai e taotoo fua ma vaai fua i le falemai. O faamai pipisi e i ai le HIV, TB, lepela, ma mai feaveai i feusuaiga e vaai fua. O i latou e aafia i gasegase o le mafaufau e vaai fua. O i latou e i ai manaoga faapitoa e vaai fua. O isi la tagata mamai uma na o le \$10 i le aso. Na ou faamatalaina muamua foi ina ua laga lenei mataupu, ua uma ona faia suesuega a o le i oo mai faapea le falemai, na fai po o le a tonu lava le tupe e alu e vaai ai le mai? E te alu atu i le falemai sue lou pepa, alu vaai le fomai , fai lona fusiga ma lona tui, tui le toto ma mea faapena, e ova ma le \$40 i le mai e toatasi, ae na o le \$10 lea e totogi, o lona uiga e totogi e le Malo le \$30. O i latou leaga o lea sa taua e faapea a alu e tui le toto e totogi, alu e fai le faata e totogi, ia o lo o faafofoga mai lenei Maota ma le atunuu e aoga tele mo lo outou silafia o tamaiti uma e tui toto mai le pepe e oo i le 15 tausaga e leai se totogi. O i latou e 65 tausaga e leai se totogi, o tina maitaga uma e manaomia le tui o le toto e leai se totogi. O i latou uma e maua i faamai pipisi nei sa ou laulauina atu.....

FOFOGA FETALAI: Malie le Minisita se i tuu atu lava le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o nei le taeao na avaavau ai le

Taitai o le Itu Agai ua matua maoae le taugata o le falemai, a o lea ou te faalogologo atu i le tele o mai e leai se totogi. O le a la sou finagalo o fea e sau ai nei mea e aumai e le Taitai o le Itu Agai?

Afioga Hon Palualue Faapo II: Lau Afioga i le Fofoga Fetalai, sa ou le faalavelave lava i le saunoaga matagofie a le Minisita, o lea ua tulai mai le Afioga i le Palemia e pei e faaoloataua, ae a faapasene tagata na e te saunoa i ai e le atoa se 30% lau Afioga i le Minisita, a o le 701% o le atunuu na ou fai atu ai. A taofia i le 2 vaiaso e ova ma le \$200 e totogi. A alu e tui le toto e \$10 le totogi, ioe. O mea nei e tataua ona faamaioio mai leaga o lea ua aumai nai tagata toaititi ma pei e foliga e faamatagofie ai le saunoaga a le Afioga i le Minisita pei e vaai fua le atunuu.

Lau Afioga i le Fofoga Fetalai, e lelei le tau mai o pasene ma tau mai tau o isi tagata nei e le o aofia i lau 15 tausaga ma le au penisione. A o le tagata mai le 15 e agai i le 65 tausaga, o tagata na o lea ou te fai atu ai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, pau lava o le mea lea o le pasene e matua leai lava ma se isi e malamalama i lena mea o le pasene. Na o le pau le mea sa ou fia maua atu o le manaia o le tolaulauina mai e leai se totogi, leai se totogi, leai se totogi, a o mea e i ai le totogi, e \$10 ae \$40 le tau, o lona uiga e \$30 o lo o tauave e le Malo. O mea ia na aumai nei e Palu ua matua ou faamautinoa lava e leaga lava lena tagata o Palu e matua pepelo tele.

Afioga Hon Palusalua Faapo II: Lau Afioga i le Fofoga Fetalai, faamasino mai Samoa po o ai o maua ma le Palemia e sao, aua e ova ma le 100,000 tagata nei ou te talanoa atu ai. O tagata nei e saunoa mai ai le Palemia ma le Minisita e le atoa se 50,000, faamasino mai Samoa.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ia lea ua 100,000 ae toaititi lava, na o tagata Apia lava lea e o i uta i le falemai a o i latou uma i tua o lo o agai i falemai i tua, ia se i vaai o le mea lea ua iloa ai le pepelo tele o le Taitai o le Itu Agai, aumai lea fuainumera, aumai lea fuainumera, ailoga o malamalama le Taitai o le Itu Agai i le lapoa o ana 100,000 ma ana pasene ia. Palu, e leai lava se isi e malamalama i na mea o pasene, e matua le malamalama lava tagata i pasene. Ona pau lava le mea o le a le tupe lea e totogi e le tagata e toatasi? O le tali, e leai se mea. O le mea lena e taua, tuu le mea lea o lou talapelo.

FOFOGA FETALAI: Malie lau Afioga i le Minisita, se i tulai mai le sui usufono mo Sagaga le Falefa.

Tofa Tuisa Tasi Patea (Sagaga le Falefa): Lau Afioga i le Fofoga Fetalai, sa taua foi i lau lauga lea tulaga ae faafetai o lea ua faamalamalama atili e le Afioga i le Minisita. O lau fesili po o le mea tonu lea e ala ai ona tumutumu gauta i le outpatient ona o le taugofie toe leai ni tau? O lau fesili lena.

Afioga Hon Palusalue Faapo II: Lau Afioga i le Fofoga Fetalai, e mafai ona ou tali i ai i o? Aua leaga ou te malamalama.

FOFOGA FETALAI: Ua e fia Minisita o Falemai?

Afioga Hon Palusalue Faapo II: Lau Afioga leaga na ou alu ma ou asiasi i ai.

FOFOGA FETALAI: O lea o le a sosopo faamanuvale le tatou Fono, lea o le a tali i ai i o....

Afioga Hon Palusalue Faapo II: Lau Afioga pau lava le tagata e le malamalama i pasene lea ou te fai atu ai o le Afioga i le Palemia ma lona itumalo, o lo o malamalama uma lava Samoa.

FOFOGA FETALAI: Ia se i tali le Minisita o ia e nofo ma pasene, ou te le iloa po o fea e aumai ai au faamaumauga nei e te avaavau mai ai.
Tulai mai le Minisita.

Afioga Hon TUITAMA TALALELEI TUITAMA: Lau Afioga i le Fofoga Fetalai, e le i lauga le uso lea i le falemai, sa lauga i le Lipoti ae le i lauga mai i le falemai, lea na aumai faamalosalia ai ana pepelo ia sa fai i le Palemia.

Lau Afioga i le Fofoga Fetalai o le a faaauau pea. O le faata o tamaiti e oo i le 15 tausaga e leai se totogi. O le 65 tausaga agai i luga e leai se totogi.

FOFOGA FETALAI: Malie lau Afioga i le Minisita. Sa aafia i lau lauga le mea lea le sui usufono mo Gagaemauga Nu. 2?

Tofa Levaopolo Talatonu: Lau Afioga i le Fofoga Fetalai, o se mea lava ou te fia malamalama ai . Sa ou lauga i le Matagaluega mo le Soifua Maloloina, o lea ua laulau mai nei le faata e fai fua. Ou te maitauina mai nei masalo po o ua savalia i le masina ua faaletonu le faata. Po o le a se faamalamalamaga a le Afioga i le Minisita.

FOFOGA FETALAI: Ia se i faamaea muamua le tau o le faata ona faamaea mai ai lea o lau faamalamalamaga ona pule lea o lau Afioga i le fesili fou lea ua alu atu i le faata.

Afioga Hon Palusalue Faapo II: Lau Afioga i le Fofoga Fetalai mo le faasaoina o le taimi, malie lau Afioga i le Minisita leaga o lea ua e oo i faata. E ui lava ina e saunoa ou te le i lauga atu i lau Afioga, leai sa pai lava i ai lau lauga. Ae pei ou te agai i le Palemia ona sosolo ifo ai lea i lau Afioga.

O faata o le tasi lea mea sa faavaatua ai le o o tatou tagata i fafo aemaise lava le tulaga o le Quota. Ua e saunoa mai e vaai fua le 15 ae ou te tautino atu lau Afioga i le Fofoga Fetalai, o le tasi lenei mea o lo o taugata i o tatou tagata o lo o Malaga i fafo i Niu Sila ma Ausetalia. Ua sui le faiga o visa i nei aso, ua manaomia le faata. Ae ou te le talitonu la i lau tala lea, pei e te talapelo foi lau Afioga.

FOFOGA FETALAI: O lea ua maua le finagalo o le sui usufono, e eseese criteria's e mafua ai ona faata tagata. E ala ona faata tagata o le faiga o visa, e ese atu lena o le mea lena e tataua ona totogi, a o le mai e fai lona faata i le falemai, o le mai lena e vaai fua. O le faamalamalamaga lena. Tulai mai lau Afioga i le Minisita.

Afioga Hon TUITAMA TALALELEI TUITAMA: Lau Afioga i le Fofoga Fetalai, o lena ua e maua tonu mai lava, o le tali lena lea na tuu e fai atu i le Taitai o le Itu Agai, e le na o i latou e gasegase, o lea ou te lau atua, ae o i latou e le mamai ae o faata ona o le fia malaga i fafo, o le latou lava lena matafaioi e tataua ona totogi.

Lau Afioga i le Fofoga Fetalai, o tulaga la na i le agai i le falemai ae le i tilotilo i ai, aua na ou tolaulauina foi muamua i latou nei o lea e tala fua fualaau. O i latou foi nei sa lau atu nei o lea e vaai fua i le falemai, e taoto fua foi i le falemai, e tala fua foi ma a latou fualaau. Ia, ou te le iloa la po o le a le isi taugata lea e lau mai, ae pei ona ou fai atu, o le vaega malolosi lea i le 16 e oo i le 24 tausaga, o i latou ia o lea e malolosi, ae leai se faapogai e tataua ai ona mai ae se i vagana o ni manua ua aafia i ni manua po o tulaga faapena. A o le tele o le mafuaaga e ala ai ona mai, o le faatamala ma le le faalogo i le fautuaga lea e avatu e puipui ai le soifua. O le faatamala ma le le faalogo i le fautuaga lea e avatu e puipui ai le soifua mai le tino puta ma le tino mai, suka ma le toto maualuga. Ma o i ina tonu lava la lea e agai i ai le health promotion lea mo i latou lea e i le va lea e puipuia mai ai, ia aua ne i afaina i le tulaga lea, ona le o ai lea i le falemai, leai ma se tupe e alu ai.

Lau Afioga i le Fofoga Fetalai, o lea sa...

FOFOGA FETALAI: Malie lau Afioga i le Minisita se i avatu lava le avanoa i le faauilavea a le sui usufono mamalu mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, faafetai lava mo le avanoa. O lea sa faatalitali se i maea ona laulau le vaega lea, ona ou... o lea ua oo tonu le Afioga i le Minisita i le mea lea o le Health Promotion Bill, ona ua saunoa le Afioga i le Minisita, e i ai le tagata e le malamalama. Lau Afioga i le Minisita, ina ua uma ona talanoa le tatou Tulafono i le faitauga faalua, faatoa oo mai ia matou nei o sui o le Palemene tusi mai i ina i finagalo o nisi o le medical association. O le mea la lea ua fesiligia ai e le mafaufau ma ou fesiligia lau Afioga, aua o tagata nei sa ou faapea, o tagata nei e fauina faatasi se Tulafono faapea. E le gata i lea o i latou o faigaluega i le National Health. O le mea lea e foliga mai lau Afioga, o le health promotion o le mea ua leva ona fai, e le o se mea fou, o lea lava e fai continuously e le public health, it also do primarily health care. E le o se mea fou, e le moomia foi la se vaega fou e fai pei o le aano lea na avatu ai le manatu. O le isi vaega taua lau Afioga, e pei o lea e feteenai lava totonu o lau Matagaluega e tusa ai ma le Tulafono. Ma le faaaloalo lava.

FOFOGA FETALAI: Ia, e avatu pea le fautuaga e faamama le galuega i lau Afioga i le Minisita. O lo o i ai pea le laolao pe a taunuu mai le tatou Health Promotion Bill, a o le taimi lena o le Tala o le Tupe, e manatu ne i tatou toso le laau felefele ona umi ai lea o le tatou taimi. Ae a taunuu mai lava le tatou Health Promotion Bill, ona manino lea, ae malie lau Afioga i le

Minisita, tuusao pea le saunoaga e uiga i le tatou Tala o le Tupe aemaise foi saunoaga a sui usufono.

Tulai mai le sui usufono mamalu mo Vaisigano Nu.2.

Tofa Motuopuaa Uifagasa Aisoli Vaai (Vaisigano Nu.2): Lau Afioga i le Fofoga Fetalai, leai o le a ou le talanoa atu i le Health Promotion Bill, a o le mataupu lea e masani ona ou aumaia i tausaga uma lava talu ona tulai mai foi le Afioga i le Minisita, sa avatu foi i lau lauga ae pei sa ufiufi atu i lalo o le Health Promotion lea sa ou talanoa i ai, le mataupu foi lea lau Afioga i mea o le tala fua o vai a tamaiti foi nei i lalo ifo o le 5 tausaga. A e silasila foi i tagata matutua nei le au penisione, e tala fua a latou vai. Ia, e le faatauagavale foi i ai, o i latou nei ua pulapula lagoto lo latou soifua, a o tamaiti o lea faatoa fananau mai e tau i le lima tausaga, o lea e tauatiae lo latou soifua. E toe faamanatu atu i lau Afioga, pe le ua tataua ona tala fua vai a fanau ia e tau i le 5 tausaga. Ma lou faaaloalo.

FOFOGA FETALAI: Malo faafetai. Faafetai faamanatu i lea manatu taua lau Afioga i le sui usufono mo Vaisigano Nu.2.

Tulai mai lau Afioga i le Minisita e faaaau mai lau saunoaga.

Afioga Hon TUITAMA TALALELEI TUITAMA: Faafetai i lau Afioga i le Fofoga Fetalai. Ia, o le a ou faitauina atu le pepa lea na aumai i le NHS lea na aumai nei ia te au e tali ai le saunoaga a le sui usufono mamalu lea e faapea mai e le o lagolagoina e le NHS. Overall satisfied with the baseline information given the health status in relation to as it is. The concept behind it and the legal aspect NHS is in full support of the National Health Promotion Bill, not only it is in line with the healthy island's declaration which stem from declaration on primary health care and the ottowa charter on the health promotion.

Ia, lau Afioga o le pepa lea, o lea na aumai e le sui o le Matagaluega lea e iinei i le Fono lenei. O lea la ou te lau atua e le faamaonia le tulaga lea e te saunoa mai ai le sui usufono.

FOFOGA FETALAI: Ia, o lea ua maua. Se i tulai mai le sui usufono mo Faleata Sisifo, malie lau Afioga i le Minisita.

Tofa Lealailepule Rimoni Aiafi: Lau Afioga i le Fofoga Fetalai, na pau lava lenei o le mea ia te au ou te le soona tautala i ni upu e le faamaonia. O lea e i ai le Komiti o Tupe lea na ou fesili i le Pule o le National Health, e mafai ona aumai faamaumauga o ana saunoaga. E le o faapea mai e le lagolagoina, ae le malamalama i le mea na fai ai le mea. E pei e le o malamalama i le mea na fai ai le mea lea, ae o lea ua aloalo i tua o le polokiki, aua...

FOFOGA FETALAI: O lea ua maua lou finagalo Lealailepule, o lea ua maua lou finagalo. E ese le lagolago i le Tulafono, ese le le malamalama i le faatinoga o le Tulafono. O lea ou te tau maua atu le...

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, tasi lea mea o le Tulafono o

mea o Komiti, e sa sa ona soona tautala le gutu i molimau e omai latou e valaau e omai e fai molimau i totonu. Afai e faapea ona fai a tatou Fono, ua aliali mai i Komiti nei, e matua leai ma se Komiti o lo o tausisia Tulafono. O le ala lena e ala ai ona omai ma valaau molimau ma omai, ona e confidential information e avatu. A faapea ona toe omai, e toe fiu lava e toe valaau tagata e omai. Ae tou omai laulau i i faamatalaga e avatu? E confidential mea na. O le mea lea e leaga ai le mea o le fai ma oso ae le se i fai ma vaai Tulafono. Lau Afioga i le Fofoga Fetalai, e tataua ona fai i ai sau faatonuga i mea ia. O molimau nei e avatu, o molimau e valaau Ofisa Sili o Pulega, e confidential ia te outou. Aua tou te omai tou fiafia e laulau i totonu o le Maota. Afai e opu a tatou mea i i o le omai lauga i totonu i i ma tautau Tulafono ae le amiotonu, o fea o i ai a outou tautoga e fai? Lau Afioga i le Fofoga Fetalai, e le mama le mataupu lea e aumai e le sui usufono.

FOFOGA FETALAI: Malie Lealailepule se i fai atu lau....

Tofa Lealailepule Rimoni Aiafi: Lau Afioga i le Fofoga Fetalai, o lea na faaali sao lou manatu, ou te le i faataga foi se isi, aua le soona le mafaufau.

FOFOGA FETALAI: Se i fai atu lau tala lea Lealailepule, alaala i lalo le sui usufono, alaala i lalo le sui usufono. O le ala tonu lava lena na ou piiama atu ai i le Afioga i le Minisita, taatia le tatou Health Promotion Bill e i ai le taimi ona tatou agai lea i le tulaga tatou te soalaupule ai. A o lea foi ou te nofonofu ma ou maitau atu, malilie sui usufono o lo o tulei saunoa, e le aoga, o tatou, aemaise lau Afioga i le sui usufono mo Faleata Sisifo ma le Taitai o le Itu Agai, o tatou lea e aafia tele i le promotional advocacy group a le tatou Palemene. O le itu lena o lea sa ou maumau iumaea atu ai, taatia le tulaga i le mataupu lea leaga e fai si felefele tele. O lea la ua agai nei ina tatou oo i le tulaga o lea o le a tatou oo ina lote le tulaga o le malupuipua o faamaumauga aemaise o taimi e fai ai a outou fonotaga i taimi e fono ai Komiti Faa-Palemene ona o le tulaga lena. E i ai lou faaeteetega, e faamalulu atu i sui usufono ia outou alofagia tatou te talanoa, ae tatou talanoa tonu e uiga i mataupu na ala ai ona laga.

O le tulaga i le Health Promotion Bill, e le tataua ona tatou toe agai i ai i le tulaga lautele leaga o lea e faasaga tonu, o lo o i ai le Tulafono o lo o mulimuli mai. A o le agaga ma le tatou faamoemoe ia malu tualumaga pe a fono a tatou Komiti.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea lea ou te tulai atu ai, o le Tulafono e taofiofi ai molimau ma aua ne i soona tautala se isi i molimau e avatu ma tau igoa o tagata, e le o mafai ona saunoa mai e puipui po o sao po o sese mea ia e aumai. O le mea a outou Afioga o lo o i totonu o Komiti, ia outou manatua le mea lena, afai e valaau po o public servants po o ai e o atu e avatu a latou molimau, e gata ai lava i totonu o Komiti, ae tou te le omai ma valavalaau ma fai mai, na fai mai ai le alii lena e nofo mai i ina. E faapefea ona malu, ma o ai e toe fia sau? Afai e valaau Ofisa Sili o Pulega ae le toe fia omai, ia e leitioa le fia omai, o le mea lea o le le mafai ona taofiofi.

Afioga Hon Palusalue Faapo II: Lau Afioga i le Fofoga Fetalai, avea ia lenei taimi ou te tulai atu ai ma le faaaloalo. A oo loa i mataupu faapenei, o lea e taumafai atu lenei Itu, aua o lea ou te le iloa i le pepa la e tulai mai ma le Minisita pe se fasipepa, a o lea e taumafai atu le Itu nei e avatu molimau ina ia faamalamalama ai se mataupu. E leai se agaga e faapea o mea e aumai i fonu a Komiti aumai faalauaitele iinei.

Lau Afioga i le Fofoga Fetalai faapea foi lau Afioga i le Palemia, ou te faamalulu atu ona o lea tulaga, a o le naunautaiga, ina ia...

FOFOGA FETALAI: O lea ua maua Palusalue.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ia outou silafia, o le tatou tautoga lena. E ala ona omai tagata tou te valaau i ai i luga o le tulaga e le faalauaitelea a latou mataupu e sausaunoa i ai saoloto. E faapefea la ona toe omai fai ni a latou molimau i le amiotonu o lea e solomua i sui o le Komiti ona le amiotonu? O le mea la lea ou te tulai atu ai lau Afioga, e le mama le mea lea o le fai ma faalautele molimau a tagata e omai i totonu. O lena e fai a outou Lipoti ma aumai, ae le taua igoa o tagata, e sa.

Afioga Hon Palusalue Faapo II: Lau Afioga, o le a le taua o lea e aumai i tatou Lipoti igoa.

FOFOGA FETALAI: Alaala i lalo le sui usufono se i ou fai atu ona tutulai mai lea. Alaala i lalo Palusalue. Tulai mai Lealailepule.

Tofa Lealailepule Rimoni Aiafi: Faafetai i lau Afioga. E matua lava le malamalama i le Tulafono lau Afioga. O le mea lea ua ou toe faamalulu atu ai, ona o lea e pei e foliga ua aumai le tusi, e pei o le saunoaga a le Afioga i le Minisita, e pei ua tauvaleaina i matou ma faamatalaga ia e avatu e le faamaoni. O le ala lea. Ae na ou lauga analeila, e pei e tauvalea, aua le pepelo.

FOFOGA FETALAI: O lea ua maua.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e saoloto lava le Minisita latou e faitau mai fautuaga a latou advisors, e saoloto lava e faitau mai. A o lea ou te talanoa atu i molimau e avatu i totonu o Komiti e tusa ai ma latou fesili, o la e i ai faamaumauga e faalilolilo mea uma. O le mea la lea ou te tuliloaina. A o le matilatila o le tu mai, o le molimau lea na aumai e ia lena e nofo mai i ina. Se i vaai i ai i le le popoi. Lau Afioga i le Fofoga Fetalai, o le mea lena o lea e tuliloa atu, a o le tu mai o le Taitai o le Itu Agai aumai lana... pei e tetee mai, o la e foi e oo i le Taitai o le Itu Agai ia e le malamalama. O le mea lena na fai ai a tatou Tulafono. Afai nei la e toe valaau outou, fiu e valaau ae le omai ni Ofisa Sili o Pulega, o le a la le mea a outou e fai, ona o lea e iloa e le malu ia te outou? E faapena ona fai le tatou galuega, faitau Tulafono ma malamalama.

FOFOGA FETALAI: Alaala i lalo Lealailepule, ava mai Lealailepule.

Tofa Lealailepule Rimoni Aiafi: Lau Afioga i le Fofoga Fetalai, e faamalulu atu i lau Afioga i le Minisita, e le o se mea tele e le o se mea foi e oti ai se isi. A e finagalo foi e tuli au, ia, se i malolo e fai feau a le aiga. Faafetai.

FOFOGA FETALAI: Oi, oi, alaala i lalo Palu, alaala i lalo, ua iu le mataupu. Ua manino ma malamalama le folasaga lea sa ou tuuina atu, o lea foi e manino le taumafai atu a le tatou Malo e faamalamalama, o lea foi ua manino le atugaluga lea sa outou saunoa mai ai. Malie lau Afioga i le Minisita e see ese ma le mataupu lea ae tatou agai i le isi mataupu fou, e manatu ua manino ma malamalama, aua le toe tautalagia le tatou Promotional Bill lea, ae se i i ai le taimi ia ona agai mai pea lea o le tulaga o le faatulagaina. O le talanoaina o le Promotional Bill i totonu o le Komiti o Tupe, ia e le anoa tele, atonu e i ai ni fesili ae se i sagatonu lau o le fo i le Tulafono lava ia ma ona molimau, ia ona faapena lea ona atoatoa. Tulai mai lau Afioga i le Minisita.

Afioga Hon TUITAMA TALALELEI TUITAMA: Faafetai lava i lau Afioga, ona o lea lava sa ou usitai i lau poloaiga, ae ona o lea ua toe laga mai e sui usufono, ia o le ala foi lea o le toe tagofia o le vaega lea, ma le tasi, ou te le i taua se suafa o se sui na saunoa i le vaega lea, o lea lava sa ou faaeteete i ai i le tulaga lea, o le tasi o sui usufono sa taua le vaega lea, e le i taua lava se igoa o se isi. Ma le isi lau Afioga, a o i ai foi ni mafaufauga i le pepa lea.....

Afioga Hon Palusalua Faapo II: Lau Afioga i le Fofoga Fetalai, ua outou atu ona o lea foi ua toe laga mai mea ia, o lea ua e saunoa, e see ese ma le mea lea ma le tatou vavao.

FOFOGA FETALAI: O lea ua faaiu mai le saunoaga a le.....se taatia mai o lea e....Palu.....

Afioga Hon Palusalua Faapo II: Leaga o lea e tuuai mai ia matou le sese.....

FOFOGA FETALAI: E le o tuuaia oe, e le o taua sou suafa, o lea e tau faatonutonu le faauiga, o le tusi le la na aumai, o le tusi mai le Matagaluega lea o lo o outou saunoa mai ai, o upu ia o lo o outou faia maia i totonu o le Maota, ua na o faamatalaga, o le faamaoniga la e uu mai e le Minisita o ia e ona le tusi, a tatou tapa nei la le tulaga e tulituliloa le mea lea o le a fai ai le finauga, e le iu i se lelei. Malilie sui usufono o lea ua faaiu atu, o la ua saunoa le Minisita o la ua na taulimaina le tusi e aumai i le Sector lea a le falemai e lagolago i le mataupu lea, ona iu lea, ua uma le mataupu. Tulai mai lau Afioga i le Minisita.

Afioga Hon TUITAMA TALALELEI TUITAMA: Faafetai, faafetai lau Afioga, ona o lea pei o le a tuuaia ai au pe sao mea ia ou te lau atua, a finagalo i ai lau Afioga, avatu i ina le pepa lea e silasila i ai ma fai ni kopi e ave i le itu lala.

Lau Afioga ia o le usitaia o lau poloaiga, o le a see ese ai ma le vaega lea. Ae sa fesiligia la ia le tulaga o faamai foi ia lea ua taua nei e Samoa, o re-imagine disease, lea la e i ai le TB ma le leprosy, mo le silafia o nei lava faamai e le i matua o ese lava ma tatou, na i lalo lava i se tulaga ua toetiiti lava faaumatia, ae ona o le tulaga faigata tele o le siama e mafua ai lenei faamai, o lea lava la sa taamilomilo ai lava i totonu o le tatou atunuu e oo mai lava i le taimi nei, ma o le tulaga foi lea e pei ona laga mai i totonu o le Maota, ia o lea ua toe vaaia ia le faaopoopoina o i latou ua aafia i le gasegase lenei, ma e le o tuulafoaia e le Matagaluega, o nei gasegase o lo o vaaia pea ma asiasia i o latou aiga ma togafitia faatasi ma o latou aiga ina ia taofia ai le pipisi faalauaitele atu i e o lo o latou mau faatasi, e faatasi ai foi ma le ave fua i ai o a latou fualaau e togafitia ai. E tusa la ma le 33 i latou ua maea ia togafitiga o le TB, ae tusa e toa 9 i latou o lo o faagasolo latou togafitiga i le taimi nei. O le lepela, e tusa e toa 16 i latou ua aafia i le lepela lea ua i ai nei, e toa 3 ua maea a latou togafitiga, ia ma le toa 13 o lo o faagasolo pea a latou togafitiga, ae le o vasai ai le asiasia pea o aiga nei, ia mautinoa e faaauau pea togafitiga nei a i latou o lo o aafia ai, faatasi ai foi ma le vaavaaia pea o e o lo o latou mau faatasi i totonu o latou aiga, ina ne i te i ua aafia ai ona o i latou ia.

Lau Afioga i le Fofoga Fetalai, ia pau ia o nai mataupu o lea sa laga mai e sui usufono ou te le i tali i ai, ia lea sa taumafai ina ia fai atu i ai se tali ina ia faamalieina pea e tusa ai ma le laga mai e sui usufono mamalu, ae momoli atu ai le faafetai tele i lau Afioga, faafetai tele foi ia i latou sa asia lenei Matagaluega. Soifua ma ia manuia le tatou Fonotaga.

FOFOGA FETALAI: Malo faafetai. Ia malo faafetai i lau Afioga i le Minisita mo le Soifua Maloloina ua manino ma ua malamalama foi ia tuleiga ma saunoaga e ala i le Matagaluega o le Soifua Maloloina, ia e avatu foi vaimalu i puega po o le a foi se tulaga o a tatou felafolafoaiga e ala i le Matagaluega. E le faigofie le faatinoina o le Matagaluega o le Soifua Maloloina, leaga o i o lo o taoto ai le toala fanau ola o le atunuu, o le soifua maloloina. Ia mau le toovae, mau foi le onosai i lau Afioga, o le a foi se taumafai atu lea itu o le Maota e ala i tuleiga ma saunoaga, ia tatou te tetele lava i Pesega ae tatou te matua i le o o, tatou te lutia i Puava, ae tatou te taunuu lava i taunuuga lelei. O le agaga ma le faamoemoe, ona o le taumafai foi e avea ma...ina ia taumafai atu e manino ma malamalama se mataupu, e le o se isi itu, a o le agaga ina ia malamalama ma manino lelei aemaise foi nisi o Tulafono fou o lo o faatulai mai, mo le manuia ma le lelei lava o le Matagaluega, e momoli atu le faafetai.

Ia tulai maia lau Afioga i le Minisita mo Faatoaga ma Faigafaiva i le tama matua i lau Afioga i le tama matua, ua oo i le taimi e tali ai le tatou Matagaluega o Faatoaga ma Faigafaiva. Tulai mai le sui usufono mamalu.

Afioga Hon LE MAMEA ROPATI (Minisita mo Faatoaga ma Faigafaiva): Malo faafetai i lau Afioga i le Fofoga Fetalai mo le avanoa ua tuuina mai ia te au e fai ma sui o lenei Matagaluega e molimoli atu ai sa matou upu. Ae le i amata la lau folasaga, e talosaga atu i lau Afioga i le Taitai o le Itu Agai ma lau Afioga i le sui usufono mo Faleata Sisifo, e fai sa oulua deep breath faasau le ea lelei i totonu o le mama, aua o i ina e maua ai le

toafilemu o le loto, te i ua uma i i ae pa mai ia te au le lua, se have a deep breath, ia.....

Afioga Hon Palusalue Faapo II: Lau Afioga i le Fofoga Fetalai ma le faaaloalo....

FOFOGA FETALAI: Ia.

Afioga Hon Palusalue Faapo II: E matua le manaomia e maua le mea lea, pau le tagata e manaomia, o le Afioga i le Palemia, ioe.

Afioga Hon LE MAMEA ROPATI: Ia o le tatou galuega e faifai toe, aua le mamafa i se isi te i ua oso se mai o se isi. Ia ua mou malie atu le malamalama i lenei aso ae solosolo malie mai le pogisa, ma e ao ona tatou momoli ai le viiga ma le faafetai tele i lo tatou Tapaau i le lagi i le Atua, i Lona alofa ma Lona agalelei ua tatou toe aulia mai foi lenei afiafi na amata mai i le taeao le tatou galuega, a o lenei lava ua pogisa o tatou faatasi i inei, ua tatou lagona uma ai faatasi le agaga faafetai ma fia vivii ae i le Atua, ona o Lona alofa ma Lona agalelei ia Lona fesoasoani mai. E talitonu foi o lo o manuia lo tatou atunuu i ona vaega eseese.

Lau Afioga i le Fofoga Fetalai ma le paia o lenei foi Maota, ua ou tulai atu i sina au upu aua le tapuaiga a lo tatou atunuu. Ma o le a fata ia i mauga o ao ou paia ma sa ma faiga o le tatou atunuu, ou te talitonu lava e leai lava se isi na te toe faaopoopoina paia tumau o Samoa, ou te le toe asaina foi la le filifili o le vaosa aua o paia lava e oo i le faavavau. O lea foi e faafofoga mai lou itumalo, ia e leai ou te le toe auiliiliina o outou paia ma outou sa ma faiga, o paia lava tumau o lou itumalo i nuu taitasi, le paia i le aiga sa Tuala faapea foi le aiga Taulagi, ae tainane foi ia le mamalu ia Tuisavailuu ma Gagaeolo ma le itu, ae tainane le fale Aana. Ae le faagaloina ai le Aufaigaluega paia a le Atua o lo o faanonomanu ma faaoololomaau i luma o le Atua i le ao ma le po, aua ia to manu aua Samoa ma lana tapuaiga, ia o le agaga faafetai lena. A o lenei itula, ou te muamua ona ou momoli atu le faafetai tele lava i lo outou paia o e sa afea foi lenei Matagaluega i a outou saunoaga ma fetalaiaga matagofie i nai nei foi aso ua tuanai atu. O le faailoga lea o lo outou amanaia foi o lenei Matagaluega, ma e momoli atu ai le faafetai tele. E tele nai mataupu sa agai mai i ai ia saunoaga foi e tusa i le Matagaluega nei, ia ou te maitauina foi i nisi o saunoaga, ia sa momoli mai ai le faafetai tele i le Matagaluega ona o nisi foi o faamanuiaga po o tau i na maua e le tatou Matagaluega e tusa ai ma Malo Aufaatasi e tauala mai i le FAO, ia ou te talitonu o le tatou galuega faatasi lava lea, e le faapea o se galuega a se toatasi po o le aufaigaluega foi. E ave foi le faafetai tele i nai o tatou faifaatoaga ma faifaiva, ia o latou e tele lava lo latou sao i lea tulaga, aua ana le seanoa latou ma latou amanaia ia timaiga ma lapataiga ma fautuaga foi a le Matagaluega, aemaise o le lapatai pea i a tatou faifaatoaga ina ia galulue, ae moni lava le saunoaga a le fai-Salamo, 'o lē lava e lulu ma loimata, ia e selesele lava ma le fiafia,' sa ou faia foi lea upu i le isi foi taimi, ia ma ou te talitonu ia o le agaga lava lea e tasi.

Se i ou agai atu lava i nai mataupu lea sa laga mai e lo outou paia e uiga i nisi o poloketi. O le manulauti lava a lenei Matagaluega a le Sector Plan lea ua uma ona faataatia, ina ia siitia le contribution po o le sao o le Matagaluega i le siitia lea i luga o lona contribution po o lona sao i le GDP a le tatou

atunuu, aua e le o toe po se lilo i tausaga ua tuanai aemaise tatou ia matutua, e silafia lelei le tele o pusa fai ma le popo sa lau i fafo, a silasila foi i lipoti ua tuanai i nei tausaga e tele ua tuanai, o le tele ia o le sao o le aufaifaatoaga i le tamaoaiga o le tatou atunuu, ia ona alu alu ai lea ua amata ona toe faasolosolo agai i lalo, e tau mai la i nai tausaga ia e lua ea ia ua tuanai, se vaimea ua oso mai lava i le 40, 50% ma agai atu lava i lalo i le 10% i le GDP, ia o le taumafaiga la a le Matagaluega lea e i ai nei, ina ia toe agai i luga ia le fuafuaga lea sa masani mai ai i ia foi fatia po o ia foi tausaga ua tuanai. O le aoga la o poloketi ia e fuafua nei ma faataatitia nei a le Matagaluega, ae momoli ai foi le faafetai i nisi o tatou paaga i fafo, ina ia maua mai ai seleni e toe faufau faalelei ai ma tapue mai mea lelei ia ma toe fai ni mea fou ma ni poloketi fou, ma faa-uunaia ai le agaga fia galue o nai o tatou tagata aemaise foi le aufaifaiva, ina ia toe agai i luga, aua o le tatou atunuu, e leai ni minerale, o tatou lava e tua lava i faatoaga ma nai figota o le sami ma ia o le sami. O le tele foi o taimi, e tau fua foi le loto i le vaavaai atu aemaise lava le tulaga lea i mea o ia, e tele o ia o la ua ao atu e i ai ia atumotu o le Pasefika ma ua lelei ai o latou tamaoaiga, ia a o lenei e tatou te le o matua cultivate ina pe tatou te taumafai ina ia faaoga lelei nai mea ia e foai fua mai e le Atua ia i tatou, e le i faapea na tatou toto po o ni mea na faatataa solo e tatou pe na fafaga e tatou, leai o le foai lava a le Atua na tuu mai ia i tatou, a o tatou la e tatou te o e fai ni auala e faaoga ai nei tamaoaiga aemaise lava lo tatou atunuu o lea e i totonu, amuia foi tatou o lea e i totonu o le Pasefika, e tele mea o le ia, figota ma mea faapena, e mafai ona tatou faaogaina ae ia faataatitia lelei a tatou poloketi, ina ia faafaigofie ai i nai o tatou tagata e fiafia foi i lea tulaga, ia ona atinae ia le tatou atunuu.

FOFOGA FETALAI: Ou te vaelupeina le saunoaga a le Afioga i le Minisita, ona ou te manatu o lea ua tatou taunuu i le tatou taimi malolo. Let's have a break, and have a big breathe, and we come back, and we will continue with our Budget tonight.

Ou te faasilasila atu o le a faataatia ese Taulumaga a le Fono Aoao Faitulafono mo se tatou malologa masani o le afiafi.

Na faataatia ese Taulumaga a le Fono Aoao mo lana malologa i le itula e9.23 i le po ma toe amatalia i le itula e 10.02 i le po.

FOFOGA FETALAI: Malo faafetai i le Agai, malo le onosai i lenei vaega o le aso.

E manatu o lea ua faafoisia le malosi o le tino e ala i le tatou faiga malologa i lenei vaega o le po a o lo o aloalo malie pea le paia ma le mamalu o le Palemene nei aua le faasologa o a tatou polokalame. E momoli atu le agaga faafetai i le paia ma le mamalu o le Maota i le onosai. O le mea lava lea e taua ai ona fai ma tatou break. E lelei lenei tatou te agai ai i fafo se i manava le ea o le ola aua o lea tatou te manava le tailua itula i totonu o le potu malulu, ae lelei le natural breath. E lelei lenei e faafoisia ai le malosi o le tino, o le mafaufau ma le loto ina ia tuutuu i lalo le loto ina ia talafeagai ma le koko Samoa lea na inu nei.

E fai le malologa o saunoa le Afioga i le Minisita mo Faatoaga ma Faigafaiva, le tama matua ia Le Mamea. Tulai mai lau Afioga i le Minisita e faaauu le saunoaga.

Afioga Hon LE MAMEA ROPATI: Faafetai i lau Afioga ona ua toe faafoi mai foi le malosi i lo outou paia ina ua maea le faamalosi tino e tauala i le taumafataga mama i lenei afiafi e faaauu ai a tatou galuega, ae ua ou tulai atu e faaauu la matou mataupu e tusa ai foi o le taimi o lenei Matagaluega. E fai le tatou malologa ua ou oo mai i nai poloketi ia o lo o taumafai e toe tapue ai ma faaolaola atili le tulaga i mea tau faatoaga i totonu o lo tatou atunuu. O stimulus package la lea ua ou oo i ai.

O le poloketi lea, o le manu lauti lava o le poloketi lenei o le toe faaolaola lelei o le niu ma le koko, ona faaopoopo lea i ai ma le kofe. Ou te masalo o lena ua silafia aua sa taua muamua foi le mea lea e tau o le inter-crop foi lea e toto vava ai laau nei ina ia ola ae ai ma toe faateleina ai aemaise lava le niu. Aua e ui lava i laau uma ma faaeleleaga uma, a o le niu lava e aupito sili ona taua aemaise lava lenei vaitaimi ua tele mea o value added products o le popo ma mea uma lava o le niu, o le pulu, o le aano o le niu, o le sua o le niu ma ua tele mea ua faaoga ai. O le mea la lea ua toe taumafai ai lava ina ia faaolaola atili le industry lenei o le toe totonu o le niu.

O le poloketi la lenei na amata i le faaiuga o le 2010, ae pei o le amataga lava o le 2011 na toe fuafua ai le laveaiina o le niu ma le koko aua ua manaia foi le kofe latou ua lelei le tau i atunuu i fafo. A o le mea la na tulai mai i le silasila atu a le Matagaluega, o le mea sa tulai mai i le amataga o le poloketi sa faapea e faa-organic foi lea, e aua ne i faaogaina ai ni vilaaui, ae peitai ua aliali mai ai nisi o faafitauli. O nisi la o faafitauli na matauina, ina ua oo mai i le 2012/2013 i le piriota lea, aua o le poloketi e tusa e manaomia le 1,000 eka, a o le poloka e tasi e 2 eka. O lona uiga o le aufaifaatoaga e 500 e 2 eka a le faifaatoaga ona maua ai lea o le 1,000 eka ma o le fuafuaga lena o le poloketi. Mai le 500 o faifaatoaga sa fuafua mo le polokalame lenei i le amata mai e oo mai i le 2013, e tusa na o le 350 faatoaga na mafai ona resitala i le polokalame lenei. Mai la i le 1,000 eka sa fuafuaina i le polokalame, na o le 728 eka na resitalaina. Ae mai le 358 o faifaatoaga sa resitala mo le poloketi, na o le 185 faifaatoaga na mafai ona ausia aiaiga o le polokalame e fai ai totogi muamua po o ponesi. O fuafuaga sa i ai le ponesi e fa tausaga o le poloketi. O le tausaga muamua e totogi le \$1,000 pe a faamanuiaina ua uma asiasiga ma ua fetai. O le tausaga lua e \$500, o le tausaga tolu e \$500. A o le tausaga fa e \$2,000, ona uma loa lea o le ponesi lea. O fuafuaga la sa i ai e uma ane le tausaga lona fa ua fua mai laau nei o le koko, niu ma le kofe. E pei o le tulaga lena sa i ai.

Mai la i le 185 lea, na o le 156 faifaatoaga na mafai ona maua a latou faamanuiaga i le totogi muamua o le polokalame po o le ponesi lea. O le mea sa taumafai i ai aua e le o se taimi muamua lenei ua tatou faia ai le ponesi. A toe silasila foi i futia ua tuanai ma le tele o tausaga ua tuanai atu, sa fai foi le ponesi o le totonu o le koko, ae sa tele foi faafitauli sa tulai mai ai i nisi o faifaatoaga sa le manuia foi i lena vaitaimi. O le mea sa taumafai i ai le Matagaluega, ia alu sao lava le ponesi ia aua ne i i ai ni itu e faaletonu ai, ae ia fai ma faaitaiga tausaga ua tuanai. Mai la i le 185 lea o faifaatoaga na ausia le lua tausaga lea muamua, na o le tovalu na ausia le peimeni e tusa lea e \$1,000. O laau foi ia na tufaina atu o lo o.....

Tofa Aveau Tuala Lepale Niko Palamo: Lau Afioga i le Fofoga Fetalai.....

FOFOGA FETALAI: Malie lau Afioga i le Minisita se i tuu atu le avanoa i le mataupu na laga e le sui usufono.

Tulai mai Aveautau.

Tofa Aveau Tuala Lepale Niko Palamo: Faafetai mo le avanoa, faafetai foi i lau Afioga i le Minisita mo le faamalamalamaina o le polokalame lea.

Sa ou fesili i le vaega lea. O tausaga e pei ona tolaulau mai e le Afioga i le Minisita, masalo po o silafia e le Maota, o le Tala o le Tupe na tea atu nei po o tua atu foi na toe faafoi mai ai i le Matagaluega le \$100,000 e faatino ai le stimulus package lea, a o lea la ua lau mai nei fuainumera toeitiiti lava 50% o tagata na resitala e le o toe i ai i totonu o le polokalame. O lea foi la ua saunoa le Afioga i le Minisita na o le tovalu. O i ina tonu lava la lea e i ai le agaga lea sa taumafai e tuutuu atu i le Matagaluega o Faatoaga. E le o se faitio, a o i ina tonu lava ia faafaigofie ma ia faamama le faatinoina o mea ia ina ia mafai ai e i latou o lo o taumafai e fai aua o lea ou te tilotilo atu i inei, o le tele o nai aiga e leai ni 2 eka, a o lea e sau le limit o le vaega lea e tatau ona 2 eka lou fanua. O criterias la ia o lea ou te taumafai atu ai i lau Afioga i le Minisita aemaise o le Matagaluega, se i toe tagai ane i ai. Afai e 50% lea o le 180 lea e i ai nei o lona uiga ai foi o le a toe faafoi mai le isi vaega o le tupe lea na ave i ai e \$150,000.

Ma le faaaloalo lava.

FOFOGA FETALAI: Tulai mai lau Afioga i le Minisita.

Afioga Hon LE MAMEA ROPATI: Ana le vavevave mai le sui usufono ae se i faafofoga pea, e oo atu lava i ai i le mea lea, ae se i maea uma lava ma oo mai i le taimi lena ona e toe fesili mai lea.

E toa 29 na ausia le 90%, e 22 na ausia le 80%, e 44 na ausia le va o le 50% i le 70%, e 35 na ausia le va o le 10% i le 49%, ae 47 sa mafai ona faatauina laau ola i lalo na o le 10%. O le uiga la o le mea lea ua tulai mai ona pau lea o le fuainumera lea na ou tau atua na qualify i le ponesi. E leai la se mea e soona alu ai fua le ponesi ae e le tatau ona qualify tagata ia. O le mea la lena na faasaoina ai le tupe. E le o se tupe la e faapea na toe faafoi ae ua faasaoina le tupe. E le faapea o le a vaavaai atu lava i le faifaatoaga na o le 30 i le 40 laau ae alu i ai le \$1,000 aua o la lava e fai fuafua e le Matagaluega. Ona tulai mai loa lea o faafitauli ia ona fesiligia loa lea po o le a le mea ua ala ai ona pau le fuainumera o e ua mafai ona qualify? Ona suesue loa lea o faafitauli. O faafitauli la na tulai mai, o le toatele o le aufaifaatoaga ua faapea mai o latou e le tele ni tagata e mafai ona o faa-organic faatoaga po o le tulaga foi lea e aua le faaaogaina ni vailaau, ae o e teu ma e le toatele ni fanau aua e uma ane na o sina tamai vaega lava na talosaga mai ai o lo o lavea. O le tasi lena reason po o le tasi lena mafuaaga.

O le isi mafuaaga o le fevaai lava o aiga latou. Ua fai mai le isi o lona fanua, ae fai mai foi le isi o le fanua o le isi ina ua vaai mai ua lelei, ona fai mai lea o lona fanua atoa ai ma mea uma faapena. O lea la na i ai loa lea o le fuafuaga lea ua faagaoioi ai nei le polokalame, o lea ua uma ona pasia e le Kapeneta

ma faaaauai ai lava atili. O lea ua faataga le faaaogaina o vailaau e faamama ai poloka nei. O le uiga o lea mea e fai le filifiliga a le faifaatoaga pe faa-organic pe faaoga vailaau. E 500 poloka ua resitala na faatinoina e faifaatoaga na ausia ai le 1,000 eka lea ua fuafua e pei lava ona faatulaga i le polokalame.

Ua tatalaina foi le avanoa i faifaatoaga tetele ia ua matauina le lelei o a latou taumafaiga ma le resitalaina, ma e tetele o latou fanua, e mafai la e le faifaatoaga lea ona apply up to 5 blocks. O lona uiga pe tasi le poloka, pe lua, tolu, fa, lima pe sili atu foi i le lima. O le tulaga lea ina ia mafai lava ona faatinoina lenei poloketi taua mo le atunuu. O lea foi la na faatino le polokalame lea e 4 tausaga, ae tumau pea le faatupeina e pei ona faatulagaina e le Kapeneta i le faaiuga o le 2010. O lona uiga o lo o tumau lava le vaega lea e \$1,000 le tausaga muamua, \$500 i le tausaga lona lua, \$500 i le tausaga lona tolu ae \$2,000 i le lona fa o tausaga.

E i ai la le mea lea ua faaopoopo i ai, ua le gata la i le Matagaluega e o e asiiasi, ae ua faaopoopo i ai ma le Matagaluega o Tupe, toe faaopoopo i ai ma le Ofisa o le Pule ma Suetusi Sili ina ia malu puipuia lava tupe ina ia aua ne i i ai ni togafiti i ni auala faaleuo pe aiga, ae ia sao lelei le faiga o fuafuaga. O le mea la ua tulai mai nei, o lea e le i leva nai vaiaso ia ua i ai, a o lea ua oo atu i luga le aofai o tagata ia ua i ai nei i le poloketi. O le aofaiga la lea ua i ai nei o tatou tagata ua resitala po o faifaatoaga ua uma ona resitala ia Iuni i le tausaga nei, o Savaii e 128 a o Upolu e 364, o le aofai e 492. O lona uiga toe 8 lava nai poloka, ae masalo e oo mai i le taimi lenei o la ua fully prescribed po o ua atoa lelei le fuainumera. O le aofaiga la lona o le tulaga lea ua i ai nei e fuafua mo le isi a tatou ponesi lea o le a totogi nei i se vaitaimi o le tausaga lenei. Ia manatua o lea sa i ai lava le vaega tuai ae na taumafai lava ina ia faaoga lelei le poloketi lenei aua e talitonu o le tasi lea poloketi e aoga tele mo nai o tatou tagata. O le tupe la na toe faafoi mai o lea o le a toe faaoga uma lea e i ai le \$150,000 le tupe e toe faaopoopo atu i ai ina ia ausia ai le totogiina o nai a tatou ponesi ia.

O lea foi la ua faaopoopo atu i ai i laau ia e inter-crop ai ona o lea o le a tuu atu i ai le avoka, e mafai foi ona tuu atu i ai le Tahitian line. O lea foi la ua talanoa nei ma vaavaai atu o lea ua toe faataga mai le ava, ua sili foi ona toe faaopoopo atu i ai ma le ava e inter-crop ai le mataupu lenei e uiga i le stimulus package.

O lau faamalamalama lona ma o le resitala e \$100 i le poloka, ona o atu loa lea o le Matagaluega e avatu laau ia e toto. E filifili mai lava la e oe pe fia au niu, koko ma kofe. E avatu fua la aua e kava i lau \$100 lea laau ia o le a avatu e le Matagaluega e toto ma fua e le Matagaluega le va o lea laau ma lea laau aemaise o le fesoasoani atu e faataitai le totoina o le laau. O le tulaga lona ma le talitonuga atonu o le a lelei ai loa i le vaega lenei ona ua faaoga le vailaau ma ua toatele ai tagata ua fia faaofi mai ai i totonu o lenei poloketi.

O le tulaga i le maketi o le talo, faafetai i lo outou tuitui mai e le o se mea e leaga, o lo o faafofoga mai foi le Matagaluega, tuitui mai pea aua e leai lava se isi e 100% sona atoatoa. O le agaga atoa o lo o ua fesoasoani le Matagaluega i le fufuluina o le talo, tuu i tagata ma tuu i containers e leai se tupe e alu ai a le tagata e observed uma lava le Matagaluega nei galuega. O le mea sa faigata ai tatou i mea nei o bio-security po o le quarantine o le talo leaga sa lavea tatou i le taro leaf blight po o le faamai lea. O lo o iloa lelei e Niu Sila, Ausetalia ma Amerika aemaise Ausetalia o le faigata ia aua foi e i ai

maumaga talo i le itu Matu o Ausetalia e matua strict lava i le bio-security i le talo, o lo o feoloolo Niu Sila ma Amerika. O le tulaga o a tatou taga talo na ave i le 2011 e 909. O talo nei na ave i Amerika o le 2012 e 1,344, 2013 e 1583, 2014 e 823 ona faaopoopo faatasi lea ma maua ai le 9,962 tusa e tai 40kilo i le taga talo e tasi. O Niu Sila i le taimi lea e lei matua uunaia le tatou talo o le 2011 e 553, oo mai i le 2012 ua oo i luga i le 4,778, oo mai i le 2013 ua oo atu i le 10,210, o le tausaga leni ae manatua faatoa afa le tausaga a ua oo atu i le 4,516 taga talo. O Amerika sa alu alu lava ua matua leai lava se talo e toe alu i Amerika, 2012 o le aofai o taga talo 2,438, 2013 e 6,225, o le tausaga leni a o lea e lei taitai ua 5,348. A total faatasi mea na e oo mai i le taimi leni o le aofai o taga talo ua alu i fafo tusa e 286,003. Ua alu lava i luga le tatou maketi ae le o nofonofu ai le Matagaluega, o lo o taumafai lava e uunai leaga e sao lelei ua tele le talo i totonu o le atunuu.

Sa i ai le fuafuaga a le Matagaluega e pei o mea sa laga mai e se tasi o sui usufono mo Aana Alofi Nu, 1, Afioga Leaupepe Toleafoa Faafisi ma nisi foi o sui usufono, e fai le tatou Pack House po o le PMD, Produce Marketing Division. Sa fai fuafuaga a le Matagaluega ma ua uma ona fai le consultancy o le mea lea ua uma foi ona lisi tai le uafu i autafa o le SPA, o le a fau ai i ina le fale e faafigofie ai ona lau vaa talo e le gata i lena ao nisi faaeleeleaga. Ua uma foi ona tusi le ata i Niu Sila ae peitai ua alu alu toe mafaufau ifo o le tele o le aufaipisinisi fai mai e lafo atu ia latou le exporting po o le aveina atu o le talo i fafo. Ua toe hold back ai le Matagaluega leaga o le agaga lea o le Malo ina ia tuu atu le pisinisi i tagata taitoatasi a ua leva ona sauniuni le Matagaluega i le fuafuaga lea ua uma ona fai ae ua toe taofiofi i tua se i tuu atu pea le avanoa i le aufaipisinisi o lo o manao latou te avea le talo i Niu Sila ma ave le talo i Amerika ma Amerika Samoa. O lea e taumafai le faiga i Ausetalia e pei ona ou taua e ese le strict o a latou fuafuaga i mea nei o bio-security ona sa feagai tatou i le leaf blight. O lo o mataituina lava e le Matagaluega le mea e tatau ona fai a o le mea aupito sili lava i le taimi leni ua penefiti lo tatou atunuu i taumafa, ua tele le talo, penefiti le aufaifaatoaga. E moni lava ua tau alu i lalo le latou tupe maua a o le tele o le benefit e leai ni maumaga a o lo o faigaluega ma maua tupe e faatau mai ai talo. O lea ua amata mai lava i le \$20, \$15, \$10 ua oo lava foi i le \$5. E le o nofonofu ai le Matagaluega, na alu foi le matou malaga ma sa ou taitai malaga ai, o le Ofisa Sili o Pulega ma sui o le Kamupani Vaa ma sui o le Private Sector na o i Niu Sila. Na manaia lava le matou feiloaiga ma importers i Niu Sila i le aveina o le talo. N fai foi fonotaga ma tagata o le Quaranteen i Niu Sila, ua manaia ua solosolo lelei nei feutagaiga a o lea lava e ave le faamuamua i le aufaipisinisi i leni taimi. O le mea lava lea e fai mai ai le au ave talo i fafo e le manao e faasu le talo a o le a taumafai i le vaega i Niu Sila pe le manaia le clear atu iinei o containers i meatau quaranteen na ona avatu lava ma ave loa i fafo ae fai mai foi latou e fai sina faigata, e le gata o le a le fair mo isi atunuu aua e fai foi si faigata leaga e i ai taimi nei te i ua i ai ni mea e osofaia ai containers i le vaa ma mea faapea ae avatu i o te i ua...Ia o lea lava e fai feutagaiga nei te i ua tou faapea mai ai o nofonofu le Matagaluega, ae e leai e tau sao atu o lo o taumafai ma le malosi le Matagaluega i lea tulaga. Ao lea foi e i ai le isi o le au exporters uma ia te au, tagata o lea e avea le talo.

FOFOGA FETALAI: Malie lau Afioga i le Minisita sei tuu atu le avanoa i le faauilavea. Tulai mai le sui usufono mo Faasaleleaga Nu 2.

Susuga Papalii Lio Faavaivaiomanu Taeu Masipau: Faafetai i lau Afioga i le Minisita mo le faamalamalamaina o lenei mataupu. E talitonu foi o lou nei foi sui usufono sa laga le mataupu lea, sa taua foi le suafa o le tama matua ia Tuiloma aua sa lauga ai foi i le Fonotaga talu ai. O le taua o tulaga ia o le tatou fuafuaga e pei o le mea sa faatu i aso ia BMD, ao lea e maua atu o lea lava e tologo atu le aufaipisinisi ina ia tuu mai pea le mea lea ia latou. E talitonu lou nei sui usufono o le a lafo atu pea i lau Afioga, faafetai o lea e le o moenai le tofa ma le silasila a lau Afioga ma le Matagaluega. Pau lava le matou tatalo sei silasila pea i le tulaga lea i le itu i te i ua matele mai le aufaipisinisi ina ia maua ai so latou manuia ae faaletonu ai le aufaifaatoaga lautele. Ae o le a lafo atu pea i lau Afioga ma le Matagaluega o lena e iina le tofa mamao ma le silasila, o le agaga lava ia, ia aua nei paulia nai o tatou tagata aemaise lava le talo, o le talo i le tatou atunuu ua matua tele ma ua ola gofie foi i soo se mea ma ou te iloa ua tele foi aiga ua tua i ai. Ae faafetai o lea e maitau atu o lea foi e faatauaina e lau Afioga ma le Matagaluega. O le matou lena fautuaga e tuitui atu pea i lau Afioga ma le Matagaluega.

FOFOGA FETALAI: Faafetai tele lava. Tulai mai lau Afioga i le Minisita.

Afioga Hon LE MAMEA ROPATI: O le agaga lena, e le o nofonofu loa le tatou Matagaluega i te i ua outou faapea mai aemaise le aufaifaatoaga ai e le o manatu atu le Matagaluega i le tulaga lea, ae o lo o taumafai lava, e ui lava ina leai se tupe o lo o faatagaina mai i le tatou paketi e faapitoa mo le mea lea. Ae ua ave le faatonuga i le Matagaluega ia faaoga ifo pea savings i totonu i le vaega lea a matou o le crops, e faagaoioi ai le mea lea o le aveina o le talo i fafo. Sa taumafai foi lava ae ua utiuti foi seleni a le Matagaluega ao lea lava e fai, o lea e taumafai e fai. Sa laga foi se isi faiga e liliu i ai le talo, o lea ua ok mai le ave o le tatou talo e frozen, o le mea la e lelei ai pe a faa frozen le talo, e le go through by security, quarantine, na ona lelei lava ona faaaisa tuu i le container ma ave loa, ua ok mai Ausetalia ua ok mai foi ia Niusila. Mo le agai atu i luma e mafai foi ona tatou agai atu i le maketi ia Saina pe a ave frozen aua e umi ona last le talo. E le o nofonofu foi i lea itu, e faapea foi i chips lea e le o taua le kamupani lea mai Ausetalia lea e faapaaga ai ma nisi o nai o tatou tagata i o, o lea ua i inei le latou Ofisa a o lo o faagaoioi pea nai a latou final chats mo a latou masini a o lea ua setup le latou ofisa i inei. So se i tatou faatalitali pea po o le a le tulaga o le a i ai, a oo atu ai i le taimi lena ua faamanuiaina foi tatou i lea tulaga.

Na ona ou toe touch laitiiti lava i sina taimi i le tatou SACEP, ou te faasao atu i a outou saunoaga lea e faapea mai ua tuai tele. E oo foi i le Palemia ma matou ua fono soo ai i lea mea ua tuai tele ona pay out le mea lea. O lea e i inei le team a le World Bank ae pei ona ou fai atu i le Fono o le Aso Lua o finauga tetele na fai i le fono o le Aso Gafua ma le vaega lea a le World Bank, e le gata i le pay out o mea lava nei o uta povi. O le agaga o le World Bank po o le latou tupe lea na aumai fuafua o povi ia e fia aumai mo le head o le Matagaluega e breed ai povi ona faatoa tufatufa loa lea. Ona matou fai atu lea e leiloa po o le fia o tausaga e matutua ai povi ma tufa a o lea e manaomia nei e le aufai povi se uta povi. Ua matou galulue ma sue e matou le tagata o lo o i fafo na te mafai ona faagaoioia lea mea a o lea ua maua i le

vaiaso lenei ma o le a amata ona faafesootai. Afai o i le Ofisa Sili o Pulega o le Matagaluega o Tupe, alofa ma fesoasoani aua o le polokalame lea ne i outou faapea mai na o le Agriculture, leai o matou e executing pe faatinoina ae aafia ai foi ma le Matagaluega o Tupe ma le vaega o le SPEC atoa foi ma le Development Bank a tatou. Ina ne i outou faapea na o le Matagaluega o Faatoaga ae a na faapea na o matou ua leva ona fai nisi faiga aemaise o le malosi tele o aiaiga ua uma ona fai ma le World Bank. O lea lava e taumafai ma ua ou vaai atu lava e pei o le a tatala mai sina vaegatupe ae talosia, ae leaga o lea ua tatou fonu ma ua leai se taimi matou te toe feiloai ai, masalo o le amataga o le vaiaso fou o le a toe finalize ai ae talosia ia toe maua mai se tupe. Ua uma foi ona fai atu i ai o lea ua maua le faasaoina mai o le isi tupe mai le tupe lea na tuu e ave e renovate ai le headquarter o le Livestock o lo o i Avele aua ua aveese a o lea ua fai le fale fou i tua o Vaea ae masalo po o le faaiuga o le masina fou ua tatou o atu i uta e silasila i ai ma umusa la tatou fale fou na faatupe mai e Saina. Ae talosia ina ne i tei ua outou pea mai ai lava na o le nofonofo e leai, e fai lava sina faigata e pei ona silafia e le Matagaluega o Tupe aiaiga uma ma le World Bank.

O le tulaga lenei ma ua amata ona faagaoioi tagata nei ua uma ona faamauiina i le polokalame lea a le SACEP ma ua faagaoioi le totogiina atu o le ponesi. O le tulaga la lea ua i ai nei le polokalame lea, o lea ua faataatia atu le faagaoioiga ina ia vave loa ona totogi atu. E tusa e.....

FOFOGA FETALAI: Malie lau Afioga i le Minisita se i tuu atu le avanoa i le sui usufono mamalu mo Siumu, tulai mai.

Tofa Hon Tuuu Anasii Leota: Lau Afioga i le Fofoga Fetalai, e le fia faalavelave i le saunoaga a le Afioga i le Minisita, ae na pau lava lau talosaga, pe finagalo malie e toe faaulu a ma talosaga ma le Taitai o le Itu Agai lea na ave i tua. Ma lou faaaloalo.

FOFOGA FETALAI: Ia, tuu atu muamua le avanoa i le Afioga i le Taitai o le Itu Agai ona tuu atu ai lea i le sui usufono mo Faleata Sasae.

Afioga Hon Palusalue Faapo II: Lau Afioga i le Fofoga Fetalai, leai leaga o lea ua taua lou igoa. O au ou te le i alu e fai sau talosaga, na ou alu e mataitu le mea ua faaletonu ua tuai ai ona tufa le tupe, ma o atu loa i o faaulu ai le talosaga a le uso faipule mo Siumu, ioe. A o lea la ua e saunoa maioio, faamalo faafetai ae faaulu na o Siumu, a o au, tuu le avanoa i le afaifaatoaga. Ma lou faaaloalo lava.

FOFOGA FETALAI: Malie lau Afioga i le Minisita se i tulai mai le sui usufono mamalu mo Faleata Sasae.

Tofa Aveau Tuala Lepale Niko Palamo: Lau Afioga i le Fofoga Fetalai, faafetai lava i lau Afioga, faafetai foi i lau Afioga i le Minisita mo le faamalalamalama o lenei mataupu. E pei sa tele foi nai fesili sa tuuina atu i ai, faafetai o lea ua malamalama foi le sui usufono o lenei e le o nofonofo aemaise lava lau Afioga. Malo le finau. O lea foi e ala ona avatu manatu, ona o le lagolago foi i nisi o le tatou atunuu o lo o taumafai, a o lea ua iloa atu nei,

malo. Na pau lava le mea, tautuana ma outou e finafinai pea ina ia maua ai se manuia o le tatou atunuu i lena vaega, ae faafetai.

FOFOGA FETALAI: Tulai mai le sui usufono mo Siumu.

Tofa Hon Tuuu Anasii Leota: Lau Afioga i le Fofoga Fetalai, o lea la ua manino le saunoaga a le Taitai o le Itu Agai, o lea la ua ou talitonu e sao le Palemia, e pepelo le Taitai o le Itu Agai.

Afioga Hon LE MAMEA ROPATI: Se aua le toe faaitaina le tamaloa i te i foi ua toe pa mai. Malo faafetai o la e open le mea. O le aofai o tagata ua aumai a latou talosaga e oo mai i le taimi lena, e \$1,875. O lea la ua maea ona process le isi vaega lea sa saunoa i ai le Fofoga Fetalai lea sa tatou i le launch ina i le amataga foi lea sa fai i le amataga o le tausaga nei, o la e ua amata ona faagaioi le polokalame. O le isi 53 lea ua uma ona approve o le a faagaioi, e 37 Upolu ae 16 Savaii. O le isi 46 lea ua uma ona saini a latou agreement, ma o le total la o le vaega lea ua fai le second intake, o lea ua process nei a latou assessment e 529. A o le isi afe lea e totoe, o lea e faagasolo atu lava i ai le tatou Matagaluega. A o la e mafai lava ona fai applications pe a i ai se isi e manao i ai. Aua foi leaga o le mea, e le faapea o nei numera uma o le a talia. A alu atu lava le asiasiga a le Komiti ae faaletonu, e mafai lava ona avatu i ai le fautuaga, toe taumafai mai ae mafai lava ona o atu le isi vaega fou foi lea i totonu. O le tulaga lena. O le fuafuaga, ua uma ona fai atu i ai i le Matagaluega ma le Komiti, ta fia ola ta maasiasi ae te i ua toe faafoi se vaega o le tupe lena, le grant. O le luma pe a te i ua toe faafoi. O le mea lava lena o lea e uunai i le vaega a le World Bank lea e aumai, faamolemole ia tau ease mai a latou... ia taumafai... o le upu lava lea ou te uunaia i ai, ina ia outou flexible i a outou mea ia e fai nei, e ese lava le faa-Samoa ese foi le faapapalagi. E feoloolo lava si tama uliuli la e taitai mai ai mai Aferika, a o le au papae la e omai ai, o le matua faigata lava. Anyway, o lea o le a taumafai malosi lava ina ia uunai le tatou mea lea. Ae tapuai maia talosia ia alu alu...

Tofa Aveau Tuala Lepale Niko Palamo: Lau Afioga i le Fofoga Fetalai, toe tasi lava si mea lea faamolemole.

FOFOGA FETALAI: Se i avatu le avanoa lea i le sui usufono mamalu mo Faleata Sasae. Malie lau Afioga i le Minisita, se i tulai mai le sui usufono mo Faleata Sasae.

Tofa Aveau Tuala Lepale Niko Palamo: Lau Afioga i le Fofoga Fetalai, ou te faafetai i le Afioga i le Minisita. E tasi lava lau fautuaga lea lau Afioga i le Minisita ma le mamalu o le Matagaluega, ona o le seleni lea o le Evans, e le mafai ona ave se seleni e ave na o mea o goods foi nei. Ae i te i ua sese lou manatu, ae afai o le faiga lea o lo o i ai, ou te tatalo atu, pei ona silafia ua lua nei tausaga talu ona maea le Evans. O le tele o isi faifaatoaga ua uma ona fai pa, ua uma ona.... Pe mafai ona toe liuliu le tofa ae aumai nai vaega ia ua uma ona faatino ae ave sao i ai le seleni i nai tagata faifaatoaga. Ma le faaaloalo lava.

Afioga Hon LE MAMEA ROPATI: Ua fai lava si ou vavevave mai o lea tatou te i le SACEP e le i oo atu i le mea lea, a o lea la o le a fai atu loa se upu i le mea lea o le cyclone recovery programme lea a tatou o le Evans a. E leai, o le isi lava mea na faatuai ai le mea lenei, manatua foi, e le faapea na approve loa le mea ona faapea loa lea e avatu i le Matagaluega o latou lea o le a... e matua toe sue uma mai lava tagata fou. E ese lava le staff a le SACEP, ese le staff a le cyclone Evans, faasalalau atu omai e le talia toe faasalalau atu. O le umi ia o tau sue le staff, aua e toatele tagata, e fai o le asiasiga o mea, a o tagata e faamaumauina fuainumera ma mea faapea. E tasi lenei mea na tau umi ai, anyway, o lea ua on board uma mea, ua tataua lava la ona amata ona migoi nei.

O le mea lea o le cyclone recovery programme lea, tusa o le aofai o tagata ia na apply mai, registrations ia ua i ai, e 7,500 le aofai o le vaega lea e tau mai ia Iuni o le masina lenei. Ua uma foi ona faagaioi le faatinoina o latou mea. O le mea la e manao ai le World Bank, e faaoga le mea lea e tau o le e-voucher system. Ia e leai se tatou mea faapenei i Samoa, e matua sue atoa mai lava le mea, aua e leai se isi e iloa pe tomai i lea mea. A o vouchers la ia, e le o ni tupe, a o mea e procure mai ai mea faufale ma mea e faaleleia ai faatoaga. E uma foi ave faasalalau i kamupani e bid mai po o ai e taugofie. O lea la ua i ai le kamupani a le Bluebird Lumber, o le SMI, ACE, Samoa Builders, o le matou Agriculture Store, Health Pacific, o le Strickland Limited, Seb & Rene. Ia o kamupani na o lea la ua earmark loa i ai e alu atu lava le faifaatoaga tuu atu i ai lana voucher lea o le a fai. A outou tagai i ai, o le matua faigata lava o le mea. Ae pei ona ou fai atu, e leai se system faapea a Samoa o i ai, ae matua toe fai atoa lava le mea lea. So, o lea la ua amata ona migoi, ae oo mai loa la i le faafesili a le sui usufono mo Faleata Sasae pe mafai ona faaliutupe, o le mea lenei o lea e uunai nei, aua ua leva ona uma le afa. O isi tagata la e ua o faalelei i a latou tupe ma fai ai loans. Pe le mafai ona faaliutupe nei mea ae o tagata e togitogi ai pe na fai ai ni loans pe a. Ia o finauga foi ma pulu foi nei, e muliga le pulu foi lea vaeatu le paia o le Maota i le mea lea e fai nei i lea mea, ae tasi lenei mea o lea e finau ai nei. O le mea sili o lea ua faagaioi, ae onosai lava. Ta te alofa atu lava i le aufaifaatoaga. Ma ou fai atu i le matou Vaega, ta fia ola e, faafetai lava i le amataga o lenei tausaga e leai se afa. Ta ma e pe ana te i ua i ai se afa ae o lea lava e le i tufaina atu le tupe o le isi afa. Ia o upu uma lava nei o lea e lafo i si a matou Matagaluega, ae ai a oti e faitai ia te au. Anyway, ia o mea na o lea e taumafai nei. Atonu lava e le o toe mamao.

Ona tatou omai loa lea i le isi mea lea e tasi, se o lea ua uma ona saunoa le Afioga i le Palemia i le kamupani lea o le Bumble B lea e sau nei, ia talosia ia aua ua leva foi ona feagai tatou ma ia kamupani Amerika ia e i Tutuila fai mai o le a omai omai omai, ae o lea foi o le a omai le kamupani lea a le Bumble B, ia talosia ia ia moni a latou faamatalaga ia ua fai mai ina ia maua ai galuega a nai o tatou tagata. Ae se i ou toe foi tasi mai lava i le mea lea na ou fai atu ai i le amataga i le ia lenei a tatou. Ua uma ona ou fai i le tatou au fagogota e le o... e tele le ia la e i fafo, e le gafatia e tatou i le taimi lenei le lau mai o le ia. A on nei le mea lea a le Bumble B, e le lava ia. E pei lava o mea ia so o se kamupani foi lele e manao ia sustain le supply. O le taimi la lenei na ona ou faaataata atu, o lea ua i ai foi le isi kamupani ua tuu mai foi le latou tauau, o nei lava i le aso na faamaea ai talanoaga. Masalo se i ave le Lipoti i le Kapeneta, ona fai loa lea o fuafuaga mautu. A mautu lenei, ou te

iloa tasi lenei mea e matua push ai lava i luga le tatou export. Aua o le ia ia, o le matua tele lava o le ia la e i fafo, ae pei ona ou fai atu i le amataga o lau tautalaga, e faafuafua le mafauafau pe a toe go back i le history o mea nei o faigafaiva i le Pasefika, o Samoa sa i luga i i, ae omai lava Solomona, Vanuatu ma isi atunuu ia take over, o la e ua fai o latou fale ia a o lenei lava tatou te faapenei lava i i. So o le mea lea e taumafai nei, atonu foi e i ai nisi o le a le malilie, ae o le mea lea e vaavaai i ai, o le benefit o le atunuu atoa mo le tagata e toatasi, ae ia benefit le atunuu atoa ia tele ni galuega, ia tele ni mea e faalelei ai tatou export. Na ona ou faapena atu ae se i mautu ona outou faafofoga lea i ai ne i te i ua fai atu se faamatalaga ae le i oo i le taimi e faatino ai. O lau tulai atu lea ma lou faaaloalo, ae momoli atu lau faafetai tele lava....

FOFOGA FETALAI: Malie lava lau Afioga i le Minisita toe tasi lava le sui usufono lea e tulai mai. Tulai mai le sui usufono mo Faasaleleaga Nu.2.

Susuga Papalii Lio Faavaivaiomanu Taeu Masipau: Faafetai lava i lau Afioga i le Minisita o le mea sili lava o lea ua e toe oo i le fale ia, se i e alofa ane i le ta fale ia fou lena ona avatu loa lea i Savaii faamolemole lava. Faafetai. Malo lava le finau.

Afioga Hon LE MAMEA ROPATI: O le kamupani lea e talanoa atu ai nei, na matou o atu i Asau faatilitilo i le uafu la e i ai, e ese le manaia o le tatou uafu lena. A o le popolega lea e i ai, o mea e service ai le kamupani, o le power o le vai ma mea na, e taua, ma le afe gofie foi lele mo vaa ma mea faapena. So, taatia mai, taatia mai, a o le mea lea e taumafai, o le mea aupito sili ona.... Aua e faalagolago foi tatou i le kamupani po o fea tonu le mea lea e mananao i ai, aua o la e foi ua uma ona lisi le latou space i tai i le SPA mo le fuafuaga lea. Se i talosia ia tatou tatalo ia faataunuu nei mea i le manuia.

Ia, o si au agiagi atu lena i lenei itula o le afiafi, a faapea e i ai se mea ua galo ia te au, e i ai foi le isi taimi tatou te toe feiloai ai. Ae momoli atu le faafetai tele lava i a outou Afioga, aua ne i tou pea mai ai o toatamai pe ita se isi, e leai. E aoga lava le fautua mai, talia ma fautuaga, e aoga foi le tuu uma mai o outou tauau, aua o la e faapea lava le tagata na o ia e poto i le lalolagi lenei, ae le iloa e sili atu le malamalama o le isi le la e aoga i le faasoai mai ma tufatufa mai.

Lau Afioga i le Fofoga Fetalai, e momoli atu le faafetai tele i lau Afioga aua le faatoatoaina o le tatou Fono. Ia tatou lavapapale pea ma maua le onosai. A tau oso ifo le ita ona nofonofo lemu lava lea i lalo ma punou i lalo, tatalo lemu i le Alii e fesoasoani mai i ou vaivaiga ia e i ai. Ae fautua atu i le au itaita gofie lena e i lena Itu, ia onosai, onosai, sa ta i ai foi ita i ina, ia e faapena lava le mea. Ae onosai, ia tatou onosai, ae faamanuia mai le Atua i le tapuaiga a lo tatou atunuu. Ia alofagia foi nai CEOs o Matagaluega ma Faalapotopotoga a le Malo o lo o tatou faifaimea faatasi, malo lava le onosai. Ua tuua foi o outou aiga ma fanau ae ua tatou galulue faatasi ina ia pasia le tatou Tala o le Tupe i lenei afiafi. Faafetai i le Matagaluega mo taumafataga ma tulaga uma faapena. Ia faamanuia le Atua i le tapuaiga a le tatou atunuu, ia manuia foi le matou Matagaluega. E faamalulu atu foi i le Komiti o le Tupe i lo outou faitai i le matou Matagaluega. E pei lava ona ou fai atu, e le atoatoa

uma. A i ai ni o matou sese ia faamagalō mai, e faamalulu atu ai. Ia manuia le Fono. Faafetai.

FOFOGA FETALAI: Malo, faafetai saunoa i le tama matua ia Le Mamea, ia o lea lava ua talatala ma le la lou finagalo e limataitaiina ai taualumaga o tuleiga ma saunoaga sa saunoa atu ai sui usufono mamalu, e le mafai ona tuua leaga e faigata o oe lava o le poutu ma le ivitu o le tatou tamaoiga o faatoaga ma faigafaiva. Ia o le itu taua o lea e faafofoga le atunuu, o lena foi e faafofoga le toatele o le tatou aufaifaatoaga, ia mapu ane laia ma lava le onosai ma mau le toovae ma mau iumaea, e le o malolo le tatou Matagaluega ma le Malo i le taumafaiga o atinae ma mea uma, o le a foi le taulagalaga o le Itu Agai, e aoga, e faamalulu atu le Minisita, o le a foi se taumafai atu o le Itu Agai, ia e faapena lava tulaga o faamoemoega e taumafai atu e momoli atu le sao taua ina ia fesoasoani i lau pitolaau, leaga o le tatou talo ua take over i Fiti, o lena o lo o outou silafia, e toto lava le maumaga i Fiti ae ua i ai le faleoloa i Niu Sila e faatau ai, ae tatou onosai, e sefululima tausaga talu ona tatou o ese mai le maketi, o lona uiga e tatau ona tatou mautinoa e aua ne i toe i ai se mea e faaetonu, e le naunau ia ave, ae ia ave le talo lelei.

Ua tatou taunuu mai i le Afioga i le Minisita mo Tina ma Tamaitai, Atinae o Nuu ma Afioga ma Agafesootai, o lo o e laei i lau faasolo spider i lenei afiafi, ia tulai maia lau Afioga i le Minisita po o lau Afioga i le alii Tiakono Toeaina.

Tofa Hon TOLOFUAIVALELEI FALEMŌE LEIATAUA: Ia faafetai i lau Afioga i le Fofoga Fetalai mo le avanoa e tusa foi ma lenei afiafi ma le faasolosologasue o le tatou galuega e ala i tali a le Malo e ala i Afioga i Minisita, ae o le a ee pea i vaatapu lau Afioga faapea foi le paia o lenei Maota, le afio atu o le Afioga i le Taitai o le Malo ma le Kapeneta, o lena foi e afio mai lena tala na atoa, le Afioga i le Taitai o le Itu Agai e faapea foi sui usufono mamalu, o lea foi o lo o tapuaia pea faiva o le Kapeneta i Afioga i sui Minisita o le Malo, aemaise foi o le faafogafoga tapuai mai o le paia o le atunuu e ala i faaluuluga o Matagaluega ma i latou foi o lo o lipotia ma faamaumauina ia Taualumaga o le Palemene, le susuga i le Failautusi ma le Tamaitai Sui Failautusi o le tatou Maota nei, faapea foi le galuega fai a le au faasalalau aua le alo o le mafua i le tapuaiga mau ma le faasauga a le atunuu a o faagasolo galuega a le tatou Palemene.

E le tau oo so matou leo ua alu foi lenei aso o taulagi sa ma paia o le atunuu mai i ona ao se i oo i ona iu, ia o paia foi faale-Malo aemaise foi o galuega a i latou ua lautogia e tapuaia o tatou faiva e ala i le galuega a le Atua i le Aufaigaluega galulue i Taitai o Ekalesia e fia ia ma le mamalu o le Aufaigaluega paia a le Atua i fata faitaulaga taitasi o le tatou atunuu nei. Ia e tanoa foi i le tapuaiga i le paia ia te oe Aiga ma la outou tapuaiga, e faapea foi ia le mamalu i le Usoga a Tumua ma Pule ma Faleupolu o Tofiga o Tulatoa foi o Aiga ma le paia o Samoa i ona tulaga faalupeina.

Ae tulai ma le agaga faaaloalo e fai foi ma sui o le tatou Malo e ala i le Matagaluega e pei ona lausilafia foi o lo o avea ai au ma taitai, ia le Matagaluega o Tina ma Tamaitai o pulega faalotoifale e ala i le atinae o nuu ma afioaga, e faapea foi Agafesootai e aofai ai tupulaga talavou, o le mamalu foi o le atunuu o lo o soifua ma manaoga faapitoa e le atoatoa le malosi o le tino, e faapea foi le mafaufau. Ia o le paia foi lea i le Matagaluega po o le

Ofisa o le Komesina o Sulufaiga e faapea foi le vaega fou o le Lala o i lalo foi o le taitaiga o le Komesina o Sulufaiga i le vaega o aiatatau a le atunuu, e faapea foi ia sailiiliga ma suesuega faapitoa e aafia ai ia malu o le Malo pe a oo ina tuuaia foi ni tofi foi ma tulaga o a latou galuega fai.

Ia se i taoto foi ia Komiti o lo o aafia i lalo o le matou puleaga, pei o le Komiti o le Faleula ae faapea foi Komiti o sui o nuu ma sui tamaitai o nuu, ia o Komiti lava ia o pulenuu o le tatou atunuu i afioaga ma alaalfaga, e faapea foi le Komiti o le Ie Samoa lea o lo o lagolago ai le Afioga i le Palemia, pei foi ona aafia ai nisi o finagalo faaalua i lenei felafolafoaiga, e le gata i lena o le Komiti Faufautua mo mataupu tau Tina ma Tamaitai, ia o Atinae foi o Nuu ma Agafesootai.

E pei o le matau i saunoaga a sui usufono mamalu, e le i aafia tele ia le Matagaluega o lo o feagai ma au ma le Ofisa foi o le Komesina o Sulufaiga i ni finagalo faaalua, o lona uiga, o i e atagia ai o lo o lelei lava le tauaveina o le tiute fai ma galuega, o lo o atoatoa pea le faataunuuina o tiute ma faiva ma le auunaga i le atunuu, atonu o le ala foi lena e le i afea ai e le toatele o sui usufono, e i ai nai sui usufono na sau i le va i o latou finagalo ia le tautua foi a lenei vaega o le Lala o le atunuu o lo o i lalo o le matou Matagaluega, ia peitai na o le agaga faafetai sa faapena ona faailoa mai pei o le sui usufono lea o Salega ua le vaai atu ai i lenei afaifi sa ou alu lava e tausaili ia lona finagalo na faaalua i le vaega lea o le fua foi lea faatatau po o le fua e tatau ona faaoga i le fua a le Malo i le Ie Samoa po o le Ie o le Malo, pei ona faatulaga i Tulafono Faatonutonu o lo o limataitaiina ai lea vaega o galuega a lo tatou Malo.

Ae mo le silafia pei ona ou faailoa atu tulaga o tupe foi sa tapa mai e le sui usufono mamalu, ona o le tulaga lava o le manao ina ia atoatoa la outou faafofoga ma le silafia, ia o lena sa ou faailoa atu ai ia meaalofo a le Malo ia i latou e feagai ma le lalagaina o ie i tosi eseese, le tosi tasi, tosi lua ma le tosi tolu, o lena e \$1,000 ma le \$700 ma le \$500, ae ese ai mai lena mo le tagata lava ia po o le tamaitai po o le tina e toatasi i lana ie sa feagai ma ia i lona see e lalaga, ia e sa i ai foi meaalofo sa tuuina atu i fale lalaga taitasi, fale lalaga e maitauina le tele o ie e latou te faafeagai ma i latou po o le tulaga foi o le gaosiaina o le siapo Samoa, ia o tulaga uma na, sa ave uma i ai le matua lagolago o le tatou Malo ina ia uunaia ai pea le agaga ma le faamoemoe o tiute faa-Tina i totonu o afioaga e ala i fale lalaga, ia o lea sa ave i ai le tai \$2000 faasolo ifo ai lava lea i le fale lalaga e tasi le ie, ioe, e tiga ona toatele ae tasi lava le ie o la e lesitala ai lena fale lalaga. Ma lona lua, ia sa fai foi ia meaalofo mo i latou foi sa feagai ma le gaosiaina o le siapo, siapo Samoa e le o se siapo foi lea o lo o atagia ni mamanu faa-Toga, a o mamanu lava ma elei faa-Samoa. O le mea la lea le paia foi o le tatou Maota nei ma le atunuu, ia o lena ua uma ona faailoa atu lea vaega e le i lalo ifo o le \$200,000 na faaluina ai, ona o le nei itu, o le agaga faamaoni o le Malo ina ia maua pea le galulue faatasi o le au matuauu ma le au seepapa ma le afioaga e ala i galuega faa-Tina i fale lalaga, i le tulaga i le toe lagaina o le tatou Ie Samoa, o le Ie o le Malo ina ia maua la ia fuafuaga ia a le tatou Malo i le fua o le tosi ninii, ma le tulaga o le tapenaina i lona matagofie, e le gata i lena pei ona saunoa le Afioga i le Palemia i le faatinoina o le ula, ua i ai foi le fuafuaga a faapea e na o le lalaga lava fale lalaga ae i ai le tina e i ai lona poto masani ma lona agavaa e mafai ai ona faatino le mea lea o le ula i le lautele ma le lelei lea o lo o moomia, ia o sana foi lena alatupe. Pei ona outou silafia i le tausaga talu ai

sa i ai se tamaitai mai Safotulafai sa faamanuiaina i tupulaga talavou i a latou atinae, sa ia maua foi la le faamanuiaga lea o tulaga o galuega taualoa a talavou, e maua mai ai a latou seleni, a o le filifiliga lea a lea tamaitai talavou, o le lalagaina o le Ie Samoa, ae pei foi ona silafia i lenei aso ia sa faatinoina ai foi ia lea lava fuafuaga a le tatou Malo e ala i le Matagaluega, i le amanaia o talavou o le atunuu, pei o tane ma tamaitai ia ma tulaga foi o latou agavaa ma tomai ua faapena ona feagai ma i latou. O lea la sa faatinoina ai foi ia le tauaaoina o faailoga tupe ma isi lava faamanuiaga pei o telefoni feaveai, ona o le lagolago foi a le kamupani a le Digicel i lea foi vaega o atinae i totonu o le tatou atunuu e ala i faiva o le Matagaluega.

O le fua la lea mo le silafia ne i te i faapea ua le oo i ai le sailiga, o le aga e tasi, e leaga o lea sa fesiligia le metrix system a tatou, e 17.8 centimeter o le aga lena e tasi, e tusa lena ma le 8inisi, ia o le aga lena e tasi aua e eseese lava aga e fua e loomatutua i vae, a o lea na saunoa foi le Afioga i le Palemia pei e faaoga ia lima foi na e faaoga e saili ai le aga e tasi, ia e eseese uma lava, a o lea la ua fua loa i le tulaga lena, o le 8inisi tusa o le aga lena e tasi, 17.8centimetre, i le tulaga faa-metric e pei ona fesiligia e le sui usufono mamalu mai Salega, ae o le lautele ma le umi o le ie, ia o le 9 ia aga le lautele ae 12 aga le umi. E tele lava nisi ie foi ua maitauina, e fai sina lapopoa atu ma tetele i le fua a le tatou Malo, a o le fua lava lea e amanaia e le Komiti ma lana galuega fai e tusa ona tapenaina ai foi ia le faamoemoe o le tatou Malo i lea tausaga ma lea tausaga, ia o lea ua ou faailoa atu i lenei afiafi. O le tosi tasi a tatou vaavaai i ai e le o se tosi faigofie, o le toatele lava o le tosi lua ma le tosi tolu, a o le tosi tasi, a faasolo lou lima i le lauao o le tausala foi lea, e faapena uma lava, e faapena uma lava le lautele, e tau le iloa e ou fofoga pe a, ae a oo foi la ina maea ona uma ona lalaga le ie i le tosi a lea tasi, ae faasolo lou lima pe a uu le tino o le ie, se pei o le momosi o le tino o le taupou foi lea pe a e vaai i ai ae saasaa, e faapena le taua ma le lelei ma le manao o lea e fia manao i ai le Afioga i le Palemia ma le Komiti, ina ia maua e le tomai faaneionapo o tina ma tamaitai i le tulaga o le faatinoina o lea vaega o tatou measina. Pei o le mea la lea mo le silafia e le Maota, ae pei ona ou fai atu ia na o le Afioga i se tasi o sui usufono mo Salega, Afioga Afualo Wood Uti Salele, e ui ina e le o faatasi mai alii fomai, ia ae lelei alu ia ia e fai lona saolotoga i lenei afiafi a o lea ua ou faamatala atu i lau Afioga i le Taitai o le Itu Agai ma lena vaega.

O le vaega lea na saunoa i ai le sui usufono mo Faleata, o le Samoa Victim Support ua uma ona ou talanoa i ai, e le mafai ona ou toe tautala i se mea e le i saunoa i ai le Afioga i le sui usufono mamalu, ia o le a ou nofo i lalo, se i fai po o le a le finagalo o le.....

FOFOGA FETALAI: Ia faafetai le faaaloalo. Tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai faamolemole. E faamalie atu i lau Afioga ona o lea e saunoa le Afioga i le Minisita e amata faamamalu ie ia i le tausaga nei ea, ia a o lea e saunoa manino le Afioga i le Palemia, o le mea e fuafua i le Tulafono foi lea o le Supply and Demand, ne i te i ua vave faaoga, ia a o lea e tuai le lalaga a nai loomatutua, pe mafai ona tolotolo foi lea a maua lava nai mea faaoga, a i ai se....e aoga, e manaia le polokalame, ae pei o le mea lena e popole ai o lenei

taimi, atonu e le i lava le supply ia a o le tau foi la o le mea o la e i luga, ma le faaaloalo lava.

Tofa Hon TOLOFUAIVALELEI FALEMOE LEIATAUA: Lau Afioga i le Fofoga Fetalai.....

FOFOGA FETALAI: Saunoa.

Afioga Hon Palusalue Faapo II: Lau Afioga i le Fofoga Fetalai e faasaoina le taimi o le Afioga i le Minisita.

FOFOGA FETALAI: Ia se i tuu atu, sa e lauga i le mataupu lea?

Afioga Hon Palusalue Faapo II: Leai.....

Tofa Hon TOLOFUAIVALELEI FALEMOE LEIATAUA: O le soli Fono o le Taitai o le Itu Agai.

Afioga Hon Palusalue Faapo II: Leai, na ona faasilasila e leai ua le lava le malosi o le sui usufono mamalu.....

Tofa Hon TOLOFUAIVALELEI FALEMOE LEIATAUA: Ia e le afaina, tuu atu ia le avanoa i le toeaina ua tau.....

Afioga Hon Palusalue Faapo II: O le ala lea ua le afio atu iinei le sui usufono mo Salega. Ae pau le mea lea ou te faafesili atu ai i lau faamalamalamaga foi lele o le taupou e momosi, a, pei le ninii o le tosi o le lauao o le taupou, a? aua o le ie e alu faapea, a o le tino o le taupou, a? ou te le iloa la pe faapefea ona fua i ai a outou fua a le Afioga i le Palemia ma lau Afioga, fua le ie i le tino momosi o le taupou. O le mea lea po o fea e fua i ai, pe fua i le latou fua, pe fua i le momosi o le taupou ma lona lauao?

Tofa Hon TOLOFUAIVALELEI FALEMOE LEIATAUA: Lau Afioga i le Fofoga Fetalai, se e ala ona tali atu i ai i le saunoaga a le Taitai o le Itu Agai o le avafatafata ma le tulaga o le vafealoaloai, aua o au e faamaua luga tele i le Aiga Satunumafono. Aua o le mea lea....silasila i ai i le saunoaga a le Afioga i le Palemia analeila, o le ie lea a taoto mai, e selu ai le ao o le tamaitai. E le sese, aua e maua ai le ata, e maua ai le ata i ie ia ua taumafai i ai le Palemia ma au nei. E pei ona saunoa le sui usufono mo Salega, ua matua see atu le malosi o le tina e ona ie ia ia te ia na te faatauina, a o se atinae mo le silafia e le Taitai o le Itu Agai, e ese le tamaoiaiga ai o tina ma tamaitai. Ia, se i....

FOFOGA FETALAI: Se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, se i fai sina malologa a le Afioga i le Minisita. O lea lava ou te vaai atu pei o la e pupula faalii le Taitai o le Itu Agai ona o lea e fia maua le ituaiga momosi lea sa e avatua. O lea la o le a ou faamatala atu. O le mea o le taupou Samoa i le mea o le momosi, a

savali mai le tamaitai, e matua tinoao. O lea la ou te talanoa atu i le tinoao o le tamatai Samoa, ou te le o talanoa atu i le tamaitai e savali mai e tinovale, lea la e fua i ai lau vaai. O le tinovale lena e te vaai i ai, a o le tinoao ma le tino momosi lea e fua i ai a tatou ietoga. Ia o le tali lena.

Afioga Hon Palusalua Faapo II: Lau Afioga i le Fofoga Fetalai ma lou faaaloalo, e matua sese lava le faamatalaga a le Afioga i le Palemia. E leai lava sou... ona o le saunoaga a le Afioga i le Minisita. E fua i le... e faapea lava le faatusa, e le lapoa. E fua, ona alu lea faapea o ona lima i luga, e fua i le momosi. A o lea ua matua esese mamao ma le faamatalaga a le Afioga i le Palemia.

FOFOGA FETALAI: Ia, ne i tulituliaupu le tatou taimi Palu, e le taua le momosi, e taua le manaia ma le matagofie o le ie. O le momosi la e saunoa i ai le Afioga i le Minisita, o le matagofie.

Tulai mai lau Afioga i le Minisita e saunoa.

Tofa Hon TOLOFUAIVALELEI FALEMOE LEIATAUA: Faafetai i lau Afioga i le Fofoga Fetalai. O le mea lea e foliga mai e le o lava le silafia e le Taitai o le Itu Agai o le gagana foi lea faalilolilo, po o le gagana foi lea e le alu tonu ae tuu i le isi na te mate maia po o le figurative nature of speech. O la e alu oe i le literal side foi lea, ae le o lena, ae na ona faapea o ou lima, ae manatua oe, o le ietoga a tala e taoto faapea pei o lau tala lea na fai atu. Ae ia manatua foi la, o le pese a Alapati ma Malia foi lea, a e siva mai oe le taupou, e tai pei o uaea o le telefoni lau saasaa. E faapena la le ituaiga mea lea e i ai le ie Samoa, ioe. A asu loa, ona e vaai lea i ai e pei lava ua aa le vae o le tausala foi lele pe a oo ina saasaa. Le paia e o le Maota, o le tulaga lena i le vala lea na saunoa i ai se tasi o sui usufono mo Salega, Afioga Afualo Wood Utu Salele.

O le itu lea na laga e le Afioga i le Sui Fofoga Fetalai i lo latou vaitaumafa i le afioaga o Salailua, ou te faafetai atu. Ae pei lava ona fai atu o le faafetai na aumai e le Afioga i le Sui Fofoga Fetalai, e ui lava e le i samia le tatou vai, ae le afaina e sau lava taiala. Ou te talitonu foi o lena e i ai le tofa i lau Afioga. Ae afai foi ua faamalieina le tatou afioaga i le vai ua malosia, o tulaga na e moomoo i ai le tatou Malo, ia maua e le atunuu le vai lelei, o le vai mama, o le vai e talafeagai mo le soifua maloloina. O le ala foi lea e avatu ai lava le fautuaga i afioaga o lo o feagai ma le tulaga o ia ituaiga atinae po o Pulega o Vai Tumaoti, ina ia fai ma a latou anava le fai pea i masina taitasi ma tapa le fesoasoani a le SROS, le vaega lea faasaienitisi i a latou suesuega faapea foi le Matagaluega o le Soifua Maloloina ma le Vaega o le vai lea e tau nei o le Pulega o le Suavai, mo le sailiiliga po o mama pea ma saogalemu le suavai taumafa.

FOFOGA FETALAI: Malie lau Afioga i le Minisita se i tuu atu le avanoa i le Sui Fofoga Fetalai. Tulai mai le sui usufono mo Palauli Sisifo.

Tofa Agafili Patisela Eteuati Tolovaa: Lau Afioga i le Fofoga Fetalai, e leai se manatu e faalavelave i le saunoaga matagofie a le Minisita ona o lea e faalogologo mai le matou nuu, lau Afioga i le Fofoga Fetalai, ua uma ona sami le tatou vai. Na o atu lava lau Matagaluega ma le Vai Tumaoti tatope

toeaiina o le matou nuu ma omai uma ai lava ma mea na tapena mo lau Afioga i le Minisita ma le Matagaluega. E leaga o lea e faafogafoga mai le matou nuu, ua uma ona fai uma lava mea sa tatau ona fai. Ma le faaaloalo.

Tofa Hon TOLOFUAIVALELEI FALEMOE LEIATAUA: Ia, e leai o lape lava o lauga ae atonu o lena e te silafia a le auai lava le Minisita ma le Malo i se mea, o le le atoa foi lena o se faaaloalo faapea. Ae ui i lea, o lea ua e saunoa ua faafogafoga mai foi le tatou nuu i Salailua, ou te talitonu o lea ua e saunoa, tatou talia ia lea vaega o sou finagalo ua faaalia, ae faafetai atu foi i le amanaia o galuega a le Matagaluega faapea foi le tatou Malo mo le faatinoina o lea vaega o le auaunaga ma fesoasoani faatino aua le tulaga o le suavai taumafa i lalo o pulega maoti a afioaga ma alaalfaga.

Ona pau lea o vaega na agai i le Matagaluega i o latou finagalo faaalia, vagana foi le sui usufono mo Faleata Sisifo, e pei ona ou fai atu ua toe maua mai le faamaumauga i le Matagaluega o le tulaga lava lena e i ai, e leai se mea o tulai mai o i ai se faafogasea, ae o lo o taumafai lava i le tulaga ina ia maua le galulue faatasi o le Matagaluega ma Faalapotopotoga Tumaoti e i ai le Toomaga mo e Puapuagatia, aemaise foi le sootaga ma le vaega foi lea o le faamalu lautele o le SUNGO o lo o aafia uma ai Faalapotopotoga Tumaoti. O le mea la lea ou te talitonu o le auaunaga lava lea e tasi ma le faamoemoe ia tatou maua le galulue faatasi ma Faalapotopotoga ia faapea foi le Matagaluega.

O le itu e ui ina le i saua i se finagalo o se sui usufono le Ofisa o le Komesina o Sulufaiga ma le lala fou ua faaopoopo ina ua maea le Tulafono o Aiatatau a le tatou Atunuu ina ia ogatasi ma tulaga o le feagaiga o aiatatau a tagata soifua o le lalolagi, ou te matua faafetai i le Komiti e ana le Lipoti lea tatou te talanoa faatasi ma le Tala o le Tupe, o lea na ou vaavaai i ai o lo o latou matua lagolagoina mai Ofisa faigaluega fou ia e fa a le Matagaluega o le Ofisa o le Komesina o Sulufaiga. Ou te faafetai atu ai i le Komiti ona o lea ua latou aumai, o lea foi e faafogafoga atu le Palemia ma le Kapeneta ua uma ona matou pasiaina, peitai, o lea lava ua lafo i le Matagaluega o Tupe, o le taimi lava e finagalo ai le Komesina o Sulufaiga e faatino Ofisa ia e lua, lea sa latou fautuaina ina ia taofi i le taimi nei, ou te talitonu foi o le a silasila le Ofisa Sili o Pulega o le Matagaluega o Tupe ma le Matagaluega i le tulaga o le pule a le Kapeneta, aua e leai lava se isi pule i luga atu o le pule a le Kapeneta, a ioe loa le Kapeneta, o lona uiga o lena. Ae o lea ua aumai le fautuaga a le Komiti, faafetai tele i le latou toe faaopoopo maiga o le vaega lea ina ia maua ai pea le lototele e le Afioga i le Komesina o Sulufaiga. O le Afioga foi ia Maiava o le tagata ua matua, ua loa lana tautua i totonu o le atunuu, aemaise foi le tatou Malo. Ma ou te talitonu o le a mafai lava ona fetuunai le Komesina, e faapea foi le Matagaluega o Tupe i ana tofiga ia ua taoto i paga nei lona faataunuuna. O le mea la lea e momoli atu ai le faafetai i le Komiti o Tupe i lo latou finagalo ma e talitonu lava e tutupu lava mea uma mo mea sili pei o lea upu. E nofo lava ae mafai ona faatino i se taimi o i luma mo le faaleleia lea o le auaunaga ma le tautua foi a lea vaega o lala o le tatou Malo aua lea vaega fou, aua o le mea taua lava lea i la tatou vaai, ina ia silasila mai foi Malo Afaatasi ma lea vaega o le feagaiga o le aiatatau a tagata o faapena ona sainia e le Malo lea feagaiga ma tatou mulimuli ai i lona faatinoga aua le puipuiga a le auaigaluega e faapea foi le auaunaga ina ia lelei mea uma ma tino mai le tatou lagolago i lea feagaiga faava o Malo.

Ona pau ai lea o itu sa laga mai e le paia i sui usufono mamalu o le Maota. E pei ona ou fai atu, faafetai mo la outou talitonuga ma le faatuatuaga i le Matagaluega. Atonu o lea itu ua mafua ai ona le taua le Matagaluega i le tele o nisi itu i le faataunuina lea o lana tautua ma le auaunaga i le tatou atunuu. E talitonu foi o lo o i ai lava ni vaega o lo o tatou naunau i ai, ae le i fausia Roma i se aso se tasi, tatou te faamoemoe lava i le malosi ma le pule e aumai e le Atua e faapena ai ona faagasolo le tautua a i latou foi ua lautogia ma ave i ai le faatuatuaga o le tatou Malo aua lava tiute fai ina ia faia ma le amiotonu mea uma ma faia ma le tulaga ina ia manuia si o tatou atunuu i faiva ma tofi ua galulue ai.

Ona faapea ai lea o se matou tala, ona o le aso ananafi sa ou auai i le sauniga faapitoa a le Matagaluega mo le tama matua ia Tuiloa e pei ona sau i le va i nisi o finagalo ma faamaisega foi, ma e faapena foi se lagona ona o le aso taeao pei ona silafia o le a molimoli atu ai le tino maliu o lenei tama taua sa auauna i totonu o le Palemene, ae sa faapea ona avea ma Minisita Lagolago o lenei Matagaluega, e fia faaleoina ai le agaga faafetai i le Afioga i le Taitaifono o le Fono a Ekalesia Soofaatasi Kerisiano i le Tiakono matua ia Kasiano ma le Failautusi o le latou Fono i le auai e taitai le sauniga i le aso ananafi, e momoli atu ai le agaga faafetai. Ua maitauina foi ma le faafetai le tele o le feau taua mai lo tatou Matai i le lagi pei ona molimoli mai e lenei Tama Matua, o le foi ua ave i ai le faatuatuaga e le Afioga i le Akiepipoko aua le galuega faatalai e pei ona feagai ai ma ia. O le mea lea e momoli ai le agaga faafetai ma faaleo i lenei afiafi a o faafogafoga foi lo tatou atunuu.

E momoli le faafetai i le Matagaluega o Tina ma Tamaitai, Atinae o Nuu ma Afioga ma Agafesootai i lau Afioga i le Ofisa Sili o Pulega ma le Matagaluega, e faapea foi lau Afioga i le Komesina o Sulufaiga ma lou Ofisa, e faapena foi ona faailoa atu le faafetai i le Komiti o lo o i lalo o le vaavaaiga a le Minisita, e pei ona i ai le Komiti o le Faleula i le Taitaifono ma la outou Komiti i tama ma i latou o auai. Faafetai le galulue le galulue, faafetai le tautua i le tatou Faigamalo. O le Komiti o le Ie Samoa, e faapea foi le Komiti o Pulenuu, faapea foi Sui Tamaitai o Nuu, malo faafetai. E le gata i Upolu nei, a o Salafai. O la outou auaunaga e le lava tupe e tofogi ai, a o le Atua na te faamanuia i o outou faiva ma tiute o feagai ma outou. Ia, e faamuliga lava le faafetai i le Afioga i le Palemia ona o ia o le Taitaifono o le Komiti o le Ie Samoa o lo o ma galulue faatasi aemaise foi o le lagolago mai ma le aumai o lona tauau e tausoa ai le avega i le tulaga o le tau fofoina o faafitauli i totonu o afioaga, e le na ma le laina o lo o vae ulufatuga o latou upu. E faafetai atu ai i le Palemia ona o le le tuua foi o lea vaega o ona tiute, o lo o faapena ona aumai ai pea lana tuualalo a o faafogafoga mai le tele o afioaga o lo o aafia i lea vaega i le matou faafeagai pea ma asia mai le Ofisa o le Minisita faapea foi le Afioga i le Palemia. Afai o outou faafogafoga mai, o le agaga maualuga o le tatou Malo aua ne i avea le tatou Malo ma auala e saili ai ni ai o se itu o se afioaga, ae ia outou silafia, o le faamoemoe o le Malo, ia maua e afioaga taitasi le fealofani ma le nofo lelei. Ia tatou maua pea le loto maualalo ma ia tatou manatunatu i Afioga a lo tatou Matai, “O le faatupu le filemu, e fai mo ia le tofi o le nuu.” O le mea la lea, ia tatou maua le loto maualalo tatou te o ai e sailimalo i le Atua ina ia toe maua se leleiga o afioaga e pei ona silafia o lo o faapena ona faaletonu i lenei vaitaimi. Ia alofagia e le Atua a outou pulega ia tausisia pea le filemu ma le agalelei o lo tatou Matai ina ia manuia afioaga ma alaalfaga i tulaga o a outou pulega.

O le tatou aga atu i le SIDS, o le tatalo lava lea aua o lea ua saunoa le Sui Minisita o lenei Matagaluega i le talosagaina o le Minisita mo Punaoa Faalenatura ma le Siosiomaga i le tulaga lava lea i le aoina o le lapisi, o lea ua saunoa le Afioga i le Minisita. Ua manino mea uma ma o le faamoemoe lena Samoa e, o le matou tatalo ia tatou galulue faatasi, ia aumai e outou laei mo lo tatou aga atu i taliga-malo ina ia faamatagofieina o tatou nuu ma aai, ae ia tausisia foi le amio faatamalii ma amio pulea ina ia foi a tatou malo ia Setema, a o ave le tala lelei o Samoa o le atunuu e pulea lelei, aemaise o le tu mama ma le soifua faatamalii, e atagia ai foi o i tatou o le atunuu Kerisiano.

Lau Afioga i le Fofoga Fetalai faafetai mo le avanoa, ia alofagia e le Atua lou taitaiina o le Maota. Ia faamanuia le Atua i le Afioga i le Palemia ma le Kapeneta aemaise foi o le Taitai o le Itu Agai ma le la Itu, ae faapea foi le mamalu i Minisita Lagolago ma le faafofoga a Samoa i lenei po. A i ai foi se upu ua sala, ia alofa ia lafo i nuu le aina ae ia tatou folau ina ia maua pea e i tatou le filemu o lo tatou Matai ma ia maua le taeao o muamua a o maua le malosi o le tino ae sili le Agaga.

Ia faamanuia le Atua i lo tatou atunuu ma lenei Maota, ia manuia foi le leo o Leulumoega. Lo tatou itumalo, e le tau faalupea outou sa ma faiga ma ua outou silafia lelei lava na o le lua nai o tatou nuu. O Sa Tuala o le Aiga Faalagilagi, le Fofoga o le Vai faapea le Falefa o le Ailaoa, Sa Tanuvasa o le Laau na Fausia faapea foi le Faleaana, ia manuia la outou tapuaiga ma outou faiva. Ia manuia foi lau Tofa i le Matuanatogi, le afio o lou Tapaau le Tuiaana ma ona Tafai, ae faapea foi le Afio o Sooaemalelagi ma Alo o Tamaalelagi ma i laua na Faiga ma upu ia te oe le Tumua silisili, ia faamanuia le Atua i lo tatou itumalo. Ia manuia le aso.

FOFOGA FETALAI: O le a le toe faasilia so matou leo ona o lea ua lele le manu sina aua le vagana fetalai i lau Fetalaiiga Leulumoega. Tau ia ina matou faamanuia atu. Ia mau le toovae ma maua pea le tofa aua le feagai o lau Afioga i le Minisita ma le Matagaluega e fitoitonu ma le atunuu. O le Matagaluega o Tina ma Tamaitai, Atinae o Nu'u ma Afioaga ma Agafesootai aua le va faafeagai ai o le Malo ma pulega a nuu ma afioaga ma le tapuaiga a aiga, aemaise o faleupolu ma pulega i totonu o tatou nuu. Ua faafetai galue, ua malo foi le onosai. O lea lava ua manino ma malamalama matafaioi, e momoli atu le agaga faafetai i lau Afioga i le Minisita aemaise foi le paia ma le mamalu maualuga o le Matagaluega i ona tulaga faalupe i ona vaega eseese o lo o i lalo o lau vaavaaiga, ua faamalo le onosai faafetai le tautua mo le atunuu.

Ua tatou taunuu mai i le Matagaluega o Fesootaiga ma Faamatalaga Tekonolosi. Tulai mai lau Afioga i le Alii Minisita, o se tasi foi o ao sinasina i totonu o le Kapeneta. Tulai mai lau Afioga i le Minisita mo Fesootaiga ma Faamatalaga Tekonolosi.

Afioga Hon TUISUGALETAUA SOFARA AVEAU (Minisita mo Fesootaiga ma Faamatalaga Tekonolosi): Faafetai i lau Afioga i le Fofoga o lo tatou Maota nei ma le Palemene o Samoa, faafetai mo le avanoa ua maua i lenei vaega o le afiafi. E ao foi ona molioo atu le agaga faamalo ma le faafetai i le paia maualuga o lo tatou Palemene e amata mai i lau Afioga i le Palemia ma lenei Itu, aemaise foi le Taitai o le Itu Agai i lena Itu o le Maota.

Ua faamalo le onosai, ua faamalo le usufono ma le lavapapale i tualumaga o a tatou galuega i lenei afiafi.

Na amata mai i le taeao le faamanusinaina o le agaga fiafia ma le faafetai i le Atua ma e le ese foi se lagona, ae tumau pea i lena. E le mafai ona tatou faamatalaina ma taea i lo tatou malosi ma le faaeaea lo tatou Tama oi le lagi e tusa ai ma Lona agalelei ma le alofa o lo o foai mai ai pea le malosi ma leoleoina lo tatou atunuu i le toa filemu e pei ona taunuu mai i lenei aso ma lenei afiafi.

O le a taumafai atu se faamatalaga a le Matagaluega o lo o i lalo o la matou vaavaaiga, o le Matagaluega o Fesootaiga ma ala televavave faatekonolosi, o le Vaega a le Pule Faatonu po o le Regulator ma le Vaega o le Falemeli po o le Samoa Post.

E le tele ni mataupu sa laga ma e toalua sui usufono mamalu sa aofia i a la saunoaga ni fesili sa tuuina mai i le Matagaluega nei, faatasi ai ma le sui usufono mamalu sa tuuina mai le faafetai ona o le auaunaga e pei ona i ai foi suiga i lenei taimi - o le a ou amata atu ai i lena.

O le taimi nei ua faaoo atu faasalalauga e le gata i le televise i nisi o afioaga sa le i maua i le tatou fonotaga talu ai, a o lea ua oo atu i ai i Aleipata ma Fagaloa. O se vaega o Aleipata ma le tele o vaega o Fagaloa o lena ua latou maimoaina le televise. E faapena foi i Savaii i le motu o Salafai i le itu e masani ona faaletonu. O lo o i ai lava nai faafitauli, ae ua tele lava ina tuu itiitia.

O le vaega a le 2AP e pei lava ona silafia, o lena ua faalelei atu le tele o vaega sa faaletonu ona o mea sa faaleagaina ma sa i ai foi nisi o faafitauli sa aliali mai ai, a o lena lava ua asia e le Matagaluega. Ua faaleleia ma toe faatonutonu nisi o vaega sa fai ma faafitauli i nisi o aiga ona o laau o lo o faaogaina e pue atu ai faasalalauga, e le o atoatoa ma e le o sao le faatulagaga o a latou antenna ma tulaga faapena, o lea la ua manino.

Talu nei ona amata faasalalauga i le fale fou, o lea ua faaleleia lava atili faasalalauga a le 2AP mo le atunuu i fafo atu i nai o tatou motu tuaoi.

Sa fesiligia le Matagaluega nei i le tau o lo o i ai telefoni ma le internet ona e i ai le finagalo o lo o taugata. E faamuamua atu se faamatalaga i telefoni. O le mea moni lava latou i le taimi nei o lo o taugofie telefoni pe a faatusatusa i tausaga ua mavae. Na o se ata faataitai, o le mobile lava latou i le 2009, sa 19 ma le afa sene. O le 2010 sa 17.7 sene, o le tausaga na tea nei na pau ifo ai i le 13 sene ma o lea lava ua oo atu i le 10 sene i mobiles ia po o telefoni feaveai. A o telefoni fai laina ua pau mai i le 8.2 sene i le 4.8 sene. O lo o faapena lava ona mataituina e le tatou Regulator po o le poloaiga faatulaga a le Pule Faatonu. O lo o mataituina pea le faagasologa o tau ia ma o le ala foi lea e mafua ai ona mautu pea ma usitaia pea e i latou o lo o faafoeina telefoni ona o lo o mataitu e le Matagaluega a le Regulator ia vaega uma ina ia aua ne i soona fesiitai, ina ia maualuga le tau e ese mai ai pe vamamao ai ma tau o a latou auaunaga o lo o faatino ai.

E faapena foi la i le internet, mo le silafia o le taimi nei i lo tatou faaogaina o le internet o lo o i ai. O lo o i ai le tatou sub-marine cable e tasi o lo o sau mai Tutuila i le taimi leni o lo o tatou faaogaina, ona alu atu ai lea i fafo i Hawaii, alu atu i Amerika ma faasolo atu ai, a o lo o faaogaina foi le laina, o le laina lena e sau mai Niu Sila ma Ausetalia ma faasolo mai ai i luga ma o lea e pipii atu i ai tatou. O le taimi nei, o le tele lava o fuafuaga na o lo o faaogaina laina na tatou te faaogaina i le internet. O lo o tau faasoasoa foi

aua o lo o i ai pea le avanoa i isi foi atamai ma fesootaiga agai i fafo. O lo o faaaoga pea lena ma o lo o taumafai e le tatou Pule Faatonu ina ia faatulaga pea tau. O le taimi nei lava latou ua i ai foi se suiga, ua pau ifo laitiiti. Mo se faataitaiga o luma atu o Aperila i le tausaga na tea nei 2013, o le faatulagaga o tau sa i ai sa 2GB i le \$99, ae peitai ane ina ua tuanai Aperila i le 2013 po o le tausaga na tea nei, ua siitia le aofai, o le lautele ma le avanoa e faaaogaina ai ma maua ai fesootaiga, na sii atu ai i le 3GB i le \$99 lava lea e tasi.

E faapena foi la i le Digicel sa amata mai e le CSL i le \$249 i le 5GB, ae toe oso mai le Digicel toe tuu foi i lalo i le \$171 le latou tau i GB lava ia e 5. Na faapena foi ona sau ma le BlueSky pipii mai i le tauvaga, ona sii lea o a latou GB i le 6 mai le 5, ae \$249. O le taimi nei ua oo atu lava le tau ma le avanoa tele i le 7GB, ae \$188. O lo o tulaga lelei le faagasologa ma o lo o cover lava foi tau a Faalapotopotoga ma Kamupani, a o lo o faafoe foi ina ia mafai ona maua sina tupe faasili e le matua tigaina tele ai tatou.

I le taimi nei lava latou, o lo o taumafai pea a tatou fesootaiga ma le Faalapotopotoga o le World Bank, le Faletupe o Asia ma le Malo o Ausetalia, ua latalata ina mautu se tulaga e fai ai se tatou lava cable i le taimi nei. E pei ona faamatala atu talu ai, sa foliga mai e taugofie ma lelei le faataatiaga ma le tatou sootaga ma Fiti i le Southern Cross, ae peitai ane i le taimi nei o lo o ua i ai le isi kamupani lea o lo o faataatia mai nei e pei e foliga mai e sili atu le taugofie mo tatou toe fesootai vave, ma e laitiiti foi le avanoa e faalavelaveina ai i ni va o Malo e alu ai ona e sau sao lava mai Ausetalia, Niu Sila, tatou ma le isi motu e tasi o le pasefika ma oo atu ai i luga i le West Coast i Amerika, ae alu ai le isi sootaga agai i Hawaii. O lona uiga o le a maua se avanoa pe afai e faaiuina a tatou feutagaiga o lo o faia nei ma o lo o faaaauu pea. Ona pau lava le faigata o nei mea ona e le gata i le taugata, a o lona faatinoga foi o le matua taugata lava. E pei lava ona outou silafia, e faataoto le cable lena i le manava o le sami loloto. E fuafua vaa e talafeagai ma le malosi ma mea e talafeagai o le sami e faataoto ai. E le o se mea faigofie la le galuega lena ona e taugata ma e faigata lava.

A o lo o i ai le isi o tatou avanoa o lo o tatou fesootai ai nei ma taumafai e faamaea a tatou fesootaiga ma Amerika Samoa, ona e i ai le isi o tatou faamoemoe i se tatou fesootaiga ma Amerika Samoa e ese mai i le cable o lo o faaaoga i le taimi nei. O lona uiga talosia ia mafai ona faaiuina le vaega lea ona fesoasoani mai loa lea. A faapea la tatou te fesootai ia Amerika Samoa e ala i le sootaga lea o lo o taumafai atu, a oo atu a tatou fesootaiga i Amerika Samoa, ona alu loa lea i le satellite o lo o sosoo nei i ai Tutuila i le O3B, ona faigofie loa lea ona tatou vave maua le lalolagi, le open foi lea e faigofie ai a tatou fesootaiga pe afai e alu i le satellite mai Tutuila lea, ona faigofie lea, faatasi ai ma le laina o lo o i ai nei ona faaaauu pea ona faaaogaina. Ona ou see mai lea i le vaega mo le silafia e le Maota ma le tatou atunuu o lo o faafofoga mai. O le polokalame foi lea le poloketi o le Nation Broadband Highway po o le polokalame e fausia ai alapeau lautetele o le ea o lo o tatou faaaogaina, sa amata mai i le tausaga na tea nei e i ai le faamoemoe e tatalaina nei i le Aso Tofi o le vaiaso fou. A tatala loa le tatou broadband lea ona feololo foi lea o a tatou fesootaiga aemaise lava i totonu o a tatou Matagaluega uma a le Malo ma o lea e i ai le faamoemoe o le Aso Tofi o le vaiaso fou o le a tatala ai lea galuega tele ua leva ona faagaioi mai e le tatou Matagaluega. I le taimi nei.

Tofa Lealailepule Rimoni Aiafi: Lau Afioga i le Fofoga Fetalai.

FOFOGA FETALAI: Malie lau Afioga i le Minisita sei avatu le avanoa i le faauilavea. Tulai mai le sui usufono mo Faleata Sisifo.

Tofa Lealailepule Rimoni Aiafi: Momoli tele le faafetai i lau Afioga i le Minisita i le tau faamalamalamaina o lenei vaega, e pei lava ona e silafia ua le tasi foi ae ua atulasi ona avatu le manatu i lea vaega, ona o lea matou te vaavaai pea i le Tala o le Tupe, tasi lea vaega e alu tele ai tupe a Matagaluega o le Malo o le initaneti. Ae e le mafai ona alofia ona e moomia i galuega, e le gata i lea ao tatou aoga o le tele o aoga lea e fuafua o lea ua i ai computer labs, e faigata tele ona faaaogaina i le mea e tataua ona oo i ai ona o le taugata o le tau, e le gata i lea, a e alu i fafo e te turisi i fafo i le tele o atunuu lata mai, e te alu atu loa e alu i le internet, free, ae faafetai o lea ua e lauina mai tulaga o le taumafaiga aemaise foi o le tausailiili atu i nisi o atunuu e pei o Fiti ma Amerika Samoa ina ia fesoasoani mai i le tau o le initaneti. Ia talosia ia ia vave mai se taimi. Aua o lea ua e saunoa i le broadband aua e tasi lea vaega, lau Afioga pe i ai se aafiaga aua o lea e pei ua matou maua o lea ua award atu e le Blue Sky pe afai e moni na te tauaveina lea mea, aua manatua o latou foi lea e own ina le gateway lea, ina tei foi ua atili ai le taugata, o le mea ina ia afford e le tagata lautele ia nei auaunaga i se tau taugofie. Ma le faaaloalo lava.

Tofa Aveau Tuala Lepale Niko Palamo: Lau Afioga i le Fofoga Fetalai.

FOFOGA FETALAI: Tulai mai le sui usufono mo Faleata Sasae.

Tofa Aveau Tuala Lepale Niko Palamo: Faafetai i lau Afioga i le Minisita mo le faamalamalamaina foi o lenei mataupu. Aua o lenei mataupu e ese le taua aemaise lava i alo ma fanau o si o tatou atunuu o lea e taumafai ia aoga aemaise lava IA o lo o faatino nei. E momoli foi lau faafetai i le polokalame lea e fai e le Matagaluega lea e alu i tua i aoga o le talanoa centre. E ese le matagofie o lea polokalame, o lau faafesili atu lava i le polokalame lea, pe o i ai lava se avanoa e avatu ai le talosaga a nisi itumalo i le faatinoina o le polokalame lea ona o se polokalame e ese le lelei aemaise lava i fanau aoga. Aua e ui lava ina laualau mai ia tau ia ua i ai nei a le Blusky ma le Digicel i le faiga o le internet, ae ou te iloa e fai lava si taugata laititi o tau ia e pei ona faaali mai nei, ae pei o lea e i ai le isi polokalame lea. Ma le faaaloalo lava lau Afioga i le Fofoga Fetalai.

FOFOGA FETALAI: Tulai maia lau Afioga e faaauau ma faaii mai le saunoaga.

Afioga Hon TUISUGALETAUA SOFARA AVEAU: E pei ona ou faamatala atu, e tele le eseese o tatou ma isi atunuu, ona o isi atunuu o lo o connect i cables, o lo o i ai satellite o lo o mafai ai ona tauave sao ai fesootaiga. Ao tatou na o le tasi lava le tatou cable lea o lo o fesootai nei o lea o lo o oso mai Amerika Samoa. I le taimi nei o lea e fesootai mai le AS Aid o Hawaii o Amerika Samoa ona sau ai lea ia tatou pau lena o le tatou cable lea

e i ai i le taimi nei. Ma le malosi o masini o lo o faaaoga e tagata e maua ai le satellite ma le connection lena.

O le tulaga lena o lo o i ai but e pei lava ona ou fai atu, o lo o taumafai pea a tatou fesootaiga i vaega ia, atonu lava o le a latalata mai se taimi, e le mafai ona ou polomisi atua se vaega mautu, ae o lo o taumafai pea le Matagaluega i le tulaga e tatau ona i ai. O le saunoaga a le sui mamalu o Faleata Sasae o lo o i ai pea le avanoa e talosaga mai, e pei ona silafia le tatou polokalame lea, o lo o i ai tatou talanoa center po o le fesootai centre, o lo o tatala pea le avanoa aemaise lava i latou o lo o i vaega ia e amata i nai tina, komiti a tina ona tuu ifo ai lea o le avanoa mo nai fanau aoga. I lalo lava o le broadband lea o le a tatala nei, o vaega lava ia e luau a ave i ai le faamuamua. E muamua i le Matagaluega o Soifua Maloloina, faatasi ai ma le vaega a le Ofisa o Leoleo faatasi ai ma le ofisa o aoga. O Matagaluega ia e tolu muamua, ae o le tele lava o Matagaluega o i ai nei o la o la ua connect ae taatia ia lena vaega sei oo atu i ai i lea vaiaso ona faamalalama atili ai lea i le taimi e tatala aloaia ai le tatou polokalame lea. Ae o lo o tatala foi le avanoa e pei ona fesiligia mo nisi komiti po o nisi nuu e mafai ona toe faatino ai talanoa centres ia.

O le isi mataupu ou te manatu e tatau ona faailoa i le tatou Palemene nei, o le tapenaga lea ua i ai nei o le suiga o faasalalauga mo broadcasting lava latou i TV ma leitio o le a sui mai ai mai i le analog o lo o i ai nei i le digital. O le faamoemoe o lo o i ai nei mo le silafia, sa faapea foi ona fai ina ua oo mai le telefoni ia tatou, sa i ai le tatou analog muamua. 1996 sa i ai, oo mai i le 2006 ona suia loa lea i le digital, lea la e alu ai nei telefoni ia ua mafai ona tatou faaaogaina nei. Faaaogaina ai cellphones ma tulaga faapena ua tele mamao atu le manino. Ao le faamoemoe lea e i ai nei i a tatou faasalalauga, e suia mai le tulaga o i ai nei a tatou faasalalauga mai le analog i le digital. E pei ona silafia a outou tagai i le TV, a faaali se video i se ata faapena, o le ituaiga manino la lena e tatau ona i ai pe a faapea e uma ona fai le fesuiaiga lea o lo o i ai nei. O le taimi lenei e faigofie lava ona nenefu ia faasalalauga o le TV, e faapena foi i le leitio, ae ona o lea ua see uma atu le lalolagi atoa latou i le tulaga lena, o lea ua amata, ua see isi Malo tetele ma atunuu tetele ao faasolosolo atu isi lea la e i ai tatou. O le faamoemoe ina ia fai faatoatoa lelei le tatou suiga ona e taugata, o lea e i ai le faamoemoe ia oo mai le tatou suiga lea, ao lei oo mai le 2017. Ole faamoemoe a faapea lava e talafeagai i le 2016 ua manaia, ae o le faamoemoe ao lei oo atu i le 2017 ae ua mafai ona fai atoa le tatou suiga ona e le gata i le faigata ae taugata mo i latou ia o lo o faia ia auaunaga i le taimi nei. I le vaega lea ou te toe faapoopo atu ai i le saunoaga a le Taitaifono a le komiti i le tulaga o lo o i ai le auaunaga foi ma le fesoasoani tele o lo o tuuina mai e le Falemeli, e pei lava ona silafia, e lei misi lava se tausaga i tausaga ia e tolu pe fa talu ai nei ona maua pea ia tupe e tuuina atu mai le tatou Falemeli e fesoasoani ai i le budget o lo o i ai nei.

E pei foi la o le tupe talu ai nei o lenei tausaga e \$2270,000 nna ua silafia e le Komiti e pei ona momoli mai ai le faafetai a le Taitaifono, ia e ui lava ina laititi ia e laititi ae maini, sia falemeli laititi ae o lo o maua pea nai seleni ia ma tuuina atu e fesoasoani atu i le Malo i le faiga o fuafuaga faatatau. E momoli atu foi le agaga faafetai e ui lava ina le atoatoa foi ona cover uma le tatou atunuu ae ua siisii lava i luga le tautua a tatou kamupani fai TV i totonu o le tatou atunuu. O le taimi nei o la ua faasolosolo atu lava ina feololo isi ao isi o la e tumau lava i le mea e tasi, e lei see atu lava i se suiga lelei, ia o lo o fai pea i ai le galuega a le regulator, o lo o matou fetuunai pea ma le ofisa o

le Pule Faatonu i le maitauina o le cover o lea masina aua o la e fai tai tolu masina ma cover ma mataitu o lo o sologa lelei pea ia isi ao isi o lo o taumafai lava i ai le agaga ma le galuega, ae faapena foi ona i ai foi o latou faafitauli. E pei na ona pau na o mataupu sa laga mai.

Tofa Lealailepule Rimoni Aiafi: Lau Afioga i le Fofoga Fetalai.

FOFOGA FETALAI: Lau Afioga i le Minisita sei tuu atu le avanoa i le sui mamalu.

Tofa Lealailepule Rimoni Aiafi: O le vaega lea sa ou taua, o tupe maua mai le Digicel ma le Bluesky tupe lea le totogi o laisene, fesootaiga, faamolemole o lea e maitauina e le Komiti ma fesiligia o lea e alu i lalo le aofai o le tupe lea, pe aisea le mafuaaga. O le isi vaega e i ai le piriota atoa lena e iina e leai se tupe ua maua mai, ao tupe nei e ova i le tai \$2miliona i le tausaga, tupe ia o lea e faamoemoe i ai le Matagaluega, ma e tatau foi ona tagai totoa i ai lau Afioga ma le Matagaluega sei sue lelei po o le a le mafuaaga, e le tatau ona pau i lalo le tupe lea e tatau ona agai i luga, ona e 2% o le profiti, ao lea e maitauina i faamaumauga na tuuina mai, e le gata ina pau i lalo ao isi tausaga e lei oo mai se tupe. Ma le faaaloalo lava.

FOFOGA FETALAI: Tulai mai le Minisita.

Afioga Hon TUISUGALETAUA SOFARA AVEAU: O faamaumauga ia e pei ona tuuina mai e le Matagaluega, o lea foi e i ai si ou iloa laititi i ai, o lo o sologa lelei faatonutonuina o laisene ma le totogiina mai o laisene a kamupani lapopoa ia. E feololo i latou o la e i lalo atu, le vaega laiti, a tatou kamupani laiti ia i fesootaiga la foi o lo o i ai a latou aitalafu o lo o i ai e totogi mai i totonu o le tatou Matagaluega. Ma o lo o faia pea e oo mai i le taimi nei o lo o faia pea i ai le galuega a le tatou ofisa o le Pule Faatonu. Ae i le tulaga lava latou o le tupu maua a kamupani, mo se faataitaiga, a faapea e faatulaga e le Pule Faatonu ia le faiga o lana poloaiga, a fai sana order i le tulaga i le tau i lea taimi i lea taimi e fua i le manaoga o tagata po o se piriota ua atoaina. E tapa uma a latou faamaumauga ia e le mafai ona fai fua se poloaiga a le Pule Faatonu e aunoa ma faamaumauga ia e tuuina mai i kamupani uma la. E leai lava la ma se mea e faanenefuina aua o mea na e fua i ai le poloaiga lea e tuuina atu e le Regulator. E leai la se mea e mafai ona faapea o la e le o sao mai i, sei vagana foi la ua fai faasolitulafono e se kamupani ni a latou fuainumera e tuu mai i totonu. Ae e le tatau ona le sao ona o lea matou te maitauina uma lava e le Pule Faatonu ia a latou fuainumera na aumai i isi taimi, tupe maua ma tupe na faaogaga, o iina la e seki ai le poloaiga, e le tatau la ona maua ai se le faamaoni, sei vagana foi e i ai lava le faaetonu i so o se mea pe a naunau e fai le faaetonu, ae o le faamatalaga lena.

Tofa Lealailepule Rimoni Aiafi: Faafetai lava i lau Afioga i le Minisita. E pei o le mea lea e taumafai atu ona o kamupani nei o kamupani mai fafo, o le tele o tupe lea e alu i fafo. E tatau ona mataitu lelei e lau Afioga ma le Matagaluega le Regulator. O tupe nei o tupe taua e sili atu tupe nei i le tele o export, leaga o le tupe lea o le tele o le faaogaina e le vaega lea o game plan,

ia e faigofie foi ona fai femeiaiga o profiti, ona o lea ou te maitau atu e pei o lea e fiafia o le mea lea latou te aumaia i tausaga uma ona aumai lava lea ae o lea tatou te iloa o lea e faatupulaia o latou share i le maketi. O le isi vaega taua o lea e vaai atu ua tutusa lelei lava tupe lea e aumai e le digicel ma le bluesky, ae o lea tatou te iloa le feeseeseaiga o a latou mea ia e i ai. Ao le vaega e pito sili ona taua lau Afioga o lea e taua o lea e galulue i le aumaiga o tupe, afai e faamaonia faamaumauga ia e aumai, o lona uiga e ova i le \$2miliona le tupe lea e outstanding e lei aoina mai. O lona uiga a faaputupu, ona tele lea o le afaina i le agai i luma ao lea e moomia e tatou le seleni lea. Ma le faaaloalo lava.

FOFOGA FETALAI: Tulai mai lau Afioga i le Minisita.

Afioga Hon TUISUGALETAUA SOFARA AVEAU: Ia aumaia lou faatuatuaga, afai o i ai se \$2miliona e le i aoina mai i totonu o le a faatonuina ina ia fai lena, ou te le talitonuina e i ai se tupe faapena e lei tatau ona oo mai i totonu. E pei ona ou fai atu o so o se taimi lava e fai ai poloaiga e tatau lava ona aumai uma fuainumera o a latou tupe maua ma tupe alu. E pei ona silafia o le taimi nei na amata mai o taugata a o la ua pau o latou tau e le tatau ona tumau pea le aofai o a latou tupe maua pe afai ua pau i lalo, ona pau o le mea o la ua faatele tagata. E sao ai lau saunoaga o Kamupani tetele nei mai fafo, ae aumaia lou faatuatuaga a o le a matou mataituina pea ni tupe faapea o lo o i ai ou masalosaloga e le i oo mai i totonu.

Lau Afioga i le Fofoga Fetalai, ua faaiu atu ai ma nai mataupu e pei ona sa laga mai i la matou Matagaluega, e momoli atu ai le agaga fiafia ma le faafetai.

Ou te fia oo atu foi i le itumalo mo Vaimauga Sasae, faamalo faafetai le tapuai, faafetai i le aumai pea o la outou faatuatuaga ia te au nei ma le faatauvaa o le auauna e mafai ai ona tautua i le atunuu e fai ma o tatou sao. O lo tatou nuu i Lailii, Letogo, Vailele, Vailele uta, Mauga Fiafia ma Fagalii, faamalo faafetai le galulue, faafetai tapuai, faafetai le lagolago mai i le taumafaiga o le tatou galuega. O lena ua fai atu isi a tatou galuega mo lenei taimi ma ua amata i Lailii nisi galuega tetele ua leva ona outou talosaga mai ai.

Ou te faafetai atu ai i lau Afioga i le Minisita mo Punaoa Faalenatura ma le Siosiomaga, ona ua amataina nei galuega tetele, faamalo faafetai.

Lau Afioga i le Fofoga Fetalai, e momoli atu ai le agaga fiafia ma le faafetai i lenei afiafi, faafetai ma faamalo mo le faatautaiga o le tatou galuega ma le Fonotaga, ia faamanuia pea le Atua i lou finagalo e faasoaso ma faatulaga ai galuega o lenei Maota.

Ia faamanuia foi le Atua i le usugafono a le atunuu atoa e pei ona i ai lenei Maota, ia tumau pea manuia o le Atua i luga ia te outou. Ia faapena foi pe a fai se faiga malologa i se taimi mulimuli o lenei afiafi. Soifua.

FOFOGA FETALAI: Malo faafetai saunoa i le Minisita mo Fesootaiga ma Faamatalaga Tekonolosi aemaise o le Regulator ma Matagaluega uma o lo o i lalo o le vaavaaiga a lau Afioga i le Minisita.

E momoli atu foi la matou faamanuiaga i lou alofaiva i mea uma, malo le onosai, malo foi le galulue. E le gata i lea e le faaitiitia le agaga o le naunau

atu o le Palemene ona o le tasi lenei o Matagaluega taua i le fesuiaga o auala faatekonolosi i lenei vaitau ina ia alu Samoa i suiga tetele ua tatou i ai.

Ou te manatu o le a faataatia ese galuega a le Palemene mo lana malologa masani o le afiafi, A toe faaauau Tausalumaga ona sauni mai loa lea o le Minisita mo Galuega Tau Alamanuia ma Atinae a le Malo.

Ou te faasilasila atu o le a faataatia ese Tausalumaga a le Fono Aoa mo lana malologa masani o le afiafi.

Na faataatia ese Tausalumaga a le Fono Aoa mo lana malologa masani i le itula e 9:24 i le po ma toe faaauau i le itula e 10:04 i le po.

FOFOGA FETALAI: E momoli atu le agaga faafetai ma le faamalo i lenei vaega o le afiafi i le onosai mai pea ma le lavapapale o le Maota. E i ai lava le popolega i talii ae popoe le paia ma le mamalu maualuga i Taitai o le atunuu, e talitonu le agga o lo o vaatele pea ma mau le toovae i le paia o le Palemene ona o lo outou naunau pea aua le faatinoina o le tatou Fonotaga i lenei po atoa ma lo outou le tausisi i paia ma mamalu masani o le Maota, a ua outou manatu lava i le faaauauina o le tatou galuega.

E momoli atu ai le agaga faafetai ma ua maea foi ona palegaauau le taliga o le sua, palepale malie pea le sua i Ofisa Sili o Pulega aemaise o Faalapotopotoga a le Malo, o le manatu e sili ona tala mea faasolo le tatou Fonotaga ona o lo o alu foi le afiafi.

E faia le tatou malologa ua maea ona tulei saunoa le Afioga i le Minisita mo Fesootaiga ma Faamatalaga Tekonolosi. O lea ua tatou taunuu mai i le Minisita mo Galuega Tau Alamanuia ma Atinae a le Malo.

E le toe na ma le laina le tulai mai o le sui usufono mo Satupaitea e avea ma Minisita o lenei Paeaiga, o se tasi foi lenei o itu taua talu ona tulai mai o le sui usufono e avea ma Minisita o le Kapeneta, e le gata i lea a o se Matagaluega fou ua faatuina e le Malo aua lava le tau faamapueina ma le faaleleia atili o le auaunaga, e le gata i totonu o le Kapeneta ae faapena foi le Palemene aemaise o le tapuaiga a Samoa.

O lea ou te valaau atu ai ma le faaloalo i lau Afioga i le Minisita mo Galuega Tau Alamanuia ma Atinae a le Malo ua avanoa le Maota mo lau saunoaga faa-taupou ma faa-Minisita.

Afioga Hon LAUTAFI FIO SELAFI PURCELL (Minisita mo Galuega Tau Alamanuia ma Atinae a le Malo): Faafetai i lau Afioga i le Fofoga Fetalai, faafetai atu foi i le Ofisa o le Fono mo la tatou faamalosi tino ua maua ai foi se faasiliga malosi i sui usufono uma o le Maota i lenei afiafi. Ua ou tulai atu ona ua oo mai le faasologa ia te au nei.

Lau Afioga i le Fofoga Fetalai, na ou sau i le taeao ma lau lauga umi lava o le a fai ma lou faamoemoe lava ou te lauga analeila a o i luga pea le fetu a le tamaloa. A o le taimi lenei ua toe fesui ai lou mafaufau, o le a tuu lau lauga faataupou ona o lea ua ou mafaufau atu ua uma ona fai lau lauga faataupou i le taimi ao ou saofai mai i o. E i ai foi le talitonuga e le faalua ona taupou se isi, e tasi lava le taimi e te taupou ai, e te fiu lava e toe fia taupou e te le toe taupou. Ua alofa atu foi ua vela le fala i le Maota Fono a Samoa faapea foi tupu ma ee o lo o tatou faatasi ona ou faapea ai lea, tau lava ina ou faapai i le

tatou Maota. O le a ou le taea lava paia o Samoa, ua alu foi lenei aso i lauga a sui usufono o latou faalupe faigata o Samoa, pe oo i ai sou leo pe leai, e leai lava se paia e sui. O le tulaga o lenei afiafi na ona ou faapai atu lava i le tatou Maota e faigata o le Malae i Tiafau, o le Malae o taga tia ma le Malae o le faalelega fulu a Samoa, ae tainane o le Malae o le faautugatagi a Samoa.

I le afio o lau Afioga i le Fofoga Fetalai, afio lau Afioga i le Palemia, Minisita o le Kapeneta, afifio Minisita Lagolago ae tainane le afio o lau Afioga i le Taitai o le Itu Agai ma lena foi Itu o le Maota o lo o Agaia le Malo. Afifio foi Ofisa Sili o Pulega i Tamaitai ma Alii, aemaise o sui o Matagaluega o lo o lima ma vae i ai le Malo i galuega fai.

Lau Afioga i le Fofoga Fetalai, na o sina taimi lava ou te oo atu ai i lou itumalo. O le asō sa fai ai le sa o le matou itumalo, e sa lava ona ola se televise seiloga ua faalogo mai ua uma la'u lauga. Na ou fai i ai e ta le 7:00 ua fai lau lauga a o lea ua tea le 10, o lona uiga ua momoe uma lo'u itumalo. E ui o lea Satupaitea lou itumalo pele, e faigata le Susu o Asiata o oe o le Va i Malae e Falefa i ai Tumua, Susu le Aiga o Samoeleoi i lo oulua vaavaalua Gasu ma Tavui, Afifio Alo o Lilomaiava ia Faanana ma Tuimaseve, susu le Aiga Sa Valomua faapea le Suafa Fauatea. Afifio Tapaau, alaalatai oe le Alatua aua Tapaau le fano, Nofoapule ma le Matuafia, ae tainane foi faletua ma tausī, saoa ma le malosī o le tatou nuu.

E le faagaloina foi le tapuaiga a nai ou tama ma tina faale-agaga i Ekalesia uma lava o lo o i totonu o Satupaitea, Ekalesia Metotisi, Ekalesia a Iesu Keriso o le Au Paia o Aso e Gata Ai, Ekalesia a le Assembly of God, Penetekoso ma le Ekalesia Aso Fitu. O Ekalesia nei o lo o i totonu o lou itumalo, o i latou nei o lo o faafalelemalu ma tapuai mai i faiva o lo latou sui usufono. Faafetai tatalo, faafetai i la outou tapuaiga. O lau tala e fai ia tatou fonotaga i aso ou te oo atu i ai, e ala lava ona mafanafana lenei sui usufono ma toa lona loto ona ou te iloa o lo o tapuaia atoa e le itumalo ou faiva. O faiva lava e tapuaia o faiva na e manuia.

Satupaitea, o lea ua tali mai le Atua ia outou tatalo faalilolilo ma moomooga leleoa sa ouotu faia ona o lo outou naunau ina ia maua so tatou tofi Minisita, ua leva tausaga e le i toe tulai se sui usufono mo Satupaitea i se tofi Minisita. O lea ua tali mai le Atua e ala i tofiga a le Palemia, Satupaitea alo mai laia, ia outou aputiputi i lenei tofiga ua faaeaina ai tatou. O la outou tala talosia, talosia ae maua so tatou tofi Minisita mo le isi Paeiaga o le a sau, a o lenei ua faamanuiaina lenei Itumalo i le Paeiaga lenei. E avea ai foi lenei itulā e momoli atu ai le faafetai i lau Afioga i le Palemia ma lenei tofiga maualuga ua e tofia i ai lou tagata faatauavaa, o le tofiga lava lenei o Satupaitea, e le o se tofiga o Lautafi.

Ona pau le tautinoga e tau atu i lenei itula lau Afioga i le Palemia ma le mamalu o le Maota, e le faigofie lenei tofiga i le tagata lenei e tulai atu, a o le a taumafai lava i le mea e gata ai le mafai ina ia maua se ai o le tulai mai o Satupaitea i le 20+ masina o lo o totoe o lenei Paeiaga, ou te lagona ua lava ma totoe lea taimi e faaali atu ai e i ai le sao o Satupaitea i le tatou faigamalo lenei a o le i oo foi i le isi Paeiaga, o ni mea e i tua atu, o mea na e tuu i luma o le Atua.

Lau Afioga i le Fofoga Fetalai, o le a ou oo loa i le tulaga na ala ai ona ou tulai atu. E toalima nai sui usufono sa oo mai o latou finagalo i le Matagaluega o lo o ou vaaia mo lenei taimi. Ae mo le silafia e le faapea o SOEs uma ua i lalo o lau vaavaaiga i lenei taimi, e leai, na o le fa lava, o le

SLC, Samoa Housing Corporation, ACC ma le SSFA ma le Matagaluega a le PSC ma le Ofisa o Fuainumera Faamauiina. E tusa e ono Matagaluega ua ia te au i le taimi nei ae na o le 4 SOEs lea ua i lalo o lau vaavaaiga mo lenei taimi.

Ia, o nai faafesili la sa tuuina mai, o le a ou tali atu lava faalauaitete, o le a ou le auiliilia atua ni sui usufono na tuu mai, ae o lena lava o lo o outou silafia. O le mataupu sa tuuina mai muamua, ia o le Survey foi lea a le Statistics sa fai po o le a le mea ua le toe faia ai, o le Income and Expenditure a aiga taitasi, ia o le tali atu, ua maea le taimi lea na fai ai le sailiiliga lea e lima tausaga ma fai, o lena ua uma ona collect mai le data lea, o lea la ua tuufaatasi nei o le a fai mai ai le Lipoti, ia a uma le Lipoti lena ia atonu e oo mai foi i totonu o le Maota lenei, ia ona toe faatali foi lea i le isi lima tausaga ia ona toe fai foi lea, so it's every five years ma fai le Lipoti lea pei ona faafesiligia e le sui usufono mamalu, po o le a le mea ua le faia ai i le taimi nei? A o le tali lena, ua uma ona fai, a o la e faaputupu fuu foi lea ma gather le data lea na ao mai ia e fai ai le Lipoti, o timeliness Lipoti, timeliness Annual Reports, ia sa ta'ua ai le SLC ma le PSC. E ta'u atu i le Maota lenei, ua ia te au uma lava ia Lipoti a le SLC lea sa taua foi i le Lipoti a le Suetusi Sili e 6 ea pe 7 tausaga na sa i ai ia le taimi na e le i i ai se Lipoti, ia o lea ou te tau atu o lea ua ia te au uma lava Lipoti na, o lea ua uma foi na fai le Lipoti o le 2012 ou te lagona e oo i le vaiaso lea ona present lea i le Kapeneta, ia ona oo mai foi lea i le Maota lenei aumai uma ai ma isi Lipoti lea e le i aumaia muamua.

Ma ua uma foi ona fai le lapataiga ma le fautuaga i CEOS o Matagaluega uma nei e i lalo o la'u vaauga, ia tautuana le timeliness o latou lipoti ma taumafai i Lipoti ia o le 2013 ia vave ona uma ma amata loa ona taumafai e catch up ia mafai ona ausia ia taimi faatonuina o le tulafono. O le a mataitu lava lena tulaga, a o le tulaga na ua i ai ia Lipoti ia e le SLC pei ona o lea e faalua ona tau mai e sui usufono mamalu.

O nisi o fautuaga foi sa tuu mai i SOES ina ia lelei le latou performance, aemaise lava lea i mea tau tupe ina ia maua ai tupe a lo tatou Malo, atonu o le mea tonu lava na o lea ua faatu ai e le Afioga i le Palemia ma le Malo le Matagaluega lenei, o se tasi lea o matafaioi o lea ua faataua ia te au, ina ia mataitu ia le faagaioiga o SOES e amata atu i le vaega lea ua i lalo o au nei, atonu e i ai se taimi ona oo mai lea i lalo o le Matagaluega nei ma isi foi SOES, ia a o le tulaga tonu lava lea o lo o faataua, ina ia lelei a latou performance i tulaga atoa lava, e le faapea na o le tulaga lava tau tupe, but in its entirety, ia lelei uma ona faafoe le faafoega o tupe maua ina ia maua ai latou dividends pei o le mea sa fuafuaina i le taimi na faatuina ai ia Matagaluega nei Tumaoti, ina ia maua se dividend e ave i le Malo e fesoasoani la i le tatou Tala o le Tupe. Ia taatia mai la outou faatuatuaga o le a taumafai i le tulaga lea, e i ai nisi o SOES e le maua ai ni tupe, pei e ese foi latou focus, e pei la o le vaega lea o le Sports ma le...o le a tau pea le isi vaega lea o le Kidney Foundation aua o latou lea e lē maua ai ni tupe pei o le service, a o le vaega la lea o le Sports e i ai lava ia auala e maua ai ni a latou tupe, ae le o faamoemoe foi lea e maua ni dividends se tele faapena, e pei o le service i le faaogaina o a tatou facilities mo le community, o le latou lena core function, a, ia speaking of the core functions lea e i ai foi ia saunoaga a sui usufono mamalu sa faapea, pei ua diversify ia isi SOES, ua le o sao i le mea lea na ala ai ona faatu, e sao lena saunoaga. O lea foi ua uma ona ou talanoa i SOES lea ua ou vaai, o le mea taua ia faaleleia le latou core

function na ala ai ona faatuina latou, ona faatoa tilotilo lea i nisi lava mea, aua le digress solo, ae faaletonu le auaunaga silisili lea na faatu ai lea lava SOE, o lea lava ua nofouta i ai latou ma taua tele le faataua o le latou core function na ala ai ona fai.

O isi mea sa taua i lauga a sui usufono mamalu, o le vaega lea o le PSC. Ia e tele lava ia nai faitioga ia po o nai manatu ia e tuu mai e faatatau i le Pulega po o le power o le PSC ia o tulaga ua oo i ai nisi fuafuaga a le PSC. Ia pei sa tusi atu le Afioga i le sui usufono mo Faleata Sisifo e fai ma sui o le la itu, ia o lena sa aumai ai lau tali, e taatia mai le mataupu lea se i ou talanoa i le PSC e uiga i fuafuaga ia ua pei e aliali ua fai, pei la o le mea muamua o latou totogi ia e ese mai i totogi o isi tagata faigaluega i le Principal level ma ACEO, ia o le faamatalaga lava ia ua tuu mai ia te au, e le te'i te' i fai, pei foi o lau tala na fai atu i lau tusi mai i le sui usufono, e i ai lava le mafuaaga na fai ai mea uma, ae taatia mai se i ou suesuea po o le a tonu lava lena, ona manino ai lea. Ia o le manatu lena, ona e le i i ai se taimi ou te talanoa ai ma ou iloa ai, po o le a tonu lava le mafuaaga na ala ai ona fai ia tulaga ia, a o lou malamalamaga, ia o mea o le taiala, o se taiala na fai mai e le vaega lea o le Remuneration Tribunal, o i latou ia e vaaia ia le tulaga foi o totogi o tagata, o lea la e taumafai le PSC e faatino. O fautuaga ia na aumai po'o le taiala, o le taumafai lava ina ia tau faatalafeagai uma ia totogi o tagata faigaluega across table , ae pei o lea ua amata nei ona faatino atu e le PSC o le Ofisa o le Loia Sili ma le Ministry of Finance, pei o latou ia ua amata ai le vaega lea, pei la o le tulaga lena ua feteenai ai ma ni manatu o nisi, o le a le mea ua faamuamua ai le vaega lea. Ia atonu o le process lea e fesiligia, a o le mafuaaga ia ma le uiga sao o le faiga o le tulaga ua oo i ai, ia e le i faapea na faia e penefiti ai na o le PSC, po o le AG, po o le Finance, o le taumafaiga ina ia lelei atoa lava ia totogi ma laugatasi, aua o le mea foi na finau mai ai nisi, e maualuga tele le va o le isi grade foi lea ma le isi vaega o le Principal level ma le ACEO level, e tele tele le va lea, o lea foi ua taumafai e tuutuu ae i luga ia tau talafeagai, ia a o lea foi e le o fiafia i ai. Ia atonu o le faatinoga o le process lea na fai e pei ua faapitoau i le PSC, a'o le agaga tonu lena na fai ai, we have to start somewhere, afai o le manatu ina ia fai faatasi uma lava ia Matagaluega uma i le taimi e tasi, ia taatia mai se i fai se talanoaga, pe mafai ona faatupe lena mea i le taimi e tasi, ma le faiga foi lea e fai ai, incremental foi lea, atonu e mafai ona tatou fund ina without e tau sue mai se tupe tele e fai uma ai lava Matagaluega uma, ae taatia mai le mataupu lena se i ou malamalama atili i ai, ia se i fai se talanoaga ma le Komisi, ia ona mafai lea ona tatou malamalama ma toe talanoa ai i se isi taimi.

Sa fai mai le manatu o se tasi o sui usufono mamalu, na avatu le talosaga a le latou itumalo i le SLC e oo mai i le taimi lenei e le iloa po o fea ua fai i ai, ia e faigata tele ona talitonuina se tulaga faapena, se i vagana pe a faapea ua omai ma aumai se faamaoniga o le tusi lenei sa ave i le SLC i le 2001, po o le 2002, po o le a lava, o le talosaga, afai o i ai ni faamaumauga o se kopi o tusi sa ave i le SLC ae le i i ai ma se tali atu, ia afio mai le sui usufono ma aumai i lou ofisa i le vaiaso fou, ae afai e leai, ia o le a faafaigata la aua o le a faapea mai foi le SLC ia le Matagaluega, e le i aumaia se talosaga, e faigofe foi i tagata ona o fai talosaga faapea mai, o le talosaga lea na ave i le 2007 po o le a lava, afai e leai se faamaumauga, ia ou te talosaga atu i sui usufono o lo o i ai ni tagata faapena, toe fai se isi talosaga ave i le Ofisa o le SLC ma insist i ai ina ia aumai se lisiti po o se kopi ua uma ona stamp ai i luga, ua receive e

le SLC ia le latou talosaga, pei ona fai atu, o le tele ia o tagata e mananao i fanua, tele foi tagata e avatu i ai fanua, ia ae le o faaaogaina tatau fanua. Ia o lo o tilotilo lava foi le tamaitai pule ma le ofisa o le SLC i se faiga, ina ia tau faamalieina ai le toatele o tagata o lo o naunau mai i ni fanua, ae afai ua manaomia ni fanua ia fai pea ni tusi talosaga, ia ona avatu lea ia ona aumai lea o le faamaoniga o le stamp, ia o la ua taunuu atu la outou talosaga ona faia lea i ai ni faaiuga mulimuli, ia e mafai ona outou ma le faamaumauga lea faapea, o lau tusi lea na ave i le tausaga lea ua tea o lenei lava e le i maua mai se tali, ua uma foi ona ou talanoa i le tamaitai pule e acknowledge uma lava tusi uma a tagata e avatu, ona iloa lea e le tagata o la ua faagaioi po o le a lava le tulaga o i ai, ae o la ua silafia e le tagata le tulaga o i ai fanua o le Malo. I le taimi nei e le o i ai ni fanua o faatau, o lo o tau tilotilo le Malo po o toe review ia policies i le faatauina o fanua, pei ona fai atu, e avatu foi fanua o le naunau o le Malo ia tofusua uma, ae i ai foi i latou ua fai foi a latou mea piopio, ia ona defeat atoa ai lea o le purpose na ala ai ona fai ia policies ia a le Malo e taumafai ia tufatufa atu nai fanua aemaise lava tatou mai Savaii ma tagata mai tua e leai ni fanua i totonu o le taulaga, ae o le a faagasolo lava i ai ia le review a le Matagaluega ma au nei i lea tulaga e taumafai lava ia faasoasoa le manuia, ae aua le maua e nai tagata toaitiiti.

Ia pei lava ou te lagona na ona pau na o mea sa tuu mai.

FOFOGA FETALAI: Malie lau Afioga i le Minisita o lo o i ai le mea e fia faamalalalama a le Afioga i le Taitaifono o le Komiti o Tupe Maua ma Tupe Totogi, tulai mai le sui usufono.

Susuga Hon Papaliitele Niko Lee Hang: Lau Afioga i le Fofoga Fetalai, ia faafetai mo le avanoa sa le fia faalavelave i le saunoaga faataupou a le Afioga i le Minisita, ae ona o lea e maitau atu ua faaiu mai lana saunoaga ae sa ou fesiligia ia faamanuiaga foi nei e tuuina atu i le aufaigaluega a le Malo, le vaega foi lea ua faamalolole tumau, ona o ni tuuaiga ua mafua ai ona faamalolole tumau, ona ou fesiligia lea o faamanuiaga, pe le tatau ona toe silasila i ai Malo, ona e maitau atu a faapea e faamalolole tumau ae o la e totogi atoa le totogi, toe faaoga ma le taavale, ae a alu alu la sailiiliga a le Malo e faamaonia le tuuaiga, ia pei o le tulaga lena. Ae pe le silasila la le Malo i se tulaga e faa.....

FOFOGA FETALAI: Ia se i tulai mai le Afioga i le Palemia, o lea ua maua lou finagalo le sui usufono mo Palota Taitoatasi, Susuga Hon Papaliitele Niko Lee Hang.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai o faiga faavae ia a le Malo, ma e mulimulitaia foi tulaga o le Tulafono, e taua le fautuaga ae o tagata e i ai foi o latou aiatatau o lo o puipuia e le Tulafono, ae taatia mai se i toe vaai i ai.

FOFOGA FETALAI: Ia se i faauma mai le sui usufono mo Palota Taitoatasi, ona tuu atu lea o le avanoa i le sui usufono mo Faleata Sisifo.

Susuga Hon Papaliitele Niko Lee Hang: Lau Afioga i le Fofoga Fetalai, faafetai. O le isi mea sa ou tuliloaina o le laugatasia lea o tulaga o faasalaga,

ona e le o toe po se lilo i le tulaga o lo o aafia ai le Faalapotopotoga lea o le SLC le Pulega ma le CEO, pei o tulaga.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga e aafia uma ai lava i tulaga na lea sa ou tali atu ai.

FOFOGA FETALAI: Ia o lea ua maua le tali, lafo maia le faatuatuaga lau Afioga i le Taitaifono i le Malo, o le a silasila totoa i ai ona fetuunai lea i le tulaga talafeagai e faafoe ai lea mataupu. Tulai mai le sui usufono mo Faleata Sisifo.

Tofa Lealailepule Rimoni Aiafi: Faafetai, faafetai i lau Afioga i le Minisita, sa le fia faalavelave o lena ua maea lau tali, malo ua matagofie lou tulai mai aemaise foi o tali na tuuina mai. E pau lava lea o le vaega lau Afioga sa ou fesiligia i le vaega lea o totogi o le PSC, na avatu ai le fautuaga malosi i lau Afioga, ona o lea ua e saunoa mai, e pei o se fautuaga mai le mea foi lea o le Salary Tribunal, lau Afioga i le matou talitonuga, o vaega nei e ogaoga ma siitaga maualuluga faapea, e na o le Kapeneta e i ai le malosiaga e fai ai, aua i lou silafia, o lea ua sii ese lava latou mai Matagaluega uma a le Malo, o lea foi ua saunoa lau Afioga e fai atoa Matagaluega, e le o le tali lea na tuuina mai, o le tali na tuuina mai, ua na o latou i le taimi nei ona i ai lea o le faamoemoega mo na o le Ofisa o Tupe ma le Ofisa o le Loia Sili i se taimi mulimuli ane, o lona uiga na o le tolu. Ua see ese la ma le finagalo o le Malo lea matou te talitonu i ai, ia tutusa tagata faigaluega uma. E faigata lau Afioga, a o le matou fautuaga, ia tagai manino i le mea lea, e te le toe fia... e tele le mafatiaga pe a faapea....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, taatia maia le mataupu o lo o laga se i toe vaavaai i ai i se taimi.

FOFOGA FETALAI: E faamalulu atu i sui usufono mamalu ua outou silafia o le tulai mai o le Afioga ia Lautafi, o le Matagaluega fou o lea faatoa amata ona tatou faataavale, ae lafo ia le faatuatuaga o lea ua tali manino le Afioga i le Palemia, o lea foi ua taumafai atu le Afioga i le Minisita fou e talitali finagalo o sui usufono na laga, ona tatou faapena lea ona fai. Ae masalo o le isi tatou Tala o le Tupe ua maeaea uma le.... O le a se isi mea Palu?

Afioga Hon Palusalua Faapo II: Faamalo lava saunoa i lau Afioga i le Minisita. Lau Afioga i le Fofoga Fetalai e puupuu lava lau fesili, leaga o lea sa laga i lau lauga le tatou maketi lea toetiiti uma. Po ua i ai se suiga i le tau o le galuega, aemaise foi o lea ua ou vaai i luga o le tafailagi a le Observer o lea ua toe faatau uamea o le galuega. Po o le mea ua supply e le Pulega lea a le ACC mea e fau ai le fale, a o lea na tender le galuega e faatino uma e konekarate. E pule a ia pe tali mai ae na ona ou faapena atu i lau Afioga.

FOFOGA FETALAI: O lea ua maua le finagalo o le sui usufono. E manatu taatia ia toetiiti uma le fale maua le tau. O le tulaga o lea e faafou ua

outou silafia le mea na tupu, na tatou amata mai i le \$40miliona lea ua... Palu, o lea ua malamalama le mataupu.

Afioga Hon Palusalue Faapo II: O lea ua e tali mai ae le tali mai le Afioga i le Minisita.

FOFOGA FETALAI: A foi lea ua ou fai atu o le Minisita o lea faatoa lua ona vaiaso. Ua e silafia lelei lava, e sili atu le update o au figures i le mea lea e malamalama i ai le Minisita. Ae taatia mai ia faapea. Ou te manatu o lea e malamalama lelei le mataupu, se i vagana ua e fia tali mai lau Afioga i le Minisita.

Afioga Hon LAUTAFI FIO SELAFI PURCELL: Lau Afioga, leai aua ou te lei faalogo lava o talanoa mai le Taitai o le Itu Agai ia te au i se maketi. E ese lava le mea na talanoa i ai a o lea ua faafesili mai ia te au. E leai e le i talanoa mai lava i se tau o le maketi, ma nei uamea ua faatau. O uamea na o uamea o la e totoe ua le toe faaogaina, a o la e ua toe faatau e maua mai ai tupe a le Matagaluega. A o le tau pe eseese le tau, e le i oo la i ai sou malamalamaaga i le taimi lenei. Ae faamalie atu i le Taitaifono o le Komiti ona o lea sa i ai mataupu na laga mai. Sa ou faapea ailoga o le PSC lea e faasaga mai i ai le saunoaga foi lea i mea ia o tagata e suspend.

O lea ua tali atu le Afioga i le Palemia, o le tali lava lenei. Ia, e faamalulu atu i lenei itula o le po pe afai ua i ai se leo o le Minisita ua sala, ae pei foi ona outou silafia, o lea e le i leva ona nofoia le nofoa, o lea lava e taumafai se i tau malamalama uma i Matagaluega ia e ono lea ua palalasi faatasi mai. Ia manuia tele lenei afiafi lau Afioga i le Fofoga Fetalai. Ia faamanuia mai le Atua i itula o totoe o le tatou Fonotaga. Ia manuia tele le faafofoga a Samoa. Soifua.

FOFOGA FETALAI: Malo. Faamalo saunoa i lau Afioga i le Minisita o le Matagaluega o Atinae ma Alamanuia. O ou mama na lau Tofa Lautafi, Alataua ma Samoeleoi, sauni e folau lou sa e faigata foi le tapuaiga aua le afio o e Vaiti ma le Vaimalae ma le va nonofo ai ma lea itu o le tatou Fale Alataua ma Samoeleoi, ia pati le po ma tapuaia le alofaiva o lo outou sui usufono. Faafetai i le Atua ua filifilia le auauna e tauaveina le igoa lelei o si o tatou itumalo. Ia tatou faamoemoe i le Alii, ia maua ni manatu ma ni lagona, fai se sao ia Manuvao aua le faafeagai ai ma le tautuaina o le tatou Palemene. Ia, ua tatou toe taunuu mai i le Matagaluega o lo o faatupeina uma le tatou Tala o le Tupe ia te oe le toe Ulutaia o le Maota, tulai maia lau Afioga i le Minisita mo Tupe Maua.

Tofa Hon TUILOMA LAMEKO (Minisia mo Tupe Maua): Lau Afioga i le Fofoga Fetalai, lau Afioga i le Palemia faapea le mamalu o lau Kapeneta, le paia maualuga o sui usufono o le Palemene, o e lava na faia mai le fuifui, aemaise le filifiliga toatasi a le tatou atunuu, o lea ua mamalu ai ma maualuga le Maota i Tiafau nei, o le Maota o le Faautugatagi a Samoa. Ae ua tulai atu e faaali foi se manatu e faatatau i le Tala o le Tupe ua i lumamea nei. I le vaaiga lautele i le Tala o le Tupe i lou sui usufono, o se Tala o le Tupe ua faia ma le faaeteete, O se Tala o le Tupe ua ou taua le faia ma le faaeteete ona o le formula o lo o faaoga , o lo o fai fuafua i mea foi o lo o tutupu i isi atunuu,

aemaise le taua i lou lava manatu, o le Tala o le Tupe ua tau mai ai le tulaga o le tamaoiga o le tatou atunuu. O le mea taua lea i lou sui usufono ona o le Tala o le Tupe o lo o faaalua ai vaega silisili ma le taua, aemaise le vaai i le tulaga lautele o le tamaoiga o le tatou atunuu pe a faatusatusa atu, e le gata i isi atunuu, ae faapea foi le lalolagi atoa i le tulaga o mea tau tupe.

Ma e le i toatele nisi sa faaali ni o latou manatu e uiga i le Matagaluega lenei o Tupe Maua. Ae o le Tala o le Tupe, e \$544miliona. Mai lea tupe tele o lo o fau ai le Tala o le Tupe, masalo po o le 80% na aoina e le Matagaluega o Tupe Maua. I le tulaga la i le vaaiga lautele, o se agaga faafiafiaina i lou lava sui usufono aemaise le faaiuga o le Tala o le Tupe pei ona tuuina mai o lo o faaiu i le tupe e \$4miliona i tupe totoe i le tuufaatasiga o tupe uma o le Tala o le Tupe, o lo o i ai le \$4miliona. O le mea la lea lau Afioga i le Fofoga Fetalai faapea sui usufono mamalu o le Maota, e le i faigofie pei ona ou taua e latalata i le \$80,000 po o le \$90,000 o le tupe na faagaoioi ai le tatou Tala o le Tupe sa ao mai i totonu o tupe maua a lo tatou Malo. Ma e tele ni galuega o lo o faia e le Matagaluega lau Afioga ma le mamalu o le Maota, ina ia mafai ai e le Matagaluega ona aoina tupe talafegai ma le faamoemoe o le tatou Malo. I le vaaiga lautele la, o lona uiga e tele ni galuega o lo o faia e manaomia ai le aoina po o le training mo tagata faigaluega ina ia mafai ona faataunuuina le faamoemoe o le tatou Malo ia maua mai tupe talafeagai e tatau ona maua mai lea taimi ma lea taimi aua le faamoemoe o le tatou Malo i le Tala o le Tupe mai lea taimi i lea taimi. E pei ona ou taua, e le i toatele nisi na fai mai ni o latou manatu i le matou Matagaluega. O le isi sa aumai lana faafetai i le Matagaluega, ae vagana se isi sa faailoa mai lona manatu, sa ia fesiligia ai le sao ma le amiotonu o nisi o aiaiga o lo o faataunuuina e le Matagaluega i le taimi o le aoina o tupe po o le tofogiina o tiute o mea i totonu o le Matagaluega. Na o sina au tala e faapenei atu i le na saunoa, o le a se i saili le tulaga e le faigofie le mataupu na e tuuina mai. E pau le mea ua mautinoa, o fesuiaiga mai lea taimi i lea taimi, aemaise le tiute ona o le taimi lea, o le taimi lea na faasa ai ona toe aumai ni siusiupipi i totonu o le tatou atunuu. Ae ina ua toe taga la ona aumai, o lea la na maua ai loa le fuafuaga e i ai la nai fesuiaiga na o le tiute. E faafetai ai foi i sui usufono na laga, e taua tele le mataupu ua laga. O lea ua ou faamaite atu le tulaga e agai i ai. O lona uiga o le taua o le a vaai i ai le Matagaluega, ia aua ne i i ai se tulaga e ono fesiligia ai le Matagaluega o le Tiute po o le Matagaluega o Lafoga i ni tupe ua fesiligia e tagata, ma e le tatau ona fesiligia, e tatau ona faia mea tonu e tusa ma le Tulafono.

E fia oo sau faamatalaga i le tulaga ua taua ai e nisi le tulaga o nogatupe. E eseese lava o tatou manatu. A o nogatupe, e tele ituaiga fuafuaga e fua i ai le talafeagai o nogatupe i lou iloa. Ma e leai lava se mea e eseese ai nogatupe a le Malo ma nogatupe a le aiga. O le mea numera tasi i le fuafuaga mo se nogatupe, po o le aiga po o le Faalapotopotoga po o le Malo foi, o lona ability to pay. O le mafai e le tagata, e pei foi la o le Malo. O le mea muamua e i ai, e le mafai ona faia, e mafai ona vaai po o le a le auala e mafai ai ona totogi se nogatupe. O lea ua silasila i ai i le tala lea na aumai, o lea e gafatia lava e tatou. Mai tupe maua e \$544miliona tupe maua masani lea. Mai le tupe lona, tusa po o le 20sene mai le \$1 lea e faaoga e totogi ai nogatupe a le Malo.

Lau Afioga i le Fofoga Fetalai, pei ona ou taua, e le i toatele nisi sa faaali ni o latou manatu i le Tala o le Tupe, aemaise le matou Matagaluega. Ae ou te faapenei atu, e tele le taimi ua alu o le Matagaluega i le faiga o aoga

aemaise lava o le agaga o lo o i ai, e feteenai foi ma isi atunuu i fafo ina ia mafai ona maua le tomai, e le gata i senior officers, a o e uma o lo o galulue i le Matagaluega o Tupe Maua.

Lau Afioga i le Fofoga Fetalai faapea sui usufono o le Maota, e pei ona ou taua, e le i tele ni mataupu na laga. Ona pau lava le agaga i totonu iinei, o le agaga faafetai.

E avea ai lenei avanoa ou te faafetai ai i le Ofisa Sili o Pulega ma le Matagaluega o Tupe Maua mo galuega tetele o lo o feagai ai ma le taumafai ona aoina mai tupe uma a le Malo.

Lau Afioga i le Fofoga Fetalai, ua maua foi lenei vaitaimi se i fai au sina au tala, e momoli atu ai le faafetai tele i se tasi o sui usufono mo Falealili, e faafetai tele atu ai i le paia maualuga o tupu ma ee o le itumalo, paia ia Alaalagafa ma lo la Nofo, ma Tauaga eseese ia Falealili seia oo i Susuga i Faafeagaiga o Ekalesia taitasi aemaise lava le mamalu o alii ma faipule o afioaga taitasi i totonu o Falealili. O fuafuaga uma ua feagai ai e le gata i nuu taitasi ae faapea foi i ekalesia eseese i totonu o le tatou itumalo. Ia manuia tele lau Afioga i le Fofoga Fetalai faapea le Palemia aemaise o sui mamalu o le Maota e pei ona ou taua, o tama lava na faia mai i le fuifui, e le faigofie ona avea ma faipule a ua filifilia e ala i le musumusuga a le Agaga Paia. Ia manuia lenei po. Ia soifua ma ia manuia.

FOFOGA FETALAI: Malo saunoa i lau Afioga i le Minisita mo Tupe Maua. O le tatalo foi a le Fofoga Fetalai ma le Palemene ia maua foi lou lagisoifua lelei lau Afioga i le Minisita, moomooga alofa foi e molimoli mo le Ofisa Sili o Pulega ma le Matagaluega e le faigofie, e fai sina tele o le Matagaluega ua tuufaatasia mea tau tupe maua a le atunuu, o outou mama na. O le paia ma le mamalu maualuga i le Sui Pule ma le Matagaluega i ona tulaga faalupe o outou lava o le tootoo e tua i ai le Sa o Samoa i le aoina o tupe maua aua lafoga ma tiute.

Tulai mai lau Afioga i le Tamaitai tasi o le Kapeneta, lau Afioga i le Sao Faapito po o le Minisita mo Faamasinoga ma Pulega Tau Faamasinoga.

Afioga Hon FIAME NAOMI MATAAFA (Minisita mo Faamasinoga ma Pulega Tau Faamasinoga): Afio ia lau Afioga i le Fofoga Fetalai ma le paia maualuga o le Maota Fono a Samoa, le mamalu o sui usufono i lena Itu i lau Afioga i le Taitai o le Itu Agai ma le Vaega a le Tautua. E faapea foi i lenei itu o le Maota i lau Afioga i le Palemia ma le Kapeneta ma Minisita Lagolago ma le Vaega e Puipuia Aiatatau a Tagata. Ua tatou usufono faatasi foi ma Ofisa Sili o Pulega o Matagaluega ma Faalapotopotoga Tumaoti. E faafetaia lava le agalelei o le Atua ua tatou aulia mai lenei tuneva o le po a o lo o faaauau pea la tatou galuega.

Lau Afioga i le Fofoga Fetalai, ou te lagona lava le agaga faafetai ona o le faamama avega o lenei Maota ia te au nei ma le Matagaluega ma le le tele o ni fesili e tuuina mai. E lua ni Matagaluega o lo o i lalo o lau vaavaaiga o le Matagaluega o Faamasinoga ma Pulega Tau Faamasinoga faapea foi le Komisi o Faiga Palota.

O nai mataupu sa laga i le Matagaluega o le Komisi o Faiga Palota, o le finagalo po o le augani mai pea o se tasi o sui usufono o le Palota Tutoatasi e tusa ai ma nisi foi o fuafuaga ua agai i ai le tatou Malo, aemaise foi ua taoto le tatou Tulafono Toe Teuteu mo le Faiga Palota o lo o ua faagasolo nei ma o

le a faamuta i le faaiuga o lenei Paeaiga le itumalo o le Au Palota Taitoatasi. Ou te lagona lava lau Afioga i le Fofoga Fetalai ma le mamalu o le Palemene, e le taumate o se lagona lea e le faateia ai o tatou uso o lo o la tauaveina le tofi o nei itumalo e pei ona sa sau ai talu mai ona Tutoatasi. E i ai lou manatu lau Afioga i le Fofoga Fetalai ma lou faaaloalo lava, atonu lava e toe foi mai le tatou mataupu o lo o faagasolo nei ma o lo o feagai ma lau Afioga ma le Komiti, atonu o le taimi tonu lea e toe talanoaina ai mataupu e pei ona saunoa ai le sui usufono.

O le tulaga lava o Faiga Palota sa faaalua ai se mau a le sui usufono mo Sagaga le Falefa e faapea o Aele o le a tuu atu i lalo o le latou itumalo o Sagaga le Falefa, ma e ono faatupulaia ai le faitau aofai o latou tagata palota ma ono tatau ai ona faatulai o i latou foi o se itumalo e tatau ona lua ni o latou Nofoa.

Lau Afioga i le Fofoga Fetalai, o le a ou tali atu ma le faaaloalo, se i o tatou mataituina pea le tatou Faiga Palota o le 2016, po o le a le moni o le mau a le sui usufono. Ou te manatu e le o toe avanoa le Teuteuga o le Tulafono o lo o faagasolo nei ma le mau o lo o aumai e le sui usufono mamalu.

Ona pau lena o nai manatu i le Komiti o Faiga Palota, pau o lea e momoli atu ai le faafetai i le Komiti o Tupe Maua ma Tupe Totogi.....

FOFOGA FETALAI: Malie lau Afioga i le Minisita se i tuu atu lava le avanoa i se tasi o sui usufono o le Au Palota Taitoatasi, Afioga Maualaivao Petter Ah Him.

Afioga Maualaivao Pat Ah Him: Faafetia lava i lau Afioga i le Fofoga Fetalai mo le avanoa. E le fia faalavelaveina le saunoaga a le Afioga i le Minisita, pau lava le agaga ona ua tuneva le afiafi ae ua ou tulai atu e momoli lau faafetai ona ua afea ma amanaia so matou leo. O lo o toe fotuai mai le mataupu ma faapena ona toe iloilo ai le tofa ma le faautautaga ae faafetai mo lou finagalo faaalua i lenei afiafi.

Afioga Hon FIAME NAOMI MATAAFA: Ona faaauau ai lea o sa matou faamatalaga e faafetaia ai le Lipoti a le Komiti o Tupe Maua ma Tupe Totogi. Ou te manatu e talia ma le fiafia fautuaga o lo o tuuina mai mo le vaega lea o le Komiti o Faiga Palota ma le vaega o le Matagaluega o Faamasinoga ma Pulega Tau Faamasinoga.

O nai mataupu sa laga mai i le Matagaluega o Faamasinoga ma Pulega Tau Faamasinoga, sa fesiligia le fesoasoani foi lea o le legal aid ma aumai ai se mau e faapea i lau maitau atu i le saunoaga a le sui usufono e pei o lo o o tuu tasi atu mataupu i le Supreme Court po o mataupu o lo o tuu atu e le Faamasinoga Maualuga le fesoasoani lea. Lau Afioga i le Fofoga Fetalai, pei o le faiga faavae lea sa sau ai le tatou fesoasoani lea faaletulafono i le tele o tausaga ae taua le lagaina mai e le sui usufono aua o lo o vaavaai foi i ai le Matagaluega i le faaogaina o lea fesoasoani ma toe auiliili faiga faavae o lo o faaogaina ai.

O le isi itu na ou maua atu foi i le Lipoti a le Komiti o Tupe Maua ma Tupe Totogi, sa talanoaina le Community Law Centre atonu o se taimi e le o mamao tele o le a faaulufale mai ai ma faataatia i le Laulau a Fono a le Palemene se Tulafono e faavaeina ai se Community Law Centre. O ia ituaiga Law Centres, o le isi lea auala e fesoasoani ai mo le lautele o tagata o le

atunuu i nisi o faafitauli o lo o feagai ma i latou, aemaise o le faafeagai ai ma Tulafono po o soligatulafono.

Atonu ua avatu lea faamatalaga e faaopoopo atu i le mataupu na laga mai i le Legal Aid ona o vaega uma nei o lo o vaavaai i ai le Matagaluega aemaise o le fautua malosi o le vasega o Faamasinoga i auala e fesoasoani atu ai i tagata lautele o le atunuu i manaoga faa-Loia e fesoasoani ai mo i latou ma o latou faafitauli.

O isi mataupu o nai faitioga laiti i le le tali mai o le Matagaluega i tusi, o lo o ua faamauina ma o le a apopaoaia pea le aufaigaluega pe a faapea o le lape o i ai i le aufaigaluega. Ae a faapea o tusitusiga o lo o faataau i le vasega o Faamasinoga, e i ai lava le faaeteetega i fetusiaiga ma le Vasega lea, aua o le tele o mataupu o lo o faagasolo pea i luma o le Faamasinoga, na o le Vasega lava o Faamasino o lo o tagofia nei mataupu.

E faamauina foi le agaga faafetai ona o lo o maitauina e nisi o sui usufono sa aumai le fautuaga. O lea ua faatinoina le faaogaina o masini pueleo i totonu o a tatou potu Faamasino e fesoasoani ai i faamaumauga.

Lau Afioga i le Fofoga Fetalai, na o le pau ia o nai mataupu sa laga mai. Ia manuia tele lenei po ma le Fono o lo o faagasolo. Soifua ma ia manuia.

FOFOGA FETALAI: Malo faafetai saunoa i lau Afioga i le Minisita, ou te manatu ua manino ma malamalama atugaluga o sui usufono aemaise o le tulaga tau Faiga Palota, le sui usufono o le Au Palota Taitoatasi ia toa pea le tai, lafo mai le faatuatuaga o lo o faafofoga atu le Palemia, Taitai o le Itu Agai ma au nei, o le a silasila totoa i ai le Komiti ona tatou toe felogonai foi lea ma tatou tatalo i le Atua, po o fea o i ai le Agaga o le Atua ma lona faasinomaga e ala i lenei Tulafono taua, ae le maligi fua le afu o lo oulua tautiga. Ou te talitonu e silasila le Atua i le galuega sa faatino atoa ai ma le naunautaiga o le itumalo.

Tulai mai lau Afioga i le Sui Palemia o lea ua lamalama faaiu le laina a le Kapeneta ona sosoo ai loa lea ma le Afioga i le Palemia.

Tofa Hon FONOTOE NUAFESILI PIERRE LAUOFO (Sui Palemia): Faafetai i lau Afioga i le Fofoga Fetalai, le tapuaiga a Samoa e afua mai i ou tumutumu mauga maualuluga seia paia ou vanu loloto. O ou paia e faaifo gata ae ou te manatu ua taoto a o se ala oo a o se pa foi ua le solo. Ona ou faapea lea, o le a le oo i ai se upu a le auauna i lenei itula o le afiafi aua e leai lava se tagata e toe sagolegole pe utuvai tofo i ai. O le itupa o gafua le au ositaulaga ma auauna tofofi a le Atua ma la latou galuega faifai pea o le tatalo i le ao ma le po aua se manuia o Samoa. Faafetai ma faamalo le tatalo.

Lau Afioga i le Fofoga Fetalai, na ona toe faamanino atu le tulaga lea o le sueina o a tatou tusi. O Matagaluega uma a le Malo ua maea ona sueina tusi e oo mai nei ia Iuni 2013. O le 93% o Faalapotopotoga Tumaoti ua maea foi ona sueina tusi e oo mai i le aso 30 Iuni 2013. Ua i ai le fuafuaga e pei ona ou taua i le aso ananafi, o le a faaoo mai i le Maota Fono lenei i le masina o Novema nei Lipoti e lua. O le Lipoti mo le tausaga faaletupe e faaiuina i le aso 30 Iuni 2014 o lona uiga o le faaiuga o lenei masina, ua i ai le faamoemoe o le a tuuina mai i le Maota Fono i le masina o Ianuari 2015 po o le ono masina o lumanai nei.

Lau Afioga i le Fofoga Fetalai, ua savalia nei ma le fa tausaga o lo o faagasolo pea le polokalame o le capacity building po o le reform lea i le

Ofisa o le Pule ma Suetusi Sili ma ua tulai mai la i se tulaga lelei le faasologa o galuega e pei ona ou talanoa atu. Ua i ai foi nisi o fuafuaga fou e pei ona i ai i le lagolagosua mai lea o Ofisa Suetusi tumaoti ma faapena ona maua o latou avanoa e tauofo mai ai i nisi o galuega a le Ofisa, ma ua faamanuiaina ai nisi o Ofisa na e pei ona ou fai atu. O le tulaga lena o lo o i ai le tulaga i le sueina o tusi.

Ou te masalo po o se vaitaimi po o le 20 tausaga talu ai a o i ai le Matagaluega tuai foi lea sa taua o le TCI, o i ina na amata ai ona faatalanoa mai le mea lea e tau o le one stop shop. O se nofoaga e tasi foi lea e taulai uma i ai talosaga a le aufaipisinisi i mea uma po o mataupu tau pisinisi. O lo o taumafai pea ma e ui lava la ina oo mai i le taimi nei e le i tasi se Matagaluega e faatino ai, ae ua tele le suiga pe a faatusa i lena vaitau. Ua tele le tulaga o le faafaigofieina o le faatuina po o le faavaeina o pisinisi i totonu o le atunuu ma i latou o lo o i ai lo latou naunau e faafaigaluega a latou tupe i totonu o le atunuu ma faatuina ni a latou pisinisi. O le tulaga la o i ai ua faafaigofieina le tele o nisi vaega.

Ou te tautala faapitoa mo le Matagaluega o Pisinisi, Alamanuia ma Leipa. Ua matua faigofie ona faamauiina se kamupani fou e pei ona i ai le tatou Tulafono fou e le i leva atu tausaga talu ona pasia, ma ua mafai lava ona fai i luga i le computer le tulaga lea. Ua faafaigofieina ona maua faamatalaga e auala lea mai luga i websites po o upega tafailagi a le Matagaluega, aua e maua uma ai faamatalaga i tulaga ma aiaiga o le Tulafono e manaomia ona faamalieina ona maua lea o le laisene po o le pemita. E pei foi ona taua e nisi o sui usufono le tulaga o le foreign investment certificate, o tulaga na o lo o galulue i ai le Matagaluega ma ua sili atu ona faafaigofie i lenei foi vaitau.

FOFOGA FETALAI: Malie lau Afioga i le Sui Palemia se i tuu atu le avanoa i le faauilavea a le sui usufono mamalu.

Tulai mai le sui usufono mo Faleata Sasae.

Tofa Aveau Tuala Lepale Niko Palamo: Faafetai lava i lau Afioga i le Fofoga Fetalai mo le avanoa, e faafetai foi i le Afioga i le Sui Palemia mo le mataupu. O le tasi lenei o mataupu sa taua i lau lauga ona o le va lea o Matagaluega i le faatinoina o le laisene faigaluega lea ma le Immigration i le aveina o le pemita nofomau i le tagata lea.

Silasila lau Afioga i le Fofoga Fetalai, o lalo i le tuutuuga lea e saunoa ai le Afioga i le Minisita po o le Afioga foi i le Sui Palemia, e mafai e le tagata ona sau i le 60 aso foi lea free visa, lea e sau ai iinei i le vaega lea, ona sau lea apply le laisene lea e fai ai lana pisinisi iinei ona mafai lea ona nofo iinei. Ona ave lea i le vaega lea i le Immigration e faatino ai le vaega lea. O lou manatu e tatau ona toe foi le tagata lea, e alu ona toe sau lea e nofomau i le laisene. E pei o le vaega lea na ou fesiligia ai i le va lea o le Immigration ma le pemita lea e faatino e le Matagaluega lea.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, e eseese mea ia e lua. E ese le pemita faigaluega ese foi le pemita nofomau. O le mea la lea na ou talanoa atu ai, o lea o lo o taumafai lava se faiga foi lea e sili ona faigofie e galulue faatasi ai Matagaluega uma. E mafai ona maua lou pemita e faigaluega ai aua e tuuina mai e le Matagaluega o le MCIL pe afai e faamalieina aiaiga o le Tulafono o lo o faagaioi e le

MCIL, a o le tulaga i le pemitā nofomāu, o le mataupu lena ma le matafaioi a le Immigration aua e i ai foi le latou Tulafono o lo o galulue ai. O lea e maua atu le uiga ma le agaga o le finagalo e pei ona aumai i le mea foi lea e tau o le one stop shop, a o lea ou te fai atu e fai sina lavelave o Tulafono, a o lo o galulue pea i ai Matagaluega nei mo le faafaigofieina ona vave maua ma le taimi.

O le tulaga lena, pe maua lou pemitā faigaluega, a le maua lou pemitā nofomāu e le mafai lava ona e nofo iinei e pei o le mea lea e te saunoa mai ai.

Tofa Aveau Tuala Lepale Niko Palamo: Lau Afioga i le Fofoga Fetalai.....

FOFOGA FETALAI: Se i toe tulai mai le sui usufono.

Tofa Aveau Tuala Lepale Niko Palamo: E faamalulu atu i lau Afioga i le Sui Palemia. E leai, o le mea tonu lava lea na ou fesili atu ai ona o le mea lea e tupu i le process lea, o lea o le a muamua ave le laisene e fai ai le pisinisi i totonu o Samoa ae e le i maua se pemitā e nofomāu ai. Ona avatu loa lea o le laisene lea e pei ua faafaigofie ai ona fai tuutuuga a le vaega lea. O le mea lea e ala ai ona ou manatu e tatau ona toe tagatagai i le vaega lea ina ia fai muamua le pepa nofomāu pe talia, ona faatoa ave ai lea o le laisene lea i ai. E pei o le galulue faatasi lena o lea ou te taumafai atu ai.

FOFOGA FETALAI: O lea ua maua le finagalo o le sui usufono.

Tofa Hon FONOTOE NUAFESILI PIERRE LAUOFO: E pei o le tulaga lena o lea sa tau faamatala atu ai i le galulue faatasi o Matagaluega aua o lea e maua lelei atu lava le uiga o le mataupu e pei ona aumai, a o le tulaga lena o lo o i ai o lo o galulue faatasi ma felagolagomai i le tulaga lea i pemitā ia e lua.

Lau Afioga i le Fofoga Fetalai, o nisi o tulaga o lo o faaauau pea taumafaiga a le aufaipisinisi ma le au gaosi oloa aua le auina atu o oloa i Niu Sila. E manaia finagalo ia sa faatu mai mo se nofoaga i Niu Sila e faatauina ai a tatou oloa e gaosi i Samoa nei. O tulaga ia ua leva foi ona silasila i ai le vaega lea i Asosi tumaoti e pei o le Sosaiete a le au gaosi oloa faapea foi le Faalapotopotoga a le Aufaipisinisi. O lea e i ai le faamoemoe masalo po o le masina fou o le a tatalaina ai le potu e faali ai oloa gaosi i Samoa. O lea e maua le avanoa e amata ai i le Maota Samoa po o lo tatou maota foi lea i Aukilani e faatalitali ai lo tatou fale lea o lo o fausia nei i Magele, ona fuafua lea po o a ni fuafuaga a le Malo i se tulaga e i ai pe a oo atu i le taimi lena pe maua ai se avanoa.

O le agaga lea e i ai i le au gaosi oloa ia i ai se nofoaga po o se faiga ina ia faaauau ai pea le faalauiloaina o oloa Samoa, aua o le mea lena o lea e matauina e fai sina taugata o le faaalu i vaiaso uma i nusipepa po o leitio faasalalau ma faiga faapena. A o se faiga e tau faafaigofie ma fesoasoani i le au gaosi oloa lea ua i ai le faamoemoe lea mo se nofoaga faapea. O lea e fuafua masalo po o le masina fou o Iulai ona tatala lea o lena faamoemoe.

O isi uma fesoasoani tau pisinisi o lo o faaauau pea fesoasoani a le Malo po o sao i tulaga i pisinisi laiti, faapea foi fale gaosi oloa i le tulaga foi lea sa

saunoa ai foi le Afioga i le Minisita mo Faatoaga ma Faigafaiva i le tulaga tau value adding. O lea sa faamatala le tulaga i le popo, le faaaogaina o le popo ma oloa eseese e mafai ona gaosi mai i le popo. O le tulaga faapena o lo o taumafai foi i ai le au gaosi oloa ma le aufaipisinisi e uunaia tulaga faapena ina ia taumafai ai ona tatou see ese ma le tulaga lea o le ave o a tatou faaeleeleaga ia e sii atoa i fafo, ae taumafai e gaosi iinei pe process i nisi ituaiga oloa e maua mai ai, ona faapena lea ona tele ai le tupe e maua mai ai i lo tatou tamaoaiga.

Lau Afioga i le Fofoga Fetalai, o lenei ua maua le avanoa e avatu ai foi se upu faamaise a lenei itumalo ma lenei sui usufono i le tuua o le Malo.....

FOFOGA FETALAI: Malie lava lau Afioga i le Sui Palemia. E i ai se isi mea Aveautau?

Tofa Aveau Tuala Lepale Niko Palamo: Ua ou faalogo atu o le a faaiu le saunoaga a le Minisita, ae i ai le isi mataupu taua lea sa ou laga i le vaega lea o le lisi faaleoleo po o le reserve list foi lea e i lalo o le Tulafono lea. E pei ona silafia, o le vaega lea e faaleoleo mai i pisinisi tai pei o le aufai pasi, o taavale laiti poo taxi, o rental cars, o oloa faatau taitasi ma ili laupapa. E i ai la vaega o le lisi faaleoleo lea o lea ua fai e tagata e le o ni tagata e nonofo mau i totonu o Samoa. E tai pei la o oloa faatau taitasi ma taavale totogi foi ia o rental cars aua e pei ona silafia, ua i ai car dealers ia e iinei i Samoa ua amata ona rent a latou pasi ma rent, o a latou taavale foi ia ae e le i lalo o le Tulafono lea e pei o le lisi faaleoleo lea e taatia mai i totonu o le Tulafono lea e puipui ai tagata Samoa i pisinisi ia.

FOFOGA FETALAI: O lea ua maua atu lou finagalo. Se i tulai mai lau Afioga i le Sui Palemia.

Tofa Hon FONOTOE NUAFESILI PIERRE LAUOFO: O lea ua maua atu. O le tulaga lena o lo o mataitu pea e le Matagaluega, o tulaga o aiaiga o le Tulafono lea e i ai le tatou reserve list aua o le Tulafono lena o lea foi e issue ai le foreign investment certificate, a o tulaga faapena o lo o mataituina ma ua i ai foi isi pisinisi ua maua e le Matagaluega. O le talosaga afai o i ai ni pisinisi faapena o e silafia, ona logo mai lea o le Matagaluega ae alu i ai se asiasiga a le Matagaluega se i sailiili vaega na. E pei o le tulaga lena e i ai, a o lo o faagasolosolo pea asiasiga a le Matagaluega ma faatino ona tiute, a o kamupani uma lava o kamupani ua faamalieina le Tulafono ua tuuina atu i ai laisene pe ua tatala i ai avanoa e faatino ai pisinisi ia, ae afai la o i ai ni pisinisi faapena, o le talosaga ia vave logo mai le tatou Matagaluega ona faapena lea ona asiasi i ai.

Lau Afioga i le Fofoga Fetalai, e pei ona taumafai atu se upu faamaise i le aiga faanoanoa o le Afioga i le Minisita Lagolago o le Malo. O la matou tatalo ia tafi mala le faiga malaga a le Afioga i le Minisita Lagolago, Tofa Tuiloa ma ia maua sona nofoaga tumau i lo tatou nuu o lo o i le lagi.

Faafetai i lou itumalo i lau tapuaiga aua ou te manatu o le a ou le oo i ou sa ma ou faiga i lenei itula o le afiafi aua o ou paia, o sa ma faiga e le avea aua o lena o lo o outou tausima ma o lo o i outou aao. O le manatu lea, faafetai i la outou tapuaiga ma la outou tatalo aua le tauaveina o lo tatou nofoa i le Maota Fono o le atunuu.

Lau Afioga i le Fofoga Fetalai faapea foi le Afioga i le Palemia ma le Kapeneta, o Minisita Lagolago, e faapea foi lau Afioga i le Taitai o le Itu Agai faapea sui usufono mamalu o lena Itu o le Malu, o fala lava e lafo i luma o itumalo taitasi aua upufai o lo tatou Malo. Ua faamalo faafetai. O lea ua tatou taunuu i le siui o le Tala o le Tupe i lenei tausaga faaletupe, ua faamalo lava ma ia agalelei le Atua.

Ia faamanuia le Atua i le aufaigaluega a le Malo o le au galulue, ia folau i lagima le tapuaiga a Samoa, soifua ma ia manuia lenei afiafi.

FOFOGA FETALAI: Malo, faafetai saunua i lau Afioga i le Sui Palemia po o lau Afioga foi i le Minisita mo Pisinisi, Alamanuia ma Leipa aemaise le faafofoga a le Matagaluega i ona vaega eseese.

Tulai mai lau Afioga i le Palemia, e talitonu o lea ua tinitauao tali a le Kapeneta, ae faamuliai mea uma i le tali a lau Afioga i le Taitai o le Malo.

Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Ona ua vela le fala, aua foi le poia Faleolo. O le lava ua fia moe, tofa pea.

O le tele foi o mataupu sa laga ua uma lava ona ou tali atu i ai, ae ia outou alolofa foi o lea faatoa fai lau lauga faataupou, e fou foi lou tulaga o lo o ou tulai atu ai nei, o lea foi e tau faataitai.

Lau Afioga i le Fofoga Fetalai, o lea ua uma ona sausaunua le tele o sui usufono ma o le a toe agai tasi lava i le Tala o le Tupe. Ou te manatu e tatau lava ona ou toe pai puupuu i ai ma fai ai nisi faamatalaga ina ia fesoasoani i lenei foi Tala o le Tupe o lo o tatou faatalanoaina. E pei lava ona silafia ua uma foi ona ou talanoa atu i le taeao analeila i le tapenaina o le Matagaluega o Tupe o le Tala o le Tupe lenei, e le i soona faatapepeina ona fai. Ua masani lava latou i le tapa o fautuaga ma Tala foi o Tupe e tatau ona tapena e le Matagaluega e tusa ai o le latou foi matafaioi ona avatu lea latou talanoa faatasi e fuafua i tulaga e tatau ona mafai ona faatino ai fuafuaga e tusa ai o tupe e mafai ona maua, ona aumai foi lea i le Kapeneta toe fai ai le isi galuega, ona aumai foi lea i le Palemene nei ma galue i ai le Komiti. O lona uiga la, e tele lava galuega sa fai ona faatoa tatou talanoa ai lea. E le o na ma le laina ua oo foi i ai upu o le Tala o le Tupe o le tausaga fou e \$722.9miliona. ua fai si pau mai le tausaga o le a maea nei e \$784. Ma e fulisia lava lea pau tele i le tulaga ua maea le tele o galuega sa faatino e le tatou Malo e faavae i fesoasoani mai fafo. A outou silasila i ai le faatulagaga o lo o aumai i le Tala lenei o le Tupe, o fesoasoani lava ia mai fafo i le tausaga o le a maea nei e \$244miliona, grants, a o lea ua pau i lalo i le \$178miliona.

O le manaia ia o le faataotoga mai e le Matagaluega o Tupe, ina ia manino ai galuega ua uma ona faatino, lena o lo o manino lava ma faatulaga atu i le itulau 13 faa-Roma ona silasila lea i ai i le lisi tele lava o fesoasoani na aumai, ma o lo o faaulutala, “Cyclone Evan Funding, e \$103miliona”. Lena o lo o lisi atoa mai ai lava i le 13 faa-Roma ina ia manino ai lea o lo o faatulaga atu lava i totonu o le Tala o le Tupe e lelei ona silasila i ai ona sa tele lava ina ou maitauina le tele o saunouaga pei e faaamuamu i upu ia e avatu i le lauga. Ae leai lava se mea o natia, o lena e lisi lelei i totonu o le Tala o le Tupe i le faamatalaga i luma vaegatupe ua tuuitia i le tausaga lenei. O lea la ua manino lea mea, o le \$722miliona, ona sagai loa lea o le Tala o le Tupe e

vavae le vaega mo le faatupeina o le vaegatupe mo le taimi nei mo le tausaga o le Tulafono ma le tulaga faaleoleo. O le a le mea ua faamuamua ai le vaegatupe mo le Tulafono, lea o lo o faalupe – statutory expenditure. E i ai le mafuaaga, e le i soona tuua i ina. O le mafuaaga ua faatulaga muamua ai lava, ona o vaegatupe ia o lea e tau ai le mamalu o le Malo ma le mamalu o le atunuu leni o Samoa. O le mafuaaga lena o lena e faataatia mai ai i le tulaga maua o lo o lisi mai ai aitalafu i tulaga faava o Malo, totogi o tulaga tofi mamalu. O i la i le vaega muamua lena o lo o tusia mai ai le \$88miliona, silasila i le faamalamalamaina o lo o aumai i le itu i luma o le Tala o le Tupe itulau i le Roma 1, lena e amata lava i le Statutory Expenditure, vaegatupe faaletulafono. O i o lo o tau ai le mamalu atoa o le Malo. O lona uiga e muamua lava ona foia le mea lea. Ona sosoo mai loa lea ma vaegatupe mo le tausiga, tausiga o Matagaluega, faagaioiga o le Malo, totogi o tagata faigaluega, pepa, telefoni ma mea faapena. Ona faaiu loa lea i le tupe le i fuafuaina i le taimi e le mailoa ai mea tutupu, le \$14miliona lena o lo o i ai. O fea e maua mai ai le \$14.7miliona lea?

I lalo o le Faavae, mai lava i le amataga sa i ai le vaegatupe i lalo o le Faavae e faaigoa o le unauthorized, ona toe teuteu ai lea e le Kapeneta le vaega lea o le Faavae e toe siitia i luga i le tolu pasene. O i la e i ai ni vaega faaleoleo i ni mea e tutupu faafuasei, po o ni vaegatupe e le i oo i ai le mafaufau o le Malo. O lea la e faatulaga mai ai le \$14miliona o le 3% lena i lalo o le Faavae. Ae maua le 3% lena i lalo o le Faavae, ae maua le 3% lena i le faatele i le vaegatupe o lo o faavagavaga mo le tausiga lena e maua mai ai le \$14.7miliona lena, ona maua ai loa lea o le vaegatupe alu lea e \$595miliona. O vaegatupe la nei o lea e faaigoa e economists o mea o consumption expenditure. E le o ni tupe mo le atinae. A oo la ina fuafua le Tala o le Tupe, o i tonu lava e agai i ai mafaua o le Matagaluega o Tupe. Afai e fia atiae le atunuu ona taumafai lea e confine le consumption expenditure, e taofiofi ina ia tele se vaegatupe mo le atinae. Aua afai ae ai uma i le mea lea, le leai se atinae a se atunuu e maua mai ai. E i ai atunuu a vaai nei i ai, o le tele ia o tupe a latou e maua, ae goto uma lava i totonu, ae o atu i auala, e malepepepe auala. Aisea? O le le usitaia o Tulafono taua ia i le faatulagaga o Tala o Tupe, ina ia lava le seleni, ona o atinae o i ina e tupu ai le tamaoiga ma mafai ai ona siitia le soifua o tagata o se atunuu. O lea la, a toese la le \$595miliona mai le \$722miliona, ona totoe ai lea o le ova e \$127,000. Na pau lava la lea o le nonogatupe e mafai ona faagaaga mo le atinae. E leai lava se isi mea. Ona faatalanoa loa lea e le Matagaluega o le Tupe ma Ofisa Sili o Pulega o Matagaluega eseese a le Malo. So, e faigata tele ona taofiofia le atinae i lalo i le \$127miliona, ona ua tulai mai, o le atinae lea ua fautuaina, ua matua fautuaina, e \$196miliona. O lona uiga ua \$69miliona ua sili atu ai le atinae nai lo tupe ia na totoe mai assumption expenditure. Ia, ona liliu loa lea o le Matagaluega o Tupe, o fea la e saili mai ai le \$69.1miliona lea? A outou silasila i le itulau 10 faasolo atu ai i le 13, 14 ma le 15 faa-Roma, lena o lo o auiliili mai ai i ina le vaegatupe lea e \$73miliona o tupe mai nogatupe mama le tului.

A silasila la i lalo i le itulau 14, ona outou silasila lea i ai mo sina faataitaiga o le \$73miliona lena, lena e tau mai ai i ina, Education Centre, Matagaluega o Aoga, e \$2.2miliona. O le Matagaluega o Faatoaga, \$4.5miliona. O le tulaga i le Malosiaga Tau Eletise e \$28miliona, Communication e \$4.8miliona, ona faasolosolo ifo lava lea i lalo i le Matagaluega o le Soifua Maloloina se i tau

lava i lalo ona maua ai lea o le \$73.6miliona. A tilotilo la i ai, o le taua ia o le faatulagaga lea. Aisea? E leaga o lea e te vaai i luga i le 2014 ma le 2015, a o lea foi e i ai vaegatupe i le 2013/2014. O le a le mea lea e tau mai i i? O lea e tau mai i i, o mea o atinae faaauau lea sa ou tautala i ai analeila, o atinae faaauau, e le o ni nogatupe fou. O atinae faaauau lea e i ai le \$73miliona lea. Aisea? Aua foi e sa... a le falemai lale? Ua fia nei tausaga o fai? E seasea i ai se atinae e uma i totonu o se tausaga faaletupe. O le ala lena o lea ou te maitauina ai pea o lo o tele lava le nunu i le faapea mai, o aitalafu fou. E le o ni nogatupe fou, ae matua manino i totonu o le Tala lena o le Tupe i lo outou mamalu. Lau Afioga i le Fofoga Fetalai, o lea la ua aumai le \$73.6miliona lena ona toese mai loa i le \$69miliona, totoe ai loa lea o le \$4.4miliona lea e faaupu i e faaperetania, o le cash surplus, o le tupe faasili. O le a la le mea e taua ai le mea lea o le cash surplus? A vaai i ai officials o isi Maloa ona faapea lea, e taua tele le faavae o paketi a Samoa, e i ai lava le surplus. O le taua la o le surplus lea, a alu alu foi ua i ai ni mea ua moomia, se extra funds, e mafai ona faaoga i ai le surplus lea i luga atu o le \$14.7miliona lea e sau i luga o tulaga o mea o atinae e le i fuafuaina. O le mea la lea o lea tatou te faalagolago i ai i taimi pe a agi mai se afa faafuasei, a o lea e i ai le mea tatou te tagolima i ai.

Lau Afioga i le Fofoga Fetalai, a toe re-budget la ma toe restate ma toe faatulaga ina ia faigofie, o le tulaga lena o a tatou tupe maua lea o le a faagasolo ai nei le galuega i le tausaga lena, e \$796miliona toese le aofaiga o tupe alu fuafua e \$792miliona, ona totoe ai loa lea o le tupe faasili e \$4.4miliona. O le toe restate lena o le tatou Tala atoa o le Tupe.

Ona ou agai loa lea i le mea lea sa ou talanoa atu ai analeila. O mea o nogatupe e mama le tului. O Samoa, o le sui faavae o le Faletupe o Asia mo le atinae, faatu le faletupe lea i le tausaga e 1966. Na o Samoa sa tutoatasi i le taimi lena. O Fiti, na tutoatasi i le tausaga e 1970 ona faatoa avea foi lea ma sui faavae o le Faletupe o Atinae.

O Papua Niu Kini o le 1975 ona mulimuli mai loa lea o isi Malo e mulimuli ona avea ai lea o i latou ma sulifua o le Asian Development. E i ai le faitotoa po o le faamalama o le shot widow o le Faletupe lena e mafai ona aitalafu nono mai ai tupe. O le amataga e 30 tausaga pe afai o oe o le atunuu e maulalo le tamaoaiga. O le tausaga 1972 na tatou ulufale atu ai i le Faletupe o le IMF, International Monetary Fund. O le 1971, 1973 po o le 1972 na tatou ulufale atu ai i le Faletupe o le Lalolagi. O le Faletupe o le Lalolagi e tolu vaega e aofia ai le IMF, World Bank, IFC, International Finance Corporation ma le Economic Development Institute. O le Institute o le policy lena e faatalanoa ai mataupu loloto e fuafua ai nonogatupe e fesoasoani e ave i atunuu. Mulimuli ane o le a ou talanoa i le mea lena leaga e taua tele fuafuaga lena sa ou i ai i totonu o le EDI i le tausaga 1973. O lea la ou te malamalama ai i faiga faavae a le World Bank, o le ulufale au lea o tatou maua ai lea o le avanoa i fesoasoani e lua, e fesoasoani i le shot window a le World Bank e faasau ai fesoasoani e mama tului.

O tatou nonogatupe i le amataga e ¾% i lalo ifo o le pasene e tasi. O le tausaga e 1974 na ou alu ai ma matou feiloai ma faamaea le fatalanoaina o le nonogatupe lea sa faatino ai le auala lea e alu atu iinei e alu i tua i Siumu. O le nonogatupe muamua lena a tatou mai le World Bank ae sa faasau i totonu o shot window le faamalama lea e sau ai nonogatupe e mama le tului toe umi le taimi e totogi ai, e sau ai ma le 10 tausaga e leai se tului ae na o le i totonu ae

leai se vaega o le principal e totogia. O le IMF na fulisia i le tulaga o le fesoasoani mai taimi e afaina ai lo tatou atunuu ma ua leai se tupe faaagag e oka ai a tatou oloa, a o i ina lea na tatou sulufai i ai ina ua bankrupt lo tatou atunuu i le tausaga 1983. Ona faataoto ai lea o le tatou polokalame na matou faia ai fesooaiga ma le feutagaiga ma le IMF ona ua matua tele le faaletonu o le tatou atunuu.

Ua ou tau atua nei mea ona o le amataga lena o faiga faavae i mea tau tupe, tatou te faaogaina nonogupe nei e mama le tului. O le ala lena na ala ai ona tele atunuu na matua afaina i le tulaga o debt services, ae na mama le tulaga lena ia tatou. Ae vagana ona ua tatou nonofo lava tatou ma faatino ni fuafuaga ona tatou toe lavevea ai lava lea o tatou ona o faiga faavae sa faatino. O lea na matua afaina ai tatou i le tausaga 1979, 1980, 1981, 1982, masalo e manatua pea e le tatou atunuu le tausaga nei na maua pe na tele ai, ona pau lava nei o mea na tatou vaai ai o patuamoa ma le tele o faleoloa ua matua gaogao i i. Na sosoo ai loa ma le mea lea na tupu o le Savali Tetee a le aufaigaluega a le Malo. O le Savali Tetee lena na mafua ona ua le mafai e le Malo i lena taimi ona tali atu i talosaga a le aufaigaluega mo se siitaga aemaise ua lalata i le Faiga Palota. O le faigata ia i le Faigamalo ona o policies sa sau ai le Malo i lena taimi. O faalavelave nei na tutupu lea na mafua ai ona in mai le HRPP i le Faiga Palota o le 1982.

O le mea lea o soft loans.....

Tofa Lealailepule Rimoni Aiafi: Lau Afioga i le Fofoga Fetalai...

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Faatali mai lava se i maea e le mafai ona malamalama i mea nei pe a fai ma motumotu. Lau Afioga i le Fofoga Fetalai, o mea la na sa tatou taumafai e tatou te paoa mai pea i soft windows nei ina ia mama le tului. A outou tilotilo i nonogatupe a tatou o lena o lo o lisi mai lalo o le Tala o le Tupe amata mai i le itulau 20, 21, 22, 23, 24 ma le 25, o lena e lisi uma mai ai lava a tatou nonogatupe i Faletupe Faava o Malo.

Ona tatou oo mai ai lea i le aofaiga o le tatou aitalafu po o aitalafu atoa lea e totogi i le tausaga lena e \$56milion. O le taua o aitalafu nei ona o le tulaga lea sa ou talanoa atu ai i le aoauli i le taiala lea sa avatu i le lauga, o taiala masani lava na a Faletupe nei o le Lalolagi. E fuafua a tatou borrowers i le tulaga o le 50% o le GDP. O le fesili, o le a le GDP? O le GDP o le faaupuga le faa-Economist e faasino i le tuufaatasiga, faaopoopo faatasi incomes po o tupe maua a tagata uma lava o le atunuu e aofia ai ma le Malo ma Faalapotopotoga. A silasila i le tamai laupepa lea na ou talanoa atu ai analeila, o lena o lo o taua ai, o le tupe maua aofai o le atunuu atoa lena mo le 2014, \$1,569,00000, tusa lena ma le 2.4% o le growth o lona uiga ua tupu ai le tamaoaiga. O le tausaga fou la e \$1,568,00000 lea e estimate ai e fuafua i le 2.7% le tupu o le tamaoaiga tusa e \$89milion e faaopoopo, ia ona faaopoopo atu foi lea ma le growth u le 2016 e \$1,765,00000. O fuafuaga ia ua taoto i le tulaga o le faatinoga o fuafuaga uma ia ua faataatia atu. A o lea foi ua i ai le taiala ina ia taumafai le Malo e taofiofi mai le 50% o le GDP, o letaiala ae le o se tulafono tumau e pei o tulafono a Peresia ma Metai.

Aisea le mea e ala ai ona taua o le taiala? E ala ona ou taua o le taiala, o lea foi sa saunoa manino ai le Taitaifono o Tupe ma sa Minisita foi o Tupe, e malamalama lelei i mea o lo ou talanoa atu ai. O le galueaiina o le 60% lea e

faafafa le aofaiga atoa o le tatou nonogatupe i luga o le aofaiga o tupe maua a tagata ona faatele lea i le 100% ona maua ai lea o le paene. Afai o e fia agai i lalo le pasene lea o le isi mea e fai o le matua faatupu o le tamaoaiga ia tele le GDP, o lona uiga o le denominator o le formula lea ua ou talanoa atu ai. Afai la e te manao ina ia faatupu le tamaoaiga, e tasi lava le auala e faatupu ai. Ia e punou ma ia e vaai i atinae e tupu ma ola, o lona uiga e mafai ona tupu le mea lena i lou aumaia o nonogatupe mama e atiae ai. E pei la o le malae vaalele, o atinae e pei o le uafu, atinae mo Tagata Asiasi Maimoa mai Fafu. O mea ia e maua ai galuega ma tele ai tupe maua a tagata. O le ala lena na ou fai atu o le taiala aua e le taofiofia mea ia e fiafia i ai Faalapotopotoga, aua latou te iloa e impact i luga o le denominator ona aumai ai lea i lalo o le pasene. O lona uiga o le pasene lena, e le faapea o le a alu i luga i le nono pea o tupe so long e nono mai tupe ae faaoga i protective projects e tupu ai le tamaoaiga ma tupu ai tupe maua a tagata ma a latou galuega.

Lau Afioga i le Fofoga Fetalai, i matou feiloaiga sa faia i totonu o le 31 tausaga talu ai i totonu o Economic Development Institute sa i ai uma i latou nei e i ai Freedman, o le tasi lea Economist lauiloa ma isi. O mea ia sa matou talanoa ma fetufaai ai, ma taunuu ai i le iuga o le mea aupito sili ma taua o le fua e fua ai capacity to pay. O lona uiga e te tilotilo i le malosi e totogi ai aitalafu as a ratio of the foreign exchange earning. O lona uiga e fuafua i tupe maua a le atunuu i ana teugatupe e totogi ai oka mai fafo. O le a le mea e taua ai le fua lea? O le taua o le fua lea ona;-

Muamua, ia lava au tupe e faatino ai tupe a le Malo.

Lua, ia lava au teugatupe foreign exchange earning, ia lava mo le okaina mai o oloa. O le ala lena na afaina ai lo tatou tamaoaiga i le 1979, 1980, 1981, 1982, na oo loa i le 1983 ona ou faataoto ai loa lea o le polokalame. O le polokalame la lena lea na sau ai lava le tamaoaiga o Samoa sei oo mai lava i le taimi lena ma sui sui ai lava, e le o toe foi lava tatou i le faaletonu lea sa i ai i le 1979, 1980, 1981. O le 1981, o le aofai o le tatou nonogatupe i fafo atu o Samoa e \$15.2miliona, ona pau lava lena o le tatou nonogatupe na i ai a ua le mafai ona totogi, aisea? Ua leai ma se foreign reserve. Masalo afai o i Maiava, e manatua e Maiava toetiiti faafa ona auina mai lana feau ia te au, se faamolemole Tuilaepa ua leai ma se matou tupe, o lea ua matou ola i ODs i New York e ... le tatou Ofisa. Ona ou fai atu lea e faatali mai, ou te siaki maia i Faletupe ae fai mai e faatalitali mai o lea e tau sue ni foreign reserve e ave ai le \$20,000.

Lau Afioga i le Fofoga Fetalai, e ala ona ou taua atu nei mea e leai lava se mea fou i lalo o le la, o mea na tatou sau ai, lea lava e mulimuli ai lava le Faigamalo, e leai se mea tou te popole ai. O le tulaga la i le fua e aupito sili ona taua o le debt service capacity e fua i tatou foreign reserves, o le fua aupito taua lena. O le fua lea e fua ai e ui ina ave o le taiala, o lea e fua ai i le tulaga o le tatou GDP e i ai nai ona vaivaiga, o le vaivaiga muamua o le fua lena, o lea e fua agai i le GDP, a o le GDP o le tupe faitau aofai o tagata uma e le available e totogi ai ni mea faapea, o le nonogatupe o le nonogatupe a le Malo, e le aumaia la ni tupe a le aufaifaatoaga e ave e totogi ai. O le vaivaiga lena o le fua lea i le taiala lea. O le isi vaivaiga o le taiala lea e 50% o le GDP, e le...o aitalafu nei e \$900 ma ona tupu miliona, e le totogia i se taimi e tasi e totogi auauai, ma o isi aitalafu e luasefulu, tolusefulu tausaga e totogi ai, o le tasi lena vaivaiga o le fua lea e ave ma taiala, o lea lava e tatou te faaogaina ona o mea ia o lea e tauave mai e latou, o le ala foi lena e i ai lava

taimi e le faapea, e sao lava Faalapotopotoga. Sa ou faasalalauina ia le mea na tupu i le tausaga e 2004, na omai ai foi ia Mission lenei ma latou taofia atinae nei e fa, aua ne i fa, ona e aafia ai lo tatou tamaoaiga, e aafia ai lo tatou foreign reserve, atinae muamua aua ne i faia le fale lea o le DBS, lua, aua ne i faataunuaina ia le tatou atinae o le Aggie Grey Resort, tolu aua ne i faataunuaina ia le Headquarter lea e i ai nei i Maluafou, ua ala ona fuafua le fale lena ona ua iloa e faaletonu le fale lena e i Lalovaea ona o i ina e tafe mai ai le vai mai luga ma susu uma ai a tatou uaea telefoni sa pepe ai telefoni i le taimi lena, o se faafitauli sa feagai pea ma i tatou, ua le o toe i ai nei, ia ma le vaega lona fa, o le taofiga o le tatou Join Venture ma le Virgin Blue, ona e i ai le tatou investment e \$26miliona lea foi la e taofi mai e latou, ona ua alu alu ua uma lelei ona faatino mea nei, ae aumai le Lipoti a le tatou Foreign Reserve ua alu i luga e le o alu i lalo, a o le mea lena o lea na fai mai le Faletupe ma le IMF, o le a matua afaina lava. E oo foi la i le taimi sa fai ai tatou fuafuaga mo le liliuina o taavale afi mai le itu taumatau i le itu tauagavale, ia o le forecast foi na a Lafai, o le matua oti o le Malo, na alu i luga le foreign reserve e le i alu i lalo.

Lau Afioga i le Fofoga Fetalai, o le taunuuga o le tautalaga, aua tatou te popole, o lea lava e i ai le Kapeneta sa faafeagai ma faafitauli tetele na tupu i lena taimi, ma o lea foi e faataoto atu a tatou fuafuaga mo le agai i luma o le tatou tamaoaiga e pei ona ou taua, o le tausaga e 1981 ae le i omai le HRPP, e na o le \$15miliona le aitalafu a Samoa na i ai, ae le i mafai ona totogia ua leai se foreign reserve, a o lea ua oo tatou i i, e mai lena taimi, sa matua maoae le shortage, o lea sa aumai ai e manatua e le toatele, e tasi lava le uta a le vaa tauafao taga araisa, e le o toe tupu se mea faapena i le taimi lenei. Ma ou faapea atu ai, i le tulaga o le tupu o le tamaoaiga i le agai i le lumanai, e tatau lava o na vaai pea le Malo i tulaga o ana atinae a moomia ai ni nonogatupe mama ia le tului, faaauau, na o le pau lava lena o le mea e tupu ai lo tatou tamaoaiga. Lau Afioga i le Fofoga Fetalai, ia o le faaiuga lena o lau tautalaga, ma e fautuaina e tatou te agai loa ina talanoa le tatou Tala o le Tupe, soifua ma ia manuia.

FOFOGA FETALAI: Malo, faafetai saunoa i lau Afioga i le Palemia. Ia e tuu atu pea le avanoa i le sui usufono mo Faleata Sisifo, ona o lea sa tulai mai.

Tofa Lealailepule Rimoni Aiafi: Ia malo le saunoa i lau Afioga i le Palemia ua taliga e fia logo foi i lenei afiafi, toe lava o tatou ia e malamalama i au saunoaga ia e feala, e manaia le lecture lea e manaia i le faalogologo i le tala faasolopito. E pau lava le mea o lau fesili lau Afioga, se o mea ia o soft loans lea e te saunoa ai, o le taimi la e taunuu mai ai i Samoa, e aumai ua malo foi lele i nai tagata, maimau pe ana faapea e allow foi nai o tatou tagata e same conditions ia se i loan mama, foi nei e faa-soft i nai tagata atinae nei i le pasene lava lea, e taavili ai faapena le...ia a o lea e agavaa tatou i soft loans foi ia tetele i fafo ona o le tatou tamaoaiga, ae oo mai i inei ia ua ave i pasene maualuluga i nai o tatou tagata, se i alu foi la i le pasene e faafeoloolo.....

FOFOGA FETALAI: Ia o lea ua maua le finagalo o le sui usufono.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o le mea lena o lea e fai, o le mea lena o lea e fai lau Afioga, o lau tali atu lena.

FOFOGA FETALAI: Malo. Ia taatia laia o le finagalo o lea ua.....Ia se i tulai mai le Taitai o le Itu Agai.

Afioga Hon Palusalua Faapo II: Lau Afioga i le Fofoga Fetalai o se mea e fia faamalamalama. Faafetai lava i lau Afioga i le Palemia i le faamatalatala le mea e tupu ai le tamaoaiga, maua galuega a tagata, aemaise o oloa ina ia faagaioi ai le tamaoaiga. O lea ua faamoemoe lo tatou atunuu i atinae tetele ia o le a fai nei, a o le faalavelave o la ua omai Saina e fai, omai Saina ma mea e fai ai, omai Saina ma tagata faigaluega. Ia o le mea la lea, e ese mamao lava la le saunoaga lea a le Afioga i le Palemia ia ma le tulaga lea e i ai ina ia tupu ai le tamaoaiga.

FOFOGA FETALAI: O lea ua maua le finagalo o le sui usufono mamalu, o lea ua maua, tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, se i fai atu lava lau upu lea, o le lalolagi lea ua i ai ua sui atoa, o le tulaga lena o lea ua i ai, ua matua sui atoa, o le agaga lea e talanoa mai ai le Taitai o le Itu Agai, pei e na te moomia ni tagata foi ia e omai mai fafo, aua o le mea lea o lea e fai e atunuu uma, latou te faatosina mai ia tagata e i ai tupe e omai e atiae le atunuu, e fai uma lava e atunuu uma. O le tausaga e 1965 lau Afioga, na pasia ai e le Malo i le taimi lena faatoa Tutoatasi tatou, o lona uiga e tolu tausaga ae pasi loa le Tulafono, faatoa pasi ai lava na o le Tulafono sa faaigoa o le Enterprises Incentives Act, ona faataoto mai loa lea o faatosina, e i ai mea o lafoga ua tuusaunua lafoga ma tiute, sa matua moomia e le Palemia ma le Kapeneta i lena taimi na e i ai faaiuga sa fai, ina ia faatosina mai ai ni kamupani i fafo e faatu ni a latou pisinisi i Samoa nei. O lea la ua oo mai i le taimi lenei, e le toatele lava latou na omai, e tele lava le au palagi na omai ma toe o, na ona omai lava folafola aemaise lava o le mea e aupito sili ona tele iinei le avanoa, o mea nei o atinae o tagata asiiasi maimoa mai fafo, o le atinae lena e matua moomia lava e tatou ni tagata mai fafo, o le ala foi lena o lea ua taumafai i ai le Matagaluega o lo o nafa ma le faatosina mai o i latou mai fafo e tapena le Tulafono lea, o le Tulafono lea e le o se Tulafono fou, o le Tulafono o lo o fai uma lava e atunuu, e fai foi e Niu Sila e mafai ai ona faatelevave le tulaga, o lona uiga ua le lima tausaga e faatali ai, ae mafai ona tolu tausaga e mafai ai ona maua ia le sitiseni, a o tagata lava ia e omai nonofo ma fai, ia o le iuga lava lena e iu i ai. O lona uiga, na o le pau lava le eseese, o le faatosina mai ma faavavevave lona maua i le lua tausaga. E pei ua ala ona ou taua lea mea, ona e le o fia malamalama tagata, ua sui le lalolagi, ua le o toe Siamani po o toe Amerika, a ua Saina la ua i ai le tupe ma le tomai i le taimi lenei. Ae pei o le mea lea ou te matauina pea, ai ana omai ni papalagi e leai lava nisi e pisa, ae vaai atu loa e pii mata o tagata ia e omai, pisa loa. O le a le mea ua tatou faapea ai? Aua tatou te tilotilo i le lanu o le tupe, ae tilotilo i le aoga o tagata ma galuega mo a tatou fanau.

Lau Afioga i le Fofoga Fetalai, o lau tali puupuu atu lena i le tetee lea e aumai.

FOFOGA FETALAI: Malo. E manatu ua malamalama le mataupu, ma e talitonu foi ua faaiuina le tatou felafolafoaiga.

E faafetai atu i lau Afioga i le Palemia, e talitonu o lea ua sao le tuleiga ma le saunoaga, ua matua logona foi ma taliga e faalogo le faafofogaaga a e o soifua pea i le tatou Maota i lenei afiafi. Ia e faamalo atu le onosai, faamalo le faapalepale i le paia ma le mamalu o le Kapeneta i a outou tali sa tuufofoga mai, aemaise foi le tele ma le anoanoai o faamalamalamaga sa taumafai mai e ala i le taumafai atu a lea itu o le Maota, ia e momoli atu le agaga faafetai tele, ma o le sini autu lena o lenei afiafi pei ona tuuina mai ai le tatou lafo, ina ia pasia lava i le po lenei le tatou Tala o le Tupe, tatou tiga puupuu, ia ona tatou alo ai lea leaga o taeao le aso e tatau foi ona tatou fai mea fuafua i le Aso Faraile, ia ma tele foi nisi o fuafuaga ua uma ona faataatitia.

Ua maea ona saunoa sui usufono i tulaga tau tupe ma le tamaoiga o Samoa ma sa aofia faatasi ma saunoaga o Tulafono Tau Faaofi o le Faatatauina o Tupe Faaopopo (Nu. 2) 2013/2014 ma le Tulafono Tau Faaofi o le Faatatauina o Tupe 2014/2015. Ua maea ona faatu le lafo ma ua maea ona faaluaina le faitauga faalua o ia Tulafono Tau Faaofi i le aso 29 o Me 2014, o le mea lea o le a tuuina atu le fesili.

Na tuuina atu le Fesili ma faamaonia ai le lafo na faatuina i le aso 29 Me 2014, ma faitau faalua ai le Tulafono Tau Faaofi o le Faatatauina o Tupe Faaopopo (Nu. 2) 2013/2014 ma le Tulafono Tau Faaofi o le Faatatauina o Tupe 2014/2015.

TULAFONO TAU FAAOFI O LE FAATATAUINA O TUPE FAAOPOPO (NU. 2) 2013/2014 – iloiloga auiliili

FOFOGA FETALAI: O le a sagai atu loa le Fono Aoa o le iloiloga auiliili o le Tulafono Tau Faaofi o le Faatatauina o Tupe Faaopopo (Nu.2) 2013/2014.

E tusa ai ma le Tulafono Tumau 134, e amata le iloiloga auiliili o le Tulafono Tau Faaofi i ona Faamatalaga.

FAAMATALAGA MUAMUA

VAEGATUPE MA TALA FAATATAU FAAOPOPOGA I TUPE FAATATAUINA

MATAGALUEGA FAAMATALAGA AOFAI TUPE ALU

MATAUPU TAU LE VA I FAFO & FEFAATAUAIGA: - \$1,600,000.

Faamaonia.

PUNAOA FAALENATURA: - \$365,053.

Faamaonia.

AOFAI FAAOPOOPOGA I TUPE ALU AOA 2013/2014: - \$1,965,053.

Faamaonia.

**FAAMATALAGA LONA LUA
FAAITIITIGA I TUPE FAATATAUINA**

MATAGALUEGA FAAMATALAGA FAAITIITIGA I TUPE ALU

TUPE: - \$(1,600,000).

Faamaonia.

PUNAOA FAALENATURA: - \$(365,053).

Faamaonia.

AOFAI FAAITIITIGA AOA I TUPE ALU 2013/2014: - \$1,965, 053.

Faamaonia.

Na faamaonia le Faamatalaga e avea ma Vaega o le Tulafono.

FUAIUPU 2: Faamatuu atu ma le Faatatauina o le \$1,965,053 mai le Faaputugatupe a le Matagaluega o Tupe.

Faamaonia.

FUAIUPU 3: Faaititiga o Aofaiga na uluai faatatauina ma toe faasoasoa atu i isi galuega faatino ma galuega faatino laiti.

Faamaonia.

FUAIUPU 1 MA LE IGOA.

FUAIUPU 1: Igoa puupuu ma le amataga.

IGOA: Faatatauina o Tupe Faaopopo (Nu.2) 2013/2014.

Faamaonia.

Na faagasolo le Tulafono Tau Faaofi o le Faatatauina o Tupe Faaopopo (Nu.2) 2013/2014 e aunoa ma se Teuteuga.

**TULAFONO TAU FAAOFI O LE FAATATAUINA O TUPE
FAAOPOPO (NU.2) 2013/2014 – faitauga faatolu**

FOFOGA FETALAI: Tulai mai lau Afioga i le Minisita o Tupe, lau Afioga i le Palemia.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopopo (Nu.2) 2013/2014 i lona faitauga faatolu.*

Faaluaina e le Sui Palemia, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nu'u ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa'o Faitulafono.

**TULAFONO TAU FAAOFI O LE FAATATAUINA O
TUPE 2014/2015 – iloiloga auiliili**

FOFOGA FETALAI: O le a sagai atu loa le Fono Aoa'o i le Iloiloga Auiliili o le Tulafono Tau Faaofi o le Faatatauina o Tupe 2014/2015 ma Tala Faatatau Atu o Tupe Maua ma Tupe Totogi a le Malo o Samoa mo le Tausaga Faaletupe Faaiuina aso 30 Iuni 2015 faapea le Lipoti a le Komiti o Tupe Maua ma Tupe Totogi i le Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe Faaiuina aso 30 Iuni 2015.

E tusa ai ma le Tulafono Tumau 134, e amata le iloiloga auiliili o le Tulafono Tau Faaofi i lona Faamatalaga.

**FAAMATALAGA MUAMUA
VAEGATUPE MA TALA FAATATAU
MATAGALUEGA TUPE ALU FAATATAUINA**

FAATOAGA & FAIGAFAIVA: - \$13,840,474.

Faamaonia.

PISINISI, ALAMANUIA & LEIPA: - \$16,942,143.

Faamaonia.

FESOOTAIGA & FAAMATALAGA TEKOLONOSI: - \$5,455,281.

Faamaonia.

AOGA, TAALOGA & AGANUU: - \$84,003,538.

Faamaonia.

TUPE: - \$85,504,588.

Faamaonia.

VA I FAFO & FEFAATAUAIGA: - \$21,258,876.

Faamaonia.

SOIFUA MALOLOINA: - \$81,877,881.

Faamaonia.

FAAMASINOGA: - \$9,733,948.

Faamaonia.

PUNAOA FAANATURA & SIOSIOMAGA: - \$28,569,366.

Faamaonia.

LEOLEO & FALEPUIPUI: - \$25,671,002.

Faamaonia.

PALEMIA: - \$7,986,312.

FOFOGA FETALAI: Ia, se i tulai mai le sui usufono mamalu mo Faasaleleaga Nu.2.

Susuga PAPALII LIO FAAVAIVAIONANU TAEU MASIPAU: Lau Afioga i le Fofoga Fetalai, ou te fia faafesili atu lava lau Afioga i le Taitaifono o le Komiti, i le vaegatupe lea e i lalo o le Ofisa o le Palemia, lea e i ai le faaupuga i totonu o le tusi lapoa lea, “O le Komiti Faufautua o Faatoaga.” A o lea e sau i le tusi lea, “O le Komiti o Galuega Faafaatoaga e aunoa ma le faaaogaina o vailaau.” O le fesili la; po o le a le mea ua oso mai ai le Faatoaga i lalo o le Ofisa o le Palemia? Ma lou faaaloalo lava.

FOFOGA FETALAI: Ia, se i tali atu leaga e i ai le tatou... ae o le a tali atu pea le Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: O le Komiti tonu lava lea o mea tau organic. O le ala lena e i ai i lalo o au, o au foi lea e Taitaifono i le Fono a Taitaifono o le Pasefika atoa i mea tau organic farming. Ma o le mafuaaga la lena, ona o le amataga mai, pei e fai si look warm o le Agriculture i le taimi na amatamata mai ai, ae taua tele le atinae lena, aemaise o le atinae o lea e fuifuilua ma le Women in Business, o lo o malosi tele i le tulaga o le rural development i mataupu tau... e le gata i organic farming, a o latou foi nei e taulamua i mea foi nei o industries lea e fai i tua e pei o le virgin oil production.

Lau Afioga, o le faamatalaga lena.

FOFOGA FETALAI: Malo faafetai. E manatu ua malamalama le fesili a le sui usufono.

Faamaonia le Vaegatupe e \$7,986,312 mo le Palemia.

TUPE MAUA: - \$11,421,059.

Faamaonia.

TINA MA TAMAITAI: - \$10,436,807.

Faamaonia.

GALUEGA, FELAUAIGA & ATINAE ESEESE: - \$59,132,802.

Faamaonia.

OFISA O LE LOIA SILI: - \$4,020,339.

Faamaonia.

SUETUSI: - \$3,341,769.

Faamaonia.

KOMESINA O FAIGA PALOTA: - \$3,323,331.

Faamaonia.

FONO AOA O FAITULAFONO: - \$6,678,548.

Faamaonia.

KOMESINA O SULUFAIGA: - \$789,591.

Faamaonia.

KOMISI A LE AUFALUEGA A LE MALO: - \$4,402,019.

Faamaonia.

OFISA O FUAINUMERA FAAMAUINA: - \$4,106,911.

Faamaonia.

**KOMISI O LE TOEFUATAIGA O TULAFONO A SAMOA:
\$1,094,258.**

Faamaonia.

GALUEGA TAU FALEPUIPUI & TOEFUATAIGA: \$2,951,253.

Faamaonia.

**AOFAI O TUPE ALU AOAQ FAATATAUINA A MATAGALUEGA
2014/2015: - \$492,542,095.**

Faamaonia.

Faamaonia le Faamatalaga.

**FUAIUPU 2: Faamatuu atu o le Faatatauina o le \$492,542,095 mai le
Faaputugatupe a le Matagaluega o Tupe.**

Faamaonia.

**FUAIUPU 3: Faamatuu atu ma le Faatatauina o le \$529,107 mai le
Teugatupe a le Tausi Mavaega.**

Faamaonia.

**FUAIUPU 4: Faamatuu atu ma le Faatatauina o le \$14,776,263 mai le
Faaputugatupe a le Matagaluega o Tupe.**

Faamaonia.

FUAIUPU 1 MA LE IGOA.

FUAIUPU 1: Igoa puupuu ma le amataga.

IGOA: Faatatauina o Tupe 2014/2015.

Faamaonia.

Na faagasolo le Tulafono Tau Faaofi o le Faatatauina o Tupe 2014/2015 e aunoa ma se Teuteuga.

**TULAFONO TAU FAAOFI O LE FAATATAUINA O
TUPE 2014/2015 – faitauga faatolu**

FOFOGA FETALAI: Tulai mai lau Afioga i le Minisita o Tupe po o lau Afioga i le Palemia.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o le Faatatauina o Tupe 2014/2015 i lona faitauga faatolu.*

Faaluaina e le Sui Palemia, Minisita mo Tupe Maua, Minisita mo Pisinisi ma Alamanuia, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono i lona faitauga faatolu ma faapea ona pasia le Fono Aoao Faitulafono.

FOFOGA FETALAI: Ia, e leai lava se galuega e aunoa ma sona taunuuga. Ou te manatu o lea ua taula le tatou sa i le taunuuga o le tatou galuega i lenei afiafi. E momoli atu ai le faafetai tele i le paia ma le mamalu maualuga o le tatou Maota, o lea lava sa tulitulimatagau le ufi a le tamaitai ma le talitonuga tatou te taunuu i se taunuuga lelei. Ma le agaga faaaloalo e momoli atu ai le faafetai tele i le paia ma le mamalu o le tatou Maota Fono, o viiga i mea aupitoaluga ma le faamanuina pea o le suafa o le tatou Tapaau Sili i le lagi ua mafai ona faataunuaina le manulauti o lenei afiafi, ina ia pasia aloaia le tatou Tala o le Tupe. Ma o faamoemoga na sa tatou tauavagameaina i lenei aso atoa seia taunuu mai i lenei vaega o le afiafi. E le taia i fale le paia ma le mamalu o saunoaga o lenei po. E i ai le talitonuga o lo o taputapu mai foi le atunuu i ona vaega mamalu ma ona paia ma ona pa le solo Samoa i lenei itula afiafi, faamalo le tapuai. E talitonu o le tapuaiga lea ua ae ai i manu faiva o lou Palemene i lenei taeao. O le agaga lena ma le faamoemoe e tulituli manatu pea ma le talitonuga o le Palemene, e faigata lau tapuaiga Samoa

aemaise foi le manatu i le manulauti o le matou valaauiina, o le ituaso e lelei ai le malologa, e faapena ona tatou galulue pea aua le faataunuuina o lenei faamoemoe i lenei Fonotaga ma le tatou faasologa aua le pasiaina o le tatou Tala o le Tupe. E momoli atu ai le faafetai tele i le paia ma le mamalu o le tatou Maota ua faaiu ai le tatou galuega i lenei aso, malo le onosai, malo le saunoa, malo fetalai, malo malele. O lea ua agiga i malae le fofoga taumomoli, ia o le faautautaga mau lava lena i le tatou atunuu. E le faaititia foi le agaga faafetai atu i le paia ma le mamalu o tupu ma ee, tamalii ma failauga, i Ofisa Sili o Pulega ma Pule Sili o Matagaluega ma Faalapotopotoga a le Malo o lo o faaaogagase i lenei vaiaso. E talitonu o lea ua matala ia Segala le finagalo i tulaga aloaia o le tatou Malo ma faiga faavae, o iinei i le punavai e asuvai uma i ai Matagaluega a le Malo. O lea ua faaalua i lenei po, o lea ua pasia aloaia le tatou Tala o le Tupe, o outou mama na. Ia alofagia e le Atua la outou polo faasoaso aemaise la outou lufilufi mealelei, ia tausolomua lo tatou agai mai tatou te sagisagi e pasi le Tala o le Tupe, ia faapena foi ona outou alofagia le maau ma le milomilosia o le atunuu, ia lelei ona faaso ma le alofa, ma le talitonuga e utiuti le tatou tamaoaiga. Ae lafo atu i la outou faautautaga tatau ma la outou faautautaga potu, e talitonu o lo o i ina le tofa ma le faautautaga tou te tau ai ma afifi mea uma mo le atunuu, tele pe itiiti, faafetai i le Atua mo lana foai mo Samoa. Ae leai se masalosalo, na ala foi ona outou tutu i matagiolo ma tofia outou e le Malo, ona o lo o i ina le faautautaga potu ma le faautautaga tatau. O outou mama na.

Ia, ou te manatu ua lava ia upu i lenei afiafi, ou te lagona ua sau le vaivai. O le mea sili ma le taua ua tatou tiga puupuu. O taeao le tatou aso puupuu foi ona tatou o ai lea tatou te molimauina, e le mafai ona faagaloina Afia i si ona vao, i le lagi o Finao e afio ai le Alii o le Itu ma le Tupu o le Itu ma Tootoo, e faigata Sao e fa ma le Aiga Saumalau, Leatipouniu ma le Faasau, matou te faamaise atu. Talofa, ua le lagona le leo o le tamaloa mai Safotu, o le sa o tatou faalogologo i ai i tuleiga ma saunoaga. O le Atua e pule i mea uma. Ae momoli atu le faamaisega a le Fofoga Fetalai i le paia o le itumalo i ona tulaga faalupe, o le a tatou felogonai ma feiloai i le Aso Toonai, afifio atu le Malo se i molimoli saafiafiaga mulimuli aua le soifua auauna ma le soifua tautua o le Tofa Tuiloa Anetelea Tuiloa i totonu o le Palemene o Samoa. E tatalo i le Atua ina ia maua sona nofoaga i le lagi aua o lenei olaga tatou te le tumau, ua uma ona saunia e le Atua lo tatou ola toefuataiga mo le ola e faavavau i le taulaga osi ua uma ona ia saunia.

A o le i faaiuina le tatou mafutaga i lenei afiafi, saunoa ia lau Susuga i le Feagaiga Taulagi, Tapuai Toese, o lou lava lea tofiga na saunia ai oe i lenei Paeaga o le tatalo. Fai sau tatalo faamanuia e tapuaia le malaga a Tuiloa ma tapuaia le faamanuia ma le faafetai i le Atua ua pasi le tatou Tala o le Tupe ma ia aulia le tatou aso fou a taeao. Tulai maia lau Susuga i le Faafeagaiga.

Na tolopo Taulumaga a le Fono Aoa o le itula e 12:30 i le vaveao seia aulia le itula e 9:00 i le taeao o le Aso Faraiile, 20 Iuni 2014.